

يوسف السباعي

■ أمّ رتيبة

■ جمعية قتل الزوجات





أَمْرِيَّة



مؤلفات  
يوسف السباعي



■ أمّ رتيبة

■ جمعية قتل الزوجات



## الأمك

إلى أمي العزيزة :

« الست أم يوسف »

أهدى مسرحية « أم رتية » .

لا أحاول أن أرد بها جميلا سابقا ، فجميلها أجلّ من  
أن يرد .

ولكني أرجو أن أهب لها لحظات ضحك تسرى بها  
عن نفس بكية . فياضة الدمع . هامية المآقي ..

( يوسف السباعي )





# مقدمة

هذه محاولة في كتابة المسرحية ..  
لقد أمتعتني كتابتها ، إذ كنت أشعر وأنا أغلق باب الحجر لأخلو بنفسى للكتابة .  
أنى لم أخل بها وأنى لم أكن فردا ، بل كنت محوطا بمجموعة أبطالها المضحكين  
الهازلين .

كنت أضحك وأنا أكتب ..

وقد أكون مجنوناً .. وقد أكون مغروراً ..

ولكنى أؤكد لكم أننى أحببتها وأحببت أبطالها ، وأن كتابتها لم تكلفنى أى جهد  
ولا مشقة ، بل كنت فى كتابتها كالسامر فى جلسة سمر .

ولقد سألتنى بعض الأصدقاء أن أعرضها للتمثيل على المسرح ، ولكن فضلت أن  
أضعها أولاً فى كتاب .. لأنى أثق فى كتيبى وأحب قرائى ، وأشعر بينهم بالطمأنينة  
والغبطة ، لأن بينى وبينهم رابطة أقوى مما بين كاتب وقارئ .. بينى وبينهم انسجام  
وصداقة وحب .

وثمة شىء أريد أن أقدم له .. وهو أنى كتبها باللغة العامية .. إن من الجنون أن  
أحاول إنطاق أبطالها بالعربية .. فأرجو من أنصار اللغة العربية أن « يصهينوا شويه »  
ويتسامحوا معى قليلاً .. فالمسامح كريم .

وأرجو بعد كل هذا ألا تخذلنى « أم رتيبه » فضحك القارئ كما أضحكتنى ..  
فإذا فشلت فليعذرنى .. لأن إيكائه قد يكون يسيراً .. أما إضحائه فهو أمر جد  
عسير .

( يوسف السباعى )



## الفصل الأول

المنظر : صالة في بيت عبد الصبور أفندي بها منضدة للأكل وأريكة وبوفيه .. في المواجهة شباك يطل على حارة ضيقة ويقابله شباك المنزل المقابل وهو منزل سيد أفندي . وعلى اليمين بابان يؤديان إلى غرف النوم وعلى اليسار باب يؤدي إلى السلم وباب يؤدي إلى المطبخ .  
تفتح الستار على أم رتبية وقد جلست على الأريكة وأطلت بنصفها الأعلى من الشباك وأمسكت بيدها حبل تدلى منه سبت ، وسنية تجلس أمام طبلية وتخرط الملوخية .

## المشهد الأول

أم رتبية : ( للمبائع في الطريق ) ياراجل اختشى على عرضك وحط كان بطاطايه .. هو إيه ياختى ده .. هو انت بتوزن دهب ، الله يرحم زمان كانت الواحدة تشتري حمل البطاطه بتلاته ايض .. اوعى بقى شيل إيدك خلينى اطلع السبت .. ما أنت أصلك كده دايمًا وشك عكر ، وكل ما احلف ما اشتري منك .. أرجع برضه أقول يابت نفعيه دا راجل غلبان ( تأخذ في جذب الحبل ورفع السبت ) .

سنية : ( منهكة في الخرط .. تلوك لبانة بين شدقيها وتغنى ) سايقه عليك النبي تسمع وتحضنى يا عبده ، لا والنبي يا عبده .

أم رتبية : ( تفحص البطاطا وتصيح بالمبائع ) مش بقول لك انك راجل غشاش وضلالى .. خد غير لى البطاطايه المعفنه دى .. طيب بس انكتم وانسد مانيش مغيره حاجه .. خد آدى صاغ حار ونار في جتتك ( تضع النقود في

ورقة وتذفب بها من النافذة ) .

- سنية : ( مستمرة في غنائها ) سايقه عليك النبي تسمع وتقرصني يا ...  
أم رتبية : ( ملتفتة إليها مقاطعة غنائها ) هس اخرسى يا بت بلاش مسخره وقلة  
حيا . ايه الكلام اللي بتقوليه ده . مين داللى عايزاه يقرصك ؟  
سنية : يوه . دا عبده يا ستى .  
أم رتبية : اخرسى جاكى قطع لسانك من جوا اللغاليغ .. هوا سيدك عبده بتاع  
حاجات من دى .  
سنية : وهوه يا ستى يعنى ما فيش حد اسمه عبده غير سيدى عبد الصبور .. أهو فيه  
عبده المكوجى ، وعبده اللبان .  
أم رتبية : وكان لك عين تقولى كله يا بجمحه .. يا قليلة الحيا .  
سنية : يا ستى اهو كلام .. احنا خسرانين حاجه ، أنا بقالى سبع سنين سايقه  
عليهم النبي .. لا حد حضن ولا حد قرص .  
( يفتح الشباك الذى فى البيت المقابل وتبدو فيه أم سيد ) .

## المشهد الثانى

( سنية تعاود الحزط ، والغناء ، ومضغ المبانة ) ..

- أم سيد : العواف يا ست ام رتبية .  
أم رتبية : يعافيكى ويعافى بدنك .  
أم سيد : ازاي بسلامته سى عبد الصبور افتدى .. مش بخير ؟  
أم رتبية : بخير ياختى الحمد لله ، وازاي سى سيد افتدى ؟  
أم سيد : والنبي يسأل عليكى دائما .  
أم رتبية : سألت عليه العافية ، بقاله منه ما حدش يشوفه ، ولا يسأل على سى عبد  
الصبور ولا حاجة ، ولا كأتنا جيران ، ولا الشباك فى الشباك .. يا اختى دا  
النبي وصا على سابع جار .

أم سيد : والله يا ستي ام رتيبة .. أصله مشغول اليومين دول ، والدنيا تلاهي ،  
ويادوبك بيبجي من الشغل يحط راسه ينام ، وصحته مخستكه شوية ما  
بقاش زي الأول . كان زمان عليه عافيه زي الحصان .. دلوقت ما بقاش  
يستحمل حاجة أبدا ، وطول النهار شكوى م الشغل ومن الناس .

أم رتيبه : ربنا يكون في عونك . ( يسمع على الباب الخارجي طرق فتنادي علي  
سنية ) شوفي مين يا بت ( ثم تعاود الحديث مع أم سيد ) ما تفضل شوية يا  
ست أم سيد ، أنا خلاص ما ورايش حاجة .. الملوخيه انخرطت والفرخة  
على النار .. مش ناقص غير أسقط الملوخيه في الشوربه . والتقليه حا خليها  
بعدين .. أصلي متعوده ما أطشهاش الا وسي عبد الصبور داخل ، والنبي  
تيجي ندردش شويه ، أصل انا زهقانه اليومين دول ونفسي متضايقه .

أم سيد : بس بسلايمته سي عبد الصبور زمانه جاي دلوقت .  
أم رتيبة : لسه بدرى عليه .. دا ما يجيش إلا الساعة اتنين .. لسه واخذ على مواعيد  
الشغل .. اللي فهشى ما يخلهشى .. أهو راح المعاش لكن برضه كل يوم  
الصبح ياخذ الشنطه تحت باطه ويخرج ، ويفضل يسرح ما يرجعش إلا  
الساعة اتنين زي الموظفين .

أم سيد : طيب ياختي أنا جايالك حالا .  
( تختفي أم سيد داخل الشباك ) .

( يطرق الباب مرة ثانية .. وسنية مستمرة في الخرط والغناء ومضغ  
اللبان ) .

أم رتيبة : ( ملتفتة في غضب ) انطرشت والا إيه .. قلت قومي شوفي مين ..  
جاكي خابط في ودانك ، كفايه عليك الغنا وسي عبده .

سنية : ( تنهض متناقلة ) خليه مرزي على الباب ، يعني مستعجل على إيه ..  
جايب القليعه ، والا جايب الديب من ديله .. مش جايب بنكله كسبره ،  
( تفتح الباب ) خش . خلاص .. الدنيا طارت ؟ مش قادر تصبر ؟  
( يدخل زينهم الخادم مندفعاً ويضع قرطاساً صغيراً ويصيح في عجلة وهو

هم بالخروج ) .

## المشهد الثالث

زينهم : خلدوا الكسيرة ايه .. الراجل قال ما فيش حاجة اسمها بنكلة اليومين دول ،  
جيت بالتعريفه كله ، بنكلة آل ، فيه حاجة اسمها نكله .. أنا نازل بقى .  
أم رتبية : ( تغادر الشباك وتصيح بزينهم ) تعالى هنا ياللى تنقصف رقتك .. رايح  
فين ؟

زينهم : مش وقت شرح . أصلى مستعجل قوى ، فيه خنافة على باب الحارة .  
أم رتبية : وانت مالك بقى ومال الخنافة .

سنية : سيبه يا ستى يمكن ياخذ له بطحة فى نافوخه ، تريحنا منه شوية ...

زينهم : أنا رايح اتفرج .. دى خنافة هايلا ، زكيه الملدنه بتاعة الفول النبات مرقدته  
الحاج وحش الجزار على الرصيف ، وتخططه كل دماغ واختها .. بتخلى  
الشرار يطلع من الرصيف ، والناس ملمومين عليها مش عارفين يخلصوا  
الراجل من إيديها أبدا .

أم رتبية : نخش انجر يا واد بلاش مسخره ، ما لنا احنا ومال زكيه الملدنه والعلم  
وحش ، امشى ياللا دق الكسيرة .

زينهم : الحق على ، أنا برضه استاهل اللي ما وقفتش اتفرج عليها قبل ما جيب  
الكسيرة .. عملت نفسى بنى آدم وقلت يا واد روح الأول ودى الكسيرة  
لحسن ستك تكون مستعجله عليها وبعدين ارجع اتفرج ، برضه أنا الحق  
على . ابقى مره إذا جبتلكم حاجة بعد كده دوغرى .

سنية : نخش انجر دق الكسيرة بلا قلبه دماغ .

زينهم : أسكتى انتى لحسن والنبي أحطك ع الطليله ، وانخرطك زى الملوخيه اللي  
قدامك ( ملتفتا إلى أم رتبية فى توصل ) أروح يا ست قبل الخنافة ما  
تخلص ؟

أم رتبية : قلت لك نخش ، يعنى نخش .

زينهم : طب خلينى اتفرج عليها م الشباك ( يندفع إلى الأريكة مدليا بجسده من الشباك صائحا بسرعة ) .. أهم باينين .. أديني شايفهم كويس .. زكيه فوق .. الوحش يفلقص ، يفلقص . كويس وحش . مسكها من شعرها .. مسكته من شنبه .. الوحش بيشد .. زكيه يتشد .. ها .. شد .. شد .. شد .. يا خساره طلع في إيدها .

أم رتيبة وسنية : هو إيه ؟

زينهم : شنب الوحش ، طلع في إيذ زكيه ، الوحش لوحده ، والشنب لوحده .. الوحش من غير شنب ، زكيه يشنب ، زكيه طبقت في زماره رقبته ، الوحش يبصرخ .. زكيه فأعته دماغ ، ودماغ تانيه ، وتالته .. الروسيات بترف زى المدفع الرشاش .. الوحش انفتح حاجبه .. الوحش مسخسخ .. ول زكيه ، تعيش زكيه ، فتوة الناصريه .

أم رتيبة : ( تهجم وتجره من قفاه ) انزل من على الكنبه جاك نازله في قصابك .. أنا مش قلت لك ميت مرة ما تطلعش على الكنبه برجليك اللي زى الطين ا .

زينهم : برافوزكيه .. أنا كنت عارف انها حاتغلب ، يعنى نايك إيه يا وحش غير ضياح شنبك ، عشان تبطل الغليه ( ملتفتا إلى سنية ) آدى النسوان والا بلاش ، مش زيك يا قرعه .

سنية : خليه يتلم يا ست ، لحسن والنبي اعمل فيه اللي اتعمل في الوحش .

زينهم : ( مصفقا بيديه مفتيا ) دانا باحبك ، بس شايله السمنه في الزلمكه .

سنية : أسكت احسن لك ا .

أم رتيبة : ( وهي تجلس على الكنبه وتأخذ في تفصيل رأس ثوم ) امشى دق الكسبره .

زينهم : ( يأخذ الكسبره ويتجه إلى المطبخ منشدا ) والله بحبك بس شايله السمنه

في الزلمكه ( يختفى داخل المطبخ ويسمع صوته قائلا ) بكره الماتش

الأصلى المعتبر .. زكيه ضد على الذكر .. والله حقها تلعب كوره .. يا

خسارتك يا زكيه في الفول الثابت ، دانت عليك سمانات رجلين .. ولا أبو

## المشهد الرابع

أم رتيبة : يا الله يا بت يا سنيه ، شهل شويه ، كفايه خرط بقى ، انت حاتخليها إيه ؟  
عصيده ؟ . احنا عايزين نوضب الصاله عشان ستك الحاجة ام سيد جايه ،  
والا عاجبك كده الكركبه اللي احنا فيها ؟

سنية : خلاص اهو يا ست ، خرطتين بس ، يا سلام عليكى يا ست ، دانت  
عليكى شهر مكسم وزى الزبده .. يا خسارتك يا ستى فى قلة الجواز ، هم  
الرجال انصابوا فى عنيبم والا عميوا ؟

أم رتيبة : ( تتحسس نفسها فى حزن ) قلة بخت يا سنيه يا بتى .. قليلة البخت تلاقى  
العضم فى الكرشه .. واحنا حتى العضم مش لاقينه .. رضينا بالهم والهم  
مش راضى بينا ..

سنية : يا ستى ربنا يسهلها ويرزقك باين الحلال .

أم رتيبة : يا بتى إذا كان على .. أهو مسهلها ، وإذا كان على ولاد الحلال أهم كبير ..  
لكن الدور على سيدك عبد الصبور اللي معقدها فى وشى .. وقاعد لى زى  
قرود قطع .. كل ما يبجى عريس يطفشه ، لما تعس حالى وميل بختى وخلا  
رقبتى بين النسوان زى السمسمه .. هو انا يا بتى قادره لورى وشى لحد ..  
خمسه واربعين سنه وأنا قاعده استنى ابن الحلال . وكل ما يبجى ابن الحلال  
يصدده بوشه العكر وكلامه اللي زى السم .. واهى السنه بتفوت ورا  
السنه . والعمر بيضيع ولا من درى ولا من شاف ، وادينى حاعيش  
واموت وحدانيه .. من غير لا ولد ولا بنت ، وبس بالاسم ام رتيبه ، الله  
يجحمها خالتي ام حميده بنت الشيخ معوض فضلت تقاطع على وتثق بلسانها  
اللى زى العقرب ، وتقول لى يا ام رتيبه ، وانا لسه بنت ما طلعتش من  
البيضة ، آل إيه عشان حلمت أن انا اتجوزت وخلفت بنت اسمها رتيبه ،



ومن يومها ما شفتش الجواز الا في حلم القرشانه النقااه ام حميده .

سنية : يوه ، يا ستي ما ترعليش نفسك ، دانت لسه صبيه في عز شبائك ،  
والجيات اكثر م الراجحات .

أم رتبية : ما هو بكره الجيات يقوا رجات ، والا يعنى تفتكرى الجيات حتبقى  
اجعص م الراجحات ، هو عبد الصبور أفندى تستعصى عليه حاجه أبدا ،  
بكره يضيع الجيات زى ما ضيع الراجحات ، ياما ضيع على فرص . هم اللى  
خطبوني شويه يا بنتى يا سنيه ؟ دانا كان ليه شنه ورنه .

سنية : والنبي يا ستي باين عليكى كنت بنت حنت ، تلعبى بالبيضة والحجر ..  
كام واحد والنبي يا ستي خطبو كى ؟

أم رتبية : ما تفكر نيش بقى يا بنتى باللى مضى وتجري ريقى . هوا أنا انسى سى على  
العطار اللى كان دكانه قدام بيتنا لما كنا ساكنين في حوش آدم ، وكان طول  
النهار عينه ما تتوريش من الشباك وانا واقفه ورا الشيش وواخده بالى . كان  
راجل ولا كل الرجاله . باين عليه العز والنعمة بخدوده مورده ، والدم  
حايظ من وشه ، وطابع الحسن في دقنه ، يساع فنجان ، وايدته متختخه  
وبيضه زى الفل ، وعاروج اللاسه والجلبيه سكروته عليه تشف وترف ،  
والبلغه الفاسى في رجله بتضوى .. قصده ما طولشى عليكى يا سنيه يا  
بنتى .. كان حايظجنن على كل ما يشوف ايدى تتمدم الشباك والا يلمحنى  
بانشر الغسيل فوق السطوح .. لغاية ما في يوم العصريه سمعت نقر على  
الباب .. بافتح اشوف مين لقيته سى على .. أنا شفته قدامى حسيت روحى  
ساخت ، سألته عايز مين قال عايز يقابل سى عبد الصبور .

سنية : وهو يعنى ما كنش فيه غير سى عبد الصبور اللى يقابله ؟

أم رتبية : يعنى حا يقابل مين تالى . هو انا ليه حد غيره . ما احنا اترينا يتامى لالى  
غيره ولاله غيرى .. أهو طول عمرى ما شفت لى أب ولا أم ، وكل اللى لى  
في الدنيا هو عبد الصبور . قضيت عمرى في خدمته . وهو لا رضى  
يتجوز ولا يخلينى التجوز .

سنية : وبعدين يا ستي عمل إيه سي على ؟  
أم رتيبة : دخل أودة المسافرين ودخلت اصحى سي عبد الصبور عشان يقوم يقابله .  
سنية : وبعدين .

أم رتيبة : دخل يقابله ، ودخلت اعمل القهوة ، وأنا قلبي بيدق ، ويدق ، أصلى  
كنت حاسه ، وعارفه .

سنية : يوه يا ستي وهي الحاجات تخفى .

أم رتيبة : أيوه والنبي ما تخفاش أبدا .. عقبال ما دخلت اعمل القهوة وقلت للبت  
تجه .. الخدامه اللي كانت عندنا قبلك .. تدخلها .. بصيت لقيت سي على  
خارج بيرطم ووشه أحمر زى الجزره ، ووراه سي عبد الصبور بوشه  
الأصفر اوى الناشف اللي زى جريد النخل .. يقول له : مع السلامة يا سي  
على .. ما كانش يتعز .. الراجل خرج من بير السلم وأنا مسكت سي عبد  
الصبور ، قلت له هوا إيه دا اللي ما كانش يتعز ؟ . فقال لي طليه .. قلت له  
هوا عايز إيه ؟ قال لي : جاي يخطبك .. قلت له : وبعدين . قال لي : ولا  
بعدين ولا قبلين . قلت ما كانش يتعز يعنى بالعربى رفضت . سأته له : قال  
لي دي حاجات ما تفهميهاش انت . سيبى لي انت الحاجات دي أنا أدري  
بيها .. الستات دايمًا قلايات العقل ، لازم يسيبوا الحاجات اللي عايزه تفكير  
وتدبير للرجال ، أمال الرجال اتخلقوا له .. المقصود فضلت الح عليه  
واحاوره واداوره لغاية ما عرفت السبب .

سنية : إيه هو بقى يا ستي السبب ؟

أم رتيبة : قال لي إن الراجل نحين قوى وأنا نحينه قوى ، وإن اولادنا ، مش حايقوا بنى  
آدمين ، حايقوا فيله وإلا بالقليل أوى .. حلاليف .

سنية : له حق والنبي يا ستي .

أم رتيبة : انحرسي جاكي قطع لسانك ، دا انا كنت جيت اولاد زى القشطه ..  
المقصود قعد يجيب لي في سبب ورا سبب ، مره يقول ان ما فيش سرير  
يستحملنا ، ومره يقول لي أن فيه خطوره على من جواز العطارين عشان  
حافضل آكل حله ومفتقه وحاجات م اللي بتسمن ، لغاية ما يجي على

وقت اطلق اموت ، ويكون هو السبب عشان وافق على الجواز ، وبالطريق  
ده سددها في وش الراجل .

سنية : والنبي برضه ياستى له حق .. مين يعرف لو كنت اتجوزت سى على العطار  
كان جرالك إيه ؟

أم رتبية : طب و ابراهيم افندى العقر .. العرض حاجي اللي قد الدنيا ؟

سنية : ماله ياستى . برضه طفشه ؟

أم رتبية : وطفش أبوه .

سنية : ليه بقى ؟

أم رتبية : عشان اسمه العقر . العقر . ما يقدرش بسلامته يناسب واحد اسمه العقر ،

أصله هو اللي بسلامته اسمه عدل قوى ، عبد الصبور عبد الغفور عبد

الشكور المقزقز ، ياختى لو كان الواحد يشوف عييه ما كانش عايب على

الناس أبدا ، إلا المصيبة إن البنى آدم من دول تلاقيه ببح .. يعنى ما يعيش

على الناس إلا بالحاجة اللي فيه ، يعنى يلاق التخين يقول لك يا سلام على

فلان ده ماله تخين كده يا ساتر يارب ، وتلاق تقيل الدم ، يقول لك أما

فلان ده عليه دم يا باى ، وسى عبد الصبور المقزقز ما يقدرش يناسب واحد

اسمه العقر .

سنية : وعلى كده طار العقر ؟

أم رتبية : العقر ، والسما لوطى بتاع المصبغه والشيخ عبد ربه خادم الحسين ، والحاج

صميده اللبان ، والشيخ ابراهيم عبد اللاوى الملتزم ، وزكى افندى شندى

بتاع المانيفاتوره .

سنية : كل دول خطبو كى وطاروا ؟

أم رتبية : طاروا يا سنيه يا بنتى ، طاروا كلهم ، والعمر بيظير يوم ورا يوم ، يعنى إيه

فايده عيشة الست لما تخش الدنيا وتخرج منها من غير ما تتجوز ، تبقى قيمة

العيشه إيه لما الواحدة ما تعملش الحاجة اللي اتخلقت عشانها . ربنا مش خالق

الدنيا رجاله و ستات عشان الرجاله يتجوزوا الستات . الست عملها ربنا

( أم رتبية )

عشان تتجوز وتجب أولاد ، وانا ضيقت عمرى مع سى عبد الصبور لا  
جواز ولا اولاد .

سنية : الصبر طيب يا ستى !

أم رتبية : أيوه . الصبر طيب ، وهو البنى آدم العاجز ، قدامه إيه غير الصبر ؟ أهو  
يعزى نفسه بأن الصبر طيب ، وهو عجبور على الصبر ، رضى والا  
مارضيش ، صابر ، صابر . لكن عشان يستحمل الصبر يقوم يقول ان  
الصبر طيب ، هوه فيه يا بنتى أمر من الصبر .

سنية : ربنا كريم يا ستى بكرة يفرجها ..

أم رتبية : أيوه يا بنتى كريم ، أنا برضه لما اقعدا اراجع نفسى ، واقول الحمد لله على  
الستر ، الحمد لله ، على اللى اداه لنا ربنا ، دامدنا حاجات كثير ما حناش  
حاسين بيها ، أصل الواحد ما بيعشش الا بالحاجة إالى مش معاه ، لكن  
الحاجة اللى معاه ما يعرفهاش أبدا ، ما يعرفهاش ولا يحس بها الا لما تضيع  
منه ، يقوم يعرف انه كان معاه حاجه ، احنا دائما نسخط عشان ربنا ما  
داناش ، لكن ما بنحمدوش على انه ادانا ، مع إنه يا بنتى دائما بيدينا .. أنا  
بعض ساعات اقعدا افكر اقول مش برضه ربنا عوضنى يعنى هو اتالو كنت  
اتجوزت ، كنت حلاقى واحد يرعانى ويعن على ، زى سى عبد الصبور ،  
أهو حقيقى ، بنغزه ومهفوف ، ومانيش عارفه آخذ منه لا حق ولا  
باطل .. لكن برضه مريحتى وموكلتى ، وكاسينى .. ولوقلت آه ، يقول  
ورايا ميت آه .

سنية : أيوه والنبي يا ستى ، سيدى عبد الصبور ما فيه زيه أبدا ، ولو انه اليومين

دول طالع لى فى حاجه جديده ما هياش عاجبانى أبدا ، ربنا يستر عليه منها .

أم رتبية : مش حكاية دراسة الأرواح ، وتحضير الأرواح .. ربنا يكفيننا شرها ، إلهى

يورينى فيك يا شيخ هباب ، انت اللى جريت رجله فيها ، هوه لا كان

يعرف أرواح ، ولا عفاريت ، طول عمره غرقان فى الخط العسرى ،

والاقلام البسط ، واليفط ، وكراريس المشق ، من يوم ما عرف سى هباب

الطين ، وهو ما وراهوش غير الأرواح .

سنية : ربنا يستر عليه يا ستي ، أنا والنبي بخاف عليه لما يخش الأوده ويقفلها عليه ، ويقعد يقرا زى القطط .

أم رتيبة : تكونش الأرواح دي هي اللي خسرت أخلاقه ، وخلته على دي الحال ؟  
سنية : والنبي يا ستي انا مش راضيه افسر ، دابقي ما ينطقش ، وحكاية الصراحه اللي طالع لي فيها اليومين دول كرهت فيه طوب الأرض .

أم رتيبة : أهو كان زمان يرضه طالع في حكاية انه يقول للأعور أعور في عينه .. لكن أهو برضك كان عنده شوية نحشا ، لكن اليومين دول خلاص ، ما تعرف إيه اللي جراه .. العجز .. والا الهبابه الأرواح اللي طالع فيها .

سنية : تصدق يا ستي امبارح كان طالع على السلم قام قابل إدريس افندي اللي ساكن فوقنا ، الراجل يبسلم عليه بأدب ، بصيت لقيت ده من غير مناسبه . بيقول له يا إدريس افندي انت ما سمعتش على أزمة الزيت اللي في البلد .. الراجل قال له أي والله .. الله يكون في عون الناس ، فرد عليه سي عبد الصبور بشخط ، وقال له يكون في عونهم ازاى وأمثالكم عمالين يحوشوا الزيت .. الراجل استعجب قوى وقال أنا ياسي عبد الصبور .. أنا والله ما عندي نقطة زيت في بيتي . قام قال له ما عندكشى في بيتك نقطة زيت .. لكن عندك في طربوشك كيلو زيت ، لو كان كل واحد زيك يعصر الخمسه سنتي الزيت اللي في طربوشه كانت انفكت أزمة الزيت .

أم رتيبة : يا عيب الشوم ، قال الكلام ده كله للراجل ، ياما انا خايفه يعمل كده مع سيد افندي وامه ، أهى دي تبقى المصيبة السوداء .

سنية : وهو ماله وما لهم ؟

أم رتيبة : أصلى ما خييش عليكى يا سنيه ، أنا شايفه اليومين دول من ست ام سيد ريق حلو ، ودائما تقول ان سيد افندي يبسأل على ، وقلبي حاسس . إن فيه حاجه في ضميرها ، وعيني اليمين بترف وإيدي الشمال بتاكلني وعمري ما بتحصل لي الحاجات دي الا لما يكون فيه خير جاي .

سنية : خير يا ستي خير .. خير ان شاء الله .

أم رتبية : أنا حاسه ان سيد افندى ناوى بخطبني قريب ، وحاطه إيدى على قلبى ،  
لاسى عبد الصبور يلخبط الدنيا ويطيره زى ما طير اللى قبله ، وهو اليومين  
دول زى مانتى شايفه حاله مبرجل .

سنية : رينا يستر . ( يسمع دق على الباب ) تعالى شوف الباب يا زينهم .

زينهم : ( من المطبخ ) قومى افتحى . أنا مش فاضى .

سنية : انت مش خلصت خلاص دق الكسبره ، بتعمل إيه عندك ؟

زينهم : وانت مالك انت ، بقرا ، حد شريكى .

سنية : انت بتعرف تقرا ؟

زينهم : أهو بتعلم ، بفك الخط .. مالك انت ومالى ، زين وفتحه زا ، ره وفتحه

را ، عين وفتحه عا ، زرع ، كويسه دى والالآ ، يا خسارتك يا زينهم فى

قلة التعليم كان زمانك واخذ الليسانس .

( الباب يدق مرة أخرى )

أم رتبية : ( فى غيظ ) قومى — يا بت اتحركى وافتحى الباب ، انفتحت فى راسك

طاقه ، كفايه علينا تقعد نسمع خناقكم طول النهار ، حقه بطلوا ده واسمعوا

ده .

( تفتح سنيه الباب .. وتدخل أم سيد )

## المشهد الخامس

أم رتبية : يا مرجبه يا مرجبه .. أهلا وسهلا ، الدنيا نورت يا ست ام سيد .

أم سيد : الله ينور عليكى ويشرف مقدارك .

أم رتبية : نخطوه عزيزه .

أم سيد : رينا يعزك ياختى .

أم رتبية : أهلا وسهلا .. أهلا وسهلا .. اتفضلى يا ستى الحاجه .. تعالى هنا على

الكنبه جنب الشباك .. داخنا زارنا النبى .. قومى يا بت يا سنيه فزى ..

لمى الملوخيه واركنى الطبلية وشيلى الفراخ من الشوربه واسقطسى فيها  
الملوخيه .. قومي كنده اتحركى . عدم المؤاخذه يا ستى الحاجه .

أم سيد : خدى راحتك ياختى .

أم رتبية : واد يا زينهم ، تعال انجر لم عروق الملوخيه دى ارميها فى صفيحة الزباله ..  
بلا زرع ، وبلا ضرب ، زرعوك زرع بصل ، وضربوك على نافوخك  
بالصرم .. آل بعد ما شاب ودوه الكتاب .. ما تأخذنيش يا ستى الحاجه  
على النكشه اللي احنا فيها .. أنا أصلى ما عنديش خدامين . أنا عندى  
نوايب .. عندى كواين .

أم سيد : ياختى وهم الخدامين بقوا خدامين .. دول بقوا اسياذ .  
( يدخل زينهم وفى يده كتاب القراءة الرشيدة ) .

زينهم : ( إلى سنيه مشيراً بأصبعه إلى الكتاب ) — شايفه يا بت يا سنيه راسمين امك  
وابوكى فى كتاب القراءة .

سنية : صحيح يا زينهم ؟ ورينى كده ؟

زينهم : أهم ، أم قويق ، وابو جلامبو .

سنية : بتكت يا روح امك ، جاتك نيله ، جاتك نيله حزم ، لم ياخويا العروق  
لم ، أم قويق وابو جلامبو ، والله ما فيه ابو جلامبو غيرك ، يا مصدى ، يا  
معقن ، يا مقشّف يا مجنّز .

أم رتبية : اتلمى يا بت انت وهوا ، انتوا السانكم ما يدخلش بقكوا أبدا ، ما تتعبوش م  
الحناق ، ما يتهدش حيلكم ا فوت لِم العروق ووضّب الصالة ، وانتى  
اعملى قهوه لستك ام سيد .. تشريبها ليه يا حاجه ؟

أم سيد : خلّيا على الريجه ، والا احسن خلّهم يجيبولى الكنكه والسيرتو والبن وانا  
اعملها هنا ، أنا أصلى دائماً أحب اعمل قهوتى بإيدى .

أم رتبية : تسلّم إيديكى يا ستى الحاجه ، أمرك ( إلى سنية ) هاتى عدة القهوه يا بت  
هنا قدام ستك ، اشهلى شوربه . آنتينا يا ست الحاجه .. ازاي بسلامته  
سيد افندى ؟

( يخرج زينهم وسنية )

- أم سيد : والنبي حاله مش عاجبنى اليومين دول أبدا ، شايفاه مش رايق كده ،  
وصحته مخستكه ، وبان عليه الهم والتعب .
- أم رتيبة : ياختى بعد الشر عنه ، يمكن يكون استهوى .
- أم سيد : أبدا والنبي ياختى .. داختى دايمًا محرص على نفسه .
- أم رتيبة : أهو من باب الاحتياط برضك ، حقتك تعملي له كاسات هوا والا اعملى له  
بالقدره ، أنا حابعتلك القدره اللي عندى وفتيلة الزيت تحطياها على ضهره  
مرتين تلاته تمص كل البرد اللي عنده وتشد وسطه وتصلب جتته .
- أم سيد : والله يا ست أم رتيبة أنا متبياً لى الحكاية مش حكاية برد .. دا باين عليه  
مهموم ، ومتضايق ، وزى اللي فيه حاجه شاغله باله .
- أم رتيبة : ومتضايق ليه ومهموم ليه ؟ ربنا ما يجيب لاهم ولا ضيق .
- أم سيد : أنا افكرته فى الأول مهموم من حاجه فى شغله ، وقلت يمكن حد ضايقه  
والاداس له على طرف .
- أم رتيبة : ما عاش اللي يضايق سيد افندى والا يدوس له على طرف . الراجل أمير ،  
وزى السكره ، يضايقوه ليه ياختى ؟
- أم سيد : قلت يمكن حد مسه بكلمه كده والا كده ، أهو الأمر ما يسلمش ، والا  
يكون هوا عمل غلطه ، أصل اليومين دول الشغل بقى متعب قوى وهوا ما  
يروحش نفسه .
- أم رتيبة : الله يكون فى عونته ، وياخذ بيده .
- أم سيد : أصل المعمل كبر قوى ، والإنتاج بيكثر ، والأصناف بتزيد ، وكل الشغل  
متوقف عليه وحده ، مفيش فى البلد خبير غيره .
- أم رتيبة : باين عليه ياختى باين ، هوا فيه حد زى سى سيد افندى !
- أم سيد : من يومه والنبي يا ست أم رتيبة .. خمسة وأربعين سنه وهو الخبير الوحيد فى  
المعمل ده .. ما وئش ولا كلش ، لما انحرق وانكوى .. حاجه تلهب يا  
ختى مين يقدر يستحمل غيره ؟



- أم رتيبة : ربنا يحميه ياختى .
- أم سيد : يحميه أكثر من كده ، دالو لا إته راسى ع الشغلانه دى .. كان زمانه بقى حريقه ، كان زمانه طلب وفرقع وانفجر .
- أم رتيبة : يالطيف .. يالطيف يارب ، ياختى بلاش الشغلانه الوالعه دى ، ما بلاش معمل المفرقات ده .
- أم سيد : معمل إيه ؟
- أم رتيبة : المفرقات !! مش بيشتغل خبير فى معمل مفرقات ؟!
- أم سيد : مفرقات إيه ياختى .. سلامة عقلك .
- أم رتيبة : أمال معمل إيه يا ستى الحاجه اللى بيلاهيه ده ؟
- أم سيد : معمل طرشى يا حبيبتى .
- أم رتيبة : معمل طرشى ؟
- أم سيد : أيوه معمل طرشى ، خبير فى معمل طرشى . ماله ؟ وحش ؟
- أم رتيبة : لا ياختى مش وحش أبدا ، اسم الله عليه ربنا يحميه .
- أم سيد : يوه ما بلاش ياختى حكاية يحميه دى . هوا ناقص حمو .
- أم رتيبة : أبدا ياختى أبدا .. ربنا يبرد جوفه .. ويسقع مصارينه .. وبسلامته سى سيد افندى الخبير بيعمل إيه فى معمل الطرشى ؟
- أم سيد : ياختى قلت لك خبير ، هو انتى ما بتفهميش ؟
- أم رتيبة : أيوه ياختى فاهمه وعارفه .. خبير .. والخبير دا بسلامته بيعمل إيه ؟
- أم سيد : يدوق .. هوا الأمر الناهى فى المعمل كله .. ما فيش عينة طرشى تخرج م المعمل إلا لما تفوت عليه .. لا لفت ولا خيار ، ولا جزر ، ولا كرنب ، ولا أرنيط ، ولا فلفل ، ولا بنجر ، ولا لمون ، ولا حاجه تخلق فى عالم الطرشى والمخللات ، إلا لما يحكم عليها هوه ويوافق على خروجها .
- أم رتيبة : ويحكم عليها ازاي ياختى ؟
- أم سيد : يعنى يشوفها ناقصه شطه . ناقصه خل . دلعه .. حادقه . حاميه .
- أم رتيبة : ما شاء الله . ما شاء الله . عيني عليه بارده ( يدخل زينهم حاملا معدات القهوه ويضعها على منضدة صغيرة أمام أم سيد ) .

- زينهم : ( لأم سيد ) أجيالك ميه سقعه وإلامية دقه ؟
- أم رتيبة : اقصر لسانك جاك قطعه .. مية دقه لما تلهب جوفك .. عدم المؤاخذه يا ست ام سيد .. أصله دائما مسحوب من لسانه ، فوت امشى انجر على المطبخ .. قول للبت سنية تاخذ بالها من حلة الرز لحسن تشيبتها زى ما شيطتها امبارح . ( ملتفتة إلى أم سيد ) أبوه يا ست الحاجة بقى بسلامته ما فيش عينة طرشى تخرج من المعمل إلا لما تفوت عليه ؟
- أم سيد : أبدا ، قبل اليرميل من دول ما يخرج للبيع لازم ياخذوا التصديق منه بالخروج ، هوا لوحده الأمر الناهى ، ماقيش قرن قفل يعدى من غير إذنه .
- أم رتيبة : يا سلام ، يا ست ام سيد ، كل ده بيعمله سيد افندى ، ربنا يزيده من سلطانه ، ويقاله كثير فى الشغلانة دى ؟
- أم سيد : من يومه ياختى .. من يوم ما وعى على الدنيا وهو خبير مصر الأول فى صناعة الطرشى .. عليه لسان فى دوق الطرشى مينزلش الأرض .
- أم رتيبة : ما شاء الله ما شاء الله . والموهبه دى جات له منين ياختى ، خلقه كده من عند ربنا ، والأورائه ؟
- أم سيد : أبدا والنبي ياختى ولا ورائه ولا حاجه ، دا حتى أبوه الله يرحمه ما كانش له فى الطرشى أبدا ، وما كانش يحب غير الحاجات المعسله ، زى المعصيده ، والمفتقه . والعسل والطحينه .
- أم رتيبة : أمال المحروس سيد افندى ، خذ الموهبه دى ازاي ؟
- أم سيد : بالتمرين .. بمضى المده .
- أم رتيبة : ازاي ياختى ؟
- أم سيد : المسألة ابتدت معاه وهو لسه فى اللغه ، أصلى لما كنت برضعه .. لبني تشف ، فبقيت اديله لبن اصطناعى ، فليله من ذات الليالى صحى بصرخ بالليل وكنت متعوده دائما أول ما يصحى أروح ماده قزازة اللبن فى بقه يروح راضع شويه وتنه نايم ، ففى الليله دى مديت إيدي على التراييزه وأنا

مغمضه وعينى فيها النوم مسكت البزازة لقيتها فاضيه ، فأعدت أحسس  
لقيت الكبايه اللى فيها اللبن جنب البزازة رحت دلقاها فى البزازة وخطاها له  
فى بقه ، راح مقربعها لآخرها وراح نائم .

أم رتيبة : بالهنا والشفا ، صححه وعافيه على سيد أفندى اللبن كويس ومغذى .

أم سيد : ما كانش لبن يا ستى ام رتيبه .

أم رتيبة : أمال كان إيه ياختى ؟

أم سيد : مية لفت .

أم رتيبة : يوه يا ندامه ، ومنين جتك مية اللفت ؟

أم سيد : أصلى كنت محضره كباية مية لفت أشربها على الريق ، وكنت حاطه

الكبايتين جنب بعض على الترايزه ، فلما مديت إيدى بالليل جت فى مية

اللفت .

أم رتيبة : ياختى بره وبعيد ، وجرا إيه لسيد أفندى بعد كده .. مات ؟

أم سيد : تفى من بقلك سبع تفات .. بعد الشر عنه .

أم رتيبة : ألف بعد الشر ياخالتي الحاجه ، جراه إيه طمئيني ؟

أم سيد : صبح لايه ولا عليه ، زى القرد المسنسل ومن يومه ياختى وهو راسه وألف

سيف .. ما يدوق اللبن أبدا ولا يحطه على لسانه ، كل رضاعته مية لفت ،

ميه جزر ، ميه بنجر .

أم رتيبة : بسم الله ما شاء الله .

أم سيد : قولى معدته أتحرشت ولسانه أتودك ، وأول ما ابتدا يمشى ويلعب مع ولاد

الحاره ، كنت دائما تلاقه بحب الطرشجيه ، فتبصى تلاق اولاد الحاره

ياخدوا مصروفهم يشتروا بيه قصب والامصاصه والابراغيت الست ،

وهوا من دون الاولاد ياخذ مصروفه إن كان ملين والانا نكله ، وتنه رايح على

الطرشجى اللى على باب الحاره .. يفضل يقربع فى ميه لفت وميه دقه لما

يقول بس .

أم رتيبة : يا سلام عليك يا سيد أفندى ، من يومك وانت ابن كار .

أم رتيبة : أهوته كده ، يقربع في مية اللفت والدقه ، تقوليش غاوى .. لغاية ما بدأ الاحتراف .

أم رتيبة : وازاي يا ختي ابتدا الاحتراف ؟

أم سيد : في يوم من ذات الايام راح عند بتاع الطرشي ، وقال له اديني بلميم مية لفت وبلميم مية دقه ، الراجل مد له ايده بكوز مية اللفت قربه ، ومد له ايده بكوز مية الدقه شرب شفطتين ورجعه ، الراجل قال إيه مالها ، قال له وحشه مش مضبوطة .. قال له ليه .. قال له ناقصه شطه والحل بتاعها مغشوش .. أنا عايز تجيب لي من البرميل الثالث اللي على إيدك الشمال ، أيوه البرميل ده .. الراجل فرغ الكوز وملاه من البرميل اللي قال عليه ، راح مقربه وقال له أيوه ، أهى دى تمام .. الراجل استعجب ، نحد شفطه من البرميل ده ، وشفطه من ده ، استعجب أكثر ،لقى كلام الولد مضبوط وهو السه مطلعش من البيضة عمره لسه سبع سنين ، راح مرجع له النكله ورقع الصبي بتاعه علقه ، وقال لسيد اسمع ياواد ، انت تيجى كل يوم هنا تاخذ لك كوزين مجانا ، وبعد جمعه كان سيد بيشتغل في دكان الطرشي ، قاعد على كرسي ما يعملش حاجه أبدا غير الدوقان ، ويفضل على كده كثير خمسة واربعين سنة .

أم رتيبة : ما شاء الله ... ما شاء الله .

أم سيد : الدنيا اتغيرت ، والحل كبير واتسع ، وحاله راج وبقي معمل كبير أد الدنيا ، وسى سيد هوه ، هوه ، مالوش شغله غير انه يقعد على الكرسي ويدوق ، خمسة واربعين سنة ، وهو حافظ مركزه ، خير مصر الأول في صناعة الطرشي .

أم رتيبة : أدها وأدود ، وهو حد يقدر على كده غيره !

أم سيد : عشان كده بقول أن ضيقته وعكنتته اليومين دول مش ممكن تكون م الشغل .

أم رتيبة : أمال يعنى فكرك تكون من إيه ؟

أم سيد : والله يا ختي أنا بقول ان فيه حاجه شاغله باله .

أم رتيبة : زى إيه ؟

أم سيد : بقى يا ست أم رتيبة انت مش غريبه وانا مش حاخبي عليكى ، بقى انا طول  
عمرى اقول له أنا نفسى اجوزك وافرح بك ، وهو كل ما اجيب له السيره  
دى الأقيه كشر ولوى بوزه ، وقال لى انا مش عاوز اتجوز .. أنا مبسوط من  
عيشتى كده ، لكن اليومين دول ، شايفاه كده لما نجيب له سيرة الجواز ، ما  
يكشرش ولا يلويش بوزه ، وحتى فى بعض ساعات هوا يقعد يقوللى ..  
والله يا ام يا ريتنى سمعت كلامك واتجوزت من زمان .. أهو الواحد ضيع  
عمره فشوش .. ودلوقت لو حب يتجوز ما يلاقيش اللي ترضى به .

أم رتيبة : ليه ياختى ألف من ترضى به .. هوا فيه احسن من سيد افندى ؟

أم سيد : برضه انا قلت له كدا .. لكن لقيت زى ما يكون فيه حاجه فى فكره عايز  
يقولها لكن مش قادر .. زى ما يكون كدا مكسوف .. مستعيب ..  
خايف .

أم رتيبة : وياختى مش قادر ليه .. هى الحاجات دى عيب .. والا حد يختشى منها ؟  
أم سيد : المقصود .. فضلت آخذ منه وادى ، واحاوره وداوره ، لغاية ما ابتدا  
يفضفض باللى فى قلبه .

أم رتيبة : وطلع إيه !!؟

أم سيد : كلمه من هنا ، وكلمه من هنا ، قال لى .

أم رتيبة : قال لك أيه ؟

أم سيد : يوه ياختى يا ست ام رتيبه . صبرك على ، خلىنى آخذ نفسى ، هى الدنيا  
طارت ا .

أم رتيبة : على مهلك أوى ياختى ، خدى نفسك بالراحه خالص .. هيه .. قال  
إيه ؟

أم سيد : كلمه من هنا ، وكلمه من هنا .. يا سيد قول ما تخبيش على انا مش غريبه ،  
قال لى يا ام نفسى اخش دنيا ومش لاقى حد يوافقنى ، قلت له يا بنى الدنيا  
الواسعه دى كلها ما فيهاش حد يوافقك .. بصيت لقيته وطا رأسه فى

الأرض وقال لي بوشوشه ، فيه واحده بس يا أم ، واحده ما فيش غيرها ..  
هي النص الثاني بتاعي ، النص اللي قعدت طول عمري أدور عليه .. انتي  
مش عارفه ان البني آدم منا زي ما يكون لفته وانشقت نصين وانه طول  
عمره يفضل تعبان لغاية ما يلاقى نص اللفته الثانيه ، ياختي هوه قال لي كده  
وأنا اتلخبطت .. لفته إيه وخياره إيه .. قلت له إيه الكلام الفارغ اللي  
بتقوله ده يا سيد يا بني .. إنت يا بني عاوز تتجوز والا بتدور على نص  
لفته ، هو البني آدم ده ما يقنعش . ما فيش حاجه تملأ عينه أبدا ، كل اللفت  
اللي انت غارقان فيه طول عمرك وبعدين تقول لي ان ناقصك نص لفته ا .  
أم رتيبة : يا ست أم سيد مش قصده نص لفته . نص لفته .. دا قصده نصه الثاني ..  
أصل كل واحد كده لازم له نص يكمله يعني انا ناقصني مثلا ، نص  
كرنيه . نص بطيخه .

سنية : ( مقبله من المطبخ تحمل ملعقة وطبق ) وانا يا ستي ناقصني إيه ؟ .

أم رتيبة : نص حيه ، وإلا نص عقربه .

زينهم : ( من داخل المطبخ ) وانا يا ست ؟ .

أم رتيبة : نص نعل ، يا مرقع يا بولوزه ، يا فردة شمال ، شوف شغللك بقى وبلاش  
لماضه ، حاكم دائما تتداخل في اللي ماللكش فيه .

سنية : ( تمد يدها بالملعقة ) شوف حدقها كده يا ست ؟ .

أم رتيبة : ( بعد أن تلتذوقها ) أهى كويسه ، بس هدى الوابور شويه من تحت حلة الرز  
( موجهة الحديث إلى أم سيد ) فهمت بقى يا ست أم سيد؟ أهو ده قصده .

أم سيد : ما هو برضه قال لي كده ، فهمنى أن نص اللفته بتاعته ، يعني الست اللي  
نفسه فيها .

أم رتيبة : ولقاها ؟

أم سيد : أيوه يا ستي لقاها ، بس ما طلعتش لفته أبدا طلعت زي ما بتقولى كرنيه ،  
كرنيه عجالي .

أم رتيبة : حقيقي .. حقيقي كرنيه ؟ .

أم سيد : ياختى اصبرى .. مالك مسروعه كده .  
أم رتيبة : وبعدين يا خالتي ام سيد لما قال لك انه لقي نص اللفته .. قصدى نص الكرنبه ؟.

أم سيد : قلت يا بنى ، وهو نص اللفته برضه يوافق نص الكرنبه ؟.  
أم رتيبة : يوه يا حاجه .. ما توافقش ليه .. قادر ربك يجمعهم سوا فى برمىل واحد .  
أم سيد : ما هو برضه قال لى كده .  
أم رتيبة : من فهمه وتقديره ، وبعدين يا خالتي ام سيد قال ليه ؟ ما طلبش نص الكرنبه ؟.

أم سيد : طلبها ياختى .. وقاللى يا ام انا خايف احسن ماترضاش فى .. قلت له ازاي يابنى يا سيد .. دا انت أدها وأدود ، قال لى طيب روحى جسى النيص ، لقيت الحكاية مش عايزه بد .. أخذت بعضى وتنى جايالك .. إيه رأيك ياختى ؟.

أم رتيبة : رأيى ؟ آل رأى آل ، يا سلام ياست ام سيد دا انت خلتي جتى تمل .. دا انا طول عمرى احب اللفت ، أموت فى اللفت ومية اللفت .  
أم سيد : أصيله والنبي .. أصيله ياست ام رتيبه .. أنا برضه كنت عارفه أن أملى مش حايجيب فيكى أبدا .

زينهم : ( يدخل وفى يده مقشاة ) اسمى يا بت يا سنيه . أنا على الكنس واننى عليكى المسح .

سنية : ( وفى يدها جردل المسح ) لأكل واحد منا عليه أوده كنس ومسح ، أنت أصلك ضلالى ما عندكش ذمه .. ما بتقرطش على المقشه ، وتسبب كل التراب ، ولا بتمدش إيدك تحت الكنيه .. وادوخ انا بعدك فى المسح ..

زينهم : يا سنيه ياختى ما تبقيش مناقفه .. أنا حاقش لك كويس خالص ، وامد ايدى زى مانتى عايزه .. أمد إيدى تحت الكنيه .. وتحت الملايه ، وتحت القميص .. بس ما تبقيش تقوللى شيل إيدك .

سنية : شاهده يا ستى على قلة الأدب ؟.

- أم رتيبة : اخرس يا واد يا زينهم ، واختشى على دمك وخلي عندك تريبه .  
زينهم : خريست .. هوه انا ما اعرفش اتكلم كلمه في البيت ده ؟ .  
أم رتيبة : كلمتك اجنابك ( لأم سيد ) خطوه عزيزه يا ست ام سيد . دا حنا  
زارنا النبي . دا يوم المنا . دا يوم الهنا .  
أم سيد : خلاص يا ستى ام رتيبه .. موافقه ؟ .  
أم رتيبة : موافقه وبس ، وهو انا الاق أحسن من سيد أفندى .  
أم سيد : استيينا ؟  
أم رتيبة : استيينا .  
أم سيد : طيب واخليه يجى يقابل سى عبد الصبور إمتى ؟  
أم رتيبة : ( فى فرع ) عبد الصبور ا.. يا مصبتي .. يا وقعتى .. يا نحييتى .. يا  
نيتى ..  
أم سيد : ليه ياختى كفا الله الشر ؟ .  
أم رتيبة : يا فرحه ما تمت خدها الغراب وطار .  
أم سيد : يوه يا ندامه .. حصل إيه ياختى ما توجعش بطنى ؟ .  
أم رتيبة : عبد الصبور .. مفرق الأحباب .. وهادم اللذات .. يا خية أملك يا  
أم رتيبه .. يا ميله بختك يا أم رتيبه .  
أم سيد : هو إيه أصله ياختى ده .. ما تقوليلى إيه الحكايه وقعت قلبى ؟ .  
أم رتيبة : ما فيش فايده يا ست ام سيد . ما دام حا يدخل فيها سى عبد الصبور  
باطت واتفر كشت .. أنا كنت ناسياه خالص .. كان رايح عن بالى ..  
الفرحه نستنى أن فيه شىء اسمه عبد الصبور .. وشه يقطع الخميرة م  
البيت .  
أم سيد : ياختى ليه بس .. دا سى عبد الصبور باين عليه عاقل وابن حلال .  
أم رتيبة : عاقل فى كل حاجه .. ما عدا الحكايه دى . مفيش فايده .. أنا عارفه ما  
فيش فايده ..  
أم سيد : طب بس فهمينى ليه ؟ .



- أم رتيبة : أهو كده ، خلقتة كده .. طبعه كده .. شغلته انه يضيع منسى العرسان .. اللى خلاه رفض العشرين عريس اللى فاتوا .. يعنى حا يستعصى عليه سى سيد .
- أم سيد : ياختى قادر وكريم .. مين يعرف .. يمكن ربنا يهدى سره ويعقله .. ويخليه يوافق .. هوا فيه حاجة بعيدة على ربنا ؟ .
- أم رتيبة : مش بعيدة على ربنا .. لكن بعيدة على أنا حاسه وعارفه .
- أم سيد : طيب خليها على الله ياختى ، اسكتى انت وربنا حا يجيبها سليمه .. إن شاء الله المره دى حا تصيب .. أنا قلبى حاسس كده .
- أم رتيبة : يسمع منك ربنا .. ولو انى عارفه انه ما بيرضاش يسمع الحكايه دى أبدا .
- أم سيد : ما تقوليش كده يا ام رتيبه .. أستغفر الله العظيم من كل ذنب عظيم .. بكره كل حاجة تنصلح .. أخلى سيد يجى يزوره إمتى ؟ .
- أم رتيبة : ياما انا خايقه م الزيارة دى .
- أم سيد : ياختى جمدى قلبك ، ما تخافيش .. كل حاجة حايجى سليمه ، هو سيد فيه حاجة تتعاب ، دا على الفرازه ، وأدب وأخلاق ، وكال وذوق ، هوا فيه احسن من كده ؟ .
- أم رتيبة : ما هم اللى فاتوا كلهم كانوا كويسين ، لكن كان بيطلع فيهم القلط الفطسه .
- أم سيد : لا .. بس اطمنى ، دامش حا يلاقى فيه عيب أبدا ، إن شاء الله ربنا حيتمم بخير .
- أم رتيبة : من بقلك لباب السما ، ربنا يهديه ويكمل سيد افندى فى عينه ، بس على فكره يا ست ام سيد لازم نعمل استحرصنا على كل حاجة ، عشان المقابله تم على خير ، وعشان ما يحصلش حاجة تعكر مزاج سى عبد الصبور ويخسر لنا الشغلانہ .
- أم سيد : اللى انت عايزاه منا يا ست ام رتيبه نعمله . بس أمرى .

- أم رتبية : أول كل حاجة .. اسم سى سيد افندى الكامل إيه .. لحسن يكون فيه  
حالا جه كده وإلا كده ، أصله بهم بالاسم أوى .
- أم سيد : اسمه سيد افندى بنجر .
- زينهم : ( ضاحكا ) بنجر .. ها .. أو .
- أم رتبية : ( بيأس ) بنجر ؟ يادى المصيه الحمرا .
- أم سيد : ماله بنجر .. وحش ؟ .
- أم رتبية : لأ حلو .
- زينهم : ( مصفقا يديه مغازلا سنية ) حلو .. يا حلو .. مش حاتتجوزينى  
بقى يا بيت يا سنيه ، أموت ولا رحش اتغن .
- سنية : يا خويه إلهى تموت وتروح اتغن .. يا بيجع يا ضلالى ، أنا اتجوزك  
انت .. خلاص الدنيا خلصت من الرجاله لما اتجوزك أنت .
- أم رتبية : ( تضرب كف على كف ) حلو ، حلو أوى .. يا خسارة الجوازه ، يا  
ميلة بختك يا ام رتبيه .
- أم سيد : ياختى .. هوا إيه أصله ده .. ميلة بختك ليه بس .. هو اسم بنجر  
عيب ؟ .
- أم رتبية : اللى ما رضى بالعقر يرضى بالبنجر .
- أم سيد : يا ستى هو ماله ومال الاسم .. هو الاسم بيعض .. كل واحد حرفى  
اسمه ، بنجر ، خيار ، جزر .
- أم رتبية : ما فيش فايده يا ست أم سيد ، مش ممكن مش ممكن .
- أم سيد : وعلى العموم الاسم فى إيدنا .. ده حاجه سهل .. من بكره يروح  
المحكمة الشرعية يغيره .
- أم رتبية : حقيقى يا ست ام سيد ؟ ممكن يغير اسمه ؟ .
- أم سيد : مش ممكن ليه ؟ ممكن قوى . هوا يعنى كان لرق .
- أم رتبية : ما لرقش ولا حاجه . بس هوا يعنى حا يرضى يغير اسمه ؟ .
- أم سيد : يرضى قوى .. عشان خاطر عيونك . من بكره يروح يغيره ، وبعد

- بكره يكون هنا من غيره .. مبسوطه يا ستى ؟ .
- أم رتيبة : كتر خيرك يا ست ام سيد . ما عدمكيش أبدا .
- أم سيد : خلاص .. اتفقنا . بعد بكره أقول له يبجي يقابل سى عبد الصبور ؟ .
- أم رتيبة : خلاص أوى . بس قولى له . يستحمه ولا يزعلش منه . يعنى إن قال له كلمة كده والا كده ما ياخذش على خاطره . قولى له ياخده على أد عقله . حاكم هوا اليومين دول . عقله يعلم به ربنا .
- ( يسمع طرق على الباب بعضا )
- أم رتيبة : ( مرتبكة ) يوه . دى دقته . يا ترى إيه اللى جابه بدرى كده ؟ .
- ( يطرق الباب ثانية ) .
- أم رتيبة : طيب . طيب . افتحى يا بت يا سنيه . تعالى بنا يا ست ام سيد نخش فى أودة الضيوف .
- أم سيد : لأ ياختى أنا خاقوم بقى عشان اشوف ورايه إيه . واسييك يمكن يكون سى عبد الصبور عايز حاجه .
- ( تفتح سنيه الباب ، ويدخل عبد الصبور . أم سيد تغطى وجهها بالملاءة )
- عبد الصبور : إيه ده . هوا انتوا نايمين نومة أهل الكهف . ساعه وانا عمال اخبط ما حدش راضى يفتح .. انطرشتم .
- أم رتيبة : ( مشيرة إلى أم سيد ) خالتي ام سيد جارتنا يا سى عبد الصبور .
- عبد الصبور : طيب . طيب . مش وقته دلوقت . قوموا ياللا من هنا . اخلو لنا الصاله بسرعه .. عشان خاطر عندنا جلسه مستعجله . عندنا حاجه خطيره عايزين نشوفها . ياللا اتفضلوا .
- أم رتيبة : يوه .. هوا انت دايمًا كل حاجتك مستعجله ، جلسة إيه اللى حاتمعلها هنا ؟ .
- عبد الصبور : جلسة أرواح ، يعنى حا تكون جلسة إيه ، جلسة مجلس وزراء ! .
- أم سيد : ( تلتف فى ملاءتها وتنهض ) طيب يا ست ام رتيبه أستاذن أنا .. ( أم رتيبة )

- خليتك بعافيه .. إن شاء الله بعد بكرة زى ما اتفقنا ؟ .
- أم رتيبة : إن شاء الله ، بس ما تنسيش اللي قلت لك عليه ، إوعى يجى بيه ؟ .
- أم سيد : ما تخافيش ياختي ، اطمنى . حطى فى بطنك بطيخه صيفى ، أنا اخليه  
بغيره ويغير أبوه ، ما يكونش عندك فكره أبدا .  
( تنصرف أم سيد ، وتودعها أم رتيبة حتى باب البيت ) .

## المشهد السادس

- عبد الصبور : ( صائحا ) زينهم .. يا حلوف ، يا بجم يا لوح .. انت فين ؟ .
- زينهم : ( من داخل المطبخ ) يا ستار يارب .. ادحنا جينا للشحخط والنظر  
( بنغم طويل ) حاضر .
- عبد الصبور : ( مستمرا فى ثورته لسنية وأم رتيبة ) وانتم واقفين كده ليه ؟ يا الله  
اتلحلحوا شويه مافيش وقت . الجلسة حا تنعقد الساعة ١٢ ،  
والساعة دلوقت اتناشر الا ربع ، عايز الصاله تكون جاهزه حالا  
( مشيرا إلى أكوام عروق الملوخيه وقشر التوم والبطاطا ) ياللا  
شيلوا البلاوى التتله على دماغكم دى . عروق ملوخيه وفصوص  
توم ، إيه الحاجات الأرضيه دى .. ملوخيه وتوم وبطاطا .. احنا  
رايحين نحضر أرواح ، أرواح سماويه ، أثريه .. اتوا عايزين الأرواح  
تنزل بين الملوخيه والبطاطا والتوم ، دى تقى فضيحة فى عالم  
الأرواح ، دى تبقى نكبه .. دى تبقى كارته .
- أم رتيبة : ليه يا خويا بس .. نكبه و كارته على إيه !! يمكن أرواح تحب البطاطا .
- عبد الصبور : أرواح تحب البطاطا ؟ انتى يا وليه مجنونه ؟ بتخرفى ؟ أنا طول عمري  
اقول ان عقلك على قدك ، أرواح تحب البطاطا ؟ .
- أم رتيبة : ليه ؟ عيب ؟ قباحه ؟ ماها البطاطه ؟ . دى حتى بطاطه حمرا من بطاطه  
سيدي جابر زى الشهد .

عبد الصبور : بطاطا ، بطاطا .. انتى يا وليه جنسك إيه . أرواح تحب البطاطا ؟  
أم رتيبة : لا .. تحب الأمازيه ، يعنى هوا انت ضامن أن الأرواح اللى حا تنزل  
أرواح من جاردن ستي والا من الزمالك ، يمكن برضه تكون زى  
حالتنا كده من حوش آدم .

عبد الصبور : أرواح إيه يا شيخه اللى حا تنزل من جاردن ستي ، والا من حوش  
آدم ، دى نازله من طبقات الأثير ، من العالم الآخر المجهول ، أرواح  
يا وليه ، أرواح .

أم رتيبة : أرواح والا بستليه .. أنا مالى .. تنزل من مطرح ما تنزل .  
عبد الصبور : تنزل من السما ، لا تاكل بطاطا .. ولا أمازيه .. دى أرواح .. عارفه  
يعنى إيه أرواح ؟ يعنى مثلا لما تطلع روحك ..

أم رتيبة : ( مقاطعة ) بره وبعيد .. تف من بقك سبع ثقات . إيه الكلام دا اللى  
بتقوله اللى زى السم .

عبد الصبور : يا ستي يقول مثلا ، مثلا .. وعلى كل حال انتى زعلانه ليه ، ما هي  
مسيرها تطلع .. وتنطلق حره فى طبقات الأثير .. وربنا يتوب عليها  
من السجن اللى هيه فيه .

أم رتيبة : سجن ؟ فين يا خويا السجن دا اللى هيه فيه ؟  
عبد الصبور : ( يشير إلى جسدها ) ده .. ده .. السجن السفلى ، الدنياوى ، الجته  
اللى زى جنة الخنازير .. اللى زى كيس الغسيل .. بكره تفارقه وتنطلق  
منه .. وتمشى فى السموات السبع حره .. تطير زى الفراشة ..  
تصورى أنك تبقى طايره زى الفراشه ، خفيفه لطيفه ، بترفر فى  
بأجنحتك . مش احسن من اليرميل اللى انت محشوره فيه .. مش  
احسن من القدرة اللى عماله تدنى فيها أكل .. بطاطا ، وتسم ..  
وملوخيه ، ومفتقه .. وتكلفتها فى خرق وهلاهيل ، إيشى قميص  
وايشى لباس وايشى شراب .. والنهارده بردت وبكره سخنت ،  
ومره طلع لها خراج ، ومره وقعت انكسر لها إيد والا رجل .. مش

هي دى اجته اللي اتى مسجونه فيها ، واللى مورياك الويل والعذاب ..

مش احسن لك تفارقها .. مش احسن إن روحك تطلع منها ؟

أم رتية : روحك انت اللي تطلع . أنا عجبانى جتى . إذا كان مش عاجباك

جنتك الناشفه المقده .. اطلع انت منها .. أهو باب السما واسع ، آل

جتى آل .. مالها جتى ؟ عوجه .. عارجه .. خمسه وخميسه ..

وحصوه فى عين اللي ما يصلى على النبي .

عبد الصبور : لسه بندرى عليكى عشان تفهمى .. لسه قدامك كثير .. كستير

خالص ، ومين يعرف يمكن ما تفهميش أبدا .. اللي زيك انتى مش

ممكن يفهم .. ومش ضرورى يفهم ، وعلى كل حال ده مش وقته ،

ياللا ياللا .. شيلوا البلاوى دى .. الناس زمانهم جاين .. وله يا

زينهم الكلب يابوز الإخص ، انت مش عايز تيجى والا إيه ؟

زينهم : ما تصبر عليه شويه ، والا أجيلك كده زى مانا ؟

عبد الصبور : تعال بسرعه .. احنا مستعجلين .

( زينهم يدخل مترددا ، فلا يكاد عبد الصبور يرى وجهه حتى يفرغ

ويصيح به وهو يصرخ عليه ) .

عبد الصبور : ارجع .. ارجع تانى .. ارجع بقول لك ، مقدرش ابص فى وشك ،

شكلك يلبشتى .. وشك نحس .. عينيك كلها سفاله .. نظراتك

كلها مكر ولؤم .. ارجع .. ارجع احسن لك .. أنا قلت لك ميت مره

ما نخشش على بوشك مكشوف غطيه بسرعه .. يا ساتر .. يسأ

مفيث .

زينهم : ( يترجع ) ما قلت كده ، ما عجبكشى .

أم رتية : مالوا يا خويه وشه ؟ مش خلقة ربنا ؟ مش زى وش البنى آدمين اللي فى

الشارع ؟ حقه بطلوا ده واسمعوا ده . أهو ده اسمه كهن .. اسمه

بدع .

عبد الصبور : خبوه . خبوه بسرعه . أنا قلت له ما يطلع ايش بوشه مكشوف أبدا .

- زينهم : ( من المطبخ ) — فين يا بت يا سنيه الوش ؟ . الله يخرب بيتك .
- سنية : ( تخرج من إحدى الحجرات ) بلاش زعيق كده . دور عليه عندك في صفيحة الزبالة ( لعبد الصبور ) الطرطور والعبايه وعلية التنشوق والمنشه جاهزين على الكنبه . أحضر لك الطشت ؟
- عبد الصبور : لأ مش دلوقت ، أنا مش حاقب دلوقت لسه ورايه جلسه ، وجاى لى ضيوف .
- ( زينهم يدخل وقد ارتدى وجهها من الوجوه الورق المضحكة ) .
- أم رتيبة : كده يعجبك يا سى عبد الصبور ؟ كده حلو ؟ دلوقت ما يلبشكش ولا حاجه ، راحت السفاله والخساسه ؟
- عبد الصبور : أيوه كده ، كده أحسن كثير ، كده كويس خالص .
- ( تخرج سنية من إحدى الحجرات وتأخذ في لم عروق الملوخيه )
- أم رتيبة : حكمته !! ( تدخل في إحدى الحجرات ) .
- عبد الصبور : يا الله يا زينهم جهاز التراييزة للشغل ، شيل المفرش وامسحها كويس ، وجهاز الكبايه ، ورض الكراسى . انت عارف التوضيب كله ؟
- زينهم : عارفه ، عارفه ، أوعوا بقى وسعوا لنا عشان نشوف شغلنا ، اوعى كده يا بت يا سنية .. وابعدى صدرك من سكنى لحسن زاحم الدنيا ( يأخذ في تجهيز المنضدة ورض الكراسى حولها ) .
- سنية : ( وهى تجمع عروق الملوخيه والبطاطا ) سامع يا سيدى يقول إيه ؟
- عبد الصبور : أنا مش قلت لك ياود يا زينهم أقصر لسانك الزفرعتها ، يعنى أعمل إيه فيك أكثر ما انا ملبسك وش ، ألبسك كمانه ؟ أربط لسانك ؟ مش حرمتك ميت مره شغل البصبصه ، وزوغان العين .
- زينهم : وانا اعمل لها إيه .. إذا كانت زاحمه الطريق بصدرها ، مش تلمه شويه ، بص كده واحكم شوف مين فينا الغلطان ؟
- عبد الصبور : ( يلتفت إلى سنية ) أيوه حقيقي ، لك حق لى صدرك يا بت واحتشمى جاكى خابط في نافوخك ، أنا مش قلت لك ميت مره بظلى

### المسخره دى وقلة الحيا ؟

سنية : يوه يا سيدى .. وانا اعمل إيه ما هوه اللي طالع كده خلقة ربنا .  
عبد الصبور : أيوه حقيقى .. خلقة ربنا ، معذوره ، حاتعملى إيه .. الله يكون فى  
عونك ، ربنا ياخذ بصدرك .. يا اللا ياواد يا زينهم اشهل شويه ،  
الكبايه فين بتاعة كل مره ؟ ( سنية تنتهى من جمع عروق الملوخيه  
وقشر التوم وزينهم ينتهى من تجهيز المنضدة وإحضار الكوب  
الفارغة ) .

عبد الصبور : أول ما يجوا الضيوف تعملى قهوه يا سنيه وتدخليها ، وبعدين مش  
عايز أشوف خلقة حد منكم أبدا .. سامعه ؟ . قولى لستك كده ،  
وانت يا واد يا زينهم تقف على باب المطبخ لحسن يمكن نعوز حاجه ..  
وتلم لسانك .. ولا تتداخلش فى اللي ما لكشى فيه . واوعى تقلع  
الوش .

زينهم : علم يا سى عبد الصبور علم ، حافظ كل حاجه . ( يسمع صوت  
أقدام تقترب من باب الشقة ثم صوت طرق على الباب ) .  
عبد الصبور : س .. بس .. ياللا يا بيت يا سنيه شيلى اللي فى إيدك ده واطلعى بره .  
( يتجه إلى الباب ويفتحة ) .  
( يدخل الشيخ جاد الله ، والأستاذ زكى حنجل ، والأستاذ  
محبوب الور الذى يرتدى بدلة سوداء وكرافته سوداء ) .

## المشهد السابع

عبد الصبور : أهلا وسهلا .. ( ينظر إلى ساعته ) الساعه اتناشر وتلات دقائق ،  
يعنى جيين متأخرين تلات دقائق .. لكن معلشش .. خشوا  
وخلص .. ابقوا خدوا بالكم من المواعيد بعد كده .  
الشيخ جاد : ( يخرج ساعة الجيب ) الساعه عندى اتناشر بالضبط .



عبد الصبور : ساعتك مخرفه .. لكن قلنا خلاص .. اتناشر .. اتناشر الا تلاته ..  
اتناشر وتلاته .. مش مهم ، يا الله خدوا مطارحكم على الترابيزه  
لحسن ما عندناش وقت ، عايزين نخلص المجلسه .. وننتهى بسرعه ..  
أمال فين علوان افندى ؟

زكى : اعتذر .. علشان راح ياخذ حقنه .

عبد الصبور : حقنة إيه ؟

محبوب : حقنة كلب .

عبد الصبور : ليه ؟

محبوب : حماته عضته .

الشيخ جاد : مسكين .. أنا طول عمري اقول له على الوليه دى انها سعرانه ،  
مكانش مصدقتى .. يستاهل .

عبد الصبور : يا للا يا جماعه بقى اقعدهوا كل واحد ياخذ مطرحه .. زينهم ..  
زينهم .. هات ورقة التحضير من على المكتب .

( يدخل زينهم من المطبخ إلى إحدى الحجرات .. ويدهش الجميع  
من منظره ، ولكن عبد الصبور يدهشهم قائلاً ) :

عبد الصبور : اسمعوا كلامى .. كده أحلى كثير .

( زكى يضع طربوشه على الشماغه ويضع محبوب طربوشه  
بجواره ) .

زكى : ابعده طربوشك لحسن يتلخبط مع طربوشى .

محبوب : إى والله انا حاسس برضك انهم حا يتلخبطوا سوا وما حدش فينا حا  
يعرف طربوشه أنهمو .

زكى : أقول لك ( يأخذ طربوش محبوب ويجذب زره فيقطعه ثم يرده له  
قائلاً فى ارتياح ) دلوقت نعرف نيزهم كويس .. طربوشك اللى من

غير زر .

( زينهم يدخل ويقف لمشاهدتهم )

- محجوب : ( يفعل ثم يجذب زر طربوش زكى فيخلعه ) نبقى خالصين .
- زكى : ( متأسفاً ) كويس كده ؟ . أهم حا يتلخبطوا تانى ( ييم بأن يأخذ طربوش محجوب لينزع خوصته ولكن زينهم يتداخل فى الأمر ) .
- زينهم : ليه ؟ وعلى إيه ؟ . اتوا حا تعملوا زى الاتنين البرابره اللى اشترى كل واحد منهم معزه وخافوا لا المعزتين يتلخبطوا مع بعض .
- محجوب : وعملوا إيه ؟
- زينهم : ولا حاجه .. عثمان بص محمدين .. قال له يا مهمدين .. المنزه بتأتى هاتلهبط ماً المنزه بتأك .. إيه الأمل . محمدين بص لعثمان .. وقال له دى بسيطه هالص يا أتمان .. تقطع ودن واحد منهم .. تبقى اللى بودن بتأتى واللى بتتبن بتأتك ، عثمان بص محمدين وهز رأسه بانبساط وقال له يا سلام أليك يا مهمدين وألى أفكارك النيره دى حاجه تمام هالص ، وعنهما وراحوا قاطعين ودن معزه من المعزتين .. كان فيه واحد ابن حلال واقف بيتفرج عليهم حب يلخبطهم راح مسهيم وقاطع ودن التانيه جم كل واحد ياخذ معزته لقوهم الاتنين بودن واحده ، بصوا لبعض كده وهزوا دماغهم بزعل ومصمصوا شفايفهم وعثمان قال لمحمدين : وبأدين إيه الأمل .. المنزه اتلهبطوا تانى ؟ محمدين قال له : يا سلام يا أتمان .. ودا حاجه ترأل .. تقطع رجل واحد واللى بتلاته يبقى بتأتى واللى باربعه يبقى بتأتك ، بص عثمان لمحمدين وهز رأسه بمنتهى الإعجاب وقال له يا سلام يا مهمدين . أما أليك هته دين مخ ، وعنهما وراحوا قاطعين رجل معزه من المعزتين ، ابن الحلال كان واخذ باله برضه خلاهم بيتلقوا كده وراح قاطع رجل الثانية ، وبعدين جه كل واحد ياخذ معزته اتلخبطوا تانى ، عثمان قال لمحمدين : وبأدين بأه يا مهمدين دى حاجه تلهبط خالص . محمدين قال له ولا يكون أنك فكر ، وعنهما وراح خازق عين واحده ، ابن الحلال سهاهم تانى وخرق عين الثانية .. فضلوا على كده ، محمدين يقطع رجل وابن

الحلال يقطع رجل ، لغاية ما المعزتين صفصفا خالص ، ما بقاش فيهم  
حاجه أبدا ، والآخر قعد محمدين على الدكة وهز رأسه بزعل كده  
وقال لعثمان : أقولكش يا أتمان .. عثمان قال له : إيه ؟ محمدين قال له :  
أحسن طريقة أشان آدم اللهيطة . انت تاهد البيضة وأنا آهد السوده .

الشيخ جاد : ( مقهقها ) يا سلام على الذكاء وعلى المخ النضيف .

زكى : طب دلوقت حا تعمل ايه فى الطرايش ؟

زينهم : ( يمسك أحد الطرايش ويقذف به من الشباك ) حاجه بسيطه

قوى ، دلوقت ما فضلش غير طربوش واحد ، أظن مش ممكن  
يتلخبط .

عبد الصبور : ( هائجا ثائرا ) إيه دا يا حلوف يا ابن الحرام .

زينهم : أعمل لهم إيه ما هى أصلها حاجه تلخبط خالص .

زكى : ( يأخذ الطربوش ويلبسه غير أنه يسقط على أذنيه ) ده مش  
طربوشى .

زينهم : خلاص .. يبقى طربوشك اللي تحت .

( يجلس الأربعة حول المائدة )

عبد الصبور : أظن دى أول جلسة أرواح تحضرها يا شيخ جاد ؟

الشيخ جاد : تقريبا .

عبد الصبور : يعنى إيه تقريبا ؟

الشيخ جاد : سبق قبل كده ان انا رحمت مع أمى الله يرحمها عند الشيخ الكومى فى

سيدنا الحسين .. أصل الأسياد كانت تعبها .. وكان واحد منهم

متسلط عليها اسمه الويشى وبعدين الشيخ الكومى طلعه وطلع على جته

البلا الأزرق بعد ما جينا له راس هدهد وفرخه باربع أجنحه ، ومره

تانيه حضرت معاها الزار عند سيده الكوديه ، واللى كان عليها برضه

هوه الويشى نفسه .

عبد الصبور : زار إيه ، وكودية إيه ، وويشى إيه .. دا اللي كان على امك .. دا شغل

دجل ، شعوزه ، نصب واحتيال ، يضحكوا ييه على المهافيسف  
والنخايل ، إحنا هنا مش بتدجل ، ومش بتعمل شغل مسخره من اللي  
كان بي عمله الشيخ الكومى اللي بتقول عليه .. إحنا هنا مش حانجيب  
العفريت اللي كان على أمك الله يرحمها .. إحنا حانجيب أمك نفسها .  
فاهم والا لا ؟

الشيخ جاد : أمى !! أمى نفسها ؟! أمى أنا ؟ يا شيخ قول كلام غير ده ؟

عبد الصبور : أمال إحنا جاين هنا ليه ، يا بجم ، دى جلسة تحضر أرواح ، يعنى حانجيب  
تنزل الأرواح من السما السابعة ، هنا عندنا .. نكلمها وتكلمنا ، أى  
روح عايزين نجيبها نقلر نجيبها .. ومن ضمنها روح المرحومه أمك ،  
والا يعنى فاكر انها جعيصه ؟

الشيخ جاد : ولا جعيصه ولا حاجه .. بس هيه كانت دائما دماغها ناشفه .. الله  
يرحمها كانت عنيده خالص يمكن تعصلج معاكم شويه .

عبد الصبور : ما فيش حاجه هنا اسمه عنيد ولا دماغه ناشفه .. إحنا حانجيبها ونجيب  
أبوها كان ، أنا دلوقت حالا اجيبها لك يا شيخ جاد .

الشيخ جاد : حالا !! حالا ؟! من غير راس مهدد ولا ديك برجل واحده ؟

عبد الصبور : دا كلام فارغ ، دا نصب يا شيخ جاد ، دا احتيال ، قلت ميت مره ،  
إحنا هنا حانجيبها بتمتة البساطة .. إنت شايف الكبايه اللي قدامك  
دى ؟

الشيخ جاد : طبعا شايفها .. بس يعنى بقول ....

زينهم : (مقاطعا) ليه .. هيه المرحومه كانت حبايه فى كبايه تطلع وردايه والا  
ليه ؟

عبد الصبور : اسكت انت يا زينهم الكلب .

زينهم : طب عن إذنك ، اقلع الوش بقى لحسن حافظس ؟

عبد الصبور : إوعى ، إوعى ، إياك .

زينهم : هوه إيه أصله ده ا علوز اشم نفسى شويه يا عالم !

عبد الصبور : ( في غضب ) روح جوا المطبخ شم نفسك شويه وتعالى ، ( إلى  
الشيخ جاد ) خذ بالك بقى يا شيخ جاد . شايف الكبايه دى ؟  
الشيخ جاد : شايفها .

عبد الصبور : أهو دلوقت حانحطها في وسط الترايزه ونحط تحتها الورقه المدوره دى  
اللى مكتوب عليها الحروف الهجائيه كلها والأرقام من ١ إلى ١٠  
ومكتوب عليها لا ونعم ولا أجيب ، من باب مساعدة الأرواح ..  
فاهم ؟

الشيخ جاد : ولا انا فاهم حاجه .

عبد الصبور : لك حق .. فهمك على قدك .. زى اسم الله عليها اختى ام رتيه .  
الشيخ جاد : يا أخى انا مش فاهم إيه دخل الأرواح بالكبايه ، وإيه دخل الكبايه  
بالحروف الهجائيه والأرقام ، وإيه دخل لا ونعم ولا أجيب ، في  
مساعدة الأرواح .. فهمنى .. اشرح لى .

عبد الصبور : حا شرح لك وافهمك كل حاجه ، بس ادينى عقلك الوسخ شويه ،  
حاول انك تفهم .. دلوقت تلاته منا حا يحطوا صوابهم السبايه على  
حرف قاع الكبايه وهى مقلوبه ، يعنى كده ، يشويش خالص ، مجرد  
لمس .

الشيخ جاد : ويعدين ؟

زكى : ولا قبلين .. الكبايه حا تتحرك ، يمين وشمال ، وتنتقل من الحرف ده  
إلى الحرف ده ، وتحدد لنا الكلمات اللى حا تجاوب بها على الأسئلة  
بتاعتنا . فاهم ؟

الشيخ جاد : ولا انا فاهم حاجه .

عبد الصبور : بعد دا كله ما نتش فاهم ؟

الشيخ جاد : حلمك شويه يا سى عبد الصبور ، ما لى أنا وما لى الكبايه لما تتحرك يمين  
وشمال .. وإيه دخل الكبايه عشان تجاوب لنا على أسئلتنا ، وأنا ليه حا  
سأل الكبايه ، بس فهمونى يا اخوانا، إيه حكاية الكبايه ؟

محجوب : ما هي الروح هي التي حاتحرك الكبايه .  
الشيخ جاد : يعنى الروح جوا الكبايه ، امى انا ؟ الست صالحه ؟ حاتخش جوا  
الكبايه ( يضحك يشده ) امى انا جوه هنا .. ( مشيراً إلى الكوب ،  
ومستمرًا فى الضحك ) وبرضك تقول لى فاهم والا لا ، طبعاً مش  
فاهم .

زكى : ليه يا شيخ جاد ، الله لا يسيغك ، مانتش فاهم ليه ا  
الشيخ جاد : امى انا جوا الكبايه ا ( يضحك بشده ) .  
عبد الصبور : أيوه امك جوا الكبايه ، فيها إيه ا كثيره ا معضله ا  
الشيخ جاد : ( مستمراً فى الضحك ) أصلك لو كنت شفت امى ما كنتش قلت  
كده .. دى مره حيينا تدخلها فى أوده ما عرفناش ، انحشرت بين  
الاربع حيطان .. تقوم بسلامتك عايز تدخلها فى كبايه ( مستمراً فى  
الضحك ) .

عبد الصبور : شيخ جاد ، يا شيخ حلوف ، يا شيخ قرد ، يا عرة المشايخ .. أمك الله  
يرحمها ، حاتنزل بروحها مش بجسمها .. حاتنزل كده زى  
القراشه ، تشف وترف .. مش حاتنزل بالبراشوت زى صناديق  
الذخيره والتموين ، أمك اللى كانت بتتحشر فى أوده ، بقت دلوقت زى  
النسمه الطايره .. أمك اللى كانت ماتنفدش من الباب ، بقت تنفد من  
الحيطه ، تنفد من السقف . أمك اللى كانت فى العش .. طارت .  
فاهم ؟

الشيخ جاد : ولا أنا فاهم حاجه .  
عبد الصبور : عنك ما فهمت ، أمك حاتجملك دلوقت وخلاص .  
محجوب : سيك منه بقى يا أستاذ عبد الصبور .. بلاش تضيع وقت ، ياللا بينا  
نبتدى .

عبد الصبور : أهم حاجه عايز سكون تام .. لا كلمه ولا حركه .. عايز نفوسكم  
تصفو وتفكر كم يسمو . عايز بعد عن الماديات ، وارتفاع إلى

السماويات والروحانيات.. كلنا نركز أذهاننا في الأرواح اللي حا  
نستدعيها. في الأشياء الساميه الصافيه الأثيريه غير المنظوره. إنتو التلاته  
كل واحد يمد السبابه بتاعه ويحطه على طرف الكبايه.. أيوه كده،  
لمس.. مد صباعك يا شيخ جاد ما تخافش، الكبايه مش حا تلسعك.  
سكون عميق. مالك بتترعش كده له يا شيخ جاد؟ الله يخرب بيتك.

الشيخ جاد : ( مرتعشا ) هيه نزلت ؟

عبد الصبور : إيه هي اللي نزلت ؟

الشيخ جاد : روح امي ا

عبد الصبور : روح امك لا نزلت ولا طلعت ، لسه ما فيش حاجه لغاية دلوقت ، ما  
فيش داعي للرعشه دي .. والخوف ده .. انت إيه ا جنسك إيه !

زكى : شد حيلك يا شيخ جاد ، شد .. دا حتى عيب عليك . انت عمرك ما  
قابلتش روح ؟

الشيخ جاد : أبدا .. أبدا .

محبوب : أدبك حا تقابل .

الشيخ جاد : ما هو دا اللي مخوفني ، أنا طول عمري اخاف م الضلمه والعفاريت .  
عبد الصبور : انت مهفوف ، لسه برضه بتجيب سيرة العفاريت . احنا هنا مش حا  
نطلع عفاريت ، مش حا نخضر جن .. حا نستدعي أرواح ، أرواح ،  
يعني لو كنت بسلامتك مت ، كنا جيناك ، بغاوتك وسخافتك كده  
زي ما انت .

الشيخ جاد : طيب .. طيب .. ما تزعلش كده .. آدى صباعي أهه .

عبد الصبور : بشويش .. ما تحطش صباعك أوى كده دامش طبق على لوز ، دي  
روح ، خلى إيدك خفيفه .. لمس يدوبك لمس .. مفهوم ؟

الشيخ جاد : مفهوم .

عبد الصبور : أيوه كده ، دلوقت . كل واحد يسبل عنيه . وياخد شوية شهييق  
طويل ، وبعدين زفير . اطرد معاه كل الأرضيات اللي في نفسك

والشوائب والرواسب المادية التي في ذهنك .. عايز صفاء وسمو ..  
مفهوم يا شيخ جاد ؟ ما تفكرش في حاجسه غير الأرواح  
والسماويات .

الشيخ جاد : والترب والقرافات والأموات .. فاهم .. فاهم .. أنا الدمعة قربت  
تفر من عيني .

عبد الصبور : دا اللي انا عايزه . مش عايز ماديات أبدا أبدا .. ودلوقت تحبوا نبتدى  
بمين . أنتهى روح تحبوا نستدعيها الأول ؟

زكى : نبتدى بروح ام الشيخ جاد .

عبد الصبور : فليكن .. أمك اسمها إيه يا شيخ جاد ؟

الشيخ جاد : صالحه .. وشهرتها ابو جلمبو .

عبد الصبور : صالحه وخلص .. ما فيش داعى لاسم الشهره دلوقت ، وخصوصا  
انه أرضى خالص . واسم أبوها ؟

الشيخ جاد : التمس .. المفش .

عبد الصبور : كفايه التمس ما فيش داعى للمفش دى . زمانه قش في السما وشبع  
فششان .. اسم امها ؟

الشيخ جاد : أنا فاكر ! انت حا تفتحلها محضر ! ما دام ناوى تجيبها ابقى اسألها  
هى .

عبد الصبور : اسم امها يا شيخ جاد .. أنا مش بهزر معاك .

الشيخ جاد : والله ما اعرف .. أنا فاكر ان أبويا كان بيقول لها امك .. ام قويق ..  
يبقى لازم اسمها ام قويق . وعلى كل حال لما تنزل تبقى تتأكد ما دام دا  
شئ يهملك أوى .

عبد الصبور : صالحه بنت التمس وام قويق ( ناظرا إلى السقف ) يا ست صالحه ،  
أرجوك تفضللى شويه .

الشيخ جاد : ( ناظرا إلى السقف في دعر ) هى حا تفضل من السقف ؟

زكى : ( يزغده بكوعه ) اثبت يا شيخ حنش .. اثبت ما تضحكشى علينا



## الأرواح .

الشيخ جاد : طيب بس فهموني يا ناس ، فهموني ، حاتي جي منين ؟  
محبوب : دلوقت تشوف ، حط صباغك واسكت ، ودخل لسانك جوا  
بقك ..

عبد الصبور : ( مستمرا في النظر إلى السقف ) يا ست صالحه ، اتفضللي شويه من  
فضلك ، ابنك جاد عايزك .

الشيخ جاد : أيوه يا ام ، عايزك يا ام .

عبد الصبور : ( يزغده ) اسكت انت ، صوتك وحش قوي ، ييطفش الأرواح .

الشيخ جاد : ( هامسا ) آمال اععمل إيه ؟

عبد الصبور : حط صباغك على الكبايه واسكت .. وفكر في امك ، تفكير سماوى  
نقى .

الشيخ جاد : إيه يا خويا اللخبطة دي ، إيه أصله ده ا

محبوب : لخبطة إيه يا شيخ قرد ا

الشيخ جاد : ماتتاش سامع يقول لي إيه ا

زكى : ماله ا يقول لك إيه ؟ يقول لك فكر في امك تفكير سماوى مرتفع .

الشيخ جاد : وهو دا معقول بس يا ناس ا

عبد الصبور : مش معقول ليه يا بلا .. مش معقول ليه ؟

الشيخ جاد : عشان التفكير السماوى المرتفع مش ممكن يجتمع مع امسى في مخ

واحد .. لأنى لما بافكر في امى بتصورها قاعدة قدام الماجور وبتطب في

العجين .. طب . طب . أو ماسكه المنفضه وبتنفض في الكلم ، طاخ

طاخ ، أو طايقه في زمارة رقبة ابويا ، وعلى دماغه ، دى ، دى ..

بالذمه يبقى ده فيه إيه من السماويه والارتفاع .

عبد الصبور : طب بس ، بس .. إيه الأصوات المنكروه دى .. دى أصوات تطفش

سما بحالها .

الشيخ جاد : وانا مالى ، ما هي دى الأصوات اللى كانت بتعملها في حياتها ، عايزنى

افتكرها ازاي امال ، ماسكه كإتجه وبتضرب تقاسم حجاز ، تن ،  
تن ، ماسكه مروحه وبتهوى بها بخفه ودلال ، هس ، هس .. عايزنى  
اتصورها بترقص بصاجات تم ، تم .

عبد الصبور : ليه لا !

الشيخ جاد : لا ، اتصورها انت ، أصلك ما تعرفهاش أنا عارفها كويس .. دلوقت  
تنزل لك بالحنجل والمنجل .. وتشوف ، وتقول يا ريت اللى جرا ما  
كان .

زكى : وبعدين معاك يا شيخ جاد ، الوقت حا يروح واحنا ما عملناش  
حاجه .. أرجوك تسكت ، اسكت خالص وسينا على امك .. واحنا  
نجيبها لك من تحت طقاطيق السما ، بس انسد انت .

الشيخ جاد : ( يضع كفه على فمه ) هاب ، سكت انا .

عبد الصبور : ( مستمر فى النظر إلى السقف ) يا صالحه يا بنت الشمس وام قويق ،  
أرجوك تفضلى شويه .. كلمتين ورد غطاهم ( ينظر إلى الكوب  
الذى لا يتحرك ، ثم يستمر ) يا لله بقى يا ست صالحه احنا مش  
فاضيين لك ، عندنا شغل ( يبدأ الكوب فى قلقلة خفيفة ) .

زكى : بس . بس . أهى جت .

عبد الصبور : ( هامسا لثلاثة ) سكون ، ولا حركة ، ( ناظرا إلى الكوب ) أهلا  
وسهلا .. العواف يا ست صالحه .

الشيخ جاد : ( مرتعشا ) هى نزلت . هى فين ؟ هى فين ؟

محبوب : ( يضربه بكوعه ) اثبت . اثبت يا شيخ جاد . ( الكوب يأخذ فى  
الحركة يمينا وشمالا فى اتجاه الحروف المختلفة ) .

عبد الصبور : ( يقرأ الحروف ويجمعها ويقول بيضاء ) الله يعافى بدنك .. ( مخاطبا  
الروح ) حضرتك الست صالحه بنت الشمس بنت أم قويق ؟

عبد الصبور : ( الكوب يتحرك وعبد الصبور يقرأ ) لا . ( عبد الصبور للروح فى  
دهشة ) الله امال انت مين ؟ ( قارئا ) أنا صالحه قاصين ( متحدثا

للمجموعة ) صالحه قاصين ؟ هي امك اسمها صالحه قاصين يا شيخ جاد ؟

الشيخ جاد : ( مرتجفا ) أبدا .. أبدا ، ولا امي ولا اعرفها .

عبد الصبور : ( للروح ) عدم المؤاخذه يا ست صالحه . الظاهر ان فيه غلط .

حصل .. ( قارئا ) يعني ما حدث عايزني ( للروح ) ما نستغناش يا

ست ، لكن احنا الحقيقه كنا عايزين الست صالحه الخمس أم الشيخ

جاد ، عشان كان عايز بسألها على كام سؤال . ( قارئا ) تاني مرة تبقى

تاخذ بالك وتطلب الروح كويس . دي مسخره وقله حيا ..

( للروح ) متأسفين خالص .. عدم المؤاخذه .. ( قارئا ) يعني

امشي ؟ ( للروح ) اتفضل من غير مطرود ، بس إذا كنت تسمحي

ولو فيها رذالة تبعتي لنا الست صالحه الخمس ( قارئا ) من عينه

( للروح ) تسلم عنيكي ( للشيخ جاد ) راحت تجيبها .

الشيخ جاد : تفكر حا تلاقيا يعني ؟

عبد الصبور : ما تلاقياش ليه ؟ ضروري تلاقيا .

الشيخ جاد : أصل الله يرحمها كان لها غطسات كده في الغوريه وتحت الربع وسيدى

ابو السعود . ما حدث يعرف يعتر لها على أثر ، ربنا يسهل وتلاقيا .

( الكوب يأخذ في الحركة )

عبد الصبور : بس . بس سكون ( للروح ) أهلا وسهلا حضرتك مين ( قارئا )

يرضه صالحه قاصين ( للروح ) أمال ما بعيش الست صالحه الخمس

ليه ، ما لاقيتياش ؟ ( قارئا ) لا .. لقيتها ( للروح ) أمال ما بعيتياش

ليه ( قارئا ) ما قدرتشى تيجي ( للروح ) ليه كفى الله الشر ؟ تعبانه

والاحاجه ؟ ( قارئا ) لأ إيدها مش فاضيه ( للروح ) مشغوله بايه ؟

( قارئا ) بزماره رقة ابو جاد .

الشيخ جاد : ( صائحا فجأة ) هي ما فيش غيرها ، هي بعينها . مفيش حد إيده

مشغوله برقة أبويا غيرها ، طول عمرها طابقه فيها ، مش مخلياها

تفلفص ، هي بعينها .. ازيك يا ام ؟

( أم رتيبة )

عبد الصبور : ( نائرا ) اسكت يا شيخ هباب ، انسد ، لحسن تطفش الروح  
( للروح ) لا مؤاخذه يا ست صالحه .. ده الشيخ جاد ، أصل عنده  
شوية خبل ، عقله على أده ، لسه ما تعلمش الأدب والصلاح في  
حضرة الأرواح ، لا مؤاخذه ( الكوب يتحرك وعبد الصبور يمز  
رأسه أسفا ) . معاك حق ، معاك حق ، هوا كده برضه زى ما  
بتقولى .

الشيخ جاد : بتقول إيه ؟

عبد الصبور : بتقول انك مدب ، وغيبى ، وقليل الأدب . زى امك .

الشيخ جاد : غورى غارك حنش ، وليه هزؤ ما تختشيش ، أنا اللي مدب وغيبى يا بوز  
الإخص يا وش النحس .. ما سمعتكيش امى كانت فصصتك وفرجت  
عليكى اللي ما يتفرج . أم .. أم .. عاجبك يا ام .. الحقينى يا ام .  
انزلى بسرعة يا ام . الوليه بتشتمنى .

عبد الصبور : عيب يا شيخ جاد ما يصحش . اعقل . ما تفضحنش قدام الأرواح .  
( الكوب يهتز بشدة والترابيزه تتأرجح وتهايل ) .

عبد الصبور : ( منزعجا ) يا نهار اسود ، الظاهر ان امك نزلت لها زى القضا  
المستعجل .. تلاقهم دلوقت مسكوا في بعض ، والخناق شغال  
والضرب نازل يرف .

الشيخ جاد : ( فرحا ) ول يا ام .. ادبها يا ام .. كان يا ام . ركبهم الى بالك فيهم ،  
أيوه كده ، كان دماغ ، يا سلام عليك يا ام .

( الكوب مستمر فى الاهتزاز بشدة ثم يطير من المنضدة متهشما ) .

عبد الصبور : ( صائحا فى عجلة ) وله يا زينهم ، كبايه تانيه بسرعه يكملوا فيها  
الخناق .. ياللا يا زينهم .. الخناق حامية قوى .. بسرعه يا وله ..

( زينهم يتقدم بكوب آخر ووضعه على المنضدة .. فيضعون عليه  
أصابعهم ولكن الكوب لا يتحرك ) .

- عبد الصبور : الظاهر ان الخناقه خلصت .  
الشيخ جاد : لازم صالحه قاصين هربت .  
عبد الصبور : استنوا كده لما نشوف حد منهم موجود ؟ سكون . سكون . ارتفاع  
عن الماديات وسمو عن الأرضيات . سمو . سمو . سماويات .  
روحانيات .  
الشيخ جاد : سماويات إيه بس يا سي عبد الصبور ، هوا بعد اللي حصل يقى فيه  
سماويات . بلاش تضيع وقت يا شيخ ، اسألها باختصار .. مين  
انت ؟  
عبد الصبور : انت مين ؟ ( يقرأ ) مين إيه .. يا عومر . انتوا حاتلمسوا والا  
اضلمهالكو ، وادشدشلكوا الكبايه على نفوخكو ونفوخ اللي  
يشددلكو ( للشيخ جاد ) لا .. دى حاجه ما تنطاقش أبدا .. دى  
روح شلق قوى .  
الشيخ جاد : هي أمي ما فيش غيرها ( صائحا بأعلى صوته ) ازيك يا ام ، سلامات  
يا ام ، وحشتيني يا ام ( لعبد الصبور ) اطلع انت منها بقى وسيني  
منى لها .  
عبد الصبور : ( في ثورة ) — دى بقت حاجه هزؤ خالص . دى ما بقتش جلسة  
أرواح ، دى بقت جلسة أودباتيه . ( الكوب يهتز بشدة ) طب بس  
خلاص اسكتي . حقتك علينا . عدم المُواخذة .. اتفضل يا سيدى  
كلمها . كلم ست صالحه التمس .  
الشيخ جاد : سلامات يا ام ، عامله إيه في السما يا ام ؟  
عبد الصبور : ( يقرأ ) برضك ماشيه بالدراع زى ما كنت في الأرض ، ما فيش  
روح تقدر تدوس لى على طرف ، مدوخاهم روح روح .. لو كنت  
شفت العلقه اللي هبديتها لصالحه قاصين كنت عرفت ان امك برضه  
راجل زى ماهيه .  
الشيخ جاد : وازاي ابويا ؟ .

عبد الصبور : ( يقرأ ) مدوخنى فى السما زى ما كان مدوخنى فى الأرض .. فلاتى وبصباص وعينه فارغه .. كنت زمان فى الأرض بعرف اعفقه . لكن دلوقت سايب على حل شعره ، طول النهار يعط فى السما ، ما انا عارفه له قرار ، راح فىن ولا جه منين ، لكن لما يقع فى إيدي عينيك ما تشوف الا النور .. لسه اقربها دلوقت كنت طابقه فى زمارة رقبتة ، مخلصوش منى غير الوليه صالحه قاصين .. ما علينا .. إيه أخباركم انتم . ازاي أختك خديجه ؟ .

الشيخ جاد : مبسوطه وأشيتهارضا .. من يوم ما متى ، وجوزها مهنيا وباسطها وما تختقش معاها ولا خناقه .

عبد الصبور : ( يقرأ ) الضلالى ابن الضلالى .. هو انا يعنى كنت ضبايه على عينه ، والا راكزه على نفسه ، يا حبيبتى يا بتتى ، لازم مفيش حد قادر يسودلك عيشته زى ما كنت باعمل ، لازم راكبك وموريك الويل ، وازاي خالتك زنوبه ؟ .

الشيخ جاد : بتدعى عليكى ان ربنا يجحملك .. وكل ما تشوفنى تقول : جاتها داهيه امك مطرح ما راحت .. من يوم ما ماتت والدنيا رايقه بلوزه .. وانا مش قادر اكلها ولا اهب فيها .

عبد الصبور : ( يقرأ ) أصلك مره طالع لابوك .. وبتسكت لها ليه ؟ خايف منها ؟ .  
الشيخ جاد : لا .

عبد الصبور : ( يقرأ ) أمال إيه ؟ .

الشيخ جاد : الحقيقه انى شايف انها على حق .. أصل انت يا ام كان لسانك زفر قوى ، ما كانش حد يطيقك . فاكره لما دلقتى حلة الملوخيه الحامضه على دماغ الشيخ شوشه ؟ .

عبد الصبور : ( يقرأ ) ما هو كان كان يستاهل اكرم اللى جراه ، مش كان هو اللى مخسر ابوك ، ومعلمه السهر والبصيصه ؟ .

زكى : ( متململا ) يا الله بقى يا أخى قول لها تنصرف ، احنا ما عندناش

وقت للكلام الفارغ ده ( الكوب يتر بشدة ) .

عبد الصبور : طيب ، طيب ، ما ترعلش حقلك على .

زكى : ( خائفا ) ما لها ! بتقول إيه ؟

عبد الصبور : ( يقرأ ) بتقول قول للواد الاقرع اللي ينقرص في لسانه بتلم ، لحسن  
والنبي ، واللى نيا النبي تدش الكبايه على نفوخك .

زكى : لا . مفيش لزوم ، وعلى إيه ؟ قل لها انا راجل غليان ، وصاحب عيال .

الشيخ جاد : عايزه حاجه يا ام ؟

عبد الصبور : ( يقرأ ) عايزاك تطلع القرافه على روحى بخلتين مفتقه وحلة حليه  
وربطه حنا بغدادى .

الشيخ جاد : من عنيه يا ام ، بس المفتقه بقت غاليه أوى اليومين دول ، ما تخليهم حله  
واحد ، هو انتى مبطلتيش الفجمه دى ؟

عبد الصبور : ( يقرأ ) لسه برضك مقوم .. وتموت ع المليم ؟ هوا انا خساره فيه  
خلتين مفتقه .. ؟ إن شا الله تنطس في عنيك ، ياما شلتك وياما  
ريبتك .. آدى آخره تربيتى وتعبى ، تستخسر فيه حلة مفتقه !

محبوب : ( وقد ضاق ذرعاً ) يا أخى أرجوك .. أنا حاطع عليها باربع حطل ..  
بس قول لها تفضل بقى .. وتروح لحاها .. كفايه ، عايزين نشرف  
شغلنا .

الشيخ جاد : طيب يا ام ، اتفضللى انتى بقى .. ابقى سلمى على ابويا ، وقولى له :  
العميره اللي كان مخيبها في الطقيسى .. لقيتها مغشوشه ومخلوطه بجنه  
وتراب .. هى دى اللي جابت أجله .. الله يرحمه ويحسن إليه .. مع  
السلامه يا ام .

عبد الصبور : ( يقرأ ) مع السلامه .

زكى : ( متلهدا بارتياح ) مع ألف سلامه ، حلى عنا بقى دى أم دى يا شيخ

جاد .. الله يكون في عون عزرائيل اللي قبض روحها .

عبد الصبور : دلوقت خلونا نخش بقى ع المهم .. هيه . نبتدى .. ؟

- محبوب : ( بلهجه حزينة ) أبوه .. نبتدى .
- الشيخ جاد : ( يفرك يديه مسرورا ) أبوه نبتدى .. دى الحكايه سهل أوى ..  
قولوا بس أنهى روح عايزين تنزلوها ، وانا انزلالكسو زى  
العصفوره .. طلباتكم ؟ .
- عبد الصبور : اسكت انت يا شيخ جاد .. كل اللى عليك انتك تخط صباeck  
وتسكت . اوعى تتكلم والا تتنفس لحسن تطرد الأرواح .
- الشيخ جاد : أنا بطرد الأرواح . أمال امى نزلت لى ليه ؟ .
- عبد الصبور : علشان امك من نفس النوع الواطى بتاعك .. يعنى فيه توافق بين  
أرواحكم .. يعنى زى المتعوس وخايب الرجا .. فاهم ؟ .
- الشيخ جاد : عيب يا سى عبد الصبور .. تجيب سيرة امى .. دى برضه حرمه  
وميته .. وانا ما احبش حد يجيب سيرة امى أبدا .
- زكى : لا .. باين عليك مترى وابن ناس ! .
- عبد الصبور : دلوقتى حطوا صوابكم على الكبايه .. عايز صمت .. وسكون ..  
سكون .. سكون .. ارتفعوا بأذهانكم .. حلقوا بأرواحكم ..  
سمو .. وارتفاع .. لا ماديات ولا أرضيات .  
( يسمع فجأة صوت دقات شديدة بالهون فى المطبخ )
- عبد الصبور : ( فزعا ) إيه ده ؟ إيه الدق الفظيع ده ؟ إيه الضجه المرعجه دى ؟ واد  
يا زينهم .. بت ياسنيه ؟ .
- ( تدخل سنیه وهى تحمل إيد الهون )
- سنیه : يوه مالك يا سيدى .. بتصرخ كده ليه .. حصل إيه ؟
- عبد الصبور : انتم وحوش .. انتم مجانين .. ايه الدق المريع ده ؟!
- سنیه : هو إيه أصله ده .. دانا بدق الكفته .
- عبد الصبور : ( صائحا ) كفته إيه .. وزفت إيه .. وبلا أزرق إيه .. ده وقت  
كفته !! .. فيه أرواح تنزل على دق الكفته ؟ .. اتقوا إيه .. جنسكوا  
إيه ؟



الشيخ جاد : وما تنزلش ليه على دق الكفته ؟ .. أمال روح العجاني .. وروح الشيمي حاييقوا ينزلوا على إيه .. على دق الطبل .. واللا على دق الزار .. كل شيلله ويشبيلله ، كل شيخ وله طريقه .

عبد الصبور : اسكت يا شيخ هباب . مين قال لك انى عايز انزل روح العجاني والا روح الشيمي .. إحنا عايزين روح ناعمه . روح رقيقه .

الشيخ جاد : طب خلاص . فهمنا كده ، روحى يا بت دق على واحده ونص .  
( سنبة تختفى .. بعد حين يسمع دق مثل طبل الرقص على واحدة ونص ) .

عبد الصبور : ( هائجاً ) بس يا بنت الصرمة .. بلاش مسخره فارغه .. عايزين سكون مطبق ، سكون خالص .. ما فيش كفته ، ما فيش تقليه ، ما فيش ملوخييه ، ما فيش ماده ، فيه سمو ، فيه ارتفاع ، فيه إحساسات فياضه .. فيه عواطف رقيقه .. فيه تفكير صماوى ، سكون ، سكون ، ياللا حطوا صوابكم .. وارتفعوا بأرواحكم .. اسم الروح اللى انت عايزها إيه يا أستاذ محجوب ؟

محجوب : ( يتنهد بحزن ) نعيمه .

عبد الصبور : أبوها ؟ .

محجوب : محمد .

عبد الصبور : ( فى ضيق ) محمد إيه .. لازم يكون محمد حاجه .. هو فيه حد ما اسموش محمد .. دا اسم مشاع .. زى سى .. وزى حضرة .. اسمه الكامل إيه ؟

محجوب : محمد محمد .

عبد الصبور : محمد محمد ا ..

محجوب : أيوه محمد محمد .. اسمه كده محمد محمد ..

عبد الصبور : محمد محمد كده حاف ، ما فيش المنفلوطى ، الأسيوطى ، الفيومى ، حاجه كده مميزه ، ما فيش اسم تالت ؟

- محجوب : الاسم الثالث مقدرش ا قوله .  
عبد الصبور : ليه ا عيب ! .  
محجوب : مش عيب ولا حاجه .  
عبد الصبور : آمال إيه ! فيه إيه ؟ .  
محجوب : لا ولا حاجه ، بس برضك محمد ، اسمه محمد محمد محمد .. أنا ماليش  
دعوه ، انت اللي قلت لي قول ! .  
عبد الصبور : طيب خلاص .. حصل خير ، اسمه محمد محمد محمد .. ويمكن لو  
بحثت شويه كان في تاريخ العيله تلاقى الاسم الرابع محمد والخامس برضه  
محمد ، على كل حال من باب الاختصار نسميه محمد دايره .  
الشيخ جاد : أيوه محمد بن الدايره .  
عبد الصبور : اتلم يا شيخ قطران . اسكت انت يالتي هي أحسن .. اسم امها ؟ .  
محجوب : عديله .  
عبد الصبور : نعيمه بنت محمد دايره بنت عديله . كده مضبوط ؟  
محجوب : أيوه مضبوط .  
عبد الصبور : ( ناظرا إلى السقف ) يا سيده نعيمه يا بنت محمد دايره بنت عديله .  
محجوب : آنسه يا أستاذ ، ماتت قبل ما تتجوز .  
عبد الصبور : عدم المؤاخذه .. يا آنسه نعيمه يا بنت محمد دايره يا بنت عديله ،  
تسمحي بكلمه .  
( الكوب لا يتحرك ) .  
عبد الصبور : يا ست نعيمه .  
محجوب : ( في حدة ) آنسه يا أخي قلت لك ! .  
عبد الصبور : آنسه ، ست ، أهو كله محصل بعضه .. يمكن يا أخي بقت ست في  
السما .  
محجوب : لا أنا واثق منها كويس .  
عبد الصبور : طيب حقلك على ، يا آنسه نعيمه .. اتفضل ، خمس دقائق ، عايزينك

في كلمه بسيطه ، لو سمحت .

( الكوب لا يتحرك ) .

عبد الصبور : وبعدين يعنى .. يا ست نعيمه لحظه واحده .. مش حانأخسرك  
كثير .. ( إلى الشيخ جاد ) خف صباعك شويه يا شيخ جاد ما تتقلش  
ع الكبايه .. بس لمس . مفيش اكر من كده .

الشيخ جاد : أنا يدوبك لا مسها .

عبد الصبور : يا ست نعيمه ، يا آنسه نعيمه ، أرجوك ما عندناش وقت .

( الكوب يتحرك ببطء ) .

عبد الصبور : بس .. الظاهر انها جت ، ركزوا تفكيركم فيها .. ابتعدوا بذهنكم عن  
الماديات ( يقرأ ) حاكمبوش خاناكيك ( يتكلم ) ده إيه الكلام  
الفسارغ ده .

الشيخ جاد : ( لمحجوب ) هي المرحومه كانت بتتكلم بالجزيجى .

محجوب : جزيجى إيه يا جدع .. دى مصريه من شهر مصرى .

عبد الصبور : دى لازم روح شريره بتأوز . أصل فيه أرواح كده فاضيه وتحب  
اللعب والمعاكسه .

الشيخ جاد : يا أخى وفيها إيه ، خليها تأوز من نفسها شويه ، لازم مضيقين عليها في  
السما . الظاهر انهم جد قوى فوق ، هات الروح الملعبانيه دى ،  
نلعب معاها شويه خلينا نفرفش ، حد واخذ منها حاجه .

زكى : هواده وقت لعب يا شيخ جاد ، احنا ف إيه والاف إيه ؟

عبد الصبور : نجرب تالى ، ركزوا أذهانكم كويس . اسموا بتفكركم ، فكروا في  
الآخرة والملايكة والجنه والنار .. سكون ، سكون .

سنية : ( من المطبخ ) آى .. آى .

عبد الصبور : مالك يا بت بتصرخى ليه ؟

سنية : زينهم قرصنى .

عبد الصبور : اتلم يا زينهم لحسن اقوم اقرصك في نافوخك ، اتلم احسن لك . أنا

- قلت ميت مره ما لكش دعوه بسنيه ، لحسن ادبلك .  
زينهم : ( مندفعاً من المطبخ ) هوا إيه ده ، تدبختنى ازاي ! هوا ما فيش حريات ، أمال فين الحريه الخامسه ؟ .  
عبد الصبور : إيه هي الحريه الخامسه دى يا سى زينهم ؟  
زينهم : حريه البصبصه ، حريه تلعيب الحواجب ، والضرب باللسان ، ومع كلاً أنا غرضى شريف .. يعنى بصبصتى شريفه .. أنا عايز اتجوزها .  
آه .  
عبد الصبور : الظاهر انك عايز أجلك ينتهى ، أنا قلت ميت مره مش عايزك تحيب السيره دى على لسانك ، أنا مش عايز سيرة جواز هنا فى البيت ده أبداً ، فوت انجر من قدامى ، حلوف ابن حلوف .  
( زينهم يتجه إلى المطبخ ) .  
عبد الصبور : عدم المؤاخذه ، نيتدى من جديد سكون ، سكون .  
الشيخ جاد : سكون ، روحانيات ، سماويات ، أبوك السقامات ، عارفين المتولوج كله ، ياللابقى خش على الجذ ، انده لها وخلصنا ، هي إيه ؟  
السفيره عزيزه !!؟ .  
عبد الصبور : انت يا شيخ قطران اسكت بلسانك . انت السبب فى العطله دى ، الروح لازم مش عايزه تنزل من تحت راسك ، لازم تفكيرك مش ولا بد .. كده والا لأ ؟  
الشيخ جاد : والله من جهة مش ولا بد ، فهو صحيح مش ولا بد .  
عبد الصبور : بتفكر فى إيه ؟ قولى لى ؟ .  
الشيخ جاد : عايز الحق والا ابن عمه ، أنا أصلى ما حبش الكذب .. بصراحه كده كنت يافكر فى البت هاتم .  
عبد الصبور : هاتم . هاتم إيه ؟ .  
الشيخ جاد : هاتم زبده ، هاتم قشطه ، هاتم حلويات ، هاتم سكر نبات .. يا خسارتك يا هاتم ، ضاعت من إيدى . يا خساره ، يا ألف خساره .

عبد الصبور : إيه بس جرا ايه ؟ .

الشيخ جاد : كان ميعادها امبارح تيجي تشطف حنتين الغسيل ، والبيت كان فاضى مفهش حد غيرى ، وقلت يا واد احسن طريقه عشان تيلفها ، اقعدع الطشت خد لك فمين معاها .. وقعدت ، وهات يا دعك لما إيدى بقبقت ، وبعدين طلعت تنشر الهدمتين ، واستناها تنزل ما نزلتش .. أتايها زاغت من سطوح الجيران .. أنا أصلى غلطان ، الحق على . أستاهل ألف صرمة .. كان لازم اطلع انشر معاها ، مش اسببها تضحك على وتزوغ منى .. أهو أنا عمال افكر . لو كنت طلعت ونشرت معاها ، مكاتتش قدرت تزوغ منى وكانت نزلت معايا ، وكنا قعدنا فى البيت سوا .

عبد الصبور : اخص ، اخص ، اخص على التفكير السافل المنحط .. شيل صباeck من على الكبايه ، جاك قطعه دا السمو والارتفاع اللى باطلبه منك يادنى يا رمرام . هاتم زبده ، وهاتم قشطه ، وفمين غسيل ! اخص . اخص . شيل صباeck . يادون يا بأف .

الشيخ جاد : طب خلاص شلته ، داماله محموق كده ليه ، هى الدنيا طارت ، هوا الغسيل حرم ، دا غسيل ، داحتى ربنا قال النظافة من الإيمان وانا كنت بعمل مع هاتم شوية إيمان ، هو إيه ، حرام ؟

محبوب : ( إلى الشيخ جاد ) خلاص .. خلاص .. انتبيننا ، شيل صباeck واسكت .

عبد الصبور : أنا حا حط صباeck معاكم .. ابعد يا شيخ جاد ؟

الشيخ جاد : بعدت . اما اشوف كده حا تعملوا إيه بشطارتكم وتفكيركم السامى ، يا الله اتفضلوا .

عبد الصبور : سكون ، سكون .

الشيخ جاد : سماويات .. روحانيات .. يا خسارتك يا هاتم يا سكر نبات .

عبد الصبور : سكون ، سكون . سمو وارتفاع .. ( ناظرا إلى السقف ) يا نعيمه يا

بنت محمد محمد محمد يا بنت عديله اتفضلى انزلى شويه من فضلك  
وإحسانك ( الكوب لا يتحرك ) . يا ست نعيمة وحياة والدك تنزلى  
شويه ، كلمه واحده بس مفيش غيرها ( الكوب لا يتحرك ) طب إذا  
كتتى مش فاضيه قولى لنا انك مش فاضيه ( الكوب لا يتحرك ) لا ،  
دى حاجه تفور الدم خالص ( للمجماعة ) لازم فينا واحد وسيط مش  
كويس .

الشيخ جاد : اوعى يا شيخ كده ، شيل صباعك شيل ، أنا حافر جك ازاي تنزلها ..  
آل من فضلك آل .. ده مره يا سى عبد الصبور ، والنسوان ما يجوش  
الا بالدق على دماغهم آل إيه كلمه واحده من فضلك .. اوعى كده ،  
شيل إيدك من على الكبايه يا سى محجوب ، وانت عمال بتترعش  
ووشك اصفر زى الكرم .. سيبنى عليها بلا مياعه ( يضع أصبعه على  
الكوب بدل محجوب وينظر إلى الكوب صائحا ) انت يا بنت يا  
نعمة انزلى جاكى نزله فى ركبك .. انزلى وحياة امك بلا مرقعه  
فارغه .. انزلى بقول لك يا بت لحسن اخلى امى تجيبك من شوشتك .  
محجوب : لا .. أنا ما سمحشى .. دى وقاحه .. دى قلة أدب .. أنا ما سمحشى  
لحد يخاطب نعيمة باللهجه دى .

الشيخ جاد : طب بس اتلهى انت واسكت ( للروح ) يا الله يا بابت انزلى بالتى هي  
أحسن بدل ما خلى امى تجرجرك على ملا وشك وتفرج عليكى اللي ما  
يتفرج ! ( الكوب يهتز ) شفتى مش قلت لكم النسوان ما يجوش الا  
بالدق ( للروح ) ازيك يا بت .. ازاي امك .. انتى نعيمة بنت  
عديله .. ( الكوب يتحرك يمينا وشمالا ، والشيخ جاد يقرأ ) ..  
أيوه .. وانت مين ؟ ( للروح ) محسوبك الشيخ جاد .. سأؤذن  
الصنادقيه ودرج عجور وما بينهما ( يقرأ ) وعائز منى إيه ؟  
( للروح ) عائز سلامتكم .. عائز تسامر شويه .. فيه مانسح ؟  
( محجوب ) ما تستلموها اتتوا بقى يا جماعه. أنا نزلتها لكم وانتوا

عليكوا الباقى .

عبد الصبور : ( للروح ) يا ست نعيمه .. فيه هنا واحد قريب منك جدا .. عايز يكلمك ( يقرأ ) عايز منى إيه ( للروح ) والله عايز يقول لك شوية كلام كده ( محجوب ) اتفضل يا أستاذ محجوب .. كلم الست نعيمه .

محجوب : ( مرتجفا ) هي دى نعيمه !؟ حقيقتي نعيمه !! أنا مش مصدق .. أنا خايف قوى .. أنا مش حا قدر اكلمها ، أنا كنت ما بقدرش اكلمها وهي فى الأرض .. كنت لما بقعد معاها لسانى ينعد .. وقلبي يدق .. زى اللى حا ينط من صدرى .. ازاي اقدر اكلمها دلوقت .. مش ممكن .. مقدرش اكلمها .. أبدا .. أبدا .

عبد الصبور : ( فى قهر ) كلمها ياسى محجوب ما تخليهاش واقفه ملطوعه .. كلمها ما يصحش .

الشيخ جاد : كلمها كلمتك اجنابك .. أمال كنت مسروع عليها ليه . لما انت بسلامتك مش قادر تكلمها ا خايف من إيه ؟ .. يعنى هي حا تكون اقوى من امي .. كلمها بلا نسونه .

محجوب : طب بس استنوا على شويه .. خلونى اشم نفسى وابلع ريقى .. حرام عليكوا يا ناس . دانا فى حال يعلم بهارينا .. ( هاهما ) نعيمه .

عبد الصبور : زعق شويه .. بلاوى إيه دى ا .

محجوب : ( للروح ) نعيمه .

( الكوب يتحرك ) .

عبد الصبور : بتقول ما له كده بيصوصو .. زى ما يكون بيتكلم مسن تحت الأرض .. اتكلم زى البنى آدمين .

محجوب : نعيمه .

الشيخ جاد : ( فى سخريه ) إيه اللى نعيمه .. نعيمه .. ما حنا عارفين انها نعيمه .. وهي عارفه نفسها نعيمه .. انطق قول لها عايز إيه .. انت فاكر انها

- فاضيه لك .
- محجوب : ( للمروح ) أحبك يا نعيمه .
- عبد الصبور : ( يقرأ ) حبك برص .
- الشيخ جاد : تعجيبني يا بت يا نعيمه يسلم فمك .. آل احبك آل ، ياخى حبك الضب و غضب عليك الرب .
- محجوب : إيه ؟ . هي بتقول لك كده ؟ مش ممكن .. هي ما تقولش كده أبدا .
- عبد الصبور : أنا ما جبتش حاجه من عندي يا غبي ، ابقى اقرا بنفسك الحروف .  
باللا كلمها . هي مش فاضيه لك .
- محجوب : حاضر . حاضر . حاكمها ( للمروح ) نعيمه أنا مش طابق الحياه بعدك يا حبيبتى ، مش قادر اعيش فى الدنيا من غيرك ياختى .
- عبد الصبور : ( يقرأ ) طيب وإيه اللي مقعدك فى الدنيا إيه اللي ما نعلك من الموت .
- الشيخ جاد : آه حقيقى .. لها حق . إيه اللي ما نعلك ؟ .
- محجوب : ( مرتبكا ) اللي ما نعننى ، اللي ما نعننى ( الشيخ جاد ) أقول لها إيه ، إيه اللي ما نعننى ؟ .
- الشيخ جاد : قول لها أى حاجه ، ما دام حضرتك لازم تتفلسف وتقول لها انك مش قادر تعيش من غيرها ، قول لها الغلا ؟ .
- محجوب : الغلا ١١٩ غلا إيه ا
- الشيخ جاد : غلا الخانوتيه .. غلا الموت . هوا فى حاجه مصبره الواحد على غلا المعيشه غير غلا الموت .. كل حاجه دلوقت بقت متعذره .. الزيت والبقول والسكن والموت .. قول لها كده ..
- محجوب : ازاي أقول لها كده ، عشان تفتكرنى فقير .. شحات .. ؟ وبعدين تحتقرنى ، أنا طول عمري مفهمها ان انا راجل متيسر ، ومبيحج ، ومتريش .
- الشيخ جاد : طيب خلاص ، حقتك على ، قول لها اللي يعجبك ، قول لها انك متريش .



عبد الصبور : اتكلم بقى يا أخى خليت الروح زهقت . انت أصلك إيه ! انطق ! ..  
محبوب : ( للروح ) مش قادر اموت يا حبيبى .. عشا عايش على ذكراك ..  
الى مهون على عيشتى إنى بشوف طيفك فى المنام .

عبد الصبور : ( يقرأ ) يقول إيه يا ختى ده ؟ .

الشيخ جاد : سيك منه دا بيخرف .

محبوب : ( للروح ) ذكراك هى كل حاجه لى ، طيفك هو اللى مصيرنى  
ومسلىنى ، بافتكرك ليل ونهار ، بافتكر عنيك وبقك وكلامك  
الخلو .

عبد الصبور : ( الكوب يهتز ) ما فيش لزوم .

محبوب : بتقول إيه ؟ .

عبد الصبور : بتقول يا سم .. يادم .. يا كبه .

محبوب : كذاب ما بتقولش كده .. هى بتحبنى زى ما يجيبها ( للروح ) بفتكر  
كلامك الخلو وبتفكر تحديه فوقى والشفاه اللى كنت بتفياها على .. كان  
هزارك لطيف .

( الكوب يهتز ) .

محبوب : بتقول إيه ؟ .

عبد الصبور : بتقول ما كانش هزار .. ده كان جد .

محبوب : كذاب ما بتقولش كده ( للروح ) بفتكر فى الايام الخلو اللى قضيناها

سوى .. وفى الايام اللى كنت بحلم بيكى ، وبفتكر ازاي سهينى ،

وموتى نفسك ، وسيتينى فى الدنيا لوحدى .. ليه يا نعيمه ..

تتسرعى ، حقيقى الظروف ما كانتش ملائمه لجوازنا ، حقيقى

الأحوال العائلية كانت بطاله .. لكن كل شىء كان مسيره يتصلح ،

وكنا برضه مسيرنا نتجوز ، ليه تتحرقى عشان خاطرى ، وانا حياتى

كانت فداكى .. ليه يا نعيمه ؟!

( الكوب يهتز )

محجوب : إيه ؟ .. فيه إيه ؟ بتقول إيه ؟  
عبد الصبور : بتقول المغفل دا بيخرف بيقول ايه ؟  
محجوب : لا .. دى دسيسه . انتوا عايزين توقعوا بينا وهى حيه .. انتوا كان  
بتوقعوا بينا وهى ميتة ؟ حرام .. حرام عليكم .  
( الكوب يهتز ) .

عبد الصبور : ( يقرأ ) حرام إيه .. حرمت عليك عيشتك .. حب إيه وهباب إيه  
اللى كان بينا . أنا انتحرت عشان خاطر ك ؟ .. يا أنخى هزلت يا سى  
محجوب ليه الرجاله خلصم ، والا عدم .. أنا اللى زهقت مسن  
عيشتى ، أنا اللى لقيت الدنيا ما تستاهلشى .. أنا اللى يشت من كل  
حاجه مش لاقيه فيه عدل ولا رحمه حواله أبدا فى الدنيا بتاعتكم ..  
العدل فيها باللسان بس والرحمه بالكلام . لاقيه نفسى محرومه من كل  
حاجه . أبويه بيرى ثمانيه زى وياخذ اتناشر جنيه .. يعنى لو كان  
بيرى ثمان معيز ما كانش قضاهم أكل .. ثمان معيز .. واحنا ثمان  
بنات ، لنا بق عايز ياكل ، وجسم عاوز يتغطى ، وعنين بتجص  
وتشوف وتقرأ المجلات وتفرج ع الصور ، وتشوف الهدوم والصيفه  
والفلوس اللى بتبعت ، وتشوف بنى آدمين زينا متخومين ، واحنا  
سدوبك بتلاقى اللقمة .. كنت عايشه محرومه إلا من النظر  
والإحساس .. ياريت ما كانش عندو نظر ولا إحساس ما كنتش  
حسيت بالحرمات اللى انا بيه ، ولما كان الحال يفيض لى كنت أقول  
يمكن تفرج بالجواز .. لكن لما افكر كنت الاق ان جواز المحرومين حا  
يكثر المحرومين ويزود الحرمات .. وكنت الاق ان انا حاجتى على  
اولادى زى ما جنوا على أهلى .. قلت يا بت احسن حاجه .. سيبى  
الدنيا ، ونقصى المحرومين محروم .

الشيخ جاد : لكى حق يا نعيمه يا بنتى . الله يرحمك .  
محجوب : (للروح) يعنى ما متيش علشانى ؟ . يعنى ما كنتيش بتحيينى يا خاينه ؟ .

الشيخ جاد : بلاش لماضه بقى .. قالت لك ماتت من الجوع .. يعنى ماتت م  
الجوع .

محجوب : ( للمروح ) وانا اللي كنت فاكر انك انت انتحرت عشان خاطر مش  
قادر اتجوزك ، أنا اللي كنت مخدوع فيكى وفاكر انك مت من حبي ..  
أنا اللي لابس عليكى بدله سوده وكرافته سوده ، وحالف ما اقلعهم  
أبدا .

عبد الصبور : ( يقرأ ) كرافته سوده ، وبدله سوده . إانت فاكر ان احنا هنا حاسين  
بالكرافته السوده والبدله السوده .. دى تفاهة أحياء ، وهياقة بنى  
آدمين .. روح يا خويا امضغهم .

زينهم : ( يعنى داخل المطبخ بصوت مسموع ) .

فى ليله شفت الحبيب ساهى وباكى العين

وع الرصيف ماشى يطوح على الجنسين

قلت الهوى عذبه والبعد كان له فين

خبطته ورده لقيته طب مات م الجوع

يا ريتنى يا حلو شقه وطعميه وقرص متين

محجوب : ( للمروح ) اخص عليكى ( يخلع الكرافته السوداء ) اخص عليكى

يا خايته .. يا خسارة حزنى عليكى .. يا خسارة الكرافته السوده ..

شاريها بنص ريال .. خدى أهى .. ( يقذف بالكرافته السوداء على

الأرض ثم يغمى عليه )

عبد الصبور : ( صائحا ) زينهم .. سنيه .. الحقونا بكباية ميه .. الحقونا بنشادر ..

يا ناس .. يا هوه .. الراجل سخسخ الحقوزه .. حاي موت .

## الفصل الثاني

المنظر : حجرة جلوس عتيقة بها بعض الأرائك والكراسي ، ومكتب قديم في الركن ، وعلى جدرانها صور قديمة وآيات قرآنية ، وعلى اليسار باب يفضى إلى الصالة وعلى اليمين شباك وفي المواجهة باب زجاجي كبير ذو أربع ضلقات تبدو منه حجرة نوم عبد الصبور الفدى ، في منتصفها سرير حديد ذو أربع أعمدة وضع كل عمود في صفيحة ، وأمام السرير كرسي وعلى الحائط مشجب ورف عليه كتب صفراء وعلى أعلى الباب الزجاجي علفت ساعة حائط تشير إلى الثالثة والنصف .  
يرفع الستار عن سنية وهي تنظف حجرة الجلوس .

## المشهد الأول

سنية : ( تغنى ) وان كنت خايف من امى دى امى على ستوره .. وان كنت خايف من ابويا دا ابويا عدى المنصوره .  
زينهم : ( يدخل مندفعاً حاملاً في يده مكنسه ) انا اخاف من ابوكى .. ليه ؟  
هفيه .. دانا لو خبطته خبطه حاجيه الأرض .. آل عدى المنصوره آل ..  
ما يعدى واللا ينفلق ، أنا يهمنى .. دانا زينهم والأجر على الله .. أنا زينهم صبي زكيه الملدنه .. قاهرة الوحش .. إيدك بقى يا بت يا سنيه .. قرنى على يا سنسن يا لى زى اللوز .  
سنية : خليك عندك بالتى هى أحسن .. اوعى تقرب لحسن وسيدنا الحسين اخبطك بالزهره اللي فى إيدى أفتح قرنتك .  
زينهم : ( فى غزل ) خشى على خشى .. يا سنسن يا لى زى المشبك اللي بيخر

- عسل .. اخبطيني بالزهريه .. افتحي قرني .. موتيني .. ادبحيني ..  
( مغنيا ) وان دبحيني بايديكى عيب على ان قلت آه .. آه .
- سنية : ابعدا يا زينهم واقصر الشر .. وقول اللهم اخزيك يا شيطان ، ابعدا احسن لك .. لحسن والنبي أرقع بالصوت .. أجيلك سيدى عبد الصبور .
- زينهم : يا باى .. يا لطيف .. طب بس اخفيها سيره بقى .. سيدك عبد الصبور .. جاتك نيله على سيدك عبد الصبور .. ابقى خليه ينفكك .. بكره يضيع عمرك زى ما ضيع عمر المغفله الكبرى .
- سنية : هي مين دى المغفله الكبرى ؟
- زينهم : يعنى حا تكون مين غير سنك ام رتبه .. فضل يضيع منها العريس ورا العريس .. لغاية ما بلغت ارذل العمر .. وحا تطلع من الدنيا قفاها يقمر عيش .. خليكى انت وراسى عبد الصبور لغاية ما تحصلى ام رتبه .. يايت اعقلى .. حطى عقلك فى راسك واسمى كلامى .. طاوعينى يا سنيه لحسن تندمى ؟
- سنية : أطاوعه فى إيه المنيل على عينه ده ؟ ما نيش عارفه اطاولك فى إيه .. واسمع كلامك فى إيه ؟
- زينهم : الكلام اللى قولتهولك الجمعة اللى فاتت لما كنت بتشرى الغسيل فوق السطوح .
- سنية : ما نيش فاكره قلت لى إيه .. أدبك طول النهار بتقول كلام فارغ زيك .. هوا انت وراك ايه غير الكلام الفارغ !
- زينهم : لا يا سنية دا ما كانش كلام فارغ .. دا كان كلام جد .. كلام صحيح .
- سنية : قولهاولى تانى ، ما نيش فاكره .
- زينهم : طلبت منك تتجوزينى .
- سنية : أنا ؟ أتجوزك انت ؟ ليه .. انطسيت فى عنيه ، انخبطت فى نافوخى ، اتجنتت .. خلاص .. الدنيا صفصفت عليك يا سى زينهم ، الرجاله خلصم يا روح امك ، ومع كلات انت حقيقى بتكلم جد ، والا هزار ؟

- زينهم : هزار ازای يا سنسن ، هي الحاجات دى فيها هزار .. الدنيا دى فيها حاجتين الواحد ما يقدرش يهزر فيهم أبدا .
- سنية : ايه هما ؟
- زينهم : أول حاجه الجواز .
- سنية : والتانيه ؟
- زينهم : الموت .
- سنية : يا باى على ملافظك الوحشه ، صدق من قال الملافظ سعد .. ولما انت عارف ان الجواز وحش كده زى الموت .. حتتجوز ليه ؟
- زينهم : وحنموت ليه !!؟
- سنية : قضا .
- زينهم : أهو دا بروضك قضا .. لا بد منه ، بس قضا عن قضا يفترق ، قضا يحط في إيدك الكلبش .
- سنية : والقضا التانى ؟
- زينهم : يخلصك منه .
- سنية : ولما انت عارف كده ، بتجرى ورا الكلبش ليه ؟
- زينهم : ( يقترب منها ) أموت في الكلبش .. أموت في طره .. يا وعدى ع العسل النحل اللي بيعخر .. حا تحطى الكلبش في إيديه إمتى يا سنيه ؟
- سنية : ابعده عنى كده .. كلبش لما يطبق على زمارة رقبتك .. آل كلبش آل .. ليه قالوا لك على مأمور ابو زعبل ، آل كلبش آل .. حقه بطلوا دن واسمعواده ، ومع كل .. انت بتكلم جد ، ولا بتهزر ؟
- زينهم : قولتلك يا حبيبتى يا سنيه .. الكلام دا ما فيهش هزار . دا جد وابن جد . أدى إيدى حطى فيها الكلبشات .
- سنية : ما كانش ينعز يا خويا .. ياريت كان عندنا يا سى زينهم ، ومع كل سيبنى

اشاور عقلی .. خلینی أفکر .. هی المسأله کده سبیلی .. دا جواز .. دا  
عمر .

زينهم : تعجیبنی كده .. أهو كده بقیتی بت عاقله .. مش .. أتجوزك لیه ؟  
انطسیت فی عنیه ، انخبطت فی نافوخی ما یصحش الكلام ده یا سنسن ..  
أنا برضه بنی آدم ، ولی قیمه عند نفسی ، والأحا تعملی زی الخبول  
الأكبر !

سنية : دا یقی مین ده ؟

زينهم : أخو المغفله الكبری .

سنية : بس .. عرفته ، والنبی راجل طیب ویستاهل كل خیر .

زينهم : طیب . طیب . لكن عجول عجول ( مقلدا عبد الصبور ) خبی وشك  
لحسن ما بطیقوش .. غطی وشك بسرعة .. شكلك یلبشنی .. بخاف  
من عینیک .. بالذمه دا كلام یتقال . أنا وشی ما ینطقش ؟ . عینیسه  
وحشین ! ( ینظر إلی نفسه لی مرآة فی الحائط .. ویلعب حواجه ) .

## المشهد الثاني

( تدخل أم رتييه ) ..

أم رتييه : كان .. كان .. یا سى زينهم .. أدى اللى كان ناقصنا . تقف فی المرايا  
وتلعب حواجبك .. خلاص .. كملت المعاني لما تلعب حواجبك فی  
المرايا .. عاجبك أوى شكلك اللى زى بوز الإخص . قال لو كان القرد  
شاف ...

زينهم : ( مقاطعا ) خلاص مفیش لزوم ، یعنی لازم تصدى نفسی .. قرد وما  
قردش .. هوا یعنی الواحد كفر .. لما يشوف وشه فی المرايه ؟!  
أم رتييه : ما كفرش ولا حاجه .. بس قلبی عليك ، تغم قلبك وتسد نفسك . كان  
نفسی تتفرج على حاجه عدله . ما علينا . فوت انجر شوف شغلك ..

اوصل لعم شرف هات منه قزازه كازوزه للضيف اللي جى .. ياللا فوت .

( يخرج زينهم بعد أن يقذف بقبلة في الهواء لسنية )

زينهم : ( لأم رتيه وهو يهيم بالانصراف ) لا مؤاخذه يا ست . دى حاجه

كده ع الماشى .. دى دفعه أولى من إيجار السجن .. دى عربون تمن

الكلبش ( يصفق بيديه ) أموت في ابوزعبل عقبال عندك يا ست .

أم رتية : قطع لسانك .. قليل الحيا ما تحتشيش .. إن شا الله انت وعشره

زيك .. يسنسلوك من رقتك ومجدفوك في أسفل سافلين .. سجن

آل .. وكلبش آل .. بره وبعيد .

زينهم : ( لسنيه وهو يجوار الباب ) بقول لك على نياتها .. ما لهاش في الطيب

نصيب . ( لأم رتيه ) انت لو عرفت السجن اللي قصدى عليه ..

والكلبش اللي بالى فيه .. لوديتى نفسك في طوكر .. آل بره وبعيد ..

قولى ان شاء الله ألف انشا الله . عقبال الحبايب . ( يخرج زينهم )

## المشهد الثالث

أم رتية : قصده إيه المهفوف في عقله ده ؟

سنية : ما تاخذيش على كلامه يا ست .. أهو عمال بيخرف .. حدواخذ منه

حاجه غير كده .

أم رتية : امال كلبش إيه ، وسجن إيه اللي حياجره ويدفع عربونه ؟

سنية : ( تضحك ) ربنا يديكى يا ستى .

أم رتية : انت كمان بتقولى كده ؟

سنية : أيوه والنبى يا ستى ، لو عرفت السجن اللي عايز يخش فيه ، والكلبش

الى ناوى يحطه في إيديه .. لتدعى بيه على الحبايب .

أم رتية : ولا انا فاهمه حاجه .



- سنية : زينهم قصده بالكلب والشجن ، الخطوبه والجواز .
- أم رتيبة : طيب وهو اماله ومال الخطوبه والجواز .. هو اماله وش الفقر ده .
- سنية : ( تصحك ) أصله يا ستى عقبال عندك خطبتي ، والنبي يا ستى بقاله  
كام شهر وهو ييزن على وداني .
- أم رتيبة : ( تبدو عليها الفرحة ) بقى كده .. المنيل على عينه أبو تعسونه كان  
بيخطب ويتجوز .. وقلت له إيه ؟
- سنية : قلت له .. لا .
- أم رتيبة : لا تسب مفاصلك ، فيه حد تجيى له النعمه لغاية عنده ويرفضها ،  
حد في الدنيا يجيه عريس ويقول لا ؟
- سنية : مش بتقولى عليه المنيل على عينه أبو تعسونه ؟
- أم رتيبة : طيب وفيها إيه ، دى حاجه ودى حاجه .. دى بشقه ودى بشقه ،  
مش راجل ؟ كفايه ؟
- سنية : بس يا ستى حاله على أده .
- أم رتيبة : بكره ربنا يعدل حاله ، والا يعنى حانكتر على ربنا ؟
- سنية : أنا يرضه يا ست ما قلتش لا .. يعنى لا .. قلت سيني لما افكر .
- أم رتيبة : وتفكرى في إيه ؟ وليه ؟ هى دى حاجه عايزه تفكير ، ارضى يا  
بت .. ارضى به ، ذا اللي ما يرضى بالخوخ يرضى بشرابه .. وعريس  
في اليد ، أحسن من عشرة عند الخاطبه .
- سنية : بس يا ستى خايفه من سي عبد الصبور .
- أم رتيبة : وماله سيدك هباب ؟
- سنية : خايفه لا ما يوافقش .
- أم رتيبة : وهو اماله .. له عندك حاجه .. أبوكى ! أمك ! .. حقه بطلوا ده  
واسمعوا ده .
- سنية : أنا أصلى شايفاه دايمًا ساخط على زينهم وما يطيقش يشوفه .. ودايمًا  
يقول لى اوعى منه يا بت دا أصله خيس وخبيث .

- أم رتيبة : هو افيه حد عنده مش خسيس وخييث .. هوا كده دايمًا يكره العرسان  
ويطلع فيهم القلط الفاطسه .. الود وده الجواز يحرم على العالم ..  
والناس تقعد كلها زيه كده عزاب حقه عجائب .. مش كفايه ميل  
بختي .. هوا عايز يميل بخت اللي يعرفه واللى ما يعرفوش .. ارضى يا  
بت ارضى واسمعي كلامي .. ارضى دا العمر مش بعزقه ، والايام  
بشجري زى ما يكون حد وراها بالكرباج .
- سنية : واذا ما رضاش ؟
- أم رتيبة : هو امين دا اللي ما يرضاش !
- سنية : سيدى عبد الصبور .
- أم رتيبة : ولا يهك .. كل واحد يقول يا الله نفسى . آل يا روحى ما بعدك  
روح .. شوفى مصلحتك يا بنتى .. بكره لا ينفكك مت ولا سيد ..  
ما حدش له عندك حاجه .. الدور على اللي مسنستنى معاه ومجرجرتنى  
وراه .. وسادد طريقى ومميل بختى .. ويبطفش منى العرسان بوشه  
اللى يقطع الخمره م البيت .. ربك يستر النهارده .. قادر يا كريم تعقله  
وتهديه ، وتحلى فى عينه سى سيد افندى .. وتجعل الخير على قدوم  
الواردين وتحلى نهارنا لبن .
- سنية : ان شاء الله يا ستى سليمه .
- أم رتيبة : سليمه يا بنتى ياذن الله .
- سنية : ربنا يتمم بخير .
- أم رتيبة : خير وألف خير .. أنا عينى الشمال بترف ، وعمرها ما رفت الا على  
خير .
- سنية : خير يا ستى خير .
- أم رتيبة : وحكاية جوازك دا كان فال كويس .. خلانى استبشر خير .. هوا  
ياختى اتأخر ليه !
- سنية : ما تقلقيش يا ستى .. أهو زمانه جاى .. هوا معاده كام ؟

- أم رتبية : ست ام سيد قالتلى حاييجى الساعة اربعة .  
سنية : لسه بدرى قدامه ربع ساعه .. يكون سيدى عبد الصبور شرب  
القهوة وشم النشوق ووزن دماغه .. يقابله وهو فايق ورايق .  
( يسمع صوت عبد الصبور افندى وتدور المناقشة بينه وبين زينهم  
من الخارج ) .  
عبد الصبور : ( صارخا ) القبقاب .  
زينهم : ( يجيبه من الخارج أيضا ) حاضر . حاضر حا جيهورك .  
عبد الصبور : يا باى .. يا باى . يا حفيظ يا مغيث .. خيى وشك يا خسيسر يا  
إبليس يا خبيث يا منحوس .. خيى وشك لحسن بتلبش جتنى .  
زينهم : امال حا جييلك القبقاب ازاي وانا مش لاقى الوش قدامى عشان  
البسه ، خيى وشك انت لغاية ما جيهورك .  
عبد الصبور : انا حا غمض عنيه ؟  
زينهم : يكون أحسن .  
عبد الصبور : خلاص .  
زينهم : لسه .  
عبد الصبور : خلاص ؟  
زينهم : لسه .  
أم رتبية : الحقيه بالقبقاب يا سنيه يا حبيبتى .. الحقيه قبل ما يتلبش وبخلى يومنا  
زى بعضه .. شوفيهوله تحت الكنبه اللي قاعد عليها ، ولا دورى عليه  
فى رجليه .. ما هو اليومين دول خلاص عمى .. تبقى الحاجه فى إيده  
والا فى رجليه ويقلب الدنيا عليها .  
زينهم : ( صائحا من الخارج ) يا سلام . يا سلام . امال إيه اللي فى رجليك  
ده ؟  
( عبد الصبور يدخل من باب حجرة النوم وهو يطرقع بالقبقاب  
وقد ارتدى جلابا وطرطورا وظهرت أرجل السروال الطويل من

أسفل الجلاب ( .

عبد الصبور : مش قصدى على القبقاب ده .. قصدى على القبقاب أبو جلاجل ..

القبقاب الموسيقى .. هو اللي بيهدى أعصابى ويريح جتنى .

أم رتية : روحى يا حبيبتى يا سنيه شوفى له الحاجه اللي هوا عايزها . طيبى

خاطره شويه يا سنيه يا بنتى . هديه لاجل خاطرى ، وابعدى عنه

المقروص زينهم ما دام بيلبش جتنه .

( أم رتية تخرج من باب الصالون .. وسنيه تدخل إلى حجرة النوم

من الباب المتسع حيث يجلس عبد الصبور افدى على فوتيل أمام

السريـر وبجواره متضدة صغيرة ) .

## المشهد الرابع

عبد الصبور : القبقاب أبو جلاجل .

سنية : عنيه يا سيدى . أبو جلاجل وأبو صاجات ، وأبو سنه ذهب لولى .

عبد الصبور : اخلصى بسرعه .

سنية : بس صبرك على ياسيدى ، انا حا جيهورك من تحت طقاطيق الأرض .

( سنـية تبـحث تحت المقعد وتحت السريـر .. ثم تخرج قبقاب منقوش

بجلاجل ) .

سنية : اتفضل يا سيدى .. قبقاب العافيه .. قبقاب السعد والمنا .

عبد الصبور : ومخبيته ليه تحت السريـر ، هوا معيه والاميره !

سنية : أبدا .. يا سيدى أبدا .. دا زينة القباقيب .. احنا بس خايفين عليه م

العين ( تصدر حركة منع الحسد وتدور بأصابعها متجمعة فوق

القبقاب ) .

عبد الصبور : كلام فارغ ، أنا ما صدقش فى العين .. أنا عايزه ينحط دايمًا وبوزه باين

من تحت السريـر ، عايز اشوفه قدامى واتملى منه .

سنية : اسم الله على بوزه . من عنيه يا سيدى .  
عبد الصبور : دلوقتى سيهولى قدامى ، وروحى هاتى لى القروانه ، وابعتى لى ستك  
ام رتييه عشان اقرا لها شويه .. أنور مخها .  
سنية : حاضر يا سيدى ( تخرج وهى تنادى ) ستى . ستى . كلمى سيدى  
عشان عايز ينور مخك شويه .. الله ينور عليه .. ويهديه كان وكان .  
( تدخل أم رتييه ) .

## المشهد الخامس

عبد الصبور : اقعدى .. قدامى .  
أم رتييه : عايزايه .. انا مش فاضيه لك .  
عبد الصبور : اقعدى يا جاهله ، اقعدى يا مسكينه ، يا مضيعه عمرك فى ظلمات  
الجهل ، يا تايهه فى دياجير الحياه .. اقعدى لما افتح ذهنك شويه يا  
بائسه .. يا تعسه . اقعدى لما اديك شوية نور .. يخففوا عنك  
العتمة اللى انت فيها. اقعدى يا غلبانه .  
أم رتييه : يا خويه اعتقنى شويه لوجه الله .. كفايه بقى قلبت دماغى باللت  
والعجن اللى كل يوم تصدعنى بيه ، انا مش عايزه نورك ده .. انا  
مبسوطه كده من العتمة اللى انا فيها .  
عبد الصبور : طبعا . طبعا .. زى كل جاهل ، وأخو الجهالة فى الشقاوة بنعم ..  
ولكن انا لازم اتورك غصب عنك ، انا مشغول عن إخراجك من  
الشقاوه اللى انتى بترتمى فيها ، دا واجب على .. انا لازم اعلمك  
كل حاجه عشام حا حتاجلك فى وقت الزنقه ، من سوء البخت ،  
انك أقرب الناس لى ، ولا فيش حد حاعتمد عليه فى المهمه  
الكبرى غيرك .. اقعدى .  
أم رتييه : ( تجلس متربعة على سجادة صغيرة على الأرض ) حل عنى شويه

بقى .. مهمه كبرى إيه يا خويا وصغرى إيه !  
عيد الصبور: بكره تعرفي ، بعدين تعرفي ، انت حا تكوني شريكه في أكبر  
حدث في التاريخ ، انت حا تقومي بدور ، ما نتش قده ، ولا  
حملة ، لكن اعمل إيه مفيش غيرك .. انت حا تخلدى في التاريخ  
رغم أنفك .. حا تبقى عظيمه غصبن عنك .. يدي الخلق للى بلا  
ودان .

أم رتية : يا خويا اللى يفرقه العويل يسفه .. أنا لا عاوزه منك لا حلق ولا  
إسوره . هوا انت من يوم ما جبت لى الكردان الفالصو ، هان  
عليك تجيب لى حاجه بعده ؟ .

عيد الصبور: كردان إيه ، وإسوره إيه ، يا أوليه يا جاهله دا مثل ، دا مجاز .. انا  
قصدي انك حا يبقى لك شأن ، وانت بلا شأن ، حا تبقى  
حاجه ، وانت مش حاجه . حا تبقى عظيمه ، وانت تور الله في  
برسيمه ، فهمت والا لأ .. عشان كده انا عايز أنورك شويه .  
عايز اخليكى تور ، لكن متتور شويه . عايزك تفهمى حاجه  
عشان خاطر تساعدينى .

أم رتية : أساعدك في ايه بس يا خويا يا عبد الصبور ؟

عيد الصبور: بعدين تفهمى . بعدين حا تعرفى كل حاجه .

أم رتية : أنا ورايا شغل .. لازم اشوفه عشان فيه ناس ضيوف جاين لك  
دلوقت .. وانت لازم تقوم تلبس عشان تستقبلهم .

عيد الصبور: ضيوف ؟ ضيوف مين ؟

أم رتية : جارنا سى سيد افندى .. الست ام منيد قالت لى انه حا ييجى  
يزورك .

عيد الصبور: عشان إيه . عايز منى إيه ؟

أم رتية : أنا عارفه .. وهى الناس بيزوروا بعض عشان إيه ، يمكن عايز  
يأتنس بيك .

عبد الصبور : أنا مش عاوز حد يأتس بيه ، أنا كده كويس .. ممتنس بنفسى ..  
أنا بحب نفسى .. أكثر من أى حد تانى .. خلاص .. مش عايز  
اقابل حد .

أم رتبية : والضيف اللى جاي ده نظرده ؟. مفيش داعى يا خويا للحاجات  
دى ، أهو قابله برضك واقعد معاه شويه ، واجبر بخاطره .

عبد الصبور : ع العموم .. مش وقته دلوقت ، المهم انى اقرا لك دلوقت بقية  
الباب الرابع ، وبعدين يبقى نعلها ربنا دلوقت اسمعى كويس ،  
وخلى مخك معايا .. احنا كنا بنقرا فى باب « أشباح الأحياء » ..  
ووقفنا لغاية « البحث النفسانى » .

أم رتبية : حاضر يا خويا ، سامعك كويس قوى .. اقرا فى عفاريت  
الأحياء .

عبد الصبور : ( يمسك كتاب ويأخذ فى القراءة . وأم رتبية تنعس أثناء  
القراءة ) : « ولا يجب أن ننسى ، من جهة أخرى ، أن المكان  
هو الذى يوجد التقسيمات الواضحة .. فأجسامنا خارجية  
بعضها عن بعض فى المكان ، ونفوسنا من حيث هى مرتبطة بهذه  
الأجسام ، تفصلها بعضها عن بعض مسافات ولكن إذا لم تكن  
النفوس ملتحمة بالجسد إلا فى جزء منها كان من الممكن أن نعتبر أن  
يكون ثمة تداخل متبادل فيما عدا ذلك الجزء ، وكان الممكن أن يتم  
بين النفوس المختلفة تبادلات شبيهة بظواهر التداخل ، وإذا صح  
وجود هذا التواصل كان لا بد أن الطبيعة قد اتخذت الاحتياطات  
التي تحول دون ضرره ، ولعل هذه هو موضوع : « البحث  
النفسانى » لعل الرؤية الصادقة تتم على هذا النحو وكذلك تظهر  
« أشباح الأحياء » فاهمه يا أم رتبية ؟

أم رتبية : ( مستيقظة ) أبدا ، مش فاهمه حاجه أبدا .  
عبد الصبور : ولا انا .. على العموم الفهم مش مهم ، الكتب دى معموله

مخصوص عشان ما تتفهمش ، دا تلاقى اللي كاتبها نفسه ، مش

فاهمها .. فيه ناس اختصاصيين في الكتابه اللي ما تتفهمش .

( تدخل سنينه حامله قروانه نحاس وإبريق ملئ بالماء الساخن ) .

سنية : كلمى يا ست . ست ام سيد عايزاك من الشباك .

( أم رتيه تنهض )

عبد الصبور : ( بإصرار ) خليكى قاعده لما اكمل لك الفصل .

أم رتية : ( تهرول خارجه ) هوا إيه أصله ده .. هوا حكم قراقوش ، الوليه

واقفه ع الشباك . دا حتى ما يصحش .

عبد الصبور : ( يضع الكتاب جانبا ) طيب بس ما تغييش كلمه ورد غطاها .. أصل

انا عارفك وليه رغايه .. اللي انشال من مخك انحط في لسانك .

( يرفع عبد الصبور طرف جلبابه ، ويشمر سرواله ويضع ساقيه في

القروان ) .

## المشهد السادس

عبد الصبور : يا لالا ادلقى .

سنية : دى نار يا سيدى . لما تيرد شويه .

عبد الصبور : مش مهم النار .. أنا احب النار اللي في الأرض .

سنية : ليه بس يا سيدى ؟ بعد الشر .

عبد الصبور : ما بعدش ولا حاجه .. لو ما دقناش النار في الأرض حا ندقها في

السما .. بنى آدم لازم يدوق النار .. يا نار الحرمان في الأرض ..

يا نار العذاب في السما .. ربنا قال كده يا سنينه .. حانعمل ايه ؟

اهو الواحد منا قدامه خمره ونسوان وفرفشه في الأرض ، وخمره

ونسوان وفرفشه في السما يا ياخذ اللي في الأرض .. يا ياخذ اللي في

السما .. فيه ناس بينسرعوا على اللي في الأرض وينسوا اللي في



السما .

سنية : وانت يا سيدى ؟

عبد الصبور : أنا معشم نفسى باللى فى السما .. أصل العمر فى الأرض قصير يا سنيه .. دى فركة كعب . النهارده بتتولد وبكره بنموت .. أنا فاكر نفسى امبارح لسه فى اللفه . وانتى يا سنيه .. ناويه تفرفشى فى الأرض والا فى السما ؟

سنية : ( تضحك ) هى ، هى ، .. فى الأرض يا سيدى .. السما بعيده قوى .. وما حدش عارف إيه اللى فيها .. بعيده بعيده .. واللى قبلنا ما حدش عرف مصيرهم إيه .. يفرفشوا فى السما حقيقى والا بيدوبوا فى التراب .

عبد الصبور : الجسد هوا اللى بيدوب فى التراب .. لكن الروح بتتطلق حره .. طليقه زى النسمة الساريه ..

سنية : مين يعرف أهو كلام بيقولوه .. حد راح هناك وقال لك ؟

عبد الصبور : أهى دى المشكله .. دى الحاجه اللى تبدد الإيمان .. البنى آدم عايز حاجه ملموسه قدامه .. دى العقده اللى عايز احلها .. دى المسأله المستعصيه اللى انا عايز اوصل لها .. أنا لازم اعملها .

سنية : تعمل إيه يا سيدى بعد الشر ؟

عبد الصبور : مش وقته ، بكره تعرفوا ، بكره حاعمل لكم المعجزه الكبرى ، بكره حاحكى لكم على العالم الواسع المجهول ، واكشف لكم نجاييا الظلمات المحيطه بأجسادكم الفانيه .. ما علينا .. مش وقته ده .. حطى كإن شويه ميه .. فين عليه النشوق .. انا مش قلت لك دائما حطيهالى على التراييزه جنبي .

سنية : والنبي يا سيدى كنت حطها مطرحها .. يمكن حد شالها فى الدولاب .

( تذهب لإحضار علبة النشوق من الدولاب ) .

عبد الصبور : ما فيش غير زينهم .. هوا ما فيش غيره اللي بيدعيس في حاجاتي .. هوا  
الى معكن على عيشستي .. هوا الخنيس الخبيث .  
سنية : والنبي زينهم مظلوم يا سيدى .. دا أمير وطيب وابن حلال وقلبه أبيض  
ويحبك قوى .

عبد الصبور : لكن انا ما حبوش ، منظره يلبش جتنى ..  
سنية : والنبي يا سيدى دا دائما يشكر فيك قوى ، والنهارده كان قاعد يقول ان  
هوه ما لوش حد غيرك ، وكلمنى في موضوع و كنت عايزه استشيرك  
فيه ، سحاكم انا مقدرش اعمل حاجه الا لما آخذ رأيك يا سيدى .. أصل  
عقلك يعجبنى أوى .

عبد الصبور : إيه هوا الموضوع ده ؟ .  
سنية : أصل زينهم قاللى ..  
عبد الصبور : ( مقاطعا ) قال لك ايه ؟ .  
سنية : قال لى إنه كان عايز ..  
عبد الصبور : ( مقاطعا في دهش ) عايز ايه ما تنطقى ؟ .  
سنية : أنا أصل مكسوفه أوى يا سيدى .  
عبد الصبور : أنا مانا عارفه ما وراهش غير الكسوف والسفاله وقلة الحيا .  
سنية : أبدا يا سيدى المره دى ما قالش حاجه فيها سقاله ولا قلة حيا .. دا قاللى  
انه عايز يتجوز فى على سنة الله ورسوله .

عبد الصبور : ( متفضا من الغضب ) يتجوزك !! ؟؟ . الهفيه .. ابن الهفيه ..  
الضايح ابن الضايح ، والله عال يا سى زينهم ، بقيت بنى آدم وعايز  
تتجوز ، والنبي لافطع دابرك وابطلك تيجيب السره دى .. تتجوز ..  
ياخى جاك جنازه حره .. يا مقطوع ، يالمام السبارس . يا عسرة  
العرر .. ما بقاش الا سى زينهم كان اللي يجيب سيرة الجواز فى البيت  
ده .. أهو ده اللي كان ناقص .. لكن معلش أنا برضك استاهل اللي

خليته يشم نفسه ، ويفتكر نفسه راجل . لو كنت خلتيه زي ما كان  
داير بشرشين الجزر وعودين الملائه وعرقين الحلبه الخضرا .. ما كانش  
اتفرعن وقال اتجوز .

سنية : يوه يا سيدى هدى نفسك هدى .. ما تعكرش دمك كده .. دا  
عشره زي زينهم في ضفر رجلك .. نخللك تنشيقه وصل على  
النبي .

عبد الصبور : ( يتاول تنشيقه ويعطس ) سي زينهم عايز يتجوز .. الاقرع  
التزهى عايز يتجوز ؟ ياخي ينسم .. وانتى قلتى له إيه ؟ .. ما  
تفتيش في وشه ؟ ما رقتش صرمتين على نافوخه ؟ ما بلغتيش  
القسم ؟

سنية : يوه يا سيدى .. ليه بس دا كله .. هوا كفر . أنا قلت له سينى لما  
افكر ، وقلت لنفسى يا بت استشيرى سيدك عبد الصبور ،  
راجل صاحب شوره وكله عقل .

عبد الصبور : هي دى عايزه شوره ؟ هوا الجواز ده عايز شوره ، هوا فيه حاجه  
جايبه المصايب والمتاعب لخلق الله أجمعين غير الجواز .. صحيح  
النبي قال « تناكحوا تناسلوا ، فإني مباه بكم الأمم يوم القيامة »  
ولكن مش عشان سي زينهم يتجوز والا الوحش والا زكيه  
الملدنه ، هم دول يتباهى بيهم ؟

سنية : ليه كده يا سيدى .. ناقصين رجل والا ناقصين عين ! . ما كل  
الخلق كده وحشين زينا . ما فيش حد احسن من حد .

عبد الصبور : أبدا إحنا أوحش كثير من بقية الخلق .. يعنى لو بقية الخلق فيهم  
خمسه في المايه وحاشه ، احنا كده بالقليل خالص ، عندنا خمسه  
وتسعين وحاشه .. ثم نفرض ان احنا وحشين زي بقية الخلق ، ليه  
نتكاثر وتتناسل ونعمل عقلنا بعقل بقية الخلق .. ليه تزود الدنيا  
بلاوى .. كل المصايب جايبه من الجواز .

( أم رتيه )

سنية : يا سيدى دا نص الدين .

عبد الصبور : نص أنهى دين ؟ الدين اللى نسيناه ؟ الدين اللى مش موجود ؟ . يعنى نص المقيش .. يعنى مفيش .. اسمعى يا سنيه .. انت زى بتتى ، ولازم ارسيكى .. انت زى كل النسوان قللات العقل ، انتم معذورين لأن ربنا خلقكم كده من غير عقل ، لأن مفيش حاجه بتعملوها عايزه عقل ، اسمعى نصيحتى .. أنا راجل عندى عقل ، شوفى .. أنا حا شرح لك حالتك قبل الجواز وبعد الجواز حا جيها لك على بلاطه .. انت دلوقت بنت شايفه كيفك ، فرحانه بروحك ، خفيفه لطيفه ، شمه نفسك ، راسك لفوق ، صدرك لقدام ، بطنك لجوه ، مفيش عليكى حمل ولا عبء ، بعد الجواز حا تبقى إيه ؟ . نفسك اللى كنت شماه حا ينقطع ، حا تبقى وليه غليانه كحيانه ، صدرك لتحت ، بطنك لقدام . شايله فيها أول حمل ثقيل بارك على نفسك ، وهادد حيلك ، وميل خالك .. وبعدين تخلفى .. يعنى تشيلى الحمل اللى فى بطنك تحطيه على كتفك .. وصدرك اللى كان لفوق ، حا يبقى زى الكتينه تلفيه على صباعك ، وبعدين تفضلى كده ما لكيش شغله غير تجيبى حمل تحطيه فى بطنك وبعدين تنقلى الحمل من بطنك تحطيه على كتفك ، لا نوم تشوفى ، ولا راحه تلوقى . النهارده الولد عيبى .. النهارده عطس .. النهارده كح . النهارده يبسنن . النهارده سهل . النهارده حصبه . النهارده سعال ديكى . ياللطيف ، ياللطيف .. وبعد دا كله ، جوزك اللى كان بيجرى وراكى ، ويبدو فى دباديب رجليكى ، يبقى طهقان منك وزهقان من خلقتك وتبقى أى واحده من الشارع أجمل منك فى عينه الفارغه اللى ما يملهاش غير التراب . آدى يا ستى الجواز . آدى الهباب ، اللى بتجرى وراه كل واحده ، ميسوطه منه ؟ .

سنية : لكن يا سيدى دا واجب لازم تأديه ، إذا كان كل واحد حا يتهرب

- منه .. الدنيا تعمر ازاي .. والولاد ييجوا منين ؟
- عبد الصبور : يا ستي عنهم ما جم . ما فيش داعي ييجوا أبدا .
- سنية : ولما نموت احنا والدنيا تخلص ؟
- عبد الصبور : يا ستي تخلص .. يعني فيها إيه غير العذاب .. هوا احنا مش حاسين بالعذاب اللي فيها ، هوا مش احنا اللي قايلين ( تعب كلها الحياه ) .. هوا مش احنا اللي قايلين ان ( هذا جناه أبي علي ) .. ليه نجني على أولادنا اذا كنا عارفين ان مجايهم في الدنيا جناه ؟
- سنية : لكن يعني قصدك كده . الدنيا تخلص ولا يقاش فيها ناس ؟
- عبد الصبور : أيوه .. ما يقاش فيها ناس .. ويقى هوا يشوف له تصرفه فيها .
- سنية : هو مين ده ؟
- عبد الصبور : ربنا .. اللي نظمها وخلقنا فيها ، خلانا عرضه لعذابها ، وعذاب الآخره .. ما فيش داعي يسينا فيها حيرانين ، لاحنا عارفين جينا منين ولا رايحين فين ، وورانا الخير والشر ، وقال اختاروا بين الاتنين .. تختار ازاي واحنا نفوسنا كلها سفاله وقلوبنا كلها شر ؟
- سنية : أستغفر الله العظيم .. من كل ذنب عظيم .. انت جرائك ايه يا سيدى .. انت ما كتش كده أبدا ؟ انت طول عمرك مؤمن وموحد بالله !
- عبد الصبور : هوا انا قلت مش مؤمن . أنا بس حيران قلقان . فيه حاجات كتيره عايز اعرفها ومش عارفها . أنا مش فاهم ؟
- سنية : مش فاهم إيه ؟
- عبد الصبور : مش فاهم الحاجات اللي انت ما بنحاوليش تفهميها .. وعشان كده انت مستريحه ومبسوطه ، أصل الحاجات دي مش عايزه فهم ، دي عايزه جهل ، أو تجاهل ، عايزه الواحد ياخذها كده عميانى .. يؤمن بها بقلبه مش بذهنه .
- سنية : والله ما انا فاهمه حاجه م اللي بتقوله ؟

عبد الصبور : أحسن ، أحسن كثير ، على العموم سيك م الكلام ده كله ، المهم عندي انك ما تتجوزيش ، وخصوصا زينهم الكلب ، الخسيس الخبيث ، السافل المنحط ، بوز الإخص .

( يدخل زينهم مصفقا بيديه طربا من باب حجرة الجلوس منشدا ) .

زينهم : ياتلتميت مرحبه وسلامات ياخلى ، يالىي تأكيد العوازل وانت داخلى .

عبد الصبور : يا باى ، يا لطيف . برضك داخلى عريان ؟ .

زينهم : لا عريان ولا مكسى .. اللي مش عاجبه وشي يغمض ، الوش الورق الست حطت فيه الملح ، ومع كل ، أنا حاقل الباب اللي بينى وبينك . عدم المؤاخذه أصل فيه ضيوف جاين ، والست بتقول لك كفاياك بقى تقع رجلين .. دول لو كانوا حجر كانوا ياتشوا .. قوم اتفضل قابل الضيوف .. ( يغلق الباب الزجاجى ) .

عبد الصبور : ( من وراء الباب ) ما باقابلش ضيوف ، أنا مش فاضى للحاجات الأرضيه دى ، أنا مشغول فى حاجات أكبر ..

زينهم : الله يكون فى عونك .. الحقيقه مشغول قوى بتتعب خالص من قرؤانه الميه السخنه ، وعلة النشوق .

( يسمع طرق على الباب الخارجى وصوت سيد افندى من الخارج ) .

سيد افندى : ( يتسحج ) يا ساتر .

أم رتية : ( من بعيد ) يا واد يا زيتهم ، شوف مين على الباب .

زينهم : ( لنفسه ) يعنى حا يكون مين غير عريس الهنا ( بصوت عالى ) اتفضل .

( يدخل سيد افندى متفخا وهو مستمر فى قوله يا ساتر ) .

## المشهد السابع

- زينهم : يا ساتر على إيه . خش يا سيد افندى خش .. دا البيت بيتك . أهلا وسهلا .. دا حنا زارنا النبي ( لنفسه ) ماله كده نافش زى الديق الرومى .
- سيد : ( يجلس ) أمال سى عبد الصبور افندى فين ؟ .  
( تسمع عطسة عالية من عبد الصبور ) .
- زينهم : ( مشيرا إلى اتجاه العطسة ) أهو .. هوه بعينه سى عبد الصبور .. دى البشاير بتاعته .. أهلا وسهلا .. أشرقت الأنوار .. أجيب لحضرتك إيه .. قهوه مضبوط ؟ .
- سيد : لا .
- زينهم : سكر زيادة ؟
- سيد : لا .
- زينهم : سادة توزن دماغك ؟
- سيد : برضه لا .
- زينهم : كازوزه ؟
- سيد : لا .
- زينهم : كركديه .
- سيد : لا .
- زينهم : شاي . قرفة .. ينسون . كراويه . حلبة ؟ .
- سيد : لا . لا . لا . لا . لا .
- زينهم : أجيب لك لقمة بجينه ؟
- سيد : متغدى .
- زينهم : ما هو لازم اجيب لك حاجه .. لحسن الست ام رتيه تدبختى .

- سيد : إذا كان ولا بد .. هاتلى . ( ويشير بإصبعه السبابة والإبهام إشارة إلى كوب ) .
- زينهم : لا . لا . لا . داسى عبد الصبور يخرب بيتى . دا ما يطقش الحاجات دى أبدا ، دا عمره ما دخل البيت نقطة ويسكى .
- سيد : ويسكى إيه يا بنى آدم .
- زينهم : شمبانيا .. فرموت .. نبيت .. زيبب .. آمال يعنى قصدك إيه بس ( ويشير بيده نفس الإشارة ) .
- سيد : شوية مية دقه .. بس حاميه خالص .. لحسن كلت فى الغدا شوية مفتقه عامله حرقان على قلبى وعايز أضيعة .
- زينهم : عايز تضيع الحرقان بمية الدقه .
- سيد : أيوه .
- زينهم : الحرقان يضيع بمية الدقه ؟ حقه بطلواده واسمعه .
- سيد : أيوه يا أخى .. أنا كده ، خلقتى كده ، معدتى كده . الحرقان ما يضيعش عندى إلا بمية الدقه .. على طريقة المصل الواقى .. أو على طريقة وداوها بالتى كانت هى الداء .
- زينهم : حاضر .. عينيّ الاتنين ، وعايز مية الدقه كده ساده والا جنبها حتتين خيار .. حتتين جزر ؟
- سيد : لا . لا . كفايه قوى الميه ، أنا معدتى مليانه خالص .
- زينهم : وفيها إيه . تهضم بالخيار واللفت .
- سيد : ما فيش لزوم .
- ( تسمع عطسة من الداخل )
- زينهم : فاضل كان عطسه ، ويبل علينا .. عن إذتك .
- ( يسمع صوت أم رتيه تنادى على زينهم ، فيخرج لها ... وينهض سيد أفندى لمشاهدة الصور ويقف أمام صورة صبي وصية ) .
- سيد : ( لنفسه ) يا سلام .. هى بعينها . النص التانى ، نص اللفته ، نص



الخياره ، لازم دلوقت استوت ، وبقيت حاجه طعمه .. حاجه  
تتاكل .. يا سلام عليكى يا ست ام رتيه ، وعلى وقفنك الحلوه .. بس  
الورده اللى فى إيدك ما كانش لها لزوم . لو كان بدالها حزمة جرجير . أو  
فجل . حاجه كده تفتح النفس مش كانت بقت أفكه ؟ .  
( زينهم يعود وعليه سيماء الاهتمام والمجلة ) .

- زينهم : سيد افندى . سيد افندى . فيه حاجه مهمه خالص .  
سيد : حاجه إيه ؟ .  
زينهم : حاجه مهمه خالص .. حاجه خطيره . حاجه يتوقف عليها  
مستقبلك .  
سيد : مستقبلي أنا ؟ .  
زينهم : أبوه مستقبلك انت وهى .  
سيد : هى مين ؟  
زينهم : الست ام رتيه .  
سيد : آه .. مستقبلنا المشترك .. مستقبلنا الجميل ... مستقبلنا المتظر ،  
مش تقول كده يا غيبى عشان افهم .  
زينهم : معلش ، عدم المؤاخذه .. ما كتتش عارف انك واقع بالشكل ده .  
سيد : إيه هى الحاجه المهمه دى . قول . انطق !  
زينهم : الست عاوزه تظمن .  
سيد : على إيه ؟ .  
زينهم : على اسمك . اسم الله عليك . اسم النبي حارسك .  
سيد : ماله اسمي .. عايزه تظمن عليه ليه .. هوا كان وقع اتكسر ، والا قالوا  
لك اتشرح منه حرف ، ولا انصاب بشبّه ، والا همزه .. ماله  
اسمي ! .  
زينهم : طب بس وطى صوتك لحسن سى عبد الصبور يسمعك .. الست ام  
رتيه كانت وصت الست والدتك خالتي ام سيد .. انها تقول لك

عشان تغير اسمك .. أصل سي عبد الصبور ده دماغه ترللى . وبعض ساعات له تلاكيك على حاجات فارغه ، فهى خافت لا ما يعجبوش اسم السيد بنجر .. يقوم يتلكك عليه ، والحكاية كلها تبوظ من تحت راس حاجه لا راحت ولا جت . حقيقى السيد بنجر بينى وبينك — اسم مش حاجه . لكن فيها إيه يعنى . ياما فيه أسامى أبوخ من كده ، فقالت من باب الاستحراس تغير اسمك عشان ما نديلوش فرصه يجرن فيها ، ويقول كالى ومانى . وهى باعتانى دلوقت عايزه تظمن غيرت الاسم والا لا ؟ .

سيد : وهو انا اقدر أخالفها فى طلب ؟ . أنا ارفض لها حاجه ؟ آل اسم آل . ميت اسم فى ضميرها . ست رتيتب الحلوه .

زينهم : يعنى غيرته ؟ .  
سيد : طبعا ودى عايزه كلام .. امبارح ما كانش لى شغله غير كده ، طول اليوم فى المحكمة الشرعيه . لعمل الترتيبات اللازمه .

زينهم : الحمد لله . الله يطمئنتك .. لا والله شهم وذو همه ، أهو كده الخطاب والا بلاش .. عن إذنتك بقى اما اروح اظمن الست .. لحسن دى قلقاته أوى .

سيد : روح طمنها خليها تحط فى بطنها بطيخه صيفى .. قول لها ان السيد بنجر ، اللي قعد طول عمر السيد بنجر ، وبقاله خمسه واربعين سنه .. الناس يقولوا له سيد بنجر خلاص ما بقاش سيد بنجر .

زينهم : امال بقى إيه ؟ .

سيد : بقى .. على بنجر .

زينهم : ( صائح فى دهشة ) على .. إيه ١١؟ .

سيد : على بنجر .. فيها إيه .. مالك بتصرخ كده زى ما تكون قرصتك حيه ؟ .

زينهم : على بنجر ١١؟ .

- سيد : أيوه .. كنت سيد بنجر .. وبقيت على بنجر .. فيها إيه ؟  
عجيبه !!؟
- زينهم : لا .. ولا حاجة !
- سيد : أمال مالك كده بتخلق فيه ؟
- زينهم : وانا مالي يا عم حا بخلق فيك وتخلق في .. أنا اروح اقول لصاحبة الشأن .. وذنبا على جنبها .. لو وقعت من طولها والا صابها حاجة انا مش مسؤول !
- سيد : وقعت من طولها والا صابها حاجة ؟ إيه الكلام اللي زى السم ده ..  
عشان إيه دا كله ؟ قلنا سيد وحش . كخه .. كان على مش حا  
يعجب .. أمال يعنى كنت اخليه إيه ! زنوبه ! زنوبه بنجر ! كان  
يعجب كده ؟
- زينهم : يا أستاذ مش مسألة محمد ولا سيد ولا زنوبه ولا خدوجه .
- سيد : أمال مسألة ايه ؟
- زينهم : مسألة بنجر .. بنجر .. ياسى على بنجر .
- سيد : بنجر ؟
- زينهم : أيوه بنجر !!
- سيد : ماله بنجر ! فيه أحلى ولا أغلى ولا أطعم من البنجر .. أنا اغير بنجر ..  
ليه ! مجنون ؟ حد فى الدنيا يقضى اسمه بنجر ويغيره .. إنت عارف طبق  
البنجر يقف بكام ؟
- زينهم : إيه يعنى .. مش بالكثير قوى بقرش ابيض ؟
- سيد : اخرص .. دا البنجر المغشوش .. دا اللقت المصبوغ اللي بيعوه على  
لانه بنجر — لكن البنجر الأصيلي ..
- زينهم : ( مقاطعا ) يا أستاذ احنا مالنا و مال البنجر الأصيلي والبنجر  
المغشوش .. إحنا عايزين عريس .. مش سلطنة طرشى .. البنجر  
يمكن له قيمه وسط الطرشى .. لكن وسط الينى آدمين .. حاجة تبقى

- ما لهاش معنى .
- سيد : يعني إيه .. ما نيش فاهم .. يعني كنت عايزين اغير اسمي ، بدل سيد بنجر ، يبقى سيد جزر ، سيد لفت ، سيد جرجير ، سيد قشطه ؟ .
- زينهم : وهو يعني الدنيا ضاقت بالأسمى . اشمعنى فصيلة الخلل دي اللي انت ماسك فيها ، أصل ما فيش لزوم أبدا يبقى بنى آدم اسمه على أسماء أصناف الخلل ، دي حاجه ودي حاجه .
- سيد : أمال يعني فيه لزوم علشان بنى آدم يبقى اسمه خشبه ، والاحمام . والا الجمل ، والا ظاظا ، والا الفار . كل دي يعني حاجات لها لزوم ، والا لها علاقة بالبنى آدمين ؟ على الأقل البنجر حاجه لها قيمه فى عالم الحلو ، وعالم الحادق . انت ما تعرفش ان البنجر يبقى ..
- زينهم : ( مقاطعا ) يبقى والا ما يقاش .. انا مالى .. ذنك على جنبك .. خليك بنجر بنجر .. ابقى قول لسي عبد الصبور ان اسمك بنجر .
- سيد : يعني يعمل فيه إيه ؟ .
- زينهم : ولا حاجه . بالقليل خالص . حايثف فى وشك .
- سيد : إيه الكلام البارده .. اللي يسم بدن .. هوه ماله إذا كان اسمي بنجر والا عفريت أزرق ؟!
- زينهم : آدينى قلت لك بقى . خليك على كيفك . الظاهر ان دماغك ناشفه قوى .
- سيد : على العموم احنا فيها .. خلاص إذا كان مش عايز بنجر ، مش ضرورى بنجر ، ما دام ما لوش فى الطيب نصيب . حانعمل له إيه .. خلينا كده سيد حاف .. والا سيد على .. والا سيد قشطه .. والا سيد أى حاجه .. كده كويس ؟
- زينهم : تعجبنى .. أهو كده بقيت راجل عاقل .. بناقص البنجر ده .. اللي تغلبه العبه .. بس فيه حاجه تانيه عايز اوصيك عليها .. علشان الشغلانه ما تبوظش وتطلع فشوش .. الراجل سى عبد الصبور زى ما

قلت لك، بنغزه .. فخذته على هواه ، وطاوعه أوى .. إوعى تقول  
حاجه كده والا كده .. تلبشه وتفور دمه .

سيد : يعنى إيه حاجه كده والا كده ؟ ما نيش فاهم ؟

زينهم : يعنى مثلا هوه ما يجيش الكرنب المحشى .. فمتجيش سيرته قدامه ..  
وإذا جت سيرته اععمل انك ما تقدرش تدوقه على لسانك .

سيد : لكن انا بحب الكرنب المحشى خالص .

زينهم : يا أخى معلش .. استحمل .. ابقى حبه بره لكن قدامه اععمل انك ما  
تجوش .

سيد : بسيطه .. حاجه مش صعب .. وإيه كان سى عبد الصبور ما يجوش ؟

زينهم : ترمای نمره ٥ .

سيد : ترمای نمره ٥ ؟ إيه المناسبه ؟ يكره الكرنب المحشى معقول ، كل

واحد وكيفه ، أنا مثلا ما حبش السباغ ولا احبش التقليبه على  
البصاره ، لكن ترمای نمره ٥ ده .. إيه العلاقة بينه وبين سى عبد  
الصبور ؟ يحبه ليه ويكرهه ليه ؟ هوا داقه ؟ قطع حته من السلم مثلا  
لقاها متفله . والا داق السنجه لقاها دلعه ؟ .

زينهم : سلم إيه اللى لقاها متفل ، وسنجه ايه اللى لقاها دلعه ، فيه حد ياكل  
ترمای ؟

سيد : يمكن ، ما هو سى عبد الصبور بتاعك ده ما يستبعدش عليه حاجه  
أبدا .

زينهم : لا مش للدرجه دى .

سيد : أمال إيه المناسيه ، انه يكره ترمای نمره ٥ بالذات ؟

زينهم : ما فيش استلطاف .. العلاقة بينهم وبين بعض سيئه ، أصل سيدى عبد

الصبور دائما يحب يركب الترمای من غير مؤاخذه ، سفلقه ، طول  
عمره بارع ، فى التزويغ من الكمساريه ، يفضل سنين وايام ، يتنقل  
من ترمای ١٠ ل ٢٢ ل ٣ ، ما فيش حد يقول له انت فىن ، هوا يحط

- رجله في ثمره ٥ والكمسارى والمفتش يكبسوا على أنفاسه ، عشان كده ما يجيش حد يجيب سيرة الترمای ثمره ٥ أبدا .
- سيد : لا معذور ، وإيه كان ما يجوش سي عبد الصبور، فيه حاجه تانيه العلاقه بينه وبينها متوتره أو مقطوعه ، غير الكرنب المحشى وترمای ثمره ٥ ؟
- زينهم : راس العبد .
- سيد : برضك بينا وبين سيدك عدم استلطاف ؟
- زينهم : لا ، دى بقى عداوه مستحكمه ، حرب دايمه ، خصومه مخيفه .
- سيد : وعشان إيه ؟ ، وبمناسبة إيه ؟ ، يعادى سي عبد الصبور افندى راس العبد ، ويعمل عقله بعقلها ؟
- زينهم : الحقيقة ، فى الحكايه دى ، هوه مش غلطيان ، هى السبب .
- سيد : ازاي بقى يا سي زينهم ؟
- زينهم : هى دائما المعتديه ، كل ما يكون رايح كده ، والا جاي كده .. تروح مترحلقه من على الأرض وواقعه على نافوخه .
- سيد : طيب يا أنخى ما يعمل معاها معاهدة عدم اعتداء .
- زينهم : عمل .
- سيد : والتبجيعة ؟
- زينهم : زى كل معاهدة عدم اعتداء ، بعد المعاهده على طول راحت واقعه على نافوخه مسيخه دمه .
- سيد : يستاهل .. فین هي راس العبد دى عشان ابوسها من هنا ومن هنا ..
- دي مش راس عبد ، دى راس منصر . اللي قدرنت تعمل فى سي عبد الصبور كده ، وفيه إيه كان ما يجوش سي عبد الصبور غير الكرنب المحشى وترمای ثمره ٥ وراس العبد ؟
- زينهم : العدس اللي من غير جبه .
- سيد : وابو جبه ؟
- زينهم : يجبه .

- سيد : وياه كان خصوم سيدك عبد الصبور . قلهم مره واحده وخلصنا .
- زينهم : زكيه الملدنه ، وسنيه القرعه ، وابو على الاحول والكسبه ، والزيت  
الحار ، وابو قردان ، والسملك البكلاه وبراغيت الست ، وعبد الحلیم  
القرد ، والكرات ابو شوشه والسجق الی من غير فلقل .
- سيد : وأبو فلقل ؟
- زينهم : يموت فيه ، والكسيريه ، وحشيش الأرانب .
- سيد : وغير الأرانب ؟
- زينهم : يتعاطاه أحيانا ، والمنجه ، والفيل ابو زلومه ، واللبنان المدكر ،  
والخللاوه السمسيميه .
- سيد : ديهده .. ديهده .. دا ماله عامل زى الحكومه المصريه .. مخاصم  
طوب الأرض .
- زينهم : والرز ابو شعريه . وسكارش بتاع الجاز ، وقسم السيده .. و ...
- سيد : ( مقاطعا ) طيب .. بس ، وانا حا جيب دماغ متين احفض كل  
الخصوم دول .. أنا أحسن طريقه اقعده ساكت ما فتحش بقى لا  
بطيب ولا بردى .
- زينهم : ما ينفعش .
- سيد : ليه بقى ؟
- زينهم : ينام منك .
- سيد : ينام منى ازاي ؟
- زينهم : أيوه ينام منك .. لو سييته شويه كده من غير كلام .. تلاقيه فقر  
ونام ، ولو نام منك يا حظ ، لازم تفضل متسمر فى مطرحك .. لا  
حس ولا حرکه .. لحسن تقلقه .
- سيد : أفضل قاعد كده قدامه ؟
- زينهم : لغاية ما يصمحي من نفسه .
- سيد : ودى مصيبة إيه الی طبلت على دماغی .

- زينهم : اهو على أد ما تقدر ما تجييش سيرة الحاجات اللي قلتها لك .  
سيد : على العموم .. بسيطه . ما فتكرش ان حا يبقى فيه أى مناسبه لها .  
يعنى مش شايف ان الواحد حا ينزق لها قوى .  
زينهم : وفيه حاجه تانيه .  
سيد : حاجة إيه كان ؟  
زينهم : شكلك ، وقيافتك .. وريبي كسمك .. اعدل الكرافته شويه ..  
والطربوش ميله لقدام شويه .. أصل هوا دقيق قوى فى حكاية الملابس  
دى ، دايمًا يحب القيافه والجفله .  
( تسمع عطسة من داخل حجرة النوم فيقفز زينهم من محله ويفتح  
الباب الزجاجى ويدخل عبد الصبور وقد شمر الجلباب ووضع ذيله  
فى عبه وشمر أرجل السرورال ولبس القبقاب ذو الجلاجل والطرطور  
وحمل فى يده كتابا ضخما وفى الأخرى علبة النشوق ووراءه سنه  
تحمل القروانه بالماء الساخن ) .

## المشهد الثامن

- سيد : الحقيقه باين عليه يحب القيافه قوى .  
عبد الصبور : ( يصرخ فى زينهم ) يا لطيف يا مغيث .. برضه واقف بوشك  
عريان .. اخرج بره يا خسيس .. دم لما يلهفك .. دم لما يلحس بك  
قعره .. عايز التجوز .. أدى اللي انت فالخ فيه .. تتجوز بوشك العكر  
ده . تودى نفسك من ربنا فين ؟ .. يا حيوان يا حلوف ( يخرج زينهم  
ويبدو كأن القول موجه إلى سيد افندى فيزداد خجله وارتباكاه ) آل  
يتجوز آل . ياخى جاك جنازه .. جاك مصيه .. جاك وكسه . :  
جاك نيله حزم .  
سيد : ( لنفسه ) لا .. دى مش حاله دى .



عبد الصبور : آل جواز آل .. هي الدنيا ناقصه مصاييب ( يلتفت إلى سيد ) . وانت إليه ؟

سنيه : دا الضيف يا سيدى . جارنا سي السيد افندى بنجر .  
سيد : ما بنجرش ولا حاجه .. بنجر ما فيش .. خلاص راح ، عليه العوض .

عبد الصبور : ( باشمزاز ) بنجر .. انت بنجر .. اسمك بنجر ؟ بنسى آدم اسمه بنجر ؟ أمال البنجر الحقيقى يسموه ايه !! على ؟ والخيار يسموه محمد ؟

سيد : قلنا مش بنجر .. انا مش بنجر .. يا سيدنا أنا سيد ، سيد بس ، سيد حاف ، متبرى من البنجر .

عبد الصبور : وتبرى منه ليه .. بينك وبينه إيه ؟  
سيد : علاقات مش ولا بد ، من نوع العلاقات اللي بينك وبين الكرنب المحشى والترماي نمره ه ، ورأس العبد ، ما فيش استلطاف أبدا كده لله في الله .

( يجلس عبد الصبور وتضع سنية القروانة أمامه ويضع قدميه في الماء وتأخذ سنيه في تدليكهما ) .

عبد الصبور : اقعد يا سي سيد افندى . يا عدو البنجر . اقعد . اتفضل ( يمد يده بعلبة النشوق ) تاخذ تنشيقه ؟

سيد : متشكر ما بتعاطهوش ؟

عبد الصبور : علشان إيه ما بتعاطهوش ؟

سيد : والله ما جربتوش .

عبد الصبور : وليه ما بتجربوش . يخس عليك إيه ! مش ممكن تلاقيه كويس وتقعد نادم على العمر اللي ضيعته دا كله من غير نشوق ؟

سيد : والله ما افتكرشى .

عبد الصبور : ( بغضب ) يعنى إيه ما تفتكرش ؟ انت باين عليك مقاوح !

- سيد : ( يستدرك نادما ) أبدا أبدا ، أنا بس مناخيري تعبانه شويه .  
عبد الصبور : أهو دا اللي بسلكها لك ويفوقك ويحلي راسك . أهو دا الحاجه الوحيده  
اللى تعدلك . كان لازم انت تقول لى هات تنشيته ، انت مش صغير  
عشان اوريك مصلحة نفسك ، وأنا مش ولى أمرك . انت راجل  
كبير .
- سيد : ما فيش لزوم للزعل .. أنا غلطان ، هات تنشيته يا موى عبد الصبور ..  
هات .
- عبد الصبور : ( ينظر إلى العلبه فاحصا ويقلب شفته السفلى ) مفيش ، متأسف .  
اللى فاضل يدوبك تنشتين ليه . طلبك متأخر . ما لكش فى الطيب  
نصيب .
- سيد : معلش . معلش . حصل خير . ( بصوت منخفض ) رهناستر .  
عبد الصبور : ( يعيد النظر فى العلبه ) والا اقول لك .. تقدر تاخذ لك تنشيته ..  
بس صغيره ، ما تكترش .. خدى يا سنيه ودى له العلبه .  
( سيد افندى يتناول العلبه خائفا ويأخذ تنشيقه فتصيه نوبه عطس  
مزعجه )
- عبد الصبور : عضمك طرى . لسه بدرى عليك ، دى حاجه عايزه تمرين . مش  
كل واحد يقدر عليها .

## المشهد التاسع

- ( يدخل زينهم وهو مرتديا الوجه وحاملا بين يديه صينية عليها  
كوبتين بهما مشروب أحمر اللون ويتقدم إلى سيد افندى ) .
- سيد : ( مندهشا ومدعورا ) إيه ده بسم الله الرحمن الرحيم ! إنت إنس والا  
جن ؟
- زينهم : لا إنس ولا جن .. أنا زينهم .. اتفضل اشرب .

- سيد : ( مستغرقاً في الضحك ) زينهم ، ومالك عامل كده ليه في نفسك ؟ يا سلام يا زينهم .. دا انت بقيت زينهم حقيقي ، أهو كده الجمال .
- زينهم : اشرب يا سيد افندى . اشرب بلاش نقوره .  
( يشرب سيد افندى الكوب مستمتعاً مستطعماً ويمض شفته في لذة ) .
- سيد : يا سلام . حاجه حلوه . بديعه .  
( يتقدم زينهم بالكوب الآخر إلى عبد الصبور فيأخذه ويرفعه إلى فمه ولا يكاد يتناول منه رشفة حتى يقفز من مكانه ملسوعاً وهو يتأوه وينفخ ) .
- عبد الصبور : إيه ده؟ دي مية نار !!؟
- زينهم : .. مية دقه .
- عبد الصبور : مية إيه ؟
- زينهم : دقه .
- عبد الصبور : دقه ؟
- زينهم : أبوه مية دقه . عمرك ما سمعت على مية اللدقه .
- عبد الصبور : وآيه اللي بخليك تقدم مية اللدقه للضيوف . يا حلوف ؛ يا ابنن الحلوف .. اتجنتت .
- زينهم : اتجنتت ليه ، وانا مالى . أنا عبد مأمور .. يقولوا لى هات مية دقه ، اجيب مية دقه .. هات سم هارى اجيب سم هارى ، وانا مالى .
- عبد الصبور : سم لما بهرى جوفك . انا لازم اشوف قصدك إيه . انا لازم اكشف نواياك الإجرامية . انا لازم اوديك فى داهيه . مين الحيوان اللى أمرك تحرق جوفنا بمية اللدقه ؟
- زينهم : الحيوان اللى يتسأل عنه قاعد جنبك لرق . هوا سيد افندى .. هوا الضيف بتاعك .
- عبد الصبور : هوا اللى طلب منك مية اللدقه ( إلى سيد ) انت اللى طلبت مية ( أم رتية )

الدقه .. يا اخينا ؟

سيد : أيوه انا ، أصل كان فيه حرقان على قلبي ، وخلص راح ، والحمد لله .. الحقيقة نوع ممتاز .. نوع اكسترا .

عبد الصبور : إيه هوا اللي ممتاز ا اوليه هوا اللي اكسترا ا النار الآيده دى .. فيها ممتاز وفيها اكسترا ؟ . ليه . هوا انت من زباين جهنم والا من صبيان إبليس . وإذا كنت انت عندك حرقان بتعطفيه بمية النار دى . أنا ذنبي إيه ا اسمع وحياة والدك يا سي سيد افندى ، اذا كنت ناوى تيجى هنا تانى ، وناوى تحس بحرقان على قلبك ، ابقى اشرب مية اللهايب دى بره . مفهوم ؟

سيد : على العموم الحرقان دا ما بيجيلش كثير .

عبد الصبور : كثير والا قليل ، المهم تضيعه قبل ما تيجى . فاهم ؟

سيد : حاضر ، من عنيه يا سي عبد الصبور ولا يكون عندك فكر من نواحي مية الدقه ، مع إنك لو اخدت عليها مش حاتسلاها أبدا ، زى النشوق تمام ، تروق المخ وتسلك الزور .

عبد الصبور : إيه دا يا أخى الكلام الفارغ ده . حد يقول مية الدقه زى النشوق ، دى دقه ودى دقه .

سيد : أيوه برضك معاك حق .. إيش جاب دى لدى ، أنا غلطان خالص ، غلطان قوى .

عبد الصبور : معلش حصل خير ، انت شرفتنا يا سي ..

سيد : ( مقاطعا ) سيد ، محسوبك سيد .

عبد الصبور : سيد إيه ؟

سيد : اللي يعجبك ، اللي ييجى على مزاجك ، أنا سايبها مفتوحه .

عبد الصبور : يعنى إيه . ما نيش فاهم ، السيد والدك ما لوش إسم ؟

سيد : أبدا . نزل كده ، من غير إسم . ما رضوش يسموه ، لغاية ما تسميه

انت الإسم اللي يريحك !!

عبد الصبور : انا اسمي أبوك ؟ وهو انا فاضى عشان بسلامته أبوك يقعد لي خمسين سنه من غير لاسم .. وييجي دلوقت عشان اسميه .. أنا فاضى للهيافات دى ؟. أنا ورايا حاجات كتيره أهم من كده .

سيد : على العموم .. ما تتعش نفسك ، دى حاجه مش مستعجله .. أنا كفايه على سيد بس .. سيد حاف ، أهى حاجه مأمونه وما منهاش ضرر .. واللى خلاه يقعد خمسين سنه من غير لاسم . يقعد ...

عبد الصبور : ( مقاطعا ) طيب .. طيب .. فطينا بقى من حكاية لاسمك دى .. لنت شرفتنا .

سيد : الله يشرف مقدارك .

عبد الصبور : فيه حاجه اقدر اعلمها لك ؟ عايز مشوره فى علم الروح ؟ عايز تحضر جلسه .. عايز ...

سيد : (مقاطعا ) لا . لا . أبدا .. كتر ألف خيرك . أنا مش عايز حاجه من دى أبدا .. أنا كنت عايز . اقول . اقول . أصلى كنت عايز اقول ...

عبد الصبور : تقول ايه ؟ اتفضل . وقول وخلصنى يا سى سيد وحياءه أبوك اللى ما يتسماشى .

سيد : أنا أصلى كنت عايز اقول ، أنا طول عمرى . عايش كده عازب . ووحداى ..

عبد الصبور : ( مقاطعا فى حدة ) خير ما عملت ، عين العقل . ربنا يديها عليك نعمه .

سيد : لكن أنا شايف العمر يفوت والحياه بتتقضى والشيب ملا راس الواحد ، والعجز دب فى مفاصله .

عبد الصبور : شىء لا بد منه وبكره كان تشيب اكثر وتعجز اكثر ، الزمن بيدوب الحجر مش عايز يدوب البنى آدم ، لازم تشيب ، ولازم تعجز . هى دى حاجه غريبه ا

سيد : لا مش غريبه ، بس الغريبه ان الواحد كده يخرج من الدنيا ، صفر

اليدين .

عبد الصبور : وهو افية واحد يا أختينا ما بيخرحش منها صفر اليدين ، الدنيا عاملة زى البلد الموبوءه ، وباب الآخرة زى باب الحجر الصحى . لازم يجردوك فيه من كل حاجة ، لازم تخرج من الدنيا زى ما دخلت فيها ، صفر اليدين والرجلين والراس والعينين ، ما تتاش شاييل معاك غير ذنوبك ، دى الحاجة الوحيدة اللى ما تقدرش تسيبها .

سيد : مفهوم ، مفهوم ، يا سى عبد الصبور .. لكن الواحد برضه ، لازم يكمل نص دينه .

عبد الصبور : نص دين إيه يا خويه اللى طالعين لى فيه ، هو انص الدين ما يكملشى الا بالجواز ؟ دالو كان عندك نص دين ، الجواز حا يطيره . الجواز اللى اتتوا فاكرين انه يكمل نص دين يضيع دين بحاله .. دا يكفر بلد ، إنتم ايه ! مغفلين ، مهافيف ، ملاحيس ؟ ومع كلا ، أنا مالى انا ومال نص دينك ، تكمله ما تكملوش ، أنا ما ليش دعوه ، دى حاجات متخصصين .

سيد : لا ، من جهة الاختصاص ، ما فيش حد مختص غيرك ، إنت لو حدك جهة الاختصاص المسئولة عن تكملة دينى .

عبد الصبور : يعنى إيه .. ما نيش فاهم ؟

سيد : يعنى نص دينى موجود عندك هنا . معاك .. إنت المتحكم فيه ، إنت الأمر الناهى فيه ، أرجوك رده لى ، رد لى نص دينى ، ينوبك ثواب فى .

عبد الصبور : إنت إيه يا جدع أنت ؟ أنت مجنون ؟ اختصاصى إيه ؟ ودين إيه ؟ إحنا هنا مش مشيخة الأزهر .. أرجوك قول لى قصدك إيه ؟

سيد : قصدى اتجوز .

عبد الصبور : يا مغيث يا لطيف . أنا اصطبحت بوش مين النهارده ؟ كل ما اقابل حد يقول لى عاوز اتجوز ، ما فيش غير زينهم الكلب ، هوا صبيحنى

بوشه ، اللي زى القطران ، اسمع ياسى سيد افندى . انا عايز اعرف ،  
إذا كان انت بعد طول العمر اللي ضيعته فى هنا وراحه اتخبطت فى  
راسك وعايز تتجوز ، تقدر تقولى لى انا ذنبى ليه تعكس مزاجى  
وتضيع وقتى فى المسألة البايخه دى !! إنت عايز تتجوز ، وانا مالى ؟

سيد : أصلى عايز اتجوز . اتجوز ...

عبد الصبور : ( فى حدة ) تتجوز ليه .. انطق ؟ فلقتنى ؟

سيد : عايز اتجوز أم رتيبه .

عبد الصبور : بتقول ليه ؟ أم ليه ؟ إنت لازم مجنون . أنا نظرتى ما تخيش أبدا . من  
ساعة ما شفتك وشفت عينيك المبلطه وراسك المبططه ووشك  
المنابيشى قلت الراجل ده مجنون .

سيد : ليه بس يا سى عبد الصبور ؟ مجنون ليه ؟ عشان جى اخطب الست  
المصونة أختك . عشان جاي اتشرف بقريك . هما برضه الناس  
يعملوا فى جيرانهم كده ! النبي دا وصا على سابع جار .

عبد الصبور : النبي حريوصى زى ما هو عايز .. على سابع جار .. على تامن جار ..  
إن شا الله على عاشر جار . لكن انا ما احبش الكلام فى موضوع الجواز  
ده أبدا ، خلاص ، انتينا .

سيد : طيب بس حلمك على . خد ودى معايا شوپه . اسمع كلامى كله يمكن  
تقتنع .

عبد الصبور : ولزومه ليه ! وعشان ليه ؟ . إنت تبقى مين عشان اضيع وقتى الثمين  
معاك فى كلام مالوش فايده ؟

سيد : أبوه .. كده تعجبنى .. قلت لى تبقى مين .. أنا محسوبك سيد ..  
باشخبير فنى معمل شبرا .

عبد الصبور : باش ليه ؟

سيد : باشخبير .. يعنى كبير الخبراء .

عبد الصبور : طيب يا أخى مش تفهمنى كده من الصبح . أنا فاهم انك راجل ، على

أذك . فاهم أنك حمار .. من ضمن الخمر الى ماليا البلد ، ما عنديش  
أقل فكره عن أنك راجل خبير ، فنى ، بتفهم . يا سلام .. ليه  
تسينى كده على عمای يا سى سيد يا باشخبر . وحضرتك درست  
فين ؟ اكتسبت الخبرة الفنيه بتاعتك دى منين ؟ من أنى جامعه ؟

سيد : أنا ما درستش فى جامعات ، خيرتى موهبه إلهيه من عند ربنا .

عبد الصبور : ما شاء الله ، ما شاء الله . يعنى خبير بالمطهره ، يعنى عبقرى ا

سيد : بالطبط .

عبد الصبور : يا سلام ، أنا من زمان وأنا عايز اشوف واحد عبقرى ، أصل انا كان

عبقرى ، ودايما العبقرى يحب العبقرى .

سيد : مطبوط ، مطبوط .

عبد الصبور : وحضرتك خبير فنى فى إيه ؟

سيد : خبير فى الذوق .

عبد الصبور : فنى فى إيه ؟

سيد : فى الذوق ( ويخرج لسانه ) عندى لسان ، ما بخطيش ابدا ، ما ينزلش  
الأرض .

عبد الصبور : وهو فيه لسان ينزل الأرض يا سى سيد يا باشخبر ، غير لسان

الكلاب ، لكن أنا برضه ما نيش فاهم . حضرتك خبير باللسان ؟

سيد : مطبوط ، أدوق باللسان وحكمى لا يعلى عليه .

عبد الصبور : وحضرتك بتدوق إيه ؟ إيه المواد الرفيعة اللى بتحتاج لتدوقك الحكيم ؟

سيد : كل الأصناف .

عبد الصبور : ما نيش فاهم ، يعنى مثلا بتدوق الشرابات النايلون . بتدوق الخرسانه

المسلحه ؟

سيد : لا . لا . مختص بس فى صنف الحادق . صنف الخلل .

عبد الصبور : يعنى حضرتك باشخبر فنى فى الطرشى ؟

سيد : تمام . مطبوط .



عبد الصبور : باشخبر فنى فى الطرشى ؟ ياخى دم لما يلهفك .. باشخبر طرشى ،  
وجى تناسبنى ، ليه قالوا لك على وقع ، هفيه . قليل الأصل ..  
خلاص ، هى ضاقت على الدنيا ، ما لقيتش غير انت اللي اناسبك ! ليه  
اتجنت ، اتخبط فى عقلى ، أنا ادخل بيتى باشخبر طرشى ، وانا ما  
طيقش طعم الطرشى ، دنا لما بشوف دكان طرشى من بعيد بيغمى  
على ، دا انا بينى وبين الطرشجيه تار بايت وعداوه متأصله .. أقوم  
آجى على آخر الزمن ، أناسب باشخبر طرشى ! أنا اللي محرم عليهم ما  
يدخلوش فى البيت حنة لفت أقوم ادخل برميل طرشى متحرك !

سيد : طيب بس حلمك شويه يا سى عبد الصبور .. ما تتحمقش كده ،  
هدى نفسك وخلينا نتفاهم .

عبد الصبور : نتفاهم على إيه ! وهى دى حاجه عايزه تفاهم ! أنا والطرشى عدوان  
لدودان ، يبقى نتفاهم على إيه ؟ المسألة ماهاش الا حل واحد .

سيد : ( بلهفة ) إيه هوه ! الحقنى بيه .

عبد الصبور : إنك تقلب .

سيد : أقلب ؟

عبد الصبور : أيوه تقلب .

سيد : أقلب ازاي مانيش فاهم ؟

عبد الصبور : زى الناس .. يعنى بدل ما انت باشخبر فنى طرشى .. تبقى باشخبر  
فنى ، حلاوه طحينيه مثلا .. أو باشخبر فنى غزل البنات ، أو  
باشخبر فنى براغيت الست أو باشخبر فنى حلاوة زمان .

سيد : حلاوة زمان ؟

عبد الصبور : أيوه حلاوة زمان ، ماتاش عارفها !! الحلاوه اللي يلفوها على حنة  
خشبه طويله فى آخرها كوز زى الشخشيشة والراجل يشد فيها  
وعيط ، ويعمل لك حصان وعروسه زى ما انت عايز .. ؟

سيد : أنا ابقى باشخبر فنى حلاوة زمان ؟

عبد الصبور : فيها إيه !. يعنى مش احسن ما تبقى باشخير فنى فلفل .. أقل ما فيها  
تبقى خبير فى حاجه حلوه .. ما تحرقشى .. ما تشويش .. مش خبير  
لهاليب .

سيد : لكن دى ...

عبد الصبور : ( مقاطعا ) ما لكنش ولا حاجه ، انا بحب غزل البنات ، وبراغيت  
الست ، والحلاوه الطحينيه ، حلاوة زمان ..

سيد : أنا ما قولتش حاجه حب اللى تحبه بس انا ما قدرش بعد خمسه واربعين

سنه خبره فى الطرشى ، اقلب فى آخر الزمان ، وابقى خبير حلاوة  
زمان ، والا حتى حلاوة دلوقت . دى حاجه ما تعقلش ، دى تمام زى  
ما تقول للفسخانى اللى طول عمره فسخانى .. تعالى بيع رواج  
عطريه ، يموت منك ، الريحه اللى انت فاكرها كويسه تأثر على  
نخاشيشه اللى واحده على ريحة الفسيخ تموته . والا مثلا زى لما تاخذ  
الفحام ، اللى قاعد طول عمره زى حنة الهبابه ، وتقول له اشتغل فى  
حمام ، يدوب منك ، يوش فى الميه زى قص الملح ، الوساخه اللى على  
جته اللى هنى حلت محل اللحم تنزل ويسيح وما يقاش فيه حاجه .

عبد الصبور : فحام ، حمامى ، فسخانى ، دا كله ما يهمنيش كلمه واحده ما فيش

غيرها ، انا ما احبش صنف الطرشى أبدا ، حلاوه معلش ، عندك  
جميع أصناف الحلويات ، كلها مقبول ، أنا ما بدقش إن شا الله تبقى  
خبير فى المصاصه ، كله ينفع .

سيد : يا سى عبد الصبور الله لا يسبلك .

عبد الصبور : ( فى حدة ) خلاص اتبيننا .

سيد : ( ثائرا ) هو اياه اصله ده ! دا استبداد . دا ظلم . دا تحكم ا

عبد الصبور : تحكم مش تحكم ، أنا قلت كلمتى خلاص ما فيش غيرها .

سيد : ده حرام . اتقى الله يا شيخ . داربنا ما يرضاش بكده أبدا .

عبد الصبور : إذا كان ما يرضاش ، خليه يجوزها لك أمى قدامه ، لكن انا مش حا

جوزها لك أبدا .

- سيد : ده جبر .. دى قسوه .. دا انت ربنا مش حا يوريك نصفه .  
عبد الصبور : مش مهم ، النصفه اللي عنده .. ابقى خدها انت .  
سيد : روح يا شيخ ، ربنا يرزقك بحلة كرنب محشى .  
عبد الصبور : ( فى فزع ) آى .. اخرج بره .  
سيد : والا بفتش ثمره ه يكبس على أنفاسك .  
عبد الصبور : الحقونى يا هوه .  
سيد : والا براس عبد تطب على نفوخك .  
عبد الصبور : جاى يا عالم .  
سيد : ( مستمرا ) زكيه الملدنه ، سنه القرعه ، أبو على الاحول ، كسبه  
زيت حار ، أبو قردان ، سمك بكلاه . . .  
عبد الصبور : جاى . جاى . الحقونى .. ابعدوا المجرم ده .. اخرج بره يا مجرم  
( يتشنج ويغمى عليه ) .  
( سيد يهرول هاربا إلى الخارج . تدخل أم رتيه والخدم وراءها ) .  
أم رتيه : فيه إيه ! جرائه كفا الله الشر ؟  
سيد : ( وهو يهرول إلى الخارج ) آل باشخير حلاوه طحينيه آل .. دا انا  
حتى ابقى قليل الأصل ، بعد العمر الى قضيتيه مع الطرشى .. أنضم فى  
الآخر .. لمعسكر الأعداء . دى تبقى خيانة ، دى تبقى نداله .. آل  
إيه باشخير مصاصه ، أصلها هزلت .. حد الله بينى وبينكم .  
( أم رتيه منهكة فى تفويق عبد الصبور ، وزينهم يهجم عليه بكوب  
ماء ويضربه فى وجهه ) .  
عبد الصبور : المجرم . ابعدوه . باشخير الطرشى المولع . إوعوا تدخلوه بيتى . آل  
كرنب محشى ، وراس عبد ، السافل المجرم .  
سنية : سلامتک يا سيدى ألف سلامه ، روق دمک ما عاش اللي يزعلک .  
زينهم : شفت .. عشان ما تبقاش تعايب على وشى .. اللي ما يرضى بالحوخ

يرضى بشرابه ، اهو جالك الى جابلك الكافيه ( يفادر الحجره ) .

## المشهد العاشر

- أم رتيبة : إيه يا خويا ! . جرى إيه بسن فهمتى ؟ . إيه بس اللي هلبها كده ؟  
عبد الصبور : باشخبير الطرشى ، اللدون ، المنحط . ما يعتبش بيتى أبدا .  
أم رتيبة : بس اهدى يا خويا ، وقول لى إيه اللي جرى ؟  
عبد الصبور : آل عايز يتجوزك آل !  
أم رتيبة : ودى فيها حاجه تزعل ، دى حاجه نشرح حاجه تبسط .  
عبد الصبور : دا باشخبير طرشى ؟  
أم رتيبة : وفيها إيه !  
عبد الصبور : طرشى حراق ؟  
أم رتيبة : حراق والامش حراق ، هوه قال لك تعال دوق بدالى ؟  
عبد الصبور : خلاص ، أنا قلت كلمه واحده .. أنا ما حبش لا الطرشى ولا ريحة الطرشى ولا سيرة الطرشى قلت كلمه واحده وانتينا .  
أم رتيبة : يا ميله بختك يا ام رتيبه ( تنهنه ) .  
سنية : معلش يا ست . ما تزعلش يا ست .  
عبد الصبور : بس خلاص ، بلاش عياط . اقعدى قدامى هنا . لما اقول لك على المهمه الكبرى . أنا حاسس ان وقتها جه . اقعدى قدامى ، وفتحى ودانك كويس ، أنا نازل على الإلهام ، والوحى يقوللى عشان استعد من دلوقت وافهمك كل حاجه .  
أم رتيبة : يا خويا سيني فى حالى . كفايه ميله البخت اللي انت جايهاالى ، مهمه كبرى إيه ؟ وسخام إيه ؟ وهباب إيه ؟ .  
عبد الصبور : اقعدى يعنى اقعدى ، دا مش وقت أخذ وعطا .. الوقت ضيق .. اقعدى وفتحى ودانك .. واسمعى كويس الكلام اللي حا قولولك

ده .

( تجلس أم رتييه أمامه وهي تنهد يائسة ) .

أم رتييه : يارب .. توب علّي بقى م الغلب ده .

سنية : ( تجلس على الأرض ) معلش يا ست . استحملى يا ست .

عبد الصبور : خدى بالك كويس م اللي حا قوهولك ، فتحى ودانك خالص

وحضرى ذهنك ، ما تخلهش بتشتت لاهنا ولا هنا .. أنا عارف انك

غيه ، لكن حاولى انك تفهمى ..

أم رتييه : يا خويا قول ، علتى .

عبد الصبور : بقى انا عايز اعقد اتفاق بينى وبينك .

أم رتييه : اتفاق ؟

عبد الصبور : ايوه .. اتفاق .

أم رتييه : بينى أنا ، وبينك انت ؟

عبد الصبور : أيوه ، اتفاق بينى أنا وبينك انتى ، حاجه غريبه ؟

أم رتييه : أبدا . هوا فيه حاجه منك غريبه ، بس إيه المناسبه ، تعمل اتفاق بينى

وبينك .. ليه ! وعلى إيه ؟

عبد الصبور : أيوه . قلتى لى ليه ، وعلى إيه ! بقى يا ام رتييه يا بنتى أنا حاسس ان

الأجل قريب .

سنية : بعد الشر يا سيدى .

أم رتييه : بقى اسمع يا عبد الصبور يا خويا ، إذا كنت بتقعدى عشان تقول لى

الكلام الفارغ ده . أنا مش قاضيا لك انت بقالك عشر سنين وانت

تقول انك حاسس ان أجلك قرب واديلك قاعد زى فرد قطع ، لا بيك

ولا عليك .

عبد الصبور : لا ، المره دى حاسس انه قرب قوى .

أم رتييه : قرب والا ما قريش ، اللي انت عايزه ايه ؟

عبد الصبور : عايز تعمل اتفاق مع بعض ان اللي يموت قبل الثانى ينزل يقول له شاف

إليه فوق .

أم رتيبة : هو إليه أصله التخريف ده ؟

عبد الصبور : معلش ، واحده ، واحده ، أنا عارف انك غيبه ، ولازم افهمك حته ، حته ، بقى يا ام رتيبه يا اختى .. الواحد منا لما يموت .. روحه بتطلع فى السما وجتة بتفضل فى الأرض تعفن وتاكل وتدوب . يعنى لما انت تموتى مش حا يفضل منك غير روحك .

أم رتيبة : يا باى على كلامك اللي زى الضرب .

عبد الصبور : فروحك . وبقية الأرواح بتطلع فى السما وتبقى عايشه فى عالم كبير خالص أكبر من العالم اللي احنا عايشين فيه ده وتبقى مقسمه لدرجات ، واحنا دلوقت بنقدر نستدعى بعض الأرواح ، وتكلم معاها ، إما بطريقة الكتابه والإشاره ، أو بالصوت ، يعنى الروح تحتل جسم بنى آدم اسمه الوسيط .. أو فى الأحيان النادره تتجسد الروح ، فأنا عايز اللي يموت منا قبل التانى ، يبقى يتجسد وينزل ويتفاهم معاه ويديله المعلومات اللي يعرفها عن عالم الأرواح .

أم رتيبة : اسمع ياخويه يا عبد الصبور ، بلاش الكلام ده انت لبشت جتى ، أنا لا اقدر لا انزل ولا اطلع عافينى ياخويه م الاتفاق ده .. أنا لما اموت حاستكن فى تربتى لا حاهوب لا هنا ولا هنا . كل اللي انا عايزاه انكم تبقوا تزرعوا على تربتى صباره ولبلايه .. حاكم انا احب اللباب .

عبد الصبور : لبلايه إيه وبتاع إيه . إيه الكلام الفارغ اللي انتى بتقوليه ده .. إانت مش حاتبقى فى التربه . إانتى حاتبقى هايمه فى السما ولازم تنزلى .

أم رتيبة : ما نزلش ولا روحش ولا جى . بلاقلية دماغ ، هو انت ورايا فى الحيا وفى الموت .

عبد الصبور : عنك ما جيتى ، انت اصلك راسك ناشفة . على العموم انا متأكد ان أنا اللي حاموت قبلك . لأن حاسس ان أجلى قرب خالص ، يعنى يمكن أموت الليله دى .

سنية : يوه يا سيدى .. تف من بقلك سبع تفات .  
عبد الصبور : لا سبع تفات ولا تمانية. الواحد لما قضاه بييجى، ما ينفع في رده  
حاجه.. على العموم أنا مش زعلان ان انا حاموت لأن دى مسألة  
مفروغ منها.. لانا أول اللي حا يموتوا ولا آخر اللي حا يموتوا.. الحياة  
قنطره، أو نفق، والزمن دا زى القطر الاكسبريس. الروح تركب فيه  
شويه لغاية ما تعدى من ناحيه للناحيه التانيه، عمر الاكسبريس ما  
كسكس ولا هدى ولا وقف. يعنى اصلين للنهية عزنا والا ما  
عزناش. كل حاجه في الدنيا تتخلص، اشعنا احنا اللي مش عايزين  
نخلص. أنا حا موت ومش زعلان اللي انا حا موت، انا مش خايف من  
الموت، لكن اللي انا خايف منه، ان انا اروح كده هدر، زى كل الحمير  
الى ما توا قبلى.. أنا عايز استغل موقى، عايز اعمل حاجه ما عملهاش  
حد قبلى .. عايز ارجع تانى ، عايز اموت وارجع ، أروح وآجى .

أم رتيبة : ( تضرب بيدها على صدرها ) يا مصيبتى !  
عبد الصبور : مالك كده .. بتضربى على صدرك ، زى الخبايل . خضيتنى . يا  
مصيبتك ليه ؟ عشان حا موت ؟

أم رتيبة : لا .. عشان حا ترجع . موتك حقيقى مصيبه . لكن رجوعك مصيبه  
أكثر . عايز تموت ويرجع عفريتك ينظ لنا كل شوية ، يا لطيف . يا  
لطيف . ودى مين تستحمل الغلب ده .. اللي ماحنا طايقينك وانت  
بنى آدم .. نطيقك وانت عفريت ؟ .

عبد الصبور : برضه الوليه بتقول عفريت، افهمى يا فخر ركب. يا نجم. أنا مش  
حارجع عفريت. انا حارجع زى ما انا كده. حا ارجع روح مجسده،  
زى ما انت شايفانى تمام، بس أكون بقى عرفت كل حاجه، أكون  
كشفت الستار وهتكت الحجاب، ونورت العتمه اللي بتخبى العالم  
الواسع.. أكون لفيت في السما شوية، واطلعت على المستخسى،  
وعرفت الأسرار الخفيه، وعرفت تركيب السموات ووضع الكون،

وجليت سر الموت ، والروح .. كل ده اللي حار فيه الفلاسفه  
والعلماء . بشوية لف في السما ، حا عرفه ، وبعدين حارجع لكوأ ،  
واكشف لكوأ المستخبي ، واشرح لكلوأ المستر .

أم رتبية : يعنى حا تعرف مثلا .. انا حا تجوز إمتى ؟  
عبد الصبور : انتى جنسك إيه ؟ مخلوقه من إيه ؟ أقول لك أسرار الكون ، والعالم  
المجهول .. تقوللى حا تجوز إمتى ؟ يا بيجحه يا ام عين فارغه ؟ . إيش  
يكون جوازك ، فى المهمات الكبرى اللي حا تكون ورايا .. إانتى  
فاكرانى حاشتغل فى السما مخاطبه ؟ . إانت فاكرانى حاكون فاضى  
للكلام الفارغ بتاعك ده ؟ ثم انت مالك ملهوفه على الجواز كده ؟ ..  
أنا قلت لك انك مش حا تتجوزى يعنى مش حا تتجوزى لا وانا حى  
ولا وانا ميت .. مبسوطه .

أم رتبية : يا باى على ملافظك اللي تسد النفس .. طيب عرفنا وانت حى مش حا  
تجوز ، طيب ولما تموت .. يبقى شأنك إيه بقى فى جوازى ؟ هو انا  
حافضل مربوطه لك كده حى وميت ؟ حافضل متسنسله فيك ؟ .  
حقه دى مصيبه وطبلت على دماغى .

عبد الصبور : اللي حاصل . قسمتك كده ، بختك كده . المهم خيلنا فى اللي احنا  
فيه ، بلاش السقاسف دى ، خيلنا فى الحاجه المهمة ، بقى انا قلت لك  
ان انا لما اموت حاضرب بلطه فى السما وابرم فيها برمتين ، وارجع .

أم رتبية : ترجع ازاي بس ياخويا ؟  
عبد الصبور : أيوه .. كده عجبتينى ، قولتلى حا ترجع ازاي ، بقى احنا دلوقت  
بنقدر نستدعى الروح اللي احنا عايزينها وبتفاهم معنا وتقول لنا على  
اللى احنا عايزينه يا إما بواسطة الإشاره .. أو بواسطة الصوت ، عن  
طريق وسيط شاطر ، فأنا دلوقت حاطلع وانا مصمم على الرجوع .  
بس عايز وسيط اتفاهم معاه على الرجوع ، وسيط يكون بين أرواحنا  
تجاذب وتفاهم ، وما افتكرش فيه تفاهم وتجادب بين روحى وروح  
تانيه أكثر من روحك ، حقيقى روحك غيبه وحماره ، وروحى زكيه



وراسيه وعاقله .. لكن دا ما يمنعش التجاذب والتوافق اللي بينهم ..  
إنتى أقرب الناس وأحبهم لى ، رغم السخافة اللي أنت فيها ، واحنا  
اللاتين بقالنا خمسة وأربعين سنة مافارقناش بعض ، وعمر روحى ما  
تظمن وتهدى الا لروحك ، وعشان كده حا خليكى الوسيط .. اللي  
حانزل بواسطته ..

أم رتبية : ( تتهد بيأس ) ولا انا فاهمه حاجه ؟ وسيط إيه وتوافق إيه ؟ وكلام  
فارغ إيه ؟

عبد الصبور : عارف .. عارف انك مش حا تفهمى حاجه أبدا .. لكن اصبرى على  
لغاية ما فهمك كل اللي انا عايزه منك . أنا مش حا طلب منك حاجه  
اكثر من طاقتك . إنت حا يكون دورك بسيط خالص ، وانا حا يكون  
على كل الحمل .. اللي انا عايزه منك .. انك تستعدى لاستقبالى فى  
يوم معين .. فى ساعة معينة ، ويكون اليوم دا يوم الاربعين فى نص  
الليل مثلا .

أم رتبية : ( تهمز رأسها أسفا ) قصدك تقول انك حا تموت وترجع فى يوم  
الاربعين .. يعنى حا ترجع تاخذ بخاطرنا ؟

عبد الصبور : لا .. بس الفكره انكم تدونى وقت عشان الف شوية فوق ، أنا مش  
عايز ابقى مكروش ، وأظن اربعين يوم مش كتير عشان جوله فى  
السما .. يمكن احب اروح هنا والا اروح هنا ، حد من الأهل  
يعرفنى .. يعمل حفلة تكريم بمناسبة صعودى للسما .. برضه الواحد  
لازم يعمل حسابه على المشاوير اللي زى دى .

أم رتبية : ( فى سخريه ) أيوه برضك لازم تعمل حسابك .

عبد الصبور : المهم ان احنا نتفق مع بعض من دلوقت . عايزك تستنى ليلة الاربعين  
الساعة ١٢ بالليل ، ونهضى الجو الملائم لاستقبالى .. يعنى تقعدى  
لوحدك فى أودنى فى صمت وسكون .. لا حس ولا حركه ، وعايز  
كل حاجه فى الأوده تبقى زى ما هى .. كل حاجاتى تبقى حاضره ،

الطرطور بتاعى والعبايه وعلبة النشوق ، والطشت والابريق والميه  
السخته ، والكتب اللي على الرف ، وما تنسيش القبقاب أبو جناجل .

أم رتيبة : حاضر من عيني الاتنين .. مش خلاص بقى ؟ أقوم اشوف شغلى ؟  
عبد الصبور : استنى شويه .. مستعجله على إيه ؟ بكره تقعدى لوحدك لما  
تشبعى .. فيه حاجه كمان عايز اقولها لك .

أم رتيبة : إيه تانى ؟

عبد الصبور : انا عايز التلامذه بتوعى زى الشيخ جاد والأستاذ زكى والأستاذ  
محجوب ، يكونوا موجودين عشان يشوفوا التجربه وينشروها على  
العالم .. بس يقعدوا هنا ، وما يخشوش الأوده دى إلا لما انزل ..  
عشان ما يشوشوش علينا . إانت لوحدك بس اللي تستنى فى الأوده  
بتاعتى . أنا أصلى ما عنديش فكره حانزل ازاي ، يمكن أنزل بجتنى  
عريان مثلا ، تبقى عباره قدام الناس الغرب ، عشان كده بقول من  
باب الاحتياط تحضرى لى غيار .. وانت قاعده مستيانى . عايزك  
تركزى ذهنك فى ما تخليش حاجه فى فكرك غيرى .

أم رتيبة : حاضر ، مش حاخلى فى فكرى غيرك .. سيبنى بقى .. اعتقنى لوجه  
الله .

عبد الصبور : إخصص عليكى يا خاينه .. بعد العشرة الطويله ، اقول لك انا حاموت  
الليله دى .. تقوللى سيبنى بقى اعتقنى لوجه الله !

أم رتيبة : ياخويا أصل انا شبعت من موتك ده .. بقى لك اتناشر سنه وانت  
تقول انك حاتموت .

عبد الصبور : ( فى تأثر ) لا .. المره دى يظهر انه جد ، صحيح ، مش هزار .

أم رتيبة : ( ييدو عليها الفرع ) يا ندامه ! إيه الكلام اللي انت بتقوله ده .. إانت  
حانسس بحاجه . اجيب لك دكتور ؟

( تنهض وتضع يدها على جبينه ) .

عبد الصبور : ما فيش لزوم للدكتور ، عمر الدكتور ما يمنع الموت .. الا لما يكون

المريض من نفسه ، مش ناوى يموت . لكن انا قلت لكم خلاص ، أنا ناوى اموت .. أنا دلوقت حاقوم ادخل فى السرير وارخى الناموسيه ، واذا كنتم تحبوا تقروا الفاتحه على روحى ، ما فيش مانع . يمكن تفيد .  
( ينهض ويتجه إلى السرير ) .

سنية : ( تنهه ) يا عينى عليك يا سيدى ، بعد الشر عنك يا سيدى ، ما كان بدرى عليك يا سيدى .

( يدخل زينهم منزعجا ) .

زينهم : فيه إيه ؟ جرا إيه ؟ فيه إيه يا بت يا سنيه ؟ كفا الله الشر ؟ .

سنية : سيدى عبد الصبور حايوت .

زينهم : يموت ؟ ها أو ، أنا كان أموت فى المهليه .

( سنيه مستمرة فى البكاء ) .

أم رتية : بس يا بت بلاش كهن وبدع .. إيه المسخره دى ؟ . دا بقاله ..

اربعناشر سنه ناوى يموت .. ما ييموتش .. دا عمر الشقى بقى .

( يصعد عبد الصبور إلى السرير ) .

( تقف ام رتية وزينهم بجوار السرير .. ويحدقان بأنظارهما إلى عبد

الصبور ) .

سنية : ( وهى تبكى ) ما كانش يومك يا سيدى .. والله حا توحشنا يا

سيدى ! .

عبد الصبور : نشوف وشكم بخير ، حدش لازمه حاجه من فوق ، حدش له حبيب

عايز يبلغ له السلام .

( يشير بيديه تحية الوداع ويرخى الناموسية ) .

يسدل الستار

( أم رتية )

## الفصل الثالث

المنظر : نفس منظر الفصل الثاني بعد أربعين يوما ، الساعة تشير إلى الثانية عشرة إلا لث ، وحجرة الاستقبال رصت بها مقاعد خيزران ومنظرها غير مرتب بعد أن انفض المعزون في الأربعين ، الباب الزجاجي المفضى إلى حجرة نوم عبد الصبور مغلق ، بيدوزينهم وقد أمسك بمقشة يد وأخذ يكس الحجره ويجمع المقاعد الخيزران في أحد الأركان .

## المشهد الأول

زينهم : والله عملتها وخلصت يا سى عبد الصبور .. هوا انا كان داخل عقلى انك حاتموت حقيقى . أربعتاشر سنه على رأى ام رتيه وانت كل يوم بتقول انك حاسس ان أجلك قرب ، وتصيح زى الحصان . صاغ سليم . يعنى اشمعنى المره دى اللى صدقت . اشمعنى المره دى اللى حليت عنا لازم فيها سر ، لازم محضر لنا مكيده ، لازم مديبر لنا مقلب . إنت مش ممكن تسيينا كده بالساهل ، مش ممكن تحمل عنا كده الله فى الله .. ياما انا خايف لتكون ناوى ترجع حقيقى .. ما انت أصلك ما تستبعدش عليك حاجه أبداً ، أهو كده تيان طيب وعلى نيائك .. لكن فى الحقيقة قرم ابن قرم ، مين يعرف يمكن تعملها من دون الأموات ، وتقل عقلك وترجع لنا تانى ، وانت أصلك بنغزه ، وتعملها صحيح .. وتزوغ من عزرائيل زى الحريايه .. أنا بقالى خمس سنين معاشرك . ما شفتلكش حاجه كده تفوت زى بقية الخلق حتى موتك ، هى دى موته دى . تفضل ملبشنا كده أربعين يوم ، وكابس على

أنفاسنا ولا كأنك مت .. كنا عايزين نشم نفسنا .. كنا عايزين نحس أنك مت حقيقى .

( تدخل سنية وقد ارتدت ملابس سوداء ) .

سنية : ماتيا الله تشهل شويه يا زينهم .. إنت عمال تحسوك فى إيه ؟ .

زينهم : مش لما اوضب الأوده ، عشان اللى بيتسمموا دول يرجعوا يقعدوا تانى .. أنا مش عارف لزومه إيه الأكل فى الميتم ؟

سنية : وأكل إيه ! هوا أكل بعقل ادا انت لو شفت الشيخ جاد وهو هابش فى حتة الفخده اللى فوق الفته تقول دا عمره ما حضر ميتم أبدا ، والا الأستاذ محجوب وهو يلحس السمن اللى فى صوابعه ، وبابن عليه الفرحة كده ، زى اللى نفسه كل يوم يكون فى ميتم .

زينهم : الحق مش عليهم .. الحق على اللى سمهم ، ما كانش ضرورى نعمل لهم اللى عملناه ده .

سنية : أمال يعنى فكرك كده بيجوا يعزوا مجاناً .. يقعدوا يسمعوا القرآن كده لوجه الله ، على العموم . أهى رحمه ونور على روح المرحوم .

زينهم : مرحوم ؟ أنهى مرحوم ده ؟ هوا ده تنفع فيه رحمه والان نور . دا تلاقية دلوقت مشاكل طوب السما . تلاقية مخلص حد ما تخانقش معاه . أنا متأكد انه وهو طالع مع عزرائيل خلا عزرائيل ندم على أحده ، وانه لو رجع لنا زى ما بيقول مش حا يكون راجع بكيفه أبدا ، دا يكون راجع مطرود بناء على طلب الأرواح ، حا يكون راجع مضروب ثلاثين ألف برطوشه ومكسور وراه أربعين ألف قله . لكن لزومه إيه يرجع ؟ وهو سابنا لما يرجع لنا .. بدمتك انتى حاسه انه مات ؟ .

سنية : أبدا والنبى يا خويا يا زينهم ، أنا متيها لى انه فى كل ساعه قاعد قدامنا ، وكل ماجى أخش أودته ألاقية مدلدل رجليه فى الطشت زى عوايده ، وكل ما بص لطرطوريتيها لى انه قاعد تحته .

زينهم : إنت برضه كده ؟ دا انا كنت فاكر انا لوحدى . أنا كل ما فكر .. يتيها لى

انه هو ما طلعتش لا سما ولا حاجه وانه قاعد تحت الناموسيه زى ما شفتاه  
آخر مره ، وكل ما اسمع عطسه .. تنبأ لي انها بتاعته .

سنية : وستى ام رتيه . ألعن وألعن ، متلبشه ومرعوشه وعاملاله حساب زى ما  
يكون حى .. أصل حكاية رجوعه تانى مغلهاها زى الفرخة الداخه .. مش  
مصدقه أبدا انه خلاص مات ، وانها حره تعمل اللي هي عايزاه . حاسه انه  
زى ما يكون فى سفر وراجع ، وانه لسه بارك على أنفاسنا .

زينهم : على العموم .. كلها نص ساعه ، وننتهى .. والمسألة تفوت بالطول والا  
بالعرض ، واذا كان ناوى ينزل حقيقى .. أهو ينزل له شويه من نفسه ويغل  
عنا ما يورناش خلقته بعد كده أبدا .. نص ساعه ، ونبقى أحرار .. نص  
ساعه ونخلص منه خالص ، ونقطع دابره من هنا ، ونعمل زى ما احنا  
عايزين .. انتى فاكره يا سنيه الطلب اللي طلبته منك ؟ .

سنية : فاكره يا خويا .. بس المرحوم .. خوفنى م الجواز قوى ..

زينهم : وهوه المرحوم كان وراه حاجه غير كده .. أنا عارفه كويس . نوع أنانى ما  
يحبش الا نفسه . فضل مقعد اخته كده من غير جواز لغاية ما ضيع  
عمرها .. عشان عارف انه ما يقدرش يعيش من غيرها .

سنية : طب وانا ؟ ماله ومالى ؟ .

زينهم : نفسه فيكى ومش طابلك .. نفسه يتجوز ومش قادر .. خايف وموهوم ،  
وعشان كده ضيع عمره عازب .. وعمايز كل الناس تقعد زيه .

سنية : لا يا زينهم حرام عليك .. الراجل كان يقول انه صاحب مبدأ ..

زينهم : مبدأ .. سلامات يا مبدأ .. مبدأ إيه بقى يا ست سنيه .. دانتي على نياتك  
قوى .

سنية : كان يقول البنى آدم قدامه نعيمين ، نعيم الأرض و نعيم السما ، وانه هوا  
حارم نفسه من نعيم الأرض عشان قصير وزايل ، ومستنى نعيم السما عشان  
باقى ودائم .

زينهم : هاأو ، هاأو أو أو ، دا قصر ديل يا ازعر . كلهم يقولوا كده .. الواحد لما

ما يطولش النعمة ، يقول عليها زايله ، ويعزى نفسه بالسدايمه اللي في السما .. خليه ييقى يقابلني في السما . فيه حد يزهد في النعيم بكيفه ! ما يزهد في الخلق الا اللي بلا ودان . ما فيش في الأرض زهد .. الا بالاكراه .. والزهد في النعمة كفر ، دا انا لما ديكى حته ملين وترفضيها تنكسف ، تيقى عيه في حقي . أنا البنى آدم الغليان ، إيش حال بقى ربنا ؟ يصح يدينا حاجه ونقول لا !! يصح نكسف ربنا ؟ .

سنية : أستغفر الله العظيم .

زينهم : تستغفري ليه ، هوا انا قلت كفر ؟ الكفر هوا اللي قالوه لك الله يرحمه سي عبد الصبور . أنا لازم اتجوزك ، ربنا ادانى حته ملين . حته قشطه . أكسفه ! أقول لا أنا عايز من اللي في السما .. دى تبقى لماضه .

( يفتح الباب الزجاجي وتبدو منه أم رتيه متشحة بالسواد ويبدو الفراش والمقعد والطرطور وعلبة النشوق ، وكل الاستعدادات لاستحضار روح عبد الصبور ) .

أم رتيه : مش تخلصوا بقى وتخلوها ليله تفوت على خير الساعة قربت على اتناشر ، مش تقولوا للمزاعيف اللي بيتسمموا يجوا يقعدوا بقى .. مش كفايه أكل . هم إيه بياكلوا في آخر زادهم .. ما شافوش مياتم قبل كده .. ( ترفع رأسها إلى السما ) يارب انهيها بقى .. خلصنا م الدوخه اللي احنا فيها . الناس كلهم ييموت لهم أموات ويمزنوا عليهم ويخلصوا .. ما فيش حد موته عجب غيرنا احنا ، لازم سي عبد الصبور يروح وييجى .. أصله واخذ السكه قياسه . إلهى يعدلها له .

( يدخل سيد افندى من باب الصالة وهو يمضمص بشفتيه وبسلك أسنانه ويفاجأ بوجود أم رتيه فيترجع ) .

## المشهد الثاني

- سيد : يا ساتر .. عدم المؤاخذه .
- أم رتيبة : ( يندو عليها الخجل وتحجب وجهها بطرف الطرحه ) اتفضل يا خويا .. ما فيش حد غريب . اتفضل .
- سيد : ( يتقدم ويصافحها وهو يعثر من الكسوف ) أهلا ، وسهلا .. أهلا وسهلا .
- ( يخرج زيتهم وسنيه ويترك ان سيد افندى وأم رتيبة في الحجرة ) .
- أم رتيبة : أهلا بك يا سي سيد ، والنبي يا خويا .. مش عارفه اودى جميلك فين .
- سيد : على إيه يا ست .. على إيه ؟
- أم رتيبة : على التعب اللي تعبته في جنازة المرحوم . هوا انت تعبت شويه ؟
- سيد : دا الواجب يا ست .. احنا ما عملناش حاجة اكتر الواجب .
- أم رتيبة : أبدا والنبي يا سي سيد افندى .. دا انت عملت أكثر واكثر .. انت أصلك طيب وابن حلال .. ربنا يقدرني على رد جميلك .
- سيد : يا ستى ما فيش فرق .. إحنا برضك أهل .. أنا مش غريب .
- أم رتيبة : غريب ازاي يا سي سيد .. دا البيت بيتك . هوا احنا فاضل لنا مين بعد سي عبد الصبور غيرك انت والست أم سيد .
- سيد : أنا تحت أمرك .. أنا خدامك .. أأمرى يا ست ام رتيبه .. أنا مالياش بركة الا انت .. هوه لو كان الله يرحمه حط عقله في راسه ، ووافق على المسألة اياها . مش كان بقى زيتنا في دقيقنا ، وكان هدى سرنا .
- أم رتيبة : ربنا يتمم بخير يا سي سيد .. ربنا ما يخيش رجاء مؤمن .. احنا برضه مسيرنا لبعضنا .
- سيد : أيوه . برضه مسيرنا لبعضنا .. أنا مؤمن وربنا ما بيخيليش رجاء



- أبدا .. إن شاء الله أحلامنا حاتتحقق وحا تتجوز وبسرعة أسرع مما  
نتصور .
- أم رتبية : ازای ؟ ..
- سید : زى الناس . هوا فيه مانع انا تتجوز دلوقت ؟ العقبه اللى كانت  
موجوده زالت . السد اللى كان بيننا انشال .
- أم رتبية : ما نشالشى ولا حاجه .. دا السد حا ينزل تانى الساعة اتناشر .
- سید : انت برضك بتصدقنى كلام الجماعه بتوع الأرواح دول . هوا برضه  
معقول انه ينزل ! وينزل ليه ؟ وعلشان إيه ؟
- أم رتبية : قال عشان يكشف لنا السر .
- سید : سر ؟ سر بتاع إيه ؟
- أم رتبية : أنا عارفه يا خويا .. أهو قعد يقول لى كلام كثير ما فهمتش منه حاجه  
أبدا .. غير انه حا ينزل تانى الساعة ١٢ ليلة الاربعين ، وان انا لازم  
احضر كل حاجه واقعد لاستقباله فى أودته ما فيش حد معايه أبدا ..  
علشان يقول لنا على اللى شافه فوق .
- سید : وهوه كان حد طلب منه يقول ع اللى شافه فوق .. حد كان سألته ؟  
أما عجيبه على الجدع ده !
- أم رتبية : معلهش يا سيد افندى .. فات الكثير ما بقاش الا القليل .
- سید : أنا مقدرش استنى .. أنا حاسس بفرحه عجيبه .. أنا حاخرج ادور  
على مأذون .
- أم رتبية : يادى النايه يا سيد افندى ، الناس يقولوا ايه ؟ اتجوزت ليلة الاربعين  
بتاع اخوها وهو لو نزل وشاف المأذون حايجلى ليلتنا تفوت كده  
بالساهل ؟ دايجليها ليله زى الطين .
- سید : طيب معلهش .. انا حاصبر علشان خاطر ك .. حا قعد استنى اشوف  
بسلامته حا يعمل إيه بنزوله ، حا يجيب الديب من ديله !
- أم رتبية : والنبي دنا حتى خايفه من قعادك ساعة نزوله .. أصل الله يرحمه ما

كانش يطيقك أبدا . كان يقول عليك فيك شبه من الخريت .

سيد : الإيه ؟

أم رتية : الخريت .

سيد : والخريت ده يبقى ايه ؟

أم رتية : لازم حاجه شكلها وحش قوى .

سيد : انت شفتيه ؟

أم رتية : لا .. أبدا ، وانا مالى اشوفه .

سيد : هوا شافه ؟

أم رتية : ماظنيش .

سيد : أمال يعنى متين عرف ان انا شبه الخريت ؟

أم رتية : ما انا برضه سألته نفس السؤال فقال لى انه هو لما يحاول يتصور

الخريت ما فيش صورته تيجى فى دماغه غير صورتك .. وما دام كده

يبقى لازم يكون الخريت شبك ، وما دام الخريت شبك يبقى لازم

انت شبه الخريت .

سيد : ما شاء الله .. اما استتاج بديع ، معلش .. الله يسامحه ، كانت عليه

لسان زى العقربه ، وكان .. لكن على إيه . النبي قال اذكروا محاسن

موتاكم .. الله يرحمه مطرح ما راح .

( يسمع صوت الشيخ جاد من الخارج يصيح ) .

الشيخ جاد : ماتيا لله بقى يا جماعه .. دى الساعه قربت على اتناشر .

محبوب : أبوه .. ياللا بينا .

أم رتية : طيب اسيبك انا بقى يا سى سيد .. لحسن الجماعه جاين .. أنا حا

حش اقعد استنا . ياما انا خايفه قوى ، كل ما الساعه بتقرب أحسن ان

روحى سايخه وركبى ملخلخه .. أنا أصلى عمري ما قابلت أرواح قبل

كده .

سيد : شدى حيلك ، ما تخافيش . انا قاعد لك بره ، لو كان ناوى على أزيه

ابقى ازعقنى على وانا اخش اكسر لك نافوخه .. أنا عارفه جنس بطال  
ما يجيش غير بضرب الصرم .  
( تنصرف أم رتيبه وتغلق وراءها الباب الزجاجى ثم يدخل الشيخ  
جاد وزكى ومحجوب تباعا من باب الصالة ) .

## المشهد الثالث

- محجوب : ( ينظر إلى ساعة الحائط ) الساعة اتناشر الا عشره . فاضل عشر  
دقائق .  
( يجلس كل منهم على مقعد وعيونهم متقلبة ما بين الساعة والباب  
الزجاجى ) .  
زكى : لو كان صحيح الأستاذ عبد الصبور حا يقدر يوفى بوعدده وينزل ! .  
يبقى معجزة قرنه !  
محجوب : قرنه بس ! دا يبقى معجزة ميت قرن ، لو كان يقدر ينزل بجسمه زى ما  
كان بيقول دائما فى الجلسات بتاعتنا ، ويقول لنا عمل إيه فى الاربعين  
يوم ، وشاف إيه .. دا يبقى الحدث الأكبر من عهد آدم .  
سيد : عبد الصبور يبقى معجزة قرنه ؟ يبقى حدث أكبر ؟ دالميه الكلام ده ؟  
زكى : أمال .. هوا فيه حاجه محيره البنى آدم ، غير جهله باللى بعد الحياه ..  
البنى آدم اللى طار فى السما .. البنى آدم اللى غاص فى البحر ، البنى آدم  
اللى اتكلم فى لندن سمعوه فى القاهره ، واللى اتحرك فى أمريكا شافوه فى  
طوكيو .. البنى آدم اللى نطق الجماد وحرك الحجر . البنى آدم اللى ما  
عجزش عن شىء أبدا . البنى آدم اللى فهم كل حاجه وكشف كل  
سر .. عجز عن أبسط الأشياء وأقربها له ، عجز عن فهم نفسه . جى  
منين . ورايح فىن ! أصله إيه ؟ وفصله إيه ؟ بيتولد ليه ؟ ويموت  
ليه ؟ البنى آدم عرف كل حاجه فى الدنيا الا نفسه .

محبوب : مظلوم . فهم الشمس والكواكب .. فهم فيه إيه في باطن الأرض ، وفيه إيه ورا السماوات .. لكن ما فهمش فيه إيه في بطنه . والا فيه إيه ورا نفسه .

زكى : فهم كل حاجة .. ما عدا روحه .. روحه .. اللي هي كل حاجة عنده ما عرفش عنها حاجة أبدا ، بتطلع ازاي ؟ بتنزل ازاي ؟ بتعمل إيه ؟ بتروح فين ؟

سيد : حقيقي معاكم حق .. لكن لزومه إيه يعرف .. وحا يعمل إيه لما يعرف ؟ ما دام ما يملكش من أمر روحه حاجة .. ليه عايز يعرف عنها حاجة ؟ لا هوا اللي بيحب روحه ولا هوا اللي بيطلعها ، يبقى ماله هوه وماها . هوا كل اللي عليه انه يعيش ، إنه يمشى ، إنه يسب نفسه للي خلقه ، هوا اللي منزله ، وهو اللي بياخده . ماله هوه ومال روحه ! عرف والا ما عرفش . لا حا يقدر يوقف طلوعها ولا يمنع نزولها . يا شيخ انت وهوه ريجوا نفسكم بلاش فلسفه فارغه . كان غيركم اشطر .

زكى : هوه حقيقي مش حا يقدر يوقف طلوعها ، لكن على الأقل يبقى عارف هي طالعه فين ، يبقى عنده فكره ... مش يفضل في حياته دابر تايه حيران ، كل اللي يعرفه عن روحه حاجات ما يقبلهاش عقله ، ويضطر يصدقها من غير تفكير ، لأنه لو فكر مش حا يصدق ، وهوه حاسس انه لازم يصدق في حاجة ، ولازم يؤمن بحاجة ، ليه ما يقاش المصير واضح ومعروف ؟ ليه ما نعرفش انه لما حانوت حانبقى كذا ، وحا ننتهي ، كذا .. ما دام مصيرنا متقرر ومعروف .. ليه يستخير علينا ؟ ليه يفضل في ضلاله وفي ظلام ؟

محبوب : ايوه حقيقي ليه العالم الواسع دا كله ، اللي بتفاوت عليه الأجيال ، ما يعرفوش معمول ليه وفائدتهم فيه ايه ؟ ليه يفضلوا يتخبطوا في عقائد مختلفة ، وأوهام متناقضة ، واجيال تروح ، واجيال تيجي ، ولا حد

عارف ده راح فين ولا ده جه منين ، والا ليه فايده وجوده في العالم .  
ولمصلحة مين العالم موجود ؟ . إذا كان اللي عايشين فيه هم أشقى ما فيه  
من ساعة ما يتولدوا وهم مهددين بالموت ، ولإيه هوا الموت ما هماش  
عارفين .. يقولوا لهم ده انتقال من حياتهم الوحشه الفانيه لحياه حلوه ،  
حياه دائمه ، حياه خالده ، طيب امال جم للحياه الفانيه الوحشه ليه ،  
لما فيه حياه حلوه ، وحياه دائمه ، وحياه خالده ؟ لزومه لإيه التعب  
والشقا في الحياه الفانيه دى ؟ الحياه اللي بياكل فيها الكبير الصغير ، واللى  
عمره ما داق فيها الإنسان سلام ولا شاف هدوء ، ولا استريح باله ..  
إليه قيمة الفتره القصيره اللي بيقتضيا الإنسان في الحياه الأولى ، مغمور  
في الشقا والتعاسه والظلم ؟

زكى : مين يعرف ؟ يمكن لو كان عرف الإنسان مصيره المجهول ، وتأكد ان  
الفتره اللي بيقتضيا في الحياه دى فتره مؤقتة ، وان له مصير طويل آخر .  
ما كانش طمع في الدنيا وجرى ورا المتع وانكسب على الملذات ، وحب  
ياخد أكبر كميه ممكنه منها قبل ما يموت ويضيع كل شيء من يده في  
الآخر .. لو كان حقيقى يعرف إن حياته لسه لها بقيه طويله ، كان  
صبر في الحياه دى واستحمل وكان كل الناس حبوا بعض وتقاسموا  
اللقمه سوا ، بدل ما كل واحد يخطفها من بقى التانى يا أخى دا الواحد  
منا لما يكون وراه عزومه ما بيرضاش يرمم عشان نفسه ما تتسندش ..  
ليه ؟ لأنه ضامن العزومه .. وكان لو كانت العزومه الموعود بيها في  
الآخر مش ممكن كان يرمم في الدنيا .. لكن المصيه انه حاسس انه  
مش ضامن حاجه .

سيد : أبوه تمام . لو كان الواحد ضامن ان الدنيا — زى ما قال سيدنا على —  
سفر ، والآخره غايه ، كان قضى السفره زى ما تكون .

زكى : لكن هوا مش شايف الغايه أبدا ، هوا فاكر ان السفره هوه كل حاجه ،  
شايف الغايه غامضه ومجهوله .. مش عارف هوا رايح فين ، وعشان

كده يقول يفوز بالسفره أحسن له ، وعصفور قدامه خير من عشره  
مش شايفهم .. يقولوا له ان في آخر السفره حا تلاقى كل الحاجات  
احلوه اللي انت بتشوقها في المحطات وأحلى منها ، إذا كنت بتلاقى في  
المحطات جنبه وسميطة ، حا تلاقى في آخر السفره كنافه وقطاييف  
وشهد ، ولبن ، لكن أهو كلام يقولوه له .. حد وصل لآخر السفره  
وجه قال له ، أبدا .. ومع ده كله كان تلاقى واحد مثلا مباحبش الكنافه  
والقطاييف والشهد واللبن ، واحد نفسه حلوه يبحب الطعميه  
السخته ، والبنى آدم بيتغير والناس أذواق .. مش معقول انه حا يفضل  
باستمرار كل أمانيه ، لبن وشهد وخمر ، وكل حاجه ولها أوان .. كان  
زمان ركوب الحمير زينه .. لكن دلوقت بقى مهزأه .. عشان إيه ؟  
عشان فيه جنب الحمير كاديلاك وبكار .

محبوب : وليه اللف دا كله يا أخى ، البنى آدم دلوقت بيلاقى في المحطات اللي انت  
بتقول عليها حاجات أحسن من اللي بيتوعد بيها في آخر السفره ،  
دلوقت الناس ، اللي يقولوا عليهم كفار ، ولا هماش مسلمين ، ولا  
عايشين في أرض الرسول ، عايشين عيشه أحسن من اللي اتوعدوا بيها  
المؤمنين والمسلمين اللي دلوقت بيتمرغوا في التراب .. دلوقت كل  
واحد منهم عنده فرجيدير فيه الشهد واللبن والخمر ، وكان فوقها  
جاتوه ، ومرتدلا ، وبسطره ، وديك رومى ، وعنده تلفزيون  
وعنده حاجات كثير قوى .. إخواننا المسلمين لسه ما عندهمش فكره  
عنها ، وعمرهم ما ينتظروها حتى ولا في آخر السفره .

الشيخ جاد : ( وهو منمك في تسليك أمثانه ) وحدوه يا جماعه .. إيه أصل  
الكلام اللي بتقولوه ده .. ( ينادى زينهم الذى ظهر بجوار الباب )  
شوف كده يا زينهم وحياة أبوك قشايه اسلك بها سناني .. حته اللحمه  
اللى كلتها كانت متفله قوى . إيه أصل الكلام اللي عمالين تكفروا بيه  
ده .. أسرار إيه اللي عايزين تكشفوها دى ! هوه كل من أنعم عليه ربنا

بجثة نخ ، خلاص صابه الغرور ، واستكبر على خالقه .. دا فيه حاجه اسمها ربنا ، سيدى وسيدك ، وسيد الكون .. اللى منظمه ، واللى مساويه .. هوا العامل اللى فى المصنع ، مش بيشتغل الحاجه اللى فى إيده ؟ ورئيس المصنع ، مش بيديره كله وهو قاعد فى الأوده القزاز الصغيره بتاعته ؟ يعنى لو كان كل عامل ساب اللى فى إيده ، وقال أنا عايز اعرف المصنع ده ماشى ازاي ، والحته اللى يعملها رايحه فىن وحا يعمل بيها إيده ، والحامات دى بيحيوها منين ، وأصلها إيده ، كان مشى المصنع ؟ أبدا وحياتكم . كان حرب . بقى إذا كان الكلام ده صحيح فى المصنع اللى قد كده ، يبقى مش صحيح فى العالم الواسع ده . إذا كنا مستكترين على العامل إنه يتدخل فى شؤون ريس المصنع اللى هو بنى آدم زيه ، يبقى ما نستكترش على المخلوق الضعيف انه يتدخل فى شعون ربنا .. إذا كان العامل بيخفى عليه سر المصنع ، يبقى ما يخفّاش على البنى آدم سر الكون ؟ يا جدع انت وهو عيب اختشى .

زينهم : أيوه والله يا شيخ جاد ، يسلم بقك ، دا العبد لله ضعه له حدود . أسرار إيده وبلاوى إيده اللى عايز يعرفها ؟ كفايه عليه يعرف ربنا كويس . كفايه عليه يؤمن بضميره ، وبقليه .. دا الواحد مهما اتقرعن ، وكفر ، ونسى ربنا ، لما بتصيبه مصيبه أو تجراله حاجه ، غصين عنه ، ومن غير ما يفكر ، يقول يارب ، يارب .  
( يذهب زينهم ليحضر المقشه ) .

الشيخ جاد : أصل البنى آدم ضعيف ومغرور ، وعقله مهما كبر برضك عاجز ، ولو ساب لعقله العاجز حايضله ، عشان كده ربنا وضع الإيمان فى القلوب ، القلوب بتهدى أكثر من العقول ، والمغرور مهما اتنفخ ، حيقى برضك زى البللونه أقل شكه تنزله على فشوش .  
محجوب : ( ينظر إلى الساعة ويدو عليه الاهتمام ) بس بقى يا جماعه ، كفايه

كلام ، خلونا ننتظر الساعه قربت على الاتناشر ما فضلش غير دقيقة  
والا دقيقتين ، والأستاذ عبد الصبور ينزل ، يعنى زمان روحه دلوقت  
عماله نجوم حوالينا .

سيد : إنتوا برضك مصدقين انه حا ينزل ! برضك بتصدقوا الكلام البفارغ  
ده ؟

زكى : ( إلى سيد ) إيه ده يا سيدنا ، وطى صوتك كده وانت زى المدب ،  
حد يقول كده والروح نازله . إنت عايز تطرد الروح ، دى حاجات  
مجربه ومدروسه فى أكبر الجامعات ده فيه عندهم صور لأرواح . عايز  
إيه أكثر من كده ؟

سيد : وانا مالى تنزل تنزل ، أهى عندكوا . امضغوها واشبعوا بيها .. بلوها  
واشربوا ميتها .

محبوب : بس بقى يا جماعه ، كفايه كلام . أرجوكم عايزين سكون خالص .

الشيخ جاد : وبرضه ، سماويات ، روحانيات ؟

محبوب : طبعا ، طبعا ، ركزوا ففكركم فى الأستاذ عبد الصبور ، ما حدش يفكر  
فى حاجه تانيه .

سيد : ودى مصيبة إيه دى كان !. أفكر فيه بتاع إيه ؟ هوا دل حد يفكر  
فيه ؟

محبوب : يا أحنينا .. يا بنى آدم ، وطى صوتك ، اتكلمم بهدوء .. إذا كنت مش  
عايز تفكر فيه .. عنك ما فكرت ، بس اقعد ساكت .

سيد : سكت يا سيدى .

زينهم : ( يدخل حاملا المقشة على كفه منشدا ) اللبارق ، اللبارق ، اللبلا  
بالابارق ..

عبد الصبور الله يجازيك ما تقول لى بس لمن اشكيك  
ما لحقتش أبدا افرح فيك تموت وترجع تسانى تنسق  
اللبارق . اللبارق .



- محبوب : ( ناهرا زينهم ) إيه ده يا حيوان ده ا إنت عايز تطفش الروح ؟  
 زينهم : ما تخافش . دا كان يحب الغنويه دى قوى . دى يمكن هي دى اللى حا  
 تنزله . قولوا معايه قولوا ، اللبارق . اللبارق .  
 محبوب : إنت حا تسكت والا اقوم اكسر دماغك ؟  
 زينهم : ما فيش لزوم . خلاص سكت . خد يا شيخ جاد المقشه ، سلك  
 سنالك زى ما انت عايز .  
 زكى : بس يا جماعه ، اسكتوا ، خلاص ، دى كلها دقيقه بس .  
 ( يسود السكون وتمضى فترة دقيقة فى صمت عميق .. والكل  
 واجم ساهم محملق فى الساعه التى أخذ يقترب عقرب الدقائق فيها  
 من ١٢ ) .  
 ( تدق الساعة ١٢ دقه ، وفى كل دقه يزداد توتر أعصاب الجميع ،  
 ويزداد إرهابهم ، ويبتوا فى أماكنهم كالتماثيل ) .  
 ( تمضى دقيقة أخرى بعد دقائق الساعة . ثم يسمع صوت جبر  
 الطشت على الأرض وسكب المياه من الإبريق فيه ) .  
 زينهم : ( يبدو عليه فزع شديد ويمسك بيده كىف سيد أفندى وهو أقرب  
 الموجودين اليه ويمس فى خوف ) يا نهار اسود دا بينه عملها ونزل ؟  
 سيد : ( هامسا فى فزع ) هوا مين ؟  
 زينهم : هوا ، هوا بعينه .. سامعين رجليه بتتحرك فى الطشت ، يا نهار مهيب  
 وزى الطين سامعين يا جدعان ؟  
 ( الجميع ينصتون ويعلمو وجوههم الفزع )  
 محبوب : ( فى خوف ) سامعين .  
 الشيخ جاد : أنا سامع كويس .. صوت الطشت بيتجرجر على الأرض .  
 زكى : إصبروا شويه يا جماعه بلاش قلق ، إيه اصله ده اسكتوا خلونا نسمع ،  
 دى مصايب إيه دى ؟  
 ( يسمع صوت وقع أقدام القبقاب ذو الجلاجل ، وتبدو سنية على

الباب مصفرة الوجه .

- سنية : ( هامة لزنيهم ) سامع يا زنيهم .  
 زنيهم : سامع ياختي .  
 سنية : سامع القيقاب ابو جناجل ؟  
 زنيهم : سامعه كويس .  
 سنية : ( فزع ) أنا خلاص يا زنيهم ، ركبي سابت ، مش قادره اقف ، أنا كنت فاكره الحكايبه كلها تهويش في تهويش .  
 زنيهم : أنا كان كنت فاكر كده .. لكن ابن الأروبه عملها صحيح .  
 الشيخ جاد : فيه إيه ؟ يتوشوشوا بتقولوا إيه ؟  
 زنيهم : ما نش سامع ؟  
 الشيخ جاد : سامع إيه ؟  
 زنيهم : القيقاب ابو جناجل ؟  
 الشيخ جاد : ماله القيقاب ابو جناجل ؟  
 زنيهم : هو فيه حد كان يقدر يلبسه غيره !  
 محجوب : أهه .. أنا سامعه كويس ، وسامع شخصخة الجناجل .  
 سيد : لا .. أنا ما قدرش على كده أبنا ، دى الحكايبه بقت جد خالص .. دى مصيبه وطبيلت ، وبعدين تعمل إيه لو عملها وبلط هنا ولا رضيش يطلم تاني ؟  
 زنيهم : طيب بس ما تفسرش بقى .. أهى دى تبقى حقيقى المصيبه الكبرى .  
 سنية : الله يكون في عونك يا ستي .. يا ترى عامله إيه معاه دلوقت ؟  
 ( يسمع صوت تصفيق )  
 زنيهم : يا نهار اسود ، أنا ماليش دعوه ، ولا انا منقول من هنا ، خشى له انت يا سنيه ، بينده لك انتي ، الصقفتين دول يعنى لكى ؟  
 سنية : أخش ! إيه ؟ اتجننت ؟ أنا أخش ؟ دانا عقبال ما اوصل للباب .. يكون دمي نشف .

( يعاد صوت التصفيق ) .

زينهم : خشى بقه يا سنيه ، إننى بتعرفى تهديه .  
سنية : أبدا .

( يعاد التصفيق ) .

زينهم : خشى يا سنيه ، لازم عايز عليه الشوق .  
سنية : وأنا مالى ، أهى عنده اخته تحببها له .

( يسود الصمت فترة )

الشيخ جاد : لازم لقاما .

تصدر عطسة عالية ) .

سيد افندى : ( وهو يحضن الشيخ جاد ) باللطيف ، هوا بعينه ، ما فيش غيره  
( يبدو الخوف على الجميع ) هى عطسته ، اللى تطلع تشرح الودن ،  
يا مغيث ، يا ناس الحقونى ، حد يشيلنى يطلعنى بره ، ودى كانت  
وقعة إيه المهيبة دى ، يا ناس حرام عليكم ، دانا بينى وبينه تار بايت ،  
أنا حاكون أول ضحيه له ، دا مش ممكن ينسالى حكاية الكرنب  
المخشى وراس العبد ..

زينهم : طب بس بقى اخفيها سيره ، لحسن يسمعك ، يطلع يرمط بك  
الأرض .

( تستمر الجماعة فترة جالسين فى أماكنهم بلا حراك ، وكلمسا  
صدرت عطسة انتفضوا فى أماكنهم وظهرت عليهم علامات الرعب  
والفرع ) .

محبوب : وبعدين يا جماعة اوايه آخرتها احنا حانفضل كده متلشين .. مش  
نشوف إيه اللى حصل ، دا حتى حرام علينا نسيب الوليه الغلبانه جوه  
كده لوحدنا ، دى مش رجوله ، دا احنا دلوقت بنعمل تجربه ،  
والتجربه فى طريقها للنجاح ، فاويه اللى مخوفكوا كده ! هوا احنا مش  
كنا أكثر ما بنتمناه إن الأستاذ عبد الصبور ينزل لنا روحه متجسده ،  
( أم رتيبة )

- طیب أهدوه اللى حصل ، يا الله واحد منا يقوم يشوفه ويسلم عليه  
ويكلمه .. يا الله يا شيخ جاد .
- الشيخ جاد : أنا ؟ ولا اعرفه ، ولا لى دعوه بيه . حد الله بينى وبينه ، أنا لا انا عايز  
أرواح ، ولا لى دعوه بالأرواح .
- زكى : ( ناهضاً من مكانه ) اقعديوا بقى اعزموا على بعض لغاية ما الراجل  
يزهق ويسينا وتنه طالع .
- سيد : يا ريت ، ربنا يسمع منك .
- زكى : أيوه دلوقت نقول ياريت ، وبعدين نرجع نندم ، خليكوا قاعدين ، أنا  
حاقوم أشوفه ( ينهض متردداً ويأخذ فى الاقتراب من الباب  
الزجاجى ) .
- الشيخ جاد : حاسب على نفسك .
- زكى : ( يتقدم ) العمر واحد والرب واحد ، إحنا لازم نستمر فى التجربه إلى  
النهايه .
- ( يقف أمام الباب متردداً ، ثم ينحن ويضع إحدى عينيه على ثقب  
المفتاح فلا يكاد ينظر ما وراءه حتى يتراجع مبهوتا مذعورا )
- زكى : يا لطيف ، يا لطيف ، الطف بنا يارب . هوه بعينه ، بطرطوره ،  
بعبايته ، بنضارته . يا لطيف يا لطيف .
- سيد : ( وقد تراخت أعضاؤه ) يا ناس حرام عليكم .. حد يشيلنى يرمىنى  
بره ، أنا جتنى نملت ، ومفاصلى خلاص سابت .
- الشيخ جاد : وانا زيك ، ما يقاش فى نفس .
- زينهم : بس كان مالنا ومال الغم ده .
- ( سنيه تنهاوى إلى الأرض )
- محبوب : ( ينهض واقفاً ) وبعدين يا جماعه ، والوليه اللى جوه دى نعمل فيها  
إيه ؟ دى ذنبا فى رقبتنا .. إذا كان احنا واحنا بره الأوده جرا لنا  
كده ، إيش حال هى بقى .. اللى معاه فى أوده واحده .. هى دى

- برضه أصول ؟ خمس رجاله طوال عراض يقعدوا كده زى الولايا ،  
ويسيووا الوليه الغلبانه دى لوحدها جوه .
- زينهم : أيوه حقيقى ما يصحش ، دى أمور نسوان اللى احنا عملينها دى .  
سنية : يا عينى عليكى يا ستى .
- الشيخ جاد : أنا ما لياش دعوه ، لو قتلتنى ما انتقلش من مطرحى .. أنا لا قلت له  
انزل ولا اطلع .
- سيد : وانا زيك .. لو كان على كنت وصيت عزرائيل يسمنله فى السما  
بحديد .
- محبوب : أقول لكم أحسن طريقه .. ولا انت ولا هوه ( يتقدم بجرأة ويدفع  
الباب الزجاجى فيفتحه على مصراعيه )  
( تبدو حجرة النوم فى ضوء باهت تماما كما كانت فى الفصل السابق .  
وعلى المقعد أمام الفراش جلس شبح يرتدى الطرطور والعباءة  
والمنظار على أرنبة أنفه وقد وضع ساقيه فى الطشت ) .  
( الجميع يصيهم فزع ويحدقون فى الشبح فى دهش شديد )
- زكى : ( هامسا إلى سنيه ) بسم الله الرحمن الرحيم .. هوه بعينه الخالسق  
الناطق ، بس باين عليه تخن شويه .. الظاهر إن صحته جت على  
السما .
- سنية : لكن امال فىن ستى ام رتبيه ؟ راحت فىن ؟  
سيد : لازم أكلها .. هوا دا تستبعد عليه حاجه أبدا .
- محبوب : ما تكلمه يا سى زكى .. ما تسأله .  
زكى : أسأله يا شيخ جاد .
- الشيخ جاد : أنا أسأله ؟ بتاع إيه ؟ وعشان إيه ؟ أنا ما كلمش الأرواح شفوى ؟  
مقدرش عليها الا لما تكون فى الكباية بس ، لكن كده سايه .. حد الله  
بينى وبينها .
- محبوب : طيب بس . بس . اسكت انت وهوه . أنا حاكلمه ( للشبح )

- السلام عليكم يا سيد عبد الصبور عبد الغفور عبد الشكور المقرقر .  
سيد : إيه ؟ عبد إلايه ؟ إيه ؟ صبور وغفور وشكور ومقرقر ، ومكانش  
عاجبه سيد بنجر ، ياخي جتك نيله .  
( يرفع الشبح رأسه ، ويفادر مقعده ، فإذا به أم رتيه نفسها وقد  
ارتدت ملابس عبد الصبور ) .
- أم رتيه : ( بلهجة عبد الصبور وهي تتقدم تجاه سيد ) سيد إيه ؟ .. سيد  
بنجر .. إنت هنا يابوز الإخص . ياوش الخرتيت .. يالمامة اللعامه .  
( يكاد الجميع يصعقون من فرط الدهش ) .
- زينهم : إيه ده ؟ مين دي ؟  
سنية : دي ستي ام رتيه . اسم الله عليكى يا ستي .. إيه اللي جرا لعقلك يا  
ستي ؟
- سيد : إيه ده ؟ .. أنا بوز الإخص ؟ .. أنا وش الخرتيت ؟ أم رتيه تقول على  
كده .. مش ممكن ، إحنا اللي كنا متفقين حا نتجوز دلوقت ، تقوم  
تقابلنى المقابلة دي ؟
- أم رتيه : تتجوز ؟ ياخي جاك جنازه حاره .. مين قال لك نخش هنا يا باشخير  
الولعه ، يا باشخير اللهاليب ، لما تبقى باشخير الحلاوه ، ابقى تعالى  
هنا .. يا للاقوم ورينا عرض اكتافك .
- سيد : ما يمكنش ، مش ممكن أبدا تكون دي ام رتيه . أقطع دراعى ان ما  
كانش دا عبد الصبور ، هو بعينه عبد الصبور .. أم رتيه الأميره ، اللي  
زى السكره ، تقول كلام زى كده ؟ تقول على خرتيت ؟
- زينهم : حقيقى ، لك حق . الحكايه لازم حصل فيها لخبطه .
- أم رتيه : ( تنظر إلى زينهم فى استمزاز ) وانت إيه اللي جابك هنا قدامى بوشك  
العريان ده .. يا خسيس يا خبيث ، يا إبليس .. أنا مش ميت مره قلت  
لك ان وشك بيلبش جتى ، مش خرجت عليك تيجى قدامى من غير  
وش .

زينهم : ولا كلمه ، هوه بعينه .

أم رتبية : ( لزكى ومحجوب والشيخ جاد ) وانتوا إليه ؟ قاعدين لغاية دلوقت  
تعملوا إليه ايا لالا ورونى عرض كتافكم .

محجوب: يادى الخساره .. الوليه انصابت ، يا مسكينه يا ام رتبيه ، عقلها راح  
بلاش ، وهى دى حاجه بسيطه .. دا انا كنت بره وحاجتنى ، إيش حال  
هى ، هى المسكينه المبيطه الطيبه اللى لا تعرف لا روح ولا عفاريت ..  
روحنى بلاش يا ام رتبيه ، الله يجازيك يا عبد الصبور يا لى كنت السبب .  
سفيد : يعنى خلاص . أخرج كده من المولد بلا حمص . ما فيش جواز ولا  
حاجه ، ده برضه برضى ربنا !.

أم رتبية : جواز فى عينيك يا خلبوص يا وش الخريت يا وحش .. إياك اشوفك تعتب  
هنا تانى .

( يخرج سيد وهو يضرب كفا بكف ) ..

( أم رتبيه تجلس على المقعد وتضع ساقها فى المياه وتتاول علبه  
النشوق ) .

سنية : وبعدين يا زينهم .. نعمل إيه فى المسكينه دى اللى عقلها راح ؟.

زينهم : راح ؟ ولا راح ولا حاجه ، أنا عارف الحكايه . عارف اللى جرا ( ينظر إلى  
ام رتبيه ويهز رأسه ) آه يا عبد الصبور افندى يا نمس .. برضك عرفت  
تستكرد الوليه الغلبانه وتنزل مطرحها أنا عارفك كويس وعسارف  
ألاعيك .. طول عمرك واكل عقلها وضاحك عليها ، طبعا نزلت وقعدت  
تدردش معاها وتاخذ وتدى ورحت مسهبا ونازل بروحك فى جتها  
ومطلع روحها . الله يرحمك يا ست ام رتبيه . منك لله يا سى عبد  
الصبور .. يا مغالط عزرائيل ، طبعا مسبوط عشان فسخت الجوازه  
بتاعتها ، مش دى اللى كنت بتحرب عليها ، طفشت الراجل بلسانك اللى  
زى المبرد وفضلت تقول له .. وش الخريت ، وبوز الإخص ، وطبعا عايز  
تفسخ جوازنى انا كان ، لكن بعينك . والنبي لنا متجوزها غصب عن

عنيك .. وابقى تعالى بقى خدها منى بجحتك المشغولة .. جنة ام رتيه ،  
جنة الوليه ، تاخذها منى ؟ تقدر تتجوزها ؟ بعينك . ( إلى سنه ) خشى  
علتى يا سنسن يا للى زى اللوز ، تتجوزينى والا لأ يا بت ؟

سنه : أتجوزك يا زينهم .

زينهم : سامع يا سى عبد الصبور ، حا تجوزها ، غصين عن عنيك لتتين .

أم رتيه : ( فى غضب ) اخرص ، يا خسيس ، يا إبليس يا تعيس يا منحوس .

زينهم : ولو .. برضه حا تجوزها .. ابقى خلى جنة ام رتيه تنفعلك .

الشيخ جاد : ايه اصله دا يا جماعة! اتوا حا تجنونا معاكم زى الوليه ما تجنتت، ايه اصله

ده يا وله يا زينهم ما تسبب الوليه فى حالها ، عبد الصبور دا ايه وبتاع ايه ؟

مش كفايه اللى جرالها . كله دا من المسخره اللى اتوا عاملينها .. مالكم

ومال الأرواح ، والأسرار .. يعنى لو كان كل واحد يمشى على أده ،

ويعرف اللى على أده . مش يبقى احسن . دا لازم يكون فيه فرق بين اللى

يعرفه ربنا واللى يعرفه العبد .. دا اللى ماشى على الأرض ما يشوفش زى اللى

فوق السطوح ، إيش حال امال اللى فوق ، فوق فوق ، يا أخى منك له ،

خلى اللى لله ، واتقى الله .. واخش الله ، وقل هو الله أحد ، الله الصمد ،

لم يلد ولم يولد ، ولم يكن له كفوا أحد ( بصوت عال محدود ) وحده .

الجميع : ( بما فيهم أم رتيه ) لا إله إلا الله .

( أم رتيه تهرز رأسها منتفضة وتتمم بضع كلمات غير مفهومة ثم تغمض

عينها برهة .. وتفريق إلى نفسها وترمى الطرطور والنظاره ) .

أم رتيه : يا ندامه .. يا عيب الشوم .. أنا ايه اللى لبسنى اللبس المشوم ده ؟ ، أمال فين

سيد افندى ؟ راح فين ؟ الحقوقى بسيد افندى .

زينهم : ( متجها إلى الباب ) سيد افندى ، سيد افندى .

سيد : ( يعود مهرولا ويقبل على أم رتيه ) أم رتيه .. مالك ياختى . قلبى

عليك ، حمد الله على سلامتك . يا ألف نهار أبيض .



زينهم : أبوه كده .. أهى طلعت روحه تانى .. ونزلت ام رتيه مطرحها .. هى  
إيه ؟ سايه . ( ناظرا إلى السقف ) اطلع يا عبد الصبور الكلب ، خليك  
فوق عندك ، إياك تهوب هنا ، الحقونا يا جماعه بمأذون قبل ما ينزل  
يفشكلها تانى .

الشيخ جاد : ويلحقك ليه .. أمال انا هنا باعمل ايه؟ دانا أدها وأدود، هاتوا إيديكم فى  
إيدى .. قال يا بخت من وفق راسين فى الحلال ، وانا حاو فوق اربع روس ،  
منهم راسين عجالى ( يجلس الجميع وتسمع زغاريد ) المأذون لما يسعد ،  
تجيله جوازتين فى ليله .

تسدل الستار

( تمت ) .



## جمعية قتل الزوجات



## الإمطاء

إلى النقاد الذين أثارتهم « أم رتيبة » ..  
واتهموني بالإسفاف والتهريج ..  
. أهدي مزيدا من الإسفاف والتهريج ..

يوسف السباعي



أحب قبل أن يقدم القارئ على قراءة هذه المسرحية .. أن أجعله على بينة من أمره وأمرى وأمر هذه المسرحية التي يوشك أن يضيع في قراءتها بضع ساعات ثمينة — أو غير ثمينة — من عمره .

أنا لست واعظا ولا فيلسوفا ولا حكيما ولا مرشدا .. ولا .. ولا شيء أبدا من هذه الصفات الفاخرة .. التي قد يتوهمها القارئ في الكاتب .. أو يتوهمها الكاتب في نفسه .

أنا عند ما أكتب أحس بمتعة من الكتابة ، وعند ما أقدم ما كتبت للقارئ أحاول أن أدعوه لمشاركتي تلك المتعة ، وتزداد متعتي عند ما أحس أنني نجحت في أن أسبب له نوعا من المتعة .. وأنى هيأت له خلال أيامه المرهقة المتعبة التي تزدهر بها حياته ساعات من المتعة الذهنية وإيأى في كتابي .

هذا هو كل ما أقصده وأحب أن أبلغه بكتابتي .. فإذا صادف بها القارئ ما توهم فيه عظة أو حكمة أو أى شيء آخر من هذه المسميات المحترمة فأؤكد له أنى لم أقصدها .. وأنها زجت بنفسها بين الكتابة عفوا بلا قصد منى أو تدبير .

فإذا كنت يا أخى القارئ . « غلبانا » مثلى ومثل بقية الناس الذين أرهقتهم أيامهم من أمرهم نصبا وعسرا ووددت أن تخفف عنك بعض هذا النصب والعسر فاقرأ هذه المسرحية .. فقد تفلح في منحك بعض الراحة والتسلية .

وإذا كنت قارئاً « فنزوحا » ترضن بوقتك أن يصرف إلا بين آيات بينات من الحكم والعظات فلا تضع وقتك معى عبثا .. أمامك كتب الأخلاق والتهديب والتربية

و فلسفة .. أو .. لم أذهب بعيدا .. أمامك الكتب السماوية .. نخذ منها ما شئت من  
تنصح والعظة .. ولا أظن كاتبها مهما بلغ من الحكمة والعقل والبلاغة والقدرة بقادر  
على أن يأتي لك بخير منها .

أما أنا فرسالتي كما قلت لك أن أخفف عنك بعض ضيقك ونصبتك فإذا نجحت ..  
فيها وبعثت .. وإذا لم .. فاعذرنى .. إنما الأعمال بالنيات .  
والسلام عليكم ورحمة الله

يوسف السباعي



## الفصل الأول

المنظر : سطح منزل فى شارع سلامة فى حى السيدة زينب . فى اليمين قطاع حجرة يقطنها سيد الفنط ومحمود جاب الله . فى مواجهة باب يودى إلى الحمام والمطبخ وسرير حديد بأربعة أعمدة يرقد تحته محمود وسيد وقد أسدلت عليهما ملاءة السرير فأخفتها .. وعلى اليسار أريكة بالية تعلوها نافذة وضع بدل زجاجها المكسور ورق جرائد .. وفى الوسط منضدة صاج عليها لمبة زجاج وبقايا طعام وأوراق ومنه وعود . وعلى اليسار الباب المؤدى إلى السطح ، وقد كومت وراءه صناديق وسلال وشوالات وأثاث قديم حتى لا يمكن فتحه من الخارج ومعلق على الحائط مشجب ومراة مشروخة . وفى يسار السطح يبدو الباب الخارجى لحجرة خشبية صغيرة منخفضة وبجوارها تقفيصة فراخ .. وفى المواجهة مدخل السطح وحبال غسيل ممتدة بطول السطح . الوقت قبل الفجر فى أواخر الشتاء .

## المشهد الأول

( تمر فجرة صمت .. تسمع خلالها دقات المنبه وصياح الديكة دون أن يبدو على المسرح أحد .. وفجأة يدق جرس المنبه فيندفع سيد من أسفل السرير ويسكت المنبه .. ثم يتسلل على

- أطراف أصابعه فيرتدى البنطلون والجاكته فوق الجلباب ويدس قدميه في الخذاء ثم يقف أمام المرأة ليمشط شعره ويتزين ويدندن . محمود يمد رأسه من أسفل السرير وينظر إليه في دهشة ( .
- محمود : ديهده .. ديهده .. إيه الحكاويه يا خال ؟ .
- سيد : ( مأخوذاً بيقظة محمود ) .. حكاية إيه ؟! ما فيش حاجة أبدا .
- محمود : أبدا ؟! أبدا ؟!
- سيد : أيوه .. أبدا .. أبدا .. شايف في حاجة غريبه ؟ .
- محمود : لا أبدا .. ولا غريبه ولا حاجة .. بس يعنى مش زى عوايدك تتسحب كده لوحدك من تحت السرير .. وتسيبنى أروح ضحية النوم واقابل لوحدى القضا المستعجل . انت ناوى تخلى بيه ؟!
- سيد : أخلى بيك ازاي ؟! أنا ما انا واقف اهو قدامك .. مين قال لك ان أنا حاسيك رايح في النوم وانزل .. نام نام .. لسه بدرى .. أنا مش حانزل دلوقت .. ولما آجى أنزل حاصحيك ( مستمرا في الدندنة والتزين أمام المرأة ) يا الله إرخصي الستاره ونام .
- محمود : أنام ؟! ازاي ( يخرج من تحت السرير ) ما يمكنش .. لازم اعرف إيه سر الحتفة والسبب اللى بتعملها في روحك دى .. أنا اعرف ان بينك وبين المرابه تنافر شديد .. وخصومه مستحكمه .. كل واحد منكم ما يطقش التانى .. ازاي قادر تقف قدامها الوقفه الطويله دى ؟ .
- سيد : مُكره خالك لا بطل .
- محمود : وإيه اللى يكرهك على العذاب ده ؟! إيه اللى يرغمك على الاصطباح والبحلقه فيما تكره ؟!
- سيد : محتاج لها يا محمود يابنى .. مزنوق فيها . لازم اهندها واسببها لأنى حاستعملها .. حاعرضها للأبصار .
- محمود : هي إيه دى ؟!

- سيد : خلقتى .. اللخبطة اللى انا شايفها فى مرآة النحاس .. لازم اساويا شويه .. لازم احتفتها .. واسيسبها .. واساويها .. واهندمها علشان تبقى مقبولة شويه .. ان كان على أنا ما يهنيش .. أنا خلاص خدت عليها ، ما بقتش اخاف منها قوى .. لكن هم ..
- محمود : هم مين ؟!
- سيد : اللى حاشوفوها .. لازم اوضبها لهم ، لازم اهياها لهم شويه .
- محمود : إيه أصله ده يا خال ؟! هى إيه اللى توضحبها لهم وتبأها لهم .. هى لحمة راس ؟! بس مين دول اللى خايف عليهم قوى من خلقتك ؟! انت ما انت طول النهار ماشى بها كده عريانه .. وسايها على خلق الله .. اشمعنى دول يعنى اللى لازم توضحبها لهم .. وتبأها لهم .. يقوا إيه دول ؟ يطلعوا إيه ؟
- سيد : يطلعوا ؟! ما يطلعوش أبدا .. بيرموا سهامهم كنده وهم قاعدين .. بيصوبوا سحرهم كنده وهما نعانين .
- محمود : ولا انا فاهم حاجه .. هم إيه دول اللى بيرموا السهام ويوزعوا السحر .. يكونوش هنود حمر ؟!
- سيد : حمر ؟! يا غبى . دول سود . سوادهم عجب .
- محمود : هنود ، سود ، إيه الكلام ده ؟!
- سيد : هنود ؟! هنود إيه يا جدع . مين قال هنود سود ؟!
- محمود : آمال يقوا إيه دول اللى قاعدين يسحروا ويضربوا بالسهام ، واللى انت عمال توضحب لهم لحمة الراس بتاعتك ؟!
- سيد : عيون .. عيون سود .. مش هنود سود يا مقفل ، عيون المها ، عيون ، فى طرفها حور ، عيون من اللى قال فيها الشاعر :
- « يصرعن ذا اللب حتى لا حراك به » .
- محمود : وانت بقى ذا اللب الذى لا حراك به ؟!
- سيد : لا حراك ، ولا روح ، ولا نفس ، ولا حتى .. لب ..

( أم رتيبة )

- محمود : يعنى بالاختصار . انت بتحب !؟ .
- سيد : أيوه .
- محمود : قديمه .
- سيد : إيه هي اللي قديمه دي !؟ .
- محمود : مسألة الحب بتاعك ، طول عمرك وانت بتحب . من يوم ما وعيت عليك وانت عاشق مستهام . أنا فاكر وأنا صغير يوم ما جيت لنا البيت وهدومك تحت باطك ، لما ابوك طردك وحرم عليك نخش البيت من تحت راس قضايد الحب اللي كنت بتعملها في مرات الشيخ علوان ، يعنى من يومك وانت حبيب ومستندات الحب بتاعتك ، لا تعد ولا تحصى .
- سيد : مستندات الحب ؟ . إيه هي دي ؟ .
- محمود : الخيايه ، والفقير . وتلتعيت قصيده ، وخمسين قصه . واربعين غنوه . محبوسه بين اربع جدران فوق سطوح ام عبده ، ما سمعهاش غيرك ، وغيرى . والغلبان شندى عبد الجليل الجرجاوى . هو الحب دا حاجه جدت عليك .. طوى عمرى وأنا اوعى عليك ، تبص لنجوم السما وتتنهد ، وتبص لغروب الشمس وتتحسر . وتبص لطلعة القمره وتتأوه . ما فيش حاجه من الحاجات دي تعدى عليك من مكات أبدا ، لكن كل ده ما كانش له صلته بخلقك أبدا . كل الحب اللي انت غرقان فيه ده ما خلاكش مره واحده تبص في المرايه . ولا تسبب شعرك ولا تهندم نفسك . إيه اللي جد عليك !؟ .
- سيد : ما كانش حب يا محمود .
- محمود : أمال كان إيه يا بحال !؟ .
- سيد : كان هيامان . كان إفراط فى الحساسية . كان انتظار لحب . كان حب من طرف واحد ، كان حب ، والحبيب مجهول .

محمود : يعنى كله ، زى الجنايه . لما تتقيد ضد مجهول .  
سيد : كان عندى فيض من الحب ، لكن ما كانش متركز فى حاجه  
مخصوصه . كنت ابص للنجوم واحس انى بخلق بينها وادور على  
حاجه ناقصانى . كنت اسمع صوت الكروان سارى مع نسيم  
الفجر ، واحس انه بيحمل لى رساله من حبيب نأى . كنت ابص  
للقمر ويتبأ لى ان فى وشه ابتسامه حلوه بتحيينى . كنت امسك  
العود بتاعى واحس بصوابعى بتجرى عليه ، مش بنغم ولا لحن ،  
لكن بمناجاة . للحبيب الهائم الغايب . كنت بحب . لكن ما كنتش  
عارف با احب مين . لغاية ما ليله من الليالى ، سمعت صوت لذيد  
يبدندن ، بغنوة : « فى الليل لما خلى ، إلا من الباكى » ، « النوح  
على الدوح حلى ، للصارخ الشاكى » « ما تعرف الميتلى فى الليل من  
الحاكى » وكنت قاعد مره على سور السطح ، وسمعت الدندنة  
وسط سكون الليل الخالى . حسيت جسمى بيرتعش . ولقيت  
دموعى نازله بتجرى زى السيل .

محمود : وعرفت مين صاحبة الصوت ١٩ .  
سيد : عرفتها .. ليله .. ورا ليله .. بقيت اقعد لوحدى اسمع الدندنه ..  
ولقيت الإحساس الفياض والشعور الهائم والقلب التايه .. ابتدوا  
يتركزوا فى الصوت وفى صاحبة الصوت .. واتجمع كل الحب  
الحيران بين النجوم والسما والقمر والغروب والبلابل .. واتحط  
كله فى صاحبتنا دى .

محمود : بس مين هى ١٩ .  
سيد : وبقيت احس ان الأمانى بتاعنى فى الدنيا كلها انحصرت .. فى  
حاجه واحده .. مش انى أبقى فنان شهير ، ولا صاحب ثروة ولا  
سلطان .. بل فى إنى أقعد كل ليله واستنى لغاية ما تخرج فى  
البلكونه .. والمخ خيالها فى الليل ، واسمع الدندنه .. كل سعادتى

- كانت متركرة في اللحظات القصيره دى .
- محمود : هى مين بس يا خال ما تقوللى وتريح قلبى .. شفتها بالنهار والا لا ؟ .
- سيد : شفتها .. وحسيت زى اما اكون بقالى ثلاثين سنه ماشى فى صحرا فى عز الشمس .. ولقيت شجره خضرا تحتها فيه واكل .. حسيت زى اما اكون لقيت حاجه بتاعتى .. مش غريبه على .. إنت مجريتش الحب يا محمود ؟ ما تعرفش حاجه عن الحب ؟ .
- محمود : والله يا خال .. الحب بتاع الصحرا والشجره الخضرا .. وهات لى معاك بقره .. دا مجريتوش .. أنا أصلى ما كلش كثير من حكاية سكون الليل .. والنسيم والحاجات دى .. أنا بقالى ستين ماشى مع البنت « زكيه ولعمه » .. ومرمجانى خالص .. كل ليله ألاقها محضرا لى الكاسين والعشا .. أشرب الكاسين واكل اللقمين .. وانام لى شويه .. وتانى نازل .. حاجه ألسطه خالص .. لا تعب .. ولا صرف .. ولو انها اليومين دول مرغوشانى شويه .. من حكاية كده .. ربنا يستر .
- سيد : إنت ما تعرفش الحب ، الحب اللى انا بقول لك عليه ، بينك وبينه ما بين السما والأرض ، الفرق بين اللى بتعمله وبين الحب ، زى الفرق بين الكلب اللى يينهش حته لحمه ، والبنى آدم السابيح فى روضة بين الزهر والبلابل .
- محمود : والله يا خال ، انا يا احب اللحمة .
- سيد : كل إنسان وله طبيعته ، وكل طبيعته ولها الحاجه اللى ترضيها ، إنت تحس انه يرضيك كاسين وحضنين ، أى كاسين وأى حضنين ، وانا با احس انه يرضينى مجرد صوت أو كلمه أو لمسه ، بس من مخلوق معين وإنسان مخصوص ، يمكن يمر على العمر بطوله وانا مش لاقية ، ويمكن يخلص العمر واخرج من الدنيا وانا بقول مع اللى قال « عبثا

خلقت ، ، ولكن دلوقت حسبت ان انا ما تخلفتش عبث ، وان فيه حاجه تستاهل الحياه والوجود ، وان العمر ما راحش ، ومش حا يروح أونطه ، حاسس ان انا لاقيت الحاجه اللي اتخلقت علشانها ، ولو خلصت الحياه بعد كده ، مش حاندم .. لأنى شاعر انى خدت اللي انا عايزه منها .

- محمود : ديهده ، ديهده ، إيه دا كله ؟ الظاهر انك واقع قوى ١١ .
- سيد : قوى ، قوى ، قوى ، إذا كان الحب اسمه فى لغتك وقوع .
- محمود : ومين هى اللي عملت فيك كده ؟ قوللى مين هى دى بنت الأروبه  
علشان اشوف تستاهل كل اللي بتقوله عليها والالآ ، مين هى دى  
صاحبة العيون السود اللي « يصرعن ذا اللب » ، أعرفها انا ؟ ١٢ .
- سيد : أيوه .
- محمود : وشفتها ؟ ١٣ .
- سيد : أيوه .
- محمود : طيب يا أخى قوللى مين هى وريحنى ؟ ١٤ .
- سيد : بهيه .
- محمود : بهيه ؟ بنت ام عبده ؟
- سيد : أيوه .
- محمود : كده مره واحده ؟ يا نهارك اسود يا خال ، ودى تقدر عليها  
ازاى ؟ البنت من ناحية الحلاوه حلوه ، بت زى اللوز ، بس جد  
قوى ، وانا ما احبش الجد ، وما احبش الهوى العذرى ، وما  
تنساش انها بنت ام عبده كان ، يعنى ما يمكنش تقدر تقرب لها ،  
دى ساكنه فى منطقة الخطر ، فى المنطقه الحرام ، ودى وصلت  
معاها لغاية إيه ، حب من جانب واحد زى عوايدك ، من بعيد  
لبعيد ، والا حصل حاجه ؟ ١٥ .
- سيد : فضلت مده طويله ، والحب من جانب واحد وانا سعيد بيه جدا ..

كل اللي أتمناه اني أخجها بالليل واسمع صوتها وما كانش عندي فكره  
أبدا انها يمكن تحس بي ، لغاية ما ليله من ذات الليالي قعدت ادندن أنا  
بالنأي ، فدنندت هي معايا ، وبعدين في الآخر رفعت راسها لفوق  
وضحكت وشاورت بالسلاام .

محمود : وعملت إيه انت ؟

سيد : حسيت ان انا مش ماشي على الأرض ، حسيت ان انا بطير في  
السما ، حسيت ان الدنيا مش سايعاني . ما تتصورش أد إيه تكون  
سعادة انجب لما يحس ان اللي بيحبه ميزه من دون الناس ، وإته خصه  
من دون الخلق دول بابتسامه أو بإشاره أو بكلمه ، سعادته عجيبه  
جدا ، وبقيت بالاحس وأنا بستناها بالليل ، انها حاسه بيه ، وانها  
بتغنى لي أنا .

محمود : وبعدين فضلت كده تغني لك بالليل وانت تصفر لها ؟ أمال إيه اللي  
خلالك صابح تسبب أوي كده ؟

سيد : امبارح حسيت بخنين عجيب لها ، وكان نفسي ادفع نص عمري  
والمسها أو أمسك إيدها ، فبعد ما خلصت الدندنه رحت متحرراً  
ومكلمها ، قولتها بالشويش ، ان نفسي اشوفها... فضلت واقفه  
ساكنه شويه وانا كأني منتظر حكم بالإعدام لغاية في الآخر ما قالت  
لي انها ما تقدرش تطلع دلوقت ، ولكن بكره الصبح بدرى حاتطلع لي  
الساعه ٦ ، ( يرهف السمع ) سامع حاجه ؟ ، فيه صوت رجلين ؟!

محمود : ( ينصت ) لا مش سامع .

سيد : ( ينظر إلى المنبه ) على العموم لسه قاضل عشر دقائق ، يا سلام ،  
تصور ان انا ما نمتش نص ساعه على بعضها طول الليله اللي فاتت .

محمود : ليه ؟! بخيخة القليلت ما هي محطوطه جنيتك .

سيد : فليت إيه يا أخى ، أنا ما نمتش من الفرحة ، مش من الناموس ، أنا  
مش مصدق ان انا حاكلمها وحا سلم عليها ، أقول لها إيه مش



عارف ، حضرت كلام كثير قوى عشان اقله ، شعر ونثر  
ومواويل ، لكن انا عارف كل حاجه حاطط من غنى ساعة ما اقف  
قدامها ، أنا بالتلخبط قوام لما عينها تيجى فى عينى .. أظن يدوبك  
بقي لما استعد للخروج .

( يبدأ فى رفع الأشياء المكومة وراء الباب ) .

محمود : ( منزعجا ) إيه ده ؟ إيه اللى بتعمله ده ؟!

سيد : بشيل الحاجات دى عشان افتح الباب .

محمود : ( يسرع بإعادة الأشياء مكانها ) إنت مجنون .. عايز تشيل

التاريس والحصون اللى بتدافع بيها عن كياننا .. عايز تزيل الخطوط  
الدفاعية وتسيينا كده مكشوفين قدام الأعداء ؟!

سيد : الأعداء زمانهم نايمين فى سابع نومه .. ما فيش فى السطوح دلوقت  
الا الأحبه .

محمود : والله أنا خايف من الأحبه بتوعك دول ليحيوا لنا الكافيه .. خايف

ليكونوا حلقاء مع العدو . ما بلاش يا خال خروج من الباب  
دلوقت .. خلىنا مستورين .. أنا طول الليل احلم بالوليه ام عبده .  
وانها كيسست علينا زى عزرائيل الموت .

سيد : طب بس ما تفسرش .. قال الله ولا فالك .

محمود : ما فسرش ازاي .. وانت بتفتح علينا باب جهنم .. قال الباب اللى

يجيلك منه الريح سدده واستريح .. واحنا مش بيجيلنا منه ريح  
وبس .. بيجيلنا سموم .. هبوب .. عواصف .

سيد : يا ستار .. طب بس اخفيها سره .. ندرن عليه يوم ما اتلم على

قرشين اسدد بيها الأجره المتأخره .. لاحظهم لها على أقدم  
برطوشه .. وانخزأ حبابى عينها .

محمود : قرشين ؟ منين دول ؟! من القصائد .. والا من الأغاني ؟!

سيد : يا سيدى ربك كريم .. يعنى هوا احنا حاطفضل على طول كده

- على الحديد . مسير الجواهر اللي في الوحل ، يعرفوا الناس قيمتها .  
محمود : طب و حياة أبوك . تسيينا من الجواهر اللي في الوحل ، إذا كنا حنا  
نفضل معتمدين عليهم ، حانتتنا مدفونين معاهم في الوحل . لا احنا  
طالعين ولا هم طالعين ، إحنا كل أسلنا دلوقت في اولاد الصرم اللي  
في البلد بيعتو لنا حاجه .
- سيد : لا .. أنا يمست منهم خالص . ثلاث تشهر ما بيعتوش نكله . وهي  
الوليه أمك دي مش عارفه ان لها ابن بيتعلم ، وبيبص ، ويفرفش ،  
وأخ بيشقى ليل ونهار في الفن اللي ما حدش بيقدره . ( يأخذ في  
شيل الأشياء من وراء الباب ) خلينا نخرج لحسن يدوبك فاضل  
خمس دقائق .
- محمود : ( في استماعة ويمسك بالأشياء ) ما يمكش ، أنا قيل الباب ده .  
سيد : آمال أخرج لها مين ؟
- محمود : زى ما بتخرج كل مره .. من الباب الخلفى ( يشير إلى النافذة  
الزجاجية ) إحنا مش بقالنا شهر بنتزل ونطلع على مواسير الميه ،  
زى النسانيس ، والوليه مش حاسه بينا . عايز نخرج من الباب  
وتضيعنا في شربة ميه . بقلنا شهر متمتمين بالأوده ، والوليه مش  
قادره تقفشنا ، تصور لو اتلمت على واحد منا . حاشيب خيره ..  
أنا سامعها امبارح من ورا الباب وهي بتقول لقرقر ، آه يا نارى لو  
أتلم على واحد منهم الضلاليه النصايين ، أربع تشهر ما يدفعاوش  
الأجرة والنبي لاطلعا على جتتم .
- سيد : يا ساتر !! سمعتها بتقول كده !؟
- محمود : بودنى دى ، والواد قرقر الله يستره ، قال لها والله يا ست ما حد  
بيعتهم لهم على أثر ، أنا عارف دول اختفوا فين ، زى اما تكون  
الأرض انشقت وبلغتهم ، يمكن سا فرم يجيبوا فلوس .
- سيد : طب ودلوقت اخرج ازاي !؟ دى الحكايه كلها فاضل ثلاث اربع

دقايق وتطب .

محمود : يعنى كان لازم تديلك مواعيد فى السطوح ؟ لازم تحديد مواعيد الغرام ، فى مناطق الخطر ؟ .

سيد : أهو اللى حصل ، ما خطرش بيالى أبدا حكاية ام عبده دى ، أنا ساعتها كنت بخلق بأجنحة الحب فى سماء السعادة .

محمود : طيب وحياء أبوك تخلى أجنحة الحب تنزلك لغاية تحت ، يا الله ورينا ، الشباك اهو ، ما دام خايف من المواسير .

سيد : أنا مش خايف من المواسير ، هوا انا بعد الشهر اللى فات دا اللى خدت فيه السكه قياسه على المواسير ، بقيت اخاف من المواسير .

لكن الفكرة ان انا لما انزل تحت حاضطر اطلع تانى على السلم علشان اوصل للسطوح ، ولازم حافوت عليها ، يبقى ما عملناش حاجه ،بقى عملنا زى جحالما قالوا له وذنك منين . اسمع انا حا اخرج من الباب واللى يحصل يحصل . اوعى ( يقذف بالأشياء بعيدا عن الباب ) هى موته والا اكثر ، انا لو جت على شتى لازم اخرج ، بقى معقول هى تطلع لى وتآيس وانا اقف زى الجبان ورا الباب ، خايف من امها !؟ اوعى يا شيخ بلا مسخره ، ( تبتدو ببيتة من مدخل السطح ويسمع وقع أقدامها ) سامع ، الظاهر انها جت . يا سلام ، انا حاسس ان قلبى ييطب ، انا مش قادر اقف على رجلى ، مين يصدق ان انا حا كلمها وحط إيدى فى إيدها !؟ .

محمود : ( يدفعه ) طب بس اخرج .. اخرج .. ان شاء الله حا تجيب لك

الكافيه .. أنا يا عم حا خش فى الخبأ اكمل نومى .. ولما تخلص من التحليق بأجنحة الحب فى سماء السعادة .. ابقى طب على صحينى .. اتفضل .

( يدخل محمود أسفل السرير ويخرج سيد متسللا فيلمح بيتة فيقترب منها مترددا ) .

## المشهد الثاني

سيد : ( لنفسه ) يا سلام . انا متبياً لى ان انا فى حلم . مش مصدق انها حقيقة بتحبينى وانها تخاطر بنفسها وسمعتها .. علشانى أنا .. دى نعمه ما استحقهاش .. دى سعادة انا مش أدها ، دا كرم من ربنا ما استهلوش . فيه فى الدنيا سعادة أكثر من سعادة المحب لما يلاقى نفسه محبوب .

( يصل إلى بية فبندو عليها الدهشة عندما تميزه )

بيهة : مين ا؟ سيد افندى ؟

سيد : أيوه أنا سيد .. أنا .. أنا .. أنا مش عارف اقول لك إيه .. فيه حاجات كتير قوى عايز اقول لها لك .. لكن مختار ابتدى ازاي .

بيهة : ( ما زالت فى دهشتها ) .. انت ا؟ انت !!

سيد : أيوه أنا .. أنا عارف انك خايفه قوى .. عارف انك أول مره تقفى موقف زى دا . لكن أنا متأسف .. متأسف جدا .

بيهة : لكن .. لكن ..

سيد : لكن إيه ا؟ انت خايفه من إيه ؟

بيهة : أنا مش خايفه .. لكن .. آمال ..

سيد : آمال إيه ؟

بيهة : آمال فى محمود ا؟

سيد : محمود ا؟

بيهة : أيوه محمود .. كان لازم يقابلنى دلوقت .. امبارح بالليل بعد ما

صقر بالناسى قال لى اطلعى فقلت له انى ما اقدرش اطلع بالليل أبدا واديت له ميعاد دلوقت .

سيد : ( مرددا لى ذهول ) محمود ا؟ محمود !!

- جبية : ماله !؟ هو جراه حاجه !؟ .
- سيد : ( في يأس شديد ) أبدا .. أبدا ما جرالوش حاجه ( لنفسه ) أنا اللي جرافي .. انا اللي اتعلقت بأمل واهي .. أنا اللي اتحطم قلبي ، وضاع أملى .. أنا اللي طمعت نفسي بسعاده ما تخلفتهاش .
- جبية : مالك يا سيد افندى سكت ليه .. قوللى !! طمنى ! هو محمود جراه حاجه ؟ .
- سيد : أد كده بتخافي عليه !؟ .
- جبية : طبعا .. طمنى .. قوللى فيه إيه !؟ .
- سيد : بتحبيه قوى !؟ .
- جبية : قوى .. قوى .
- سيد : بتحبي فيه إيه ؟ .
- جبية : كل حاجه فيه .. أحب الهوا اللي بيتتنفسه .. والأرض اللي يمشى عليها .. من أول ما شفته حسيت ان فيه حاجه شدتني له .
- سيد : ( لنفسه ) أنا كان با احبك كده ، واكثر من كده لكن اتنى مش حاسه بي ، وهو كان مش حاسس بيكى .. دنيا عجيبه .. تحب اللخبطة !؟ .
- جبية : ما تقوللى يا أخى .. طمنى .. فيه إيه !؟ .
- سيد : ولا حاجه ، ولا حاجه أبدا .
- جبية : أمال ما جاش ليه !؟ .
- سيد : ما جاش ليه ؟ ( لنفسه ) أقول لها إيه !؟ أقول لها انه مش حاسس بيها ، أقول لها انه ماشى مع « زكيه ولغه » وانه ما يجيش الهوى العذرى !؟ أقول لها ان انا اللي با اعبيدها وانا اللي كنت با اضرب لها الناي !؟ لكن إيه الفايده ؟ هي بتحبه هوه .. مش بتحب الناي .. هي حبت الناي علشان هوه .. مش حبه علشان الناي .. إيه الفايده لما احطم قلبها زى ما حطمت قلبي .. ما يمكش اخذها ..

- لأنى يا حبيبا .. مقدرش اشوفها زعلاته .  
: ما تقوللى يا أنخى .. ما جاش ليه ؟ بهية  
: أيوه .. ما جاش .. علشان .. علشان .. علشان .. أصله .. سيد  
تعبان شويه .  
: ماله ؟ فيه إيه .. تعبنا ازاي ؟ بهية  
: لا .. ولا حاجة .. بس عنده شوية .. سيد  
: شوية إيه ؟ انطق ! بهية  
: ( لنفسه ) شوية إيه .. ابن الصرمة ، دا انا سايبه زى الحصان سيد  
( لبية ) عنده شوية مغمص .  
: مغمص ؟ مسكين .. لحسن يكون عنده المصران الاعور .. لازم بهية  
تجيب له دكتور ، ازاي تسييه كده ؟  
: لا .. لا .. ما فيش أعور ولا حاجة ، ما فيش لزوم للدكتور .. دا سيد  
مغمص بسيط .  
: بسيط ازاي ؟ ازاي تسييه كده ، مش حرام عليك .. لازم بهية  
اشوفه .  
: تشوفيه ؟ لا .. لا .. ما فيش لزوم .. ما فيش داعى . سيد  
: لازم اطمئن عليه ( تتقدم نحو الباب ) . بهية  
: ( لنفسه ) يا نهار اسود .. دلوقت تعرف كل حاجة ( سادا سيد  
الطريق إلى الباب ) يا ستى اطمنى .. دا زمانه بقى كسويس  
خالص .  
: لازم اشوفه بعينى . بهية  
: طيب بس استنى شويه .. اما ادى له خبر .. استنى ثانية واحده سيد  
( يندفع إلى داخل الحجرة ويفلق الباب وراءه ، ويمد يده تحت  
السريير ليخرج محمود ) محمود .. محمود ، قوم قوام .  
: ( فى دعر من أسفل السريير ) إيه .. إيه .. فيه إيه ؟ هي جت ؟ محمود

- هي جت؟ .
- سيد : هي مين دي .
- محمود : أم عبده ؟ .
- سيد : لا ما جتش ولا حاجه .. بس اطلع بسرعه ، بسرعه .. ( يخرج محمود ) نام فوق السرير .. يا الله يا أخي اتغطى بسرعه ، وقول آه .
- محمود : أقول آه ازاي ؟ .
- سيد : قول آه . الله يخرب بيتك . انت عندك مغمص .
- محمود : هو ايه أصله ده ؟! أنا ما عنديش مغمص ا .
- سيد : عندك مغمص .. قول آه .. قول يا جدع .. قول وبس .
- محمود : آه .. آه .
- ( تدخل بيه ) .
- بيهة : ماله .. مالك يا محمود ؟ .
- سيد : ما تكلمهش كثير لحسن المغمص اتحرك عليه .. لكن ان شاء الله حا يروح حالا .. دا برد بسيط .. ما فيش خوف منه .
- ( محمود ينظر بطرف عينيه إلى بيهة في دهشة وإعجاب فيقرصه سيد فيصيح آه ) .
- بيهة : مسكين .. سلامتك .. ألف سلامه .
- سيد : يا الله بينا بقى .. لحسن حد يطب .
- بيهة : لازم تحط له حاجه سخنه على معدته .
- سيد : أيوه .. أيوه .. أنا حا اعمل له اللازم .
- ( يجرها من يدها نحو الباب ) .
- بيهة : لازم تجيب له دكتور .. انا حا اطلع اطل عليه بالليل .. لما تيجوا تناموا .
- سيد : طيب .. طيب .. بس يا الله بينا بقى .

- بهيمة : خد بالك منه قوى ، علشان خاطرى .  
 سيد : علشان خاطرك؟! علشان خاطرك حا اعمل كل حاجة .. كل حاجة فى الدنيا .. مستعد اعملها علشانك .  
 ( تخرج بهيمة ، ويعود سيد مطرفا حزينا ويرتمى على مقعد ويضطرق برأسه على كفه ويتهد ) .

### المشهد الثالث

- محمود : ( مستمرا فى تأووه وقد أخفى رأسه تحت الملاءة ) آه .. آه .  
 سيد : بس خلاص . كفايه . ( يتأوه فى يأس ) آه .  
 محمود : ( يرفع رأسه من تحت الملاءة ) هيه خلاص مشيت . ( يقفز واقفا ) إيه الحكايه ؟ فهمنى ؟! إيه اللي جرى ؟!  
 سيد : ( وهو مستمر فى إطرافه وإخفاء وجهه بكفه ) ولا حاجة .  
 محمود : ولا حاجة ازاي !! كل ده وولا حاجة ! تصحبنى من عز النوم ، وتجرجرنى من تحت السرير وترمينى فوقه ، تقوللى قول آه ، آه ، وأسألك دلوقتى تقوللى ولا حاجة ، فهمنى إيه اللي حصل ؟ إيه اللي دخلها هنا وإيه اللي خلاك تقول لها ان انا عندى مغص ، وانا صاغ سليم ، فهمنى يا خال ، إيه اللي جرى ؟!  
 سيد : ( فى ضيق ويأس ) قولتك يا أخى ولا حاجة ، سيني دلوقت .  
 محمود : ما يمكنش اسيلك الا لما اعرف إيه اللي جرى ، ورينى وشك كده ( يزيح كف سيد عن وجهه ، فيرى عبرات صامته تنساب على خديه ، فيبدو عليه التأثر والدهشة ) الله إيه ده ، انت بتعيط . مالك يا خال ؟! قوللى جرى إيه ؟! قوللى الحقيقه . إيه اللي زعلك كده . أنا عمرى ما شفتك بتعيط أبدا . كلمنى يا خال ، أنا ما طيقش أشوفك كده ؟ قوللى إيه اللي حصل . أنا مستعد اعمل لك



- كل حاجة علشان اضيع زعلك .. بس فهمنى .  
سيد : ( يتهد تهيدته طويلة ) ولا حاجة . ما فيش حاجة .
- محمد : مش ممكن ، لازم فيه حاجة حصلت .  
سيد : حصل حاجة ماهاش علاج ، لانت ، ولا انا . ولا أى واحد يقدر يصلحها . سخرية بسيطة من سخریات الدنيا . عيث هايف من عيث الأقدار ، ( رافعا كفيه مادا شفته السفلى ) حا نعمل فيها إيه ، ما فيش غير اننا نستحملها ونسكت .
- محمد : إيه هواده ١٢ أنا مش فاهم حاجة أبدا . انت صابح مبسوط وعمال تسبب فى شعرك وتبأ فى نفسك وبتقول انك بتخلق بأجنحة الحب فى سماء السعادة . وبتقول ما فيش على وش الأرض مخلوق أسعد منك . لأنك محب محبوب . وعندك موعد حب ، وخرجت علشان تقابل اللي بتحبها وتحبك .
- سيد : كنت فاكر كده .  
محمد : وبعدين ١٢ .  
سيد : وبعدين طلعت انها بتحب واحد تانى .  
محمد : واحد تانى ١٢ أمال كانت بتشاور لك وتضحك لك . وادتك الميعاد ليه ؟
- سيد : ما كانش ليه دا كله .. كان لواحد تانى .  
محمد : واحد تانى ١٢ . ازاي ٢١ .  
سيد : كانت بتحب واحد تانى ، وافتكرت ان اللي واقف فى الضلمه ويصفر لها بالنأى هو الشخص اللي بتخبه ، فشاورت له وسلمت عليه ، وادت له ميعاد .
- محمد : وعرفته يبقى مين ١٢ .  
سيد : يبقى اللي بيقاه ؟  
محمد : ازاي الكلام ده ، مين ابن الأروبه دا ، وانا اجيب لك خبره ،

- أحببوك من على وش الأرض ؟ .
- سيد : ما فيش لزوم .
- محمود : ما فيش لزوم ازاي ! لازم اعرفه ؟ .
- سيد : ضروري يعنى ؟ .
- محمود : طبعا .
- سيد : انت ؟ .
- محمود : أنا ؟ . أنا ؟ . ( مستغرقا في نوبة من الضحك ) ، أنا ؟ . مش ممكن ، انت بتضحك عليّ يا خال ؟ .
- سيد : يا كلمك جد يا محمود .
- محمود : قول كلام غير ده يا خال !! .
- سيد : دى الحقيقه ، إنت عارف انا بحبها ازاي ؟ .
- محمود : ميت صبابه .
- سيد : أهى هتّى كان كده .
- محمود : بتحبني أنا ؟ ليه ، وبتاع إيه ؟ وعلشان إيه ؟ .
- سيد : اللي حصل .
- محمود : لكن أنا ما عنديش أى شعور ناحيتها ، دى مش النوع اللي يدخل مزاجي أبدا ، دى واحده شريفه وعذراء ، وأنا لا أحب الشرفا ، ولا العذارى .
- سيد : ماهى دى المصيه .. ماهى دى السخريه .. لو كنا احنا الاتنين بنحبها وانت اللي فزت بيها كانت بقت حاجه معقوله .. لكن أنا أحبها ، وهى مش حاسه بيه ، وهى تعبدك ، وانت مش حاسس بيها ، دى سخريه القدر اللي على أصولها .. دى مهارة الأقدار فى تعذيب الإنسان وإيلامه .. لكن على العموم أنا مش عايزها تحس باللى أنا حاسس بيه .. مش عايزها تتصدم الصدمه اللي انسا اتصدمتها . مش عايزها تنألم زى ما أنا بتألم .. أنا مجرب الشعور ده

- وعارفه ، وأنا لغاية دلوقت با احبها ، وحا فضل احبها طول  
 عمرى ، وما اقدرش افكر انها تتألم .. ما طيقش .
- محمود : ( مندهشا ) إيه يا خويه ده ، والعمل ؟ .
- سيد : العمل ما تكسفهاش .. زى ما كسفتنى ؟ .
- محمود : يعنى إيه ١٤ .
- سيد : يعنى عايزك تحبها ، وكان تخلص فى حبك لها .
- محمود : إيه ١٤ أحبها ١٤ واخلص فى حبي لها ١٤ إيه أصل ده يا خال ١٤ انت  
 جراللك حاجه ١٤ .
- سيد : اسمع يا محمود .. أنا يا تكلم جد .. البنت دى مش بنى آدمه عاديه ،  
 دى ملاك ، وهى بتحبك حب ، ما تستلوش أبدا .. لو كانت ،  
 بتحبني ربع الحب اللى بتحبهورك ده .. كنت حاسبت ان انا أسعد  
 مخلوق على ظهر الأرض ، ولو كنت اعرف ان الحب دا ممكن  
 الإنسان ينقله بسهولة كنت نقلته ، لكن انا عارف ان ما فيش فايده .  
 أنا يائس من حبها .. لكن حاسس ان انا عايز اسعدها ، ولو كنت  
 انا أقدر اسعدها بنفسى كنت سعدتها لكن المصيبة اللى يقدر  
 يسعدها انت ، وعشان كده لازم تسعدها .. لازم تحبها ، لازم  
 تكون كويس معاها علشان تستاهل حبها .. لازم تبقى إنسان  
 جد ، وتستقيم فى الدراسة علشان تبقى شخص محترم ولك مركز .
- محمود : يفتح الله .. أنا لا انا عايز احبها ولا استاهل حبها .. أنا مبسوط كده  
 خالص ، كفايه على « زكيه ولعه » على أد إيدى ، وبسطانى  
 ومهيانى ، والأشيارضا .. ابعد عنى يا خال وحياة ابوك أنا لا بتاع  
 حب ، ولا بتاع جد .. انت عارف من زمان ان انا ما ليش فى  
 الكلام ده .. وما تنساش ان البت زكيه نفعا نا برضه لولاها كنا متنا  
 من الجوع ، أهى برضه بتنفعا بقرشين بأكلتين ، وحكاية  
 الاستقامة فى المدرسة دى عارف معتها إيه ؟ انى انجح وانخرج ،  
 ( أم رتية )

وتنقطع الفلوس التي يبيعتوها لنام البلد ، ولا يبقى عندنا مصاريف  
مدرسه نضيعها ، ولا رسوم امتحان نتشربق بيها ، ولا تمن كتب  
تسدد بيها ديوننا ، واقعد معاك كده على باب الله . لا شغله ولا  
مشغله ، انت عارف ان انا بتاع شغل ؟ وحياة أبوك يا حال سيينا  
من السيرة دي ، خلينا كافيين نخيرنا شرنا .. كفايه ام عبده واللى  
عاملاه فينا ، انت راجل بتاع حب .. حب زاي ما انت عايز ، ما  
حدش قال لك حاجه .. لكن تخرجرنى معاك ، وتقول عايزك  
تحب ، وعايزك تبقى أهل للحب ، وعايزك تبقى جد ، وتستقيم ..  
كفايه كده . يفتح الله . حد الله بينى وبينك .

( يسمع فجأة صوت صياح فراخ وضجة في حجرة الفراخ .. ثم  
يفتح باب حجرة الفراخ ويخرج قرقر من الحجرة وهو يسب  
ويلعن محاولا حبس الفراخ في الغرفة وفي يده قلة ، وفي الوقت  
نفسه يصيب الذعر محمود وسيد فيقفان ويجمعان الأشياء وراء  
الباب ) .

محمود : أنا مش قلت لك انا طول الليل احلم بيها .. هات .. هات .. حط  
الترابيزه كان .

سيد : بس يا أخينا .. كفايه كده .. هى كانت دبابه .. كفايه خالص .

محمود : والعن من الدبابه .. دى صاروخ .. دى ديناميت ، يا باى ، أنا يا  
عم حاخش المطبخ .. كان فيه حته جنبه رومى قديمه . اياك يكون  
الفار ساب لنا منها حاجه .

سيد : وأنا اما نخش اتوضا .

( يخرج الاثنان من الباب المؤدى للمطبخ ويقف قرقر في  
السطوح ) .

## المشهد الرابع

قرقر

: ( بعد أن ينتهي من غلق الباب على القراخ ) يا ناس يا هوه ، يا عالم ، حد في الدنيا يرضى بكده ، طول الليل ما اشوفش النوم . أنا قرقر المسيط ، ويحكم على الزمان ، وانام في عشة فراخ !! لكن معلهش ، علشان يرضى المست ام عبده ، وعلشان يبيسط شيخ السو ، الشيخ عجائب ، اللي طول النهار يزلط في حمام وفراخ وكباب ، ويعزم له تعزيمتين ويهزله هزتين ، وآل إيه يطلع العمل ، ياخي عملك اسود ومهيب على دماغك ، أنا قرقر ، انطرد من أودتي ، واترمى في أودة القراخ ، وطول الليل ديك الكلب ده ، ينقر لي في بطن رجلى .. وانا بغير من رجلى موت . خلاني بايت مسخسوخ الضحك ، حد في الدنيا يقول كده ، واحد ما ينامش من كتر الضحك ، طول الليل سهران اضحك ، وانا حالي يستاهل البكا ، وكل ما عيني تغفل شويه ، والا افكر شويه يزعل ، ويروح نقرني في بطن رجلى أروح مفرهدم الضحك . إلهي تنقصف رقبته الشيخ زفت ، اللي نايم يشخر في الأودة وساييني انافر طول الليل مع القراخ . وياريت بلاقي ثانيه استريح فيها بالنهار ، الا طول النهار ما تفرغلوش طلبات ، اطلع يا قرقر ، انزل يا قرقر ، روح يا قرقر ، تعالى يا قرقر ، وياريت طلبات زي طلبات البنى آدمين ، الا طلبات لها العجب ، وآخر تغليعه طالع لي فيها حكاية القله ، علشان ادوخ ، علشان اموت ، أنا عارف هو مش حا يستريح الا لما يجيب أجلى . ( يضع القله على كف يده ويتحرك في السطوح وهو يوازنها . تدخل عديله الخادمه وقد حملت الغسيل وكيس المشابك ) .

- عديله : إلهي بعدلها لك ، إيه اللي انت عامله دا يا واد يا قرقر ، انت حا تشتغل مع بتوع التقرزان ؟!
- قرقر : ( يقف ويمسك القلعة من عنقها ) اصطحبني وقولي يا صبح ، أنا مش ناقصك ، إيه طلعتك كده من النجمه ؟!
- عديله : أنشر الهدمتين اللي غسلتهم امبارح العشا وبيتهم طول الليل متقوعين ، إذا كتش اعمل كده ، حا يضيع مني النهار .
- قرقر : ما يضيع ، يعني وراكي إيه ، مؤتمر سان فرنسكو .
- عديله : سان إيه ؟! والله اتعدلت ولسانك مشي ، الله يرحم زمان ، أيام التريتر ، وجنية الحيوانات ، بقى انا ورايا إيه ؟ الشغل اللي مطربق على دماغى ده كله وورايا إيه ؟! الكنس والمسح والغسيل والطبخ والمناكفه والمناقره والمهاجره ، كل ده وماورايش حاجه ؟ ياخي خلي حد يقول كده غيرك ، ليه .. هو انا زيك ؟ طول النهار قاعد لى فوق السطوح زى تنابله السلطان لا شغله ولا مشغله .
- قرقر : اللي هو انا ؟ طيب معلش ، انشرى الهدمتين وانزلى ، خليه نهار يفوت .. أنا اللي قاعد فوق السطوح ، ولا شغله ولا مشغله .. حا قول إيه ؟
- عديله : ( يضع القلعه على كفه ثم يأخذ في السير بها كما كان يفعل ) .
- عديله : ( فى دهشه ) : هو إيه أصله ده .. ما تفهمنى بس إيه اللي بتعمله .. انت جرالك إيه ؟
- قرقر : مالكيش دعوه .. انتى مش بتقولى لا شغله ولا مشغله .. سيبنى بقى فى حالى .. كفايه القرف اللي انا شايفه .
- عديله : طيب ما تزعلش .. حقتك عليه .. بس قوللى إيه اللي بتعمله ده ؟
- قرقر : زى مانتى شايفه كده .. باتمرن .
- عديله : تتمرن على إيه ؟
- قرقر : ع الشغل .

- عديله : شغل !؟ سلامات يا شغل !! شغل إيه اللي بتتمرن عليه ده ياسى  
قرقر . يا ابن ام قرقر .. تكونشى بتشتغل فى سيرك ولا حناش  
عارفين ؟
- قرقر : ومش عارفين ليه ؟ ما هو قدامكوا اهو .. على عينك يا تاجر .. فيه  
سيرك اكثر من السيرك اللي بتشتغل فيه ده .
- عديله : سيرك إيه ؟
- قرقر : سيرك أم عبده .. أم عبده والشيخ عجائب .
- عديله : انت بتهزر ؟
- قرقر : بتكلمم جد .. شوفى شغلك بقى خلىنا نشوف شغلنا . ( يعاود  
سيره بالقله ) .
- عديله : ( مغتاظه ) بقى اسمع بقى يا قرقر ، والنسبى واللى نبي النبى نبي ..  
والولى واللى ولى الولى ولى . وال ..
- قرقر : ( يقف فى ضيق ) إيه بس عايزة إيه بلا نبي بلا ولى ؟
- عديله : إذا ما كنتش تقول لى إيه اللي بتعمله ده .
- قرقر : حا تعملى إيه ؟
- عديله : حارقع بالصوت .
- قرقر : مفيش لزوم ، حاقول لك .
- عديله : قول .
- قرقر : بقى انت عارفه ان الشيخ عجائب مفهم ستك ام عبده ان معمول لها  
عمل .. وان العمل ده هو اللي مطفش نوح افندى منها .. واللى  
مخليه مش طايقها .
- عديله : معقول .. له حق .
- قرقر : حق .. يا اخى انشا الله ينكسر حُقلك .
- عديله : ان شا الله انت .
- قرقر : هي ستك ام عبده ناقصه عمل .. دى هي نفسها عمل .. دى مش

تطفش نوح افندی وبس .. دی تطفش بلد .. أنا مش فاهم  
الحکومه تايه عنها فين .. دی لو سابوها في القنال .. حا تطفش  
الانجليز في ليله .. دی كانت تجيب لنا الجلاء في ثانيه .

عديلة : المهم ، خلينا في اللي احنا فيه هنا ، بتقوللي ان الشيخ عجائب مفهم  
ستي ان معمول لها عمل ؟

قرقر : أيوه .

عديلة : وبعدين ؟

قرقر : ولا قبلين ، عايز يطلعه .

عديلة : له حق لازم يطلعه .

قرقر : بس دا حا يطلعه على عنيه .

عديلة : وانت مالك .. إيش حشرك ؟

قرقر : مالي ازاي ؟ ما هو كله على دماغى ، هوا بيخلينى اون ثانيه ، أنا

المستول عن كل الطلبات البايخه اللي بيطلبها ، ما هو لو كان العمل دا

حا يطلع كده زى كل حاجه ما بتطلع ، كانت هانت ، الا العمل

بتاع ستك ام عبده مش عايز يطلع ، الا بحاجات ما وردتش ،

مالهاش نظير ، ما سمعتش عنها عمرى .

عديلة : زى إيه كده ؟!

قرقر : خدى عندك ، أول حاجه طلبها ، جدى احول .

عديلة : وماله .

قرقر : وماله ازاي ؟!

عديلة : هات له جدى أحول .

قرقر : وهو فيه جدى احول يا مغفله ؟.

عديلة : يوه ، ما فيش ليه ، هو مش فيه بنى آدم احول ؟

قرقر : فيه .

عديلة : يبقى لازم فيه جدى احول ، زى ما فيه بنى آدم اعمى وجدى



- اعمى ، وبنى آدم اعور وجدى اعور .  
 قرقر : أصل الاعمى والاعور دى فى إيدينا ، أقدر أجيب له جدى سليم  
 وانحزق له عينه يبقى اعمى ، والا عين واحده يبقى اعور ، لكن  
 الاحول ده أحوله ازاي ؟!  
 عديلة : زى الناس .  
 قرقر : يعنى إيه زى الناس ؟!  
 عديلة : يعنى جيب له معزه على يمينه ومعزه على شماله تبص تلاقيه يحول ، هو  
 البنى آدم بيحول من إيه ، من كتر البصيصه يمين وشمال ، من  
 فروغية عينه .  
 قرقر : طب افرضى طلع جدى ، تقى ، جدى مطمطم ؟!  
 عديلة : حا يحول أكثر .  
 قرقر : طب اتبينام الجدى ، والفرخه الزعلانه ، دى أجيبها له متين ؟!  
 عديلة : فرخه إيه ؟  
 قرقر : زعلانه ، ابن الرفضى ، لازم يعقدها ، يعنى إذا كانت ميسوطه ما  
 تنفعلش ، ما يطلعش العمل ، أجيب له الزعلانه دى متين  
 بدمتك ؟!  
 عديلة : بسيطه خالص .  
 قرقر : برضك أجيب لها ديكين ؟!  
 عديلة : لأ ديك واحد .  
 قرقر : تقوم تزعل ؟  
 عديلة : حاتبسط فى الأول .  
 قرقر : تبقى مش نافعه .  
 عديلة : اصبر عليه شويه .  
 قرقر : صبرنا .  
 عديلة : تجيب لها ديك ونسيه معاها .

- قرقر : سيناه معاها .  
 عديلة : حانفرفش .  
 قرقر : فرفشت .  
 عديلة : تكبس عليها بتلات فرخات ، مره واحده . وتسيهم مع الديك .  
 قرقر : حانزعل ؟  
 عديلة : تزعل ويس ، دى يمكن تنزل عليها تقطه .  
 قرقر : يا سلام عليكى يا بت يا عديله ، يالى مقيش منك ، يسلم بقك ،  
 ( يضع القله على كفه ويعاود السير ) عن إذتك بقى اما اكمل  
 الشغل .  
 عديلة : ( فى غيظ ) بينلك ، بقى بعددا كله ، وما تقوليش بتعمل إيه ؟  
 قرقر : أيوه والله كنت حانسى ، حانقول لك ايه .  
 عديلة : قول .  
 قرقر : بقى يا ستى .. الراجل الضلالى طول النهار ما كفاهوش الطلبات  
 المعقده اللى بيطلبها ، واللى مدوخنى بيها ، لا ، آخر المتمه ، قال ان  
 العمل ده مش حانعرف هو موجود فىن الا بطريقة القله .  
 عديلة : طريقة القله ؟  
 قرقر : ايزه يا ستى طريقة القله .  
 عديلة : ودى تبقى إيه دى كان ؟  
 قرقر : قال عملاقه للآخر .  
 عديلة : وبعدين ؟  
 قرقر : واحد يحطها على كفه ، كده .  
 عديلة : بسيطه .  
 قرقر : لا مش بسيطه ، يفضل فارد دراعه بيها .  
 عديلة : حاجه سهله ، انا اقدر اعملها .  
 قرقر : يا ستى اصبرى على لما اكملك .

- عديلة : طيب كمل ، أنا أصلى عارفك قليل الحيلة .
- قرقر : يفضل فارد دراعه كده ، وماشى بيها ، ماشى ، ماشى . ماشى .
- ( يأخذ في السير ) .
- عديلة : وبعدين .
- قرقر : يفضل ماشى ، ( ويأخذ في السير ) .
- عديلة : خلاص ، فهمنا ، وآخرة المشى !؟
- قرقر : لحد ما تتدغدغ رجليه ، ويتقطم وسطه . ويتخدل دراعه ، وتقع القله تتكسر .
- عديلة : طب وبدال ما يفضل ماشى لغاية ما يجراه كل اللي حا يجراه ده مايدشدها من الأول ويريح نفسه .
- قرقر : ما ينفعشى ، لازم يسيبها لحد ما تقع من نفسها .
- عديلة : طيب وقعت من نفسها .
- قرقر : يطب وراها في الأرض ، والحنه اللي تقع فيها ، يفضل يحفر فيها لغاية ما يطلع العجل .
- عديلة : يا سلام ، أما طريقه مندهشه ، وجريتوها دى يا قرقر !؟
- قرقر : جربناها .
- عديلة : ازاي .. احكى لي احكى ، حصل إيه !؟
- قرقر : خرجت أول امبارح العصر . بعد ما مليت القله لمت عينها ، وفردت إيدي بيها كده ، ونزلت السلم . وخرجت من الباب ، أقول لك الحق ، أنا كنت مكسوف وعارف ان الناس حا تضحك عليه ، وقلت أخرج بيها كده قدام الست ام عبده ، أهو يرو عتب ، وبعدين أدشها في أقرب حته بدل ما مشى بيها في الشارع وافرج الناس عليه ، لكن لما نزلت الشارع الفار لعب في عبي ، وقلت يمكن تكون الحكايه صحيح ، ولو وقعتها بالعنيه يمكن ما يطلعشى العمل ، قولي الشهامه مسكتني وضميرى أنبنى وقلت يا وادامشى

- واستحمل .
- عديلة : لك حق ، طول عمرك شهيم .
- قرقر : مشيت ، من شارع السد على ميدان السيده ، والعيال حواليه  
والتقوره دايره ، شقع بقع يارب تقع . وكل من هب ودب يرقعنى  
بكلمه ، لحد ما وصلت شارع خيرت على عابدين ، حسيت ان  
دراعى خلاص ابتدا يتصلب وكفى حا ينخلع ، ضغطت على  
نفسى . وفضلت ماشى ، ماشى ، لغاية ، ما حسيت زى اما يكون  
دراعى اتشل ، ما بقيتش حاسس بيه خالص ، ومره واحده ، القله  
طبت انكسرت .
- عديلة : وبعدين ، عملت إيه ؟!
- قرقر : رحط طابب وراها على الأرض ، ورافع الفاس اللي شايه فى إيدى  
التانيه ، وهات يا حفر . فضلت احفر ، احفر ، احفر .
- عديلة : لغاية ما طلعت العمل ؟
- قرقر : لا ، لغاية ما جم العساكر وودونى القسم ، وبيتونى ليله على  
الأسفلت .
- عديلة : ليه ؟!
- قرقر : لأنى كنت بحفر فى وسط ميدان العتبه ومعطل حركة المرور كلها .
- عديلة : يا خساره ، والعمل ؟!
- قرقر : عمل اسود ، لازم سفلتو فوقواتانى .
- عديلة : والشيخ عجائب قال لك إيه ؟!
- قرقر : ولا حاجه .. هو خاسس عليه إيه ، قاللى اطلع تانى مره ، وامشى  
حسب القله ما تودينى يعنى مش زى ما أنا عايز .. أميل مطرح ما  
تميل .. مالت فى عطفه ادخل فى عطفه ، مالت فى زقاق ادخل فى  
زقاق ، دخلت فى بيت ادخل فى بيت .. عشان المره دى .. مش  
يودونى قسم الموسكى وبس .. يودونى قره ميدان على طول ، إياك

ينسبط الشيخ السو .. إياك يرضيه ، أنا عارف هو مش حا يسترخ  
الالما يجيب داغى . لكن أنا مش حاسكت له ، مش كل الطير اللي  
يتاكل لحمه ، لازم اجيب داغه قبل ما يجيب داغى .. لازم اطربقها  
عليه .

( يندفع فى ثورة من الغضب ويرفع يده بالقله ويهوى بها على  
سقف الحجرة التى ينام فيها الشيخ عجائب فتكسر القلة وينزل  
ما بها من مياه على الشيخ عجائب من خلال فتحات السقف  
الخشبى ويسمع استغاثات الشيخ عجائب وتأففه من المياه النازلة  
فوقه ) .

عديلة : يا منيل على عينك ، انت اتجنتت والا جرى لعقلك حاجه ..  
الراجل يقول إيه دلوقت ؟  
فرقر : ولا حاجه .. نظره .

عديلة : نظره ؟

فرقر : أيوه نظره .. حاجه عجيبه ، السما ما بتنطرش أبدا ...

عديلة : والسما اللي نظرت دى مش بتنطر فى كل حته ؟

فرقر : لا .. بعض ساعات تنطر فى حته وما تنطرش فى الحته الثانية .

عديلة : يعنى النظره ما عجبتهاش حته تنزل عليها فى كل الدنيا الواسعه دى

غير أودة الشيخ عجائب ؟

فرقر : أيوه .. لأن ده السطح البارد الوحيد اللي قابلته .. دى نظريات

علميه ما تفهمهاش .. حاجات عرفتها زمان لما كنت فى كتاب

الشيخ زكى ، وعلى العموم علشان نسبكها عليه نعمل لها شوية

تحايش .

( يخرج من جيبه بطارية ثم يضيئها عدة مرات سريعة متوالية )

دابرق ( يدق ضربات فوق سطح الحجرة أشبه بالرعد ) ودارعد

( يصفر صغيراً أشبه بالريح ) ودى العاصفه .. أظن بعد كده يبقى

- ما لناش ذنب ، وإذا ما صدقش انها نظره .. عنه ما صدق ، أنا عملت اللي عليه .. يعنى هي السما بتعمل إيه أكثر من كده .  
( يسمع صوت أم عبده من بير السلم ) .
- أم عبده : بت يا عديله .. بت يا عديله ، انت نمتى فوق والإيه ؟!  
قرقر : يا حفيظ .. زمارة الخطر .  
عديلة : أيوه يا ست ، أصل الجبال كانوا مسخين قوى وكنت بامسحهم .  
( يسمع صوت أقدام صاعدة بالقباب ) .
- قرقر : يا نهار اسود ، دى طالعه .. القضا المستعجل طالع .. اخلصي يا عديله ، دلوقت تخش للشيخ عجائب علشان يرقها .. فتعرف اللي حصل ، وتشوف القله المكسوره اسمعى أنا لازم استخبي .  
عديلة : خش في أودة الفراخ .
- قرقر : ما فيش فايده .. حا تدور عليه وتقفشني ، اقول لك .. أحسن حاجه أخش عند الجماعه دول ( يشير إلى حجرة سيد ومحمود ) .  
عديلة : لكن دول ساكين الأودة وبقالمهم مده ما بيجوش .
- قرقر : لا أنا عارف انهم موجودين بس يطلعوا على مواسير الميه ويبدخلوا من الشباك علشان ام عبده ما تقفشهمش وتطالبهم بالأجرة المتأخره .
- عديلة : طب وحا يرضوا يفتحوا لك ؟  
قرقر : طبعا .. إحنا فيه بيننا وبين بعض عمار ، فيه موده .. انا وهم على ام عبده . ( تنهك عديله في النشر ويستمر صوت القباب في الاقتراب ) .  
( يطرق قرقر الباب وفي هذا الوقت يكون سيد خارجا من دورة المياه يجفف وجهه استعدادا للصلاة ) .  
( سيد يقف متمسرا في حالة فرع .. قرقر يعاود الطرق دون أن يجيب عليه أحد ) .

- قرقر : افتح يا سي سيد افندى .. افتح انا قرقر ، افتح بسرعه .. انا في عرضك .
- ( سيد يزيح ما وراء الباب ثم يفتحه ، فيدخل قرقر ويفلق الباب وراءه ) .
- سيد : إيه ؟ فيه إيه ؟ .
- قرقر : القضا المستعجل طالع .
- سيد : القضا المستعجل ؟
- قرقر : أيوه أم عبده .
- سيد : يا نهار اسود ؟! طالعه هنا ؟
- قرقر : أيوه ، في السطوح .. طالعه للشيخ عجائب عجائب يبخرها ويرقيها ويلبسها الحجاب .
- سيد : طيب وانت خايف ليه ؟!
- قرقر : أصل عملت في الراجل خازوق ، وخايف لا تطلعه من عنيه ؟
- سيد : طيب اقعد لما اصلى ركعتين .
- ( سيد يبدأ الصلاة ، ويجلس قرقر وراء الباب ينظر من خلال الثقب ) .
- ( تظهر أم عبده صاعدة من السلم في السطوح ) .

## المشهد الخامس

- أم عبده : مش خلاص والاحاتفضلى تنشري في الهدمتين طول النهار .. أعمال فين قرقر ، لسه ما صحيش ؟!
- عديلة : ما اعرفش والنبي يا ستي ، انا من ساعة ما طلعت ما شفتلوش أثر .
- أم عبده : لازم لسه بيشخر .. هوا دا عنده دم ، عايز الخدامين بتوع أبوه يصحوه ، لازم ينام لى لغاية الضحى . ( تقترب من عشة

( الفراه ) واد يا قرقر ، انت يا واد يا قرقر ، قوم فز اصحى ..  
هى نومة أهل الكهف ، قوم يا الله ( لا يجيب عليها أحد .. تفتح  
التقيصة وتمد رأسها إلى الداخل فلا ترى غير الفراه ) ما هواش  
نايم جوه .. هوا راح فبن يا بت ؟!

عديلة : انا عارفه يا ستى .. هوا حد عارف له قرار ، أهو داير ينطزى فرقع  
لوز .

أم عبده : يمكن نايم مع الشيخ عجائب ، مع ان انا قلت له يسبب له الأوده ولا  
يعتبش جواها علشان ما يضايقش الراجل ويعطله .. الراجل وراه  
شغله .. طول الليل ما يطلش قرايه وكتابه وتعزيم .. ربنا ينجحه ،  
ويطلع لى العمل اللى علبش لى الراجل ، ومهججه .  
( تنقر بسبابتها على باب حجرة الشيخ عجائب ) .

الشيخ عجائب : ( من الداخل ) ها .. مين ؟

أم عبده : ( بصوت رقيق ) أنا .

الشيخ عجائب : ( لا يسمع ) مين اللى بيخبط ع الصبح مش كفايه التعب والسهر  
والدوشه اللى شايفينها طول الليل ؟

عديلة : افتح يا سيدنا الشيخ دى الست ام عبده .

الشيخ عجائب : طيب يا ست ام عبده .. لا مؤاخذه ، حالا .

( يفتح الباب ويدو مبتل الوجه والثياب ) .

الشيخ عجائب : عدم المؤاخذه .. أنا افكرت .. الواد قرقر .

أم عبده : أنا صحيتك م النوم ؟

الشيخ عجائب : هوا انا باشوف النوم .. وآخر الليل جيت اغفل شويه .. لقيت  
النطره نازله ترخ .

أم عبده : نظره ؟ نظرة إيه ؟! هى الدنيا نظرت يا بت يا عديله ؟

عديلة : ( هرتبكة ) والله يا ستى مانا عارفه .. يمكن قبل ما اطلع .



- الشيخ عجائب : لا .. لا .. دى نظرت حالا دلوقت السقف خر على غرفتى .  
أم عبده : يمكن ندا يا سيدنا الشيخ ؟  
الشيخ عجائب : ازاي .. دى نظره .. برعد ، وبرق ، وعواصف .  
أم عبده : كان ؟  
عديلة : يمكن يا ستى من عمايل الجن والعفاريت .. ما هو سيدنا الشيخ  
طول الليل يحضر فيهم .. اللهم احفظنا .  
الشيخ عجائب : على العموم يا ست هاتم أحسن حاجة تشوفى لنا أوده تانيه يكون  
سقفها كويس ، علشان لما النظره ترخ علينا تالى ما تبقاش تنزل  
تفرقتا وتلف شغلنا .  
أم عبده : أنا برضه بفكر فى كده .. بقول انى ادبك أودة الجماعة النصايين  
دول اللى بقى لهم ثلاث تشهر ما بيدفعوش الأجره .. أحسن حاجة  
ان انا اعزهم وافضيها لك .  
الشيخ عجائب : كتر خورك يا ست هاتم .. علشان نعرف نشوف شغلنا كويس ..  
الحاجات دى عايزه تعب ، وعايزه سهر اتفضلى جوه .. أما  
اوريكى أنا عملت إيه طول الليل .. اتفضلى ( قدخل أم عبده فى  
الحجرة ، وتحمل عديله السبت وتهبط به ) .

## المشهد السادس

- ( سيد ينتهى من الصلاة .. محمود يدخل من المطبخ ... قرقر  
يرقب من ثقب الباب ) .  
محمود : الله !! إيه ده ؟ إيه اللى جابك رهنا يا قرقر ؟  
سيد : لاجىء سيمى .. هارب من العدو المشترك .  
محمود : يعنى إيه مش فاهم ؟  
قرقر : طب بس ما تعلش صوتك ، الوليه قاعده بره .

- محمود : ولية مين ؟  
قرقر : أم عبده .  
محمود : يا نهار اسود !! يره .. يره ! يعني في السطوح !؟  
قرقر : أيوه .  
محمود : يا لطيف ، وقاعدين كده ساكتين !؟  
قرقر : على العموم هي دخلت دلوقت في الأوده بتاعتى عند الشيخ عجايب ، ودلوقت زمانها ملخومه في الأحجبة والبخور ، وزمان الراجل عمال يرقى فيها .  
محمود : يعني ما فيش خوف !؟ فيه حال أمان !؟  
قرقر : أمان مؤقت .. وبعده .. الخراب المستعجل .. فيه أنباء سيئه جدا عرفتها دلوقت .  
سيد : إيه هي ؟  
قرقر : بعد عشر دقائق بالكثير . حا تصبحوا بلا مأوى .. حا تبقوا كده زى حالاتي .  
محمود : يعني إيه !؟  
قرقر : يعني حا تنظردوا ، الشيخ عجايب ، حا ينتقل في الأوده بتاعتكم لأن الأوده بتاعتى اللي هو فيها دلوقتى سقفها بيخر .  
سيد : بيخري إيه !؟ هوا !؟  
قرقر : لا .. ميه .  
سيد : ومتين جات له الميه !؟  
قرقر : نظره .  
محمود : نظره !؟ مش ممكن ، الدنيا ما نظرتش أبدا .  
قرقر : مطر صناعى .. مطر قناوى .  
سيد : إيه يا سيدنا الكلام اللي بتقوله ده .. مطر في الصيف !؟  
قرقر : لا .. أصل انا اتغظت منه وكسرت القله على نفوخته .. المهم ان

القضا المستعجل قال انه حا ينقله في الأوده بتاعتكم دلوقت .. فايه العمل !؟

سيد : إيه العمل ؟. دي تبقى كارته .. دي تبقى تكبه حا نروح فين وننام فين ، ونودي العفش دافين .. داحنا ما معناش اللضا .

قرقر : على العموم بسيطه ، نقعد سوا في الأوده بتاعتي . والا تناموا فيها وانا انام في أودة الفراخ ، وعوضى على الله . بس المهم انكم تزوغوا دلوقت قبل ما تقفشكم .

محمود : لكن ازاي تاخذ الأوده بتاعتنا .. دي ما لهاش حق قانونى .. احنا مأجرين منها أجره بالسنة .. ولنا الحق ان احنا نقعد لغاية آخر السنة .

سيد : أيوه يا أستاذ .. لك الحق لو كنت بتدفع الأجرة .. أو لو كان معك فلوس دلوقت تدفعها .. لكن عايز تقعد ولا تدفعش .. حاجه مش محقوله . إذا كنا عايزين نقارح ونثبت في الأوده لازم اقل ما فيها تكون دافعين الأجرة المتأخره .. بس لو تسيينا يوم والا يومين ، كان الواحد قلىر يدبر المبلغ .

قرقر : ما فيش فايده ، بعد نص ساعه حا تكون مسئوليه على الأوده ، أنا عارفها كويس .. دماغها ناشفه .

سيد : والا حد بس يشوف لنا سلفيه !

محمود : سلفيه منين يا خال ، داحنا مديونين للشارع كله ، المكوجى ، والبقال ، والخضرى ، والجزار ، وبتاع البسبوسه ، وبتاع لحمة الراس ، وبتاع القول والبليله السخنه ، يعنى مفيش حد يآمنأبدا .

قرقر : بس يا جماعه انا سامع صوت رجلين .

( يدور في السطوح عم على بائع القول ويتجه إلى باب الحجره ويطرقها ) .

( الجميع يصفون .. يزداد الطرق .. ) .

( أم رتيه )

- عم علي : هو إيه أصله ده ، ده اسمه نصب ، انتوا عايزين تاكلوا بلاش ، بقالى  
خمس تيام وانا آجى علشان الشلن الى انتوا واخذين بيه .. دا حتى  
حرام ما يرضيش ربنا .
- قرقر : ( ينظر من ثقب الباب .. هاسا ) داعم على بتاع القول ، مشى  
خلاص .
- سيد محمود : ( الاثنان يتفسان الصعداء ) .
- سيد محمود : ها .. وبعدين .. العمل إيه ؟
- سيد محمود : ولا قبلين .. ما فيش قدامنا غير الطريق الوحيد ده ( يشير إلى  
النافذة ) .
- سيد محمود : أيوه بس حانات فين بعد كده ؟! والعفش والحاجه بتاعتنا حانعمل  
فيها إيه ؟
- قرقر محمود : يا أخى يبقى يحلها ربنا .
- قرقر : هس .. فيه صوت رجل تانيه .
- عم إبراهيم : ( يدخل عم إبراهيم بائع لحمة الراس .. ويترق الباب ) .
- عم إبراهيم : لا .. ما هو ما ينفعش ده .. أنا ما فياش نفس اطلع كل يوم السلام  
علشان الريال من غير فايدة .. دانتوا أفنديه محترمين امال خليتوا إيه  
للهلأفيت .. لما انتوا مش أد الجواهر .. تاكلوا جواهر ليه ؟! كلوا  
أباوه .. كلوا كرشه .. معلش مسير كو تقعوا فى إيديه ، وانا  
اوضبكوا كويس .
- قرقر محمود : ( ينظر برهة ولكنه يأس فينصرف ) .
- قرقر محمود : ( ينظر من ثقب الباب هاسا ) داعم ابراهيم .. يا جابر ..
- قرقر محمود : يا ساتر .. هولسه واقف ؟!
- قرقر محمود : لا .. مشى والحمد لله .

- سيد : ( متهددا ) الذى لا يحمد على مكروهه سواه .
- محمود : ودلوقت يا الله بنا يا خال نزوغ بسرعه من الشباك قبل ما الوليه  
تعطب علينا ونروح فى شربة ميه .
- سيد : مش بس يا أخى تفكر فى الحكايه كويس ، حانبات فين ، ونودى  
الحاجه بتاعتنا دى فين ؟!
- محمود : بعدين نفكر فى الحاجات دى كلها ، المهم اننا نزوغ دلوقت .  
( يأخذان فى ارتداء ملابسهما ) .  
( يسمع صوت أقدام أخرى تقترب ويبدو فى السطوح الشيخ  
زين يوتدى جلبابا بلديا .. يطرق باب الحجره ) .
- سيد : ودامين دا كان ؟
- قرقر : ( من لقب الباب ) مش باين ، ما عرفش يبقى مين شحط كبير  
قوى سادد الباب .
- محمود : يعنى حا يطلع مين ؟ مندوب البنك الأهلئ ؟ أهو لازم واحد من  
الديانہ ، تلاقيه عم حلاوه بتاع البسبوسه ، والا الحاج عضمه  
الجزار .
- سيد : لكن دا ما بيتكلمش .  
( زين يستمر فى الطرق على الباب ) .
- محمود : لازم ناوى على الشر ، لازم بيخمن لنا على حاجه . ( زين يمل من  
الطرق فيجلس أمام الباب ) .
- قرقر : يا نهار أسود ، ده قعد ، ده مبلط خالص ، يعنى مش ناوى يعتقكم  
أهدا .
- محمود : قلت لك يا خال ، النهارده باين من أوله ، يا الله وحياة أبوك بنا  
نزوغ من الشباك ، أنا حلمت الليله اللي فاتت حلم وحش قوى .  
( يتجه إلى الشباك ويهم بإخراج ساقه ولكنه يتراجع ) .
- محمود : يا وعدى ، الظاهر انها طبلت من كل ناحيه .

- سيد : إيه ؟ فيه إيه ؟ .
- محمود : الطريق مقفول .
- سيد : يعنى إيه مقفول ؟
- محمود : يعنى الست بييه ، بسلامتها واقفه فى البلكوند اللى تسبص على  
المواسير ، يعنى حاتكشفتنا ، على كده مش حانقدر ننزل .
- سيد : وبعدين ؟!
- محمود : ( يتقدم مرة أخرى إلى الشباك ) على العموم أنا حانزل ، ميت بييه  
ولا واحد ام عبده ، يعنى حاتعمللى إيه ؟
- سيد : ( يمسك به ) مش ممكن .. ما يصحش نتفضح قدامها .. ما  
يكنش اخليك تنزل ابدا .
- محمود : ياسيدى انت مالك ، أنا ما يهمنىش .. أنا حانزل وحدى ، خليك  
انت ، ما دام مكسوف من الست بييه ( يتقدم إلى الشباك ثم  
يتراجع ثانية فى يأس ) خلاص ، اتفقلت من كل ناحيه .
- سيد : فى إيه تانى ؟!
- محمود : نوح افندى واقف فى الشباك اللى قصادها ، وعم على واقف فى  
الشارع بعريية الفول والبليله السخنه ، يعنى عاملين علينا حركة  
كاشه ، حصار من جميع الجهات . خلاص . رحى بلاش ( يجلس  
فى يأس ) .
- سيد : ( لقرقر ) وأخينا دالسه برضه قاعد بره ؟!
- قرقر : ( ينظر من الثقب ) دا مصمم ، ما فيش فايده .  
( يسمع صوت أقدام .. تظهر عديلة فى السطوح ) .
- سيد : ودامين تانى ؟!
- قرقر : عديلة ، لو اعرف انده لما يمكن تسرب لنا اللوح اللى مبلط على  
الباب ده ، بس حانده لها ازاي ؟! اهى دى اللى تقدر تنقلنا ، يا  
نهار اسود دى راحة الأوده التانيه ، استنوا شويه اما نشوف إيه

اللى حيا يحصل .

( تصحه عديلة إلى باب حجرة الشيخ عجائب وتطرق الباب ) .

الشيخ عجائب : ( من الداخلى ) مين ؟

عديلة : أنا عديله .

أم عبده : عايزه إيه يا عديله ؟

عديله : الباميه حيا نعملها بالسلق ولا بالقوطة .

الشيخ عجائب : انا احبها بالسلق .

أم عبده : استنى انا جايه لك .

( تخرج أم عبده وقد علقت على صدرها حجابا ووراءها الشيخ

عجائب ) .

الشيخ عجائب : الحجاب ده ، ما تقلعش أبدا ، انا بقالى ثلاث تيام با عمل فيه ،

وان شاء الله النهارده حيا نشوف حكاية العمل ، لازم أطلعاه بإذن

الله . بس انا عايز آخذ حته من أترك . اتفضللى جوه شويه .

( يعود الاثنان إلى الحجرة ) .

قرقر : ( يصف ما يراه ) أم عبده على الباب .. الشيخ عجائب وراها .

الشيخ عجائب دخل الأوده . أم عبده دخلت وراه . عديله واقفه

بتقصع .. اللوح قاعد زى ما هو ، ما بيتعتش ، أم عبده

خرجت ، الشيخ هباب خرج .

## المشهد السابع

( أم عبده تخرج ووراءها الشيخ عجائب ) .

الشيخ عجائب : ودلوقت وحياة أبو كى يا ست أم عبده ابعتى لى الفطار .

أم عبده : عنيه يا سيدنا الشيخ ، عنيه .

الشيخ عجائب : بس امبارح كان شويه وانت عارفه ان انا طول الليل سهران

وتعبان .

قرقر : ( من الداخِل ) قوى ، الله يكون في عونك .  
الشيخ عجائب : وعائزك تبعنى لى أد ست بيضات مقلين واذا كانت عندك حنة  
قشطه على شوية غسل نخل ، يقى كويس ، بلاش القول لأنه  
يعملى عسر هضم ، إذا كان تقدرى تبعنى لى رطل بسبوسه علشان  
احللى بيه ما فيش مانع ، أصل ما حبش اتقل كده .. طلبات  
حفيفه .

أم عبده : من عنيه يا سيدنا الشيخ .  
الشيخ عجائب : وحكاية الأوده اللى قلت عليها ؟  
أم عبده : دلوقت حالا .. هات الحاجه بتاعتك كلها وانتقل فيها دلوقت ،  
دول جماعه نصاين .. حراميه .. أنا حاعرف اوربهم ازاي .  
( يدخل الشيخ عجائب لإحضار ملابسه وصندوقه ومعداته  
وتتجه أم عبده إلى باب الغرفة ) .

قرقر : يا تهار اسود .. استندونى .. خلاص .

عمود : حا تعمل إيه دلوقت ؟ قول قوام .

سيد : أنا عارف .

( يجلس الثلاثة فى يأس .. أم عبده ترى الشيخ زين ) .

أم عبده : وانت مين ؟

الشيخ زين : أنا الشيخ زين .

أم عبده : وعائز إيه ؟

الشيخ زين : عائز الجماعه اللى هنا .

أم عبده : ما يبجوش .

الشيخ زين : حاستناهم .

أم عبده : مش حا يبجوا أبدا .

الشيخ زين : برضه حاستناهم .



- أم عبده : خليك مستنى ( إلى عديله ) بت يا عديله .. انزلى قولى للأسطى  
أحمد النجار يبجى يكسر لنا الباب ده .
- عديلة : حاضر يا ست .  
( الشيخ عجائب يحول مهماته أمام الباب ) .
- محمود : يا جماعه لازم نشوف لنا حل .. احنا حافضل قاعدين كده ..  
لازم نستخبي فى حتة .
- سيد : ما فيش فايده ، دى حاتخش تدعيس هنا وهنا وحا نتكشف لو  
استخينا فى أى حتة .. ومش حايونبنا غير الكسفه .
- فرقر : ( ينظر إلى الشوالات الفارغة ) اسمعوا يا جماعه أنا عندى فكره  
كويسه .
- محمود : إيه هى ؟
- فرقر : كل واحد منكم يدخل فى شوال واربط عليه واركنه جنب بقية  
الشوالات .. ومش معقول أبدا حد حافكر فى فتح الشوالادى .
- سيد : بقى معقول اننا نتحبس فى الشوالات ؟
- فرقر : مش معقول إيه ؟! خمس دقائق لغاية ما تنزل ام عبده .. وبعدين  
اسرب لكم الشيخ عجائب .. وتزوغوا بعد كده .
- سيد : لكن بس .. حكاية اللشوله دى ! .
- فرقر : ما فيش حل غير كده .
- سيد : أنا كان عندى انزل احسن على المواسير .
- محمود : ما خلاص حكاية المواسير دى ما فيهاش فايده كل الطرق مقفله ..  
الظاهر ان حكاية الشوالات دى ما فيش منها مفر .. هى الطريق  
الوحيد لإنقاذ ما يمكن إنقاذه .
- سيد : يا ناس .. كل ده علشان تلاته اربعة جتبه ، تلاته اربعة جتبه نسد  
بيهم بق الوليه ، وتخلينا بقيمتنا بدل البهدله فى الشوالات .
- محمود : طب ما نخط العفش ورا الباب زى ما كنا حاطينه ؟!
- فرقر : ما فيش فايده دى بعنت تجيب النجار ومصممه على الاستيلاء على

- الأوده .. ولو أدى الأمر انها تخلع الباب .
- محمود : طب وانت حاتعمل ايه ؟!
- قرقر : ولا حاجه حاعمل نفسى بردت بالليل من أودة الفراخ ولقيت باب الأوده مفتوح فدخلت وسكيتته ونمت .
- ( تحضر عديله ومعها النجار الذى يبدأ فى كسر الباب ) .
- قرقر : يا الله يا جماعه .
- ( يدخل كل منهما فى شوال ويربط عليه ، ويضعهما بجوار بقية الشوالات ، ثم يرتقى على الفراش ويغط فى النوم ) .
- أم عبده : ( تدخل فترى قرقر على الفراش ) . يوه .. ودإيه دا كان ؟!
- عديلة : دا قرقر يا ستى .
- أم عبده : بينلك يا قرقر .. إيه اللي جابك هنا ؟ دا انا دخت عليه ، ولسه نائم لغاية دلوقت .. قوم فر .. قامت قيامتك وانتصب ميزانك .. متمطع قوى على السرير تقولشى فى بيت ابوك .
- قرقر : ( يقف ويفرك عينيه ) .. هو إيه ده ؟! يعنى انا كفرت ؟!
- أم عبده : أخرج يا الله ، فضى الأوده لسيدنا الشيخ .
- قرقر : طب والناس اللي ساكنين فيها ؟
- أم عبده : دول نصابين .
- قرقر : والعفش بتاعهم ؟
- أم عبده : أنا احجز عليه لغاية ما يدفعوا الفلوس ، حانزلوا عندى فى الشقه ، إذا ما دفعوش .. حايبعه .. أما اشوف يا أنا ياهما .
- قرقر : تنزليه فى الشقه ؟! مش ممكن .
- أم عبده : مش ممكن ليه يا عمر .. حايستعصى ؟!
- قرقر : لا بس مش شايف انه يستاهل .. كله شوية كراكيب على كام شوال .
- أم عبده : أحسن من عنيبم .. اللي بيجى منه أحسن منه . أنا ما يتكلش حقى أبدا .

- فرقر : بس طولى بالك .. ما تبقيش كده يا ست طبعك حامى .. كل حاجه بالدوق كويسه .
- أم عبده : ذوق !؟ سلامات يا ذوق .. هما فاكرين إيه . فاكرينها تكيه .. فاكرينها أردغانه .. فاكرينها شفت .. فاكرينها نهب .. أنا لازم أفرجهم .. لازم ادوخهم زى مادوخونى . لازم افضحهم ق الحى كله وافرج عليهم اللى يسوى واللى ما يسواش .
- فرقر : يا ست ما فيش لزوم . دول ناس طيبين وطول عمرهم ما حدش سمع لهم حس ولا خبز .
- أم عبده : اخرس انت .. ما حدش عمالك محامى . نخش يا سيدنا الشيخ ، ( إلى عديله ) وانت يا بت يا عديله نخشى حولى العفش ده مع فرقر ونزلوه تحت ( فرقر وعديله يحملان الشوال الذى به سيد ) .
- عديلة : هوا ماله تقيل كده ؟ حاطين فيه زلط ؟
- فرقر : شيلى من سكات .. بلاش غلبه .. لازم تنسجى من لسانك . حاطين زلط حاطين زفت احنا مالنا .
- ( فرقر وهو خارج ينظر فيجد الشيخ زين ما زال جالسا فينظر إليه فى تهكم وغيظ ) .
- فرقر : وانت يا أحنينا .. مستنى إيه ؟
- زين : مستنى الجماعه .
- فرقر : جماعه !؟ جماعة مين ، قوم ، قوم ، ما فيش لزوم .. الجماعه خلصوا خلاص .. الجماعة بقوا عفش .. والعفش انشال .
- زين : يعنى إيه !؟ عزلوا ؟
- فرقر : بيعزلوا دلوقت ، ما شيين قدامك اهم .
- زين : طب واروح لهم فين !؟
- فرقر : ما فيش فايده . ما فيش داعى تروج لهم أبدا . مش حاتعرف تاخذ منهم لا حق ولا باطل .. دول ما حيلتهمش اللضا . مش حايدوك ولا ملين .

زين : ما حيلتهومش اللضا ؟ هو انا جاي اشحت ؟ هو انا محتاج ؟ . وهو انا عايز منهم حاجه ، أنا جايب لهم قرشين من البلد ، معايا عشرين جنيه عايز اديهم لهم .

قرقر : ( يتوك الشوال يسقط من يده من فرط الدهول ) يابن القديمه !! معاك إيه ، عشرين جنيه ؟! الله يخرب بيتك بحق جاه النبي .. وقاعد المده دى كلها ما بتقولش حاجه ؟! طيب هات الفلوس ، هات ، إيدك .

زين : أجييب الفلوس ؟ ليه أهيل ؟ .. عبيط ؟ .. أديك الفلوس ازاي ما يمكنش ، لازم أسلمهم لهم يدا بيد . وبعد فحص وبحث وتمحيص وتدقيق وإثبات الشخصية والذي منه .

قرقر : ما فيش لزوم لحكاية الفحص والبحث دلوقت .. اديني الفلوس الله يسترلك وبعدين ابقى افحص وابحث زى ما انت عايز .

زين : ازاي ؟!

قرقر : لأن الفحص والبحث مش ممكن دلوقت .. لو بحثت عنهم دلوقت حا تلاقهم هما والرز والفاصوليا والبقول المدشوش واحد . هات الفلوس تكسب فيهم ثواب .

زين : أنا اديك الفلوس ؟ ليه ؟ اتبيلت ؟ اتخبطت في نافوخي . عايز تضحك عليه . فاكرني غشيم .. يا ضلالى يا نصاب .. يا محتال .. يا حرامى .. أديك الفلوس علشان تضرب عليهم عسواف .. فاكرني هفيه ، دا انا اوديك البحر وأجيبك عطشان .. دا انا اوديك في داهيه .

قرقر : وعلى إيه ما فيش داعى ، أنا مالى ، خليهم هم اللي يروحوا في داهيه . أنا عملت اللي على وهم سامعين وشاهدين . شيلى يا بت يا عديله شيلى ، الحكايه مش باينه حا تنتهى على خير أبدا ، شيلى ، خليتنا نخلص شيلى ، السلام عليكم .

## الفصل الثالث

صالة الجلوس والأكل فى شقة أم عبده ، على اليمين باب يودى إلى السلم ، وعلى اليسار باب يودى إلى داخل الشقة ، وفى الواجهة نافذة مسمرة بقطعة من الخشب حتى لا يمكن فتحها ، وفى الركن الأيمن البعيد أثاث سيد ومحمود الذى أنزل من غرفتهما وبعض الشوالات وبينها الشوالان اللذان وضعا بهما ، وفى الركن الأيسر البعيد أريكة عليها عود وأمامها قانون ، وفى المنتصف منضدة عليها ورق ، وبالحجرة فوتيلات وبعض مقاعد متفرقة ودولاب للصينى والزجاج والطعام الجاف أشبه بنملىة ، وفى الركن اليمين القريب منضدة صغيرة عليها جراموفون وأسطوانات ، وفى الركن اليسار القريب راديو على منضدة صغيرة أخرى .

## المشهد الأول

أم عبده : بس .. خليليم محطوطين كده لغاية ما يدفعوا الأربعة جنيه اللى عليهم .. إذا ما جوش بعد جمعه ، حايعهم لبتاع الروبايكيا .. زى ما يحبوا .. ان شا الله يجيبوا تلاته أبيض ، أحسن من حبابى عنيم ، الضلاله النصاين .

ببية : ليه بس يا نينه .. هم عملوا حاجه ؟

أم عبده : عملهم اسود ومطين على دماغهم ، مش كفايه مدوخينى على الأجره بقالهم أربع تشهر ، عايزاهم يعملوا أكثر من كده إيه ، يسرقونا ، ينهبونا ، يدبحونا ويشربوا دمنا .

- بهيبة : يا نينه الحكايه مش مستاهله دا كله ، يمكن مزنوقين ، يمكن  
معدورين .
- أم عبده : المعذور ما يسكنش في بيوت الناس .. ويدوخهم على الأجره .
- بهيبة : أمال يعني يعملوا إيه ، يناموا على الرصيف ؟
- قرقر : أيوه حقيقي .. يناموا فين ؟
- أم عبده : اتسد انت ، ما تتحشرش في اللي ما لكش فيه ، خلاص انتينا ..  
مش حا يعتبروا الأوده يعني مش حا يعتبروها .. مفهوم .. رجليهم  
مش حا تمتد فيها .
- قرقر : مفهوم قوى .. هم يقدرنا يمدوا إيدهم لما حا يمدوا رجليهم .
- عديلة : ما يمدوش ليه ، دول يمدوا إيديهم ورجليهم ، أمال بيتشعبطوا  
ازاي .
- أم عبده : بيتشعبطوا ؟
- قرقر : قصدها بيتشعبطوا على الترمای ، ما تاخذيش على كلامها يا ست ،  
هي وراها إيه غير الملوسه ، روحى اقلى البيض للشيخ عجائب ،  
خلى الراجل يشوف شغله .
- أم عبده : أيوه حقيقي ، مستنيه إيه ، أنا مش قتللك تحضرى له الفطار ، هوا  
انت كل حاجة تقفى تطقسى عليها وتحشرى نفسك فيها .. فوقى  
انجرى اقلى البيض وحضرى طبق العسل والقشطه ، يا الله قوام احنا  
ورانا حاجات كثير ، أديكى شايفه ، البيت يضرب ويقلب .
- قرقر : ( شامتا ) أهو كده ، أمال إيه ، الحكاية لعب .
- بهيبة : ( تنظر إلى العفش وتتهله ) بس انا صعبانين على الجماعه دول .
- أم عبده : ما يصعبش عليكى غالى .. فوقى يا الله انتى كمان شوقى شغلك ،  
إحنا ما وراناش فضا ، شوقى المقلوب ابو كى قام والالاً ؟ .
- بهيبة : قام ونام تانى .
- أم عبده : قام ليه ؟ .. ونام تانى ليه ؟! إلهى تعدلها له .

- بهيبة : قام علشان يشرب .  
أم عبده : يشرب إيه ؟!
- بهيبة : أنا عارفه بقى ، يشرب م القزازة اللي حاططها جنب السرير .  
أم عبده : طبعا ، هوا وراه إيه غير كده . وراه إيه غير اليبصبه والشرب ، لكن معلش مسيرى امشيه على العجين ما يلخبطوش ، مسيرى ادشدش القزازة اللي هو مخبها لى تحت السرير .  
( تبدو حركة من أحد الشوالات فيلاحظها قرقر ويبدو عليه الاضطراب ويتحنج بصوت عال ) .
- أم عبده : إيه أصله ده ؟! إيه اللي جراك ؟!  
قرقر : أصلى ، أصلى شرقت ، حكاية القزازة اللي حاطت شدش دى شرقتى .
- أم عبده : وانت مالك ، إيش حشرك .  
قرقر : أبدا ما فيش حاجه ( تعود الحركة ويعود إلى التحنج ) ما بلاش يا ستى حكاية دشدشة القزازة ، لحسن باين عليها مزعلاه خالص .
- أم عبده : مزعله مين ؟!  
قرقر : مزعله سيدى ، سيدى نوح افندى .
- أم عبده : وانت مالك اتته يا بارد .. إيه دخلك .. اشتكالك ؟!  
قرقر : أنا مالى .. أنا قلبى على القزازة الفاضيه .. خساره تدشدش وتروح هدر ، نبيعها احنا لبتاع الروبايكيا نستفيد بتمنها احسن .
- أم عبده : بقى كده ؟! القزازة الفاضيه بس هى اللي مزعلاك ، طب فوت يا الله شوف شغلك ، هات لى السبرتو وكنكة القهوة والبن .  
( تهيم بالجلوس فيبدو القلق على وجه قرقر ) .
- قرقر : ما تفضلى يا ستى تعملها فى المطبخ علشان ننظف هنا ، بعدين التراب يطلع عليكى .
- أم عبده : مالکش دعوه .. فوت اعمل زى ما بقول لك .

( تجلس على الكنبه ) .

- قرقر : يا ست انا حاشيل الثلث والبياضات .  
أم عبده : أكنس الأرض قبله .  
قرقر : أصل الأرض لسه عايزه غلبه كثير ..  
( يسمع صوت نوح افندى ينادى بيه ) .  
نوح : بيه .. بيه .  
بيهة : أيوه يا بابا ( تخرج ) .  
قرقر : قوعى يا ستى شوفيه .. صبحى عليه ، يمكن يكون عايز حاجه .  
أم عبده : أصبح عليه ، الله لا يصبحه ولا يربحه .  
قرقر : يعنى حا تسيه كده لغاية ما يبص من بلكونه ولا شباك ، تقع عنيه على واحده من الجيران .  
أم عبده : ( تقفز من مكانها كمن لدغتها عقرب ) تقع عنيه ؟ ياخى جه قلع عنيه ، ما يوعى يبص بيها لا يمين ولا شمال ، ما انا عارفاه ، راجل دنى ورمرام ، والنبي لانا مستكراله بقيت الشبايك والبلكونات ، أما اشوف حا يبص منين ، هو خلا حد فى الحته ما يصلوش ، دا قاضحنى فى وسط الجيران .  
( تخرج أم عبده .. يتبعها قرقر حتى الباب ) .  
قرقر : الله يكون فى عونك يا ست ، خدى بالك منه كويس ، امسكيه جامد . سنكرى الشبايك قوى .  
( قرقر يرد الباب وراءها .. ويعود وهو يفرك يديه فرحا ) .  
قرقر : بس ، ولا كلمه ، يا سلام على حداقتك يا واد يا قرقر ، يا اللى ما فيش منك فى الاربعناشر مديرية ، ( يقترب من الشوالات ويوجه إليها الحديث ) إيه رأيكم بقى ، مش برضه عرفت ازوحهم . أهو لو ما كانش ربنا الهمنى حكاية نوح افندى دى . ما كانتش عنكم حا تشوف النور أبدا ، كنت حا نخدوها تأييده جوه الشوالات .



لكن ربنا ستر ، أصل نيتكم كويسه ، دلوقت بقى ، فين سيد  
افندى ، وفين سى محمود . أظن ده سى محمود . ( يحدث  
الشوال ) كنت متأثر أوى على قزايز الويسكى وعمال ترفص  
كنت حا تودينا فى داهيه . اتفضل ( يفتح الشوال فيخرج منه  
راس سيد افندى ) الله هو انت سيد افندى ، أمال كنت بتقلب  
قوى ساعة ماجت سيرة الويسكى ليه ؟ .

سيد : ويسكى ليه يا سى قرقر ، أنا كنت با اهرش ، معرفش فيه ليه فى  
الشوال بيقرصنى .

قرقر : طب مش وقته اطلع قوام . لما اسيب سى محمود راخر .  
( يهم بالذهاب إلى محمود ، ويهم سيد بالخروج عندما يسمع  
صوت بهية مقبلة ) .

بهية : حاضر يا نينه ، حاضر ، انا حا قطفها .  
قرقر : يا نهار اسود . خش يا سيد افندى خش ، خش احسن ست بهيه  
جايه ، ( يربط عليه ) ما تتقلبش بقى لحسن تودينا فى شربة ميه ،  
ابقى استحمل القرص .

( تدخل بهيه متقدمة إلى قرقر الذى يقف بينها وبين الشوالات  
وقد تناول مكنسة كانت مستدة على الحائط ) .

بهية : ( فى عجلة وهفة ) اسمع يا قرقر . انا عايزاك فى حاجه ضرورى .  
قرقر : ( فى قلق ) حاجه ضرورى ؟ . طيب بس اما اخلص الصاله دى ،  
عن اذنتك شويه لحسن العفار يطلع عليكى ( ويأخذ فى الكنس ) .

بهية : يا أخى استنى شويه ، الدنيا ما طارتش على الكنس .  
قرقر : ما طارتش على الكنس ؟! لكن حا تطير على ابن الهرمه اللي فوق ،  
دلوقت حالا يرقع بالصوت ، عايز الفطار ، وبعدين عايز الجدى  
الاحول والفرخه الزعلاته ، والقله ، والكفته والكباب والسّم اللي  
بيهرى مصارينه ، كل دا دلوقت يطلبه ، وانا لازم اخلص من الأوده

- واللى فى الأوده . مش معقول أبدا أسيها وامشى .. دى تبقى مصيبه .
- بهية : هو إيه أصله ده . انت اتجننت ؟ اسمع الكلام اللى حا قولك ده من سكات .
- قرقر : سمعت . اتفضلى .
- بهية : الجماعه راحوا فىن ؟ .
- قرقر : أنهى جماعه ؟ .
- بهية : سيد افندى وسى محمود .
- قرقر : وأنا إيش عرفنى .
- بهية : انت مش كنت فى الأوده معاهم ؟ .
- قرقر : لا ، لا يا ست بيه ما تلخبطيش فى الكلام لحسن الست ام عبده تسمعك تودينى فى داهيه .
- بهية : توديك فى داهيه ازاي . انت مش كنت فى الأوده قدامها ؟
- قرقر : كنت فى الأوده أيوه ، لكن معاهم لأ .
- بهية : ازاي ؟! إذا كانوا هم كانوا فى الأوده ، تبقى ما كتش معاهم ازاي ؟ .
- قرقر : وايش عرفك بقى انهم كانوا فى الأوده ؟
- بهية : وايش عرفنى ؟ أصل . أصل ...
- قرقر : أصل إيه ؟!
- بهية : أمال يعنى حا يياتوا فىن الا فى الأوده ، ما هم لازم يكونوا فى الأوده .
- قرقر : يعنى استنتاج كده ؟
- بهية : أيوه .
- قرقر : اذا كان كده تبقى غلطانه ما كانوا فى الأوده .
- بهية : بقول لك كانوا فى الأوده يعنى كانوا فى الأوده ، أنا متأكده

- خالص .
- فرقر : متأكده منين بس . إذا كنت انا نايم في الأوده لوحدى طول الليل .
- بهية : كذاب . أنا شفتهم بعيني ، شفتهم في الأوده وانت ما كتش فيها .
- فرقر : يا نهار اسود . شفتهم بعينك ؟ .
- بهية : أيوه شفتهم . وعائزه اطمئن عليهم ، راحوا فين ؟ جراهم ايه ؟ .
- فرقر : راحوا فين ؟ . إيش عرفنى !! هم لازم ، خرجوا يشطحوا زى عوايدهم .
- بهية : مش ممكن .
- فرقر : ليه بس يا ست بهيه ؟ مش ممكن ليه ؟ ! ليه عدم إمكانيتها ؟ .
- بهية : لأن سى محمود كان راقد ، كان عيان خالص .
- فرقر : محمود ايه ؟ . راقد .. عيان . لا . دى انت بقى اللى ما عندكيش فكره عن الموضوع خالص .
- بهية : إزاي ؟ .
- فرقر : لأن محمود صحيح اربعة وعشرين قيراط ، صحته زى البمب .
- بهية : بمب ازاي ، إذا كنت انا شايفاه بعيني دى ، راقد وتعبان . ويقول آه .
- فرقر : آه !؟ .
- بهية : أيوه .
- فرقر : يمكن .. قادر ربنا يعيه ويعى أبوه ، لكن على العموم اطمئني قوى ربنا خد بيده خالص ، آخر لحظه شفته فيها ما كانش يقول آه .
- بهية : ازاي بس ادا كان عيان قوى ، ياترى راح فين ؟ وحايه قد فين ؟
- فرقر : اسمع يا فرقر ، أنا عايزاك تسبب الأوده دلوقت وتخطف رجلك تسأل عليهم ، تشوفهم راحوا فين ، وجم منين .
- فرقر : أسبب الأوده .
- بهية : أيوه .

( أم رتيبة )

- قرفر : ما يمكنش ، دا انا قليل الأوده ، ما سيهش أبداشم .. حكاية السؤال عنهم دى .. مش عايزه لا خطف رجل ، ولا سيان أوده .. اسمعى يا ست بيه .. إنتى يهملك أمرهم قوى ؟ .
- بهيبة : أوى وبس .. أوى خالص .
- قرفر : يعنى تخافى عليهم ، وتخبى مصلحتهم ؟ .
- بهيبة : طبعا .
- قرفر : والله انك أميره وبنت حلال ، طيب حيث كده .. انا حا اقول لك على الحقيقه .. يمكن تقدرى تساعدنى .
- بهيبة : بس قبل كل حاجه انا عايزاك تسأل عنهم .. تشوفهم راحم فين وجم منين .
- قرفر : حاضر .. من عنيه .. اطمنى .. هم لا راحم ولا جم .
- بهيبة : يعنى مستخيين فوق ؟ .
- قرفر : لا .. مستخيين تحت .. ومن جهة السؤال حاسأل لك حالا عليهم ( يتجه إلى أحد الشوالات ويريت عليه ) ازيك يا سيد افتدى .
- سيد : ( من داخل الشوالات ) زى الزفت البتاعه لسه نازله فيه قرص .
- قرفر : معلش .. تقدر تهرش شويه .. ما فيش حد غريب هنا .. ( يريت على الشوالات الآخر ) وانت ازيك يا سى محمود .. لسه بتقول آه ؟ .
- محمود : ( من داخل الشوالات ) آه .
- قرفر : ليه بقى .. ما انا حطك فى الشوالات سليم اربعه وعشرين قيراط لا بيك ولا عليك .. ليه اللى بيخليك تقول آه دلوقت ؟ .
- محمود : الجوع .. جعان قوى .. حتة الجبنة الرومى اللى كنت شايلها من امبارح .. لقيت الفيران واكله ثلاث ارباعها .
- قرفر : والربع الباقي ؟ .
- محمود : نصه واكله الصراصير والربع واكله الثمل . الظاهر كان عندهم

- عزومة حشرات .. آه .
- فرقر : طب بس ما تزعقش كده .. لحسن الست ام عبده تسمعك  
اصبر شويه انا حا افتح لك دلوقت .. اصل ست بيه عرفت  
خلاص .. بقت مننا وعلينا .
- بيهة : ( فى ذهول ) إيه ده ؟ إيه اللي عملته فيهم ، ازاي ترميهم الرمي  
دى ؟ .
- فرقر : آل إيه اللي رماك على المر ، قلت له اللي أمر منه .. قال إيه اللي رماك فى  
الشوال ، قلت خوفى لاقع فى إيد ام عبده.عرفتى بقى يا ست بيه ،  
ما كانش فيه وسيله للهروب من فتك الست والدتك غير الحكايه  
دى ، وأظن دلوقت ما فيش داعى نضيع وقت فى الأخذ والعطا ..  
المهم انا نفرج عنهم ونخليهم يطيروا قبل ما تيجى ست ام عبده  
وتقفشهم .
- بيهة : طب وبعدين حا يروحوا فين ، ويناموا فين ؟ .
- فرقر : يا ستى يحلها الحلال .. المهم دلوقت ان احنا نطلق سراحهم ..  
نخرجهم يره اللشوله .. نخليهم ياخذوا نفسهم ، نخليهم يشموا  
النسمه .
- بيهة : طب ومحمود ؟ .
- فرقر : ماله محمود ؟ .
- بيهة : مش يقول لك انه جعان .. حانسيه كده جعان ؟ .
- محمود : ( من داخل الشوال ) أيوه جعان .. جعان قوى واقع من  
الجوع .
- فرقر : يا جدع أسكت انت الله لا يسيثك .. لحسن أم عبده  
تسمعك .. ابقى شوف لك اى حاجه يره ، انشأ الله حتى لقمه  
بجبنه .. المهم بس انكم تخرجوا .  
( بهم بفتح الشوال عندما يسمع صوت نوح الفدى قادما ) .

## المشهد الثاني

- نوح : ( من الخارج ) دى ما بقتش عيشه .. دى بقت جهنم الحمرا ..  
واديا قرقر .. قرقر .
- قرقر : لا .. الظاهر ان اليوم ده مش حايتم على خير أبدا .. ما فيش  
فايده .. بايتكم حاتغدوها تأييده .. أصل لو نوح افندى اتروستا في  
الأوده دى .. ما حدش حا يعرف يطلعه منها ولا بالطبل البلىدى ..  
الحقيه يا ست بيه .. حوشيه شويه لغاية ما اخرجهم .
- ( تمهم بيبة بالخروج عند ما يدخل نوح مرتديا الجلباب ، وقد  
أمسك زجاجة ويسكى في يده وارتمى فردة حذاء ، وأمسك  
بيده الفردة الأخرى ) .
- نوح : ما بتردش ليه يا قرقر الكلب ؟ .
- قرقر : ( في يأس ) نعم يا سيدى .. أفندم .
- نوح : فين فردة الشراب الشيبكه ابو نقره واحده ؟ .
- قرقر : آمال إيه اللي في إيدك دى ؟ .
- نوح : دى بنقرتين .. واحده عند الصباغ وواحده في الكعب ، لكن انا  
فاكر ان التانيه كانت بنقره واحده عند الصباغ ، تبقى راحت  
فين .
- قرقر : تبقى برضه هي اللي في إيدك .. بس ريتا أنعم عليها بنقره زياده ،  
وبكره كان تبقى بتلاته وأربعه .
- نوح : طب بلاش الشيبكه ، هات لي ابو حربه .. أنا آخر مره قلعته كان  
بحربه واحده ، دلوقت حلاقه بحريتين والايه ؟ .
- قرقر : وافرض انك لقيته بحريتين ، تزعل ليه ؟! أهه زياده في التسليح ..  
حد لاقى .

- نوح : طيب زى بعضه .. حربه حربتين .. هاته والسلام .
- بيهة : تعالى يا بابا .. أنا اجييلك اللي انت عايزه .. تعالى معايا ..
- نوح : لا .. مش جاي ، أنا مش عايز اشوف وش الوليه امك دى مره ثانيه أبدا .. أنا حا سيلها البيت .. أنا حافرجها .. أنا وهى والزمان طويل .
- بيهة : ليه بس يا بابا ؟ هى عملت حاجه .
- نوح : عملت حاجه ؟ كل اللي عاملاه فيه ده .. وما عملتش حاجه ؟ .
- عايزاها تعمل إيه أكثر من كده .. هى مخلياني عارف اتنفس .. حاشره نفسها فى كل شؤونى .. دا مش جواز ، دا أسر ، لكن معلش هانت ، فوت يا واد يا قرقر هات الشراب والبدله ( يجلس على الأريكة ) .
- قرقر : ( ينظر مترددا إلى بيه ) حضرتك حا تطلع هنا ؟ .
- نوح : أيوه .. إيه المانع .. هو انا حا قلع فى الشارع ؟ .
- بيهة : طب ما تفضل فى أودتك يا بابا وانا اجيب لك اللي انت عايزه .
- نوح : أودتى ؟! هى بقت أوده ، دى بقت زناته ، انت عارفه عملت فيه إيه ؟ .
- بيهة : عملت ايه ؟ .
- نوح : أنا لسه بقول يا فتاح يا عليم لقيتها لك من غير مناسبه هاجمه زى الغول وفى إيدها الشكوش وشوية مسامير وهات يا دق فى باب اليلكونه والشباك .. قال إيه علشان ابطل البصبصه للجيران .. هوا انا لسه فتحت عيني ؟ . الوليه دى لازم اتجننت .. اتخيلت .. ومع كل هى البصبصه حرمت . طيب أدبنى خارج دلوقت .. اما اشوف حا تقدر تمنعنى من البصبصه ازاي ؟ .
- بيهة : طيب يا بابا قوم البس هناك وبعدين اخرج زى ما انت عايز .
- نوح : ( فى إصرار ) لا .. انا حلفت ما انا داخل الأوده لاجل خاطرها ..

فوت يا واد يا قرقر هات لى البدله والشراب ابو حربة ، وحمالة  
الشراب ، وهات علبة السجاير من فوق المكتب .. بس اوعى  
تلطش منها حاجه .

: ( تشير إلى قرقر أن يبقى مكانه ) خليك انت يا قرقر شوف شغللك  
أما أروح ادور انا على الحاجات اللي هوا عايزها .  
( تخرج بهية ) .

بهية

: ( وهو يدندن على العود ) وبعدين يا واد يا قرقر ، وأخرتها ؟ .

نوح

: ( وهو يكتس حوله مشيراً الغبار لمضايقته ) آخرتها فى إيه ؟ .

قرقر

: فى إيه ؟ فى ستك أم عبده .. هوا ربنا مش حا يتوب علينا منها ..  
ده مش عدل أبدا .. دانا أعرف واحدا قتل قتيل خد فيه عشرين سنة  
سجن ، واليومين دول طلعم السجن ، بقى حر .. يعمل زى ما  
هو عايز ، يبصص للجيران زى ما هو عايز .. ويروح البيت وقت  
ما هو عايز ، ويشرب ويسكى زى ما هو عايز ، ويغنى زى ما هو  
عايز ، وانا اللي ما قتلش ولا حاجه .. لغاية دلوقت فى السجن ،  
مش عارف اتفلفص .. تقدر تقوللى بقى ليه أفضل أنا ويخرج  
هو ؟ .

نوح

: لازم كان حسن السير والسلوك .

قرقر

: والله لو أعرف انى بقيت حسن السير والسلوك . ربنا يتوب على

نوح

منها .. لكنت صليت من بكرة لكن انا عارف ما فيش فايده ..  
يبقى لا انبساط ولا حربه ؟ .

: معلش ياسى نوح .. استحمل ، أدحنا كلنا مستحملين .

قرقر

: انا كنت زمان با استحملها .. لكن دلوقت ما بقتش تنطاق أبدا ..  
فى حد فى الدنيا يستكر الشبايك كلها كده زى ما هى عامله ؟!  
هوا دا بقى بيت يتسكن . والنضافه اللي هى طالعالى فيها دى ..  
اقوم من النوم افتح عينى على طاخ .. طاخ .. يتبأ لى ان التنظيم بيهد

نوح



البيت وبعدين الاقيها بتنفض الشبايك . ما يحيكش مسح السلام  
إلا الساعة اتنين وانا جاي .. علشان مية المسح كلها تنزل على  
نفوخي ، هوا انا عمري شفت البيت في حاله طبيعيه أبدا .. لازم  
السجاجيد فوق الكراسي ، والكراسي فوق التراييزات ،  
والتراييزات جنب الحيط والأرض مبليطه ، تزحلق بلد بحالها ، ده  
بيت يتقعد فيه ده .. انا اقدر اقعد قاعده هاديه .. أشرب لي فيها  
كاسين ولا اتتن لي تقسيمتين .

- قرقر : هوا انت، يعنى بتقعد يا سى نوح افندى ؟ .  
نوح : أقعد فين .. هوا فيه حته يتقعد فيها ، دى حاجه تخلى الواحد يهيج ،  
وآخر المتمة .. الشيخ اللى جايبهولى فوق السطوح .. تقدر تقوللى  
جايباه ليه ؟ .  
قرقر : علشان يطلع العمل .  
نوح : عمل !؟ يعنى إيه العمل ؟ .  
قرقر : أصل فيه ناس قالوا لها ان الحاله اللى انت فيها نتيجته عمل اتعمل لك .  
نوح : حاله إيه اللى انا فيها ؟ .  
قرقر : ولا مؤاخذه .. البصبصه والعربده ، وفروغية العين ، والشرب  
والمهيصه والهيجان بره البيت ، وال  
نوح : مفهوم .. مفهوم .. ماله ده كله ؟ .  
قرقر : كله ده صايك .. علشان حد متعاط منها فعمل لك عمل علشان  
يطقشك منها .  
نوح : وبعدين ؟ .  
قرقر : ولا قبلين ، قالوا لها على الشيخ عجائب انه راجل مجرب واحجبه ما  
تنزلش الأرض .  
نوح : يعنى حا يعمل ايه ؟ .  
قرقر : حا يطلع العمل .. ويعمل شوية تعازيم واحجبه ..

- نوح : والنتيجه ؟ .  
قرقر : النتيجه انك تتلم ، وتبطل الشرب والسنكحه والبصيصه وتقعده في البيت .. وتحب ست ام عبده وما تبصش لغيرها .
- نوح : ( متزعجا ) يا مغيث .. يا حفيظ .. الراجل ابن اللغام اللى فوق ده حا يعمل فيه كده ؟ .  
قرقر : دا المفروض .
- نوح : دا انا اقتله ، ودى تبقى أنهى عيشه دى .. أنا اقعده في البيت ولا اشربش ولا اهيصش ، وما اعملش حاجه غير ان انا ابص لام عبده .. يا هوه .. الراجل المجرم ده عايز يعمل فيه كده ، وتفكر انه يقدر يعمل الحاجات دى يا قرقر ؟ .
- قرقر : مين يعرف .. أهو اذا ما كانش ده يقدر غيره حا يقدر .. هي معنى حا تسكت .. حا تسيك كده لغاية ما تطير من إيدها .. أهى حاتنها وراك كده .. لغاية ما تنسلك .
- نوح : قال الله ولا فالك يا شيخ .. على العموم الحمد لله ، اللى ربنا ألهمنى المشروع اللى انا ماشى فيه دلوقت هوا الوحيد اللى حا يتقننا من المصيه دى .
- قرقر : مشروع ؟ مشروع ايه ؟ .  
نوح : قرب .. قرب هنا .. ادبنى ودنك .. ( يقترب منه قرقر ) مشروع جمعيه سريره .
- قرقر : جمعيه سريره ؟ .. بتاعه ايه ؟ .. وعلشان ايه ؟ .. واسمها ايه ؟ .  
نوح : اسمها جمعيه قتل الزوجات .
- قرقر : يا ساتر .. مره واحده كده ؟ .  
نوح : أيوه ما فيش طريقه لإنقاذ العالم من السيطره النسائية ولإعطاء الرجل حريره غير كده .
- قرقر : ودى خلاص عملتها ؟ .

- نوح : امال ! دا انا ماشي فيها جد قوى .. انا لازم اجيب خبرها .
- فرقر : هي إيه دي ؟ .. لجمعيه ؟ .
- نوح : لا .. أم عبده .. لازم اقضى عليها هي وأمثالها ، قبل ما يضيعونا في شربة ميه ، أنا فكرت فيها من زمان ، وكل الشله اللي باقعد معاها وافقتني على المشروع ، وقالوا لي دي فكره هايله ، وكنت بادرس الموضوع شويه على مهلي ، لكن حكاية الشيخ عجائب واللي ناوي يعمل فيه خوفتني أوى ، المسألة دلوقت لازم نمشي فيها بجد ، دي مسألة حرب ، يا هم يلمونا في البيوت ، يا احتنا نجيب داغهم ، دا صراع على تقرير المصير ، انا اقعد في البيت ولا ابصش لغير أم عبده .. يا هوه .. يا جاه النبي .
- فرقر : على العموم ما فيش داعي للخوف كده .. الحكاياه مش مستعجله أوى .. والجماعه دول اللي زى الشيخ عجائب معظمهم نصايين ، يعنى هي أول مره تقيهم أهي بقالها سنين تترقى وتشبشب وتلبس في احجبه وتطلع في عمل ، علشان ربنا يتوب عليك وتهدي ، ما بتهديش ، هي تنتقل من شيخ لشيخ ، وانت تنتقل من واحده لواحده ، ما فيش حاجه بتحوق فيك أبدا ، لغاية ما رسيت على الشيخ عجائب وانت رسيت على زكية ولعه . أما نشوف مين اللي حا يغلب ، الشيخ عجائب والا الست ولعه ؟ .
- نوح : إيه يا واد ده انت اتمجنت ؟ وطى صوتك ، انت عايزها تسمعك تيجي تطلع على جنتنا البلي !! .
- فرقر : انت لسه بتخاف منها بعد الجمعيه اللي عملتها ؟ دا انت رئيس جمعيه قتل الزوجات على سن ورمح ؟ .
- نوح : قولتلك متزعقش ، دي جمعيه سرية ، لازم تفضل مستخبييه كده ، تعمل في الخفاء .. انت عمرك ما اشتركتش في جمعيه سرية أبدا ؟ !! .
- فرقر : أبدا ، لا سرية ولا علنيه .

- نوح : على العموم تقدر تشترك .
- قرقر : لكن انا مش متجوز ؟ .
- نوح : مش مهم ، الجمعيه حا تجوزك . وبعدين هى نفسها تتولى أمر تخليصك من مراتك .
- قرقر : وعلى إيه .. اما اتجوز ، يبقى يحلها ربنا .
- نوح : ما تضيعش الفرصة من إيدك ، واسمع نصيحتى اشترك من دلوقت أحسن لك ، دى أحسن طريقه لضمان حريرتك ولتأمين حياتك ، وللقضاء على ام عبده وأمثال ام عبده .
- ( يتحرك أحد الشوالات ويصدر الآخر صوت آه ) .
- قرقر : ( فى فرع ) يا نهار اسود وهو افيه حاجه حا تنجينا من ام عبده ؟ ! ولا ميت جمعيه سريره ، ولا انقلاب كامل ، ( تستمر الحركة ) اصبر شويه يا ويكا .
- نوح : أصبر اكر من اللى صيرته ، مش ممكن ، أنا لازم اقضى عليها خالص ، بس عايزين أعضاء ، عايزينها تكبر ، لازم تشترك ، فاهم .
- قرقر : حاضر حا اشترك ، بس عن إذتك شويه ، أنا عايز انفض الكنبه اللى انت قاعد عليها ، تسمح تفضل فى أودتك شويه .
- نوح : انت كان بتجيب سيرة التنفيض ، إخص ، إخص عليك ، يا خيبة أمل فىك ، خلاص مش حا تنفع أبدا معانا .
- قرقر : ليه بس ياسى نوح افندى ؟ .
- نوح : عايز تدخل الجمعيه وانت بتنفض ؟ عايز تبقى عضو ، وإيدك ملوثة بجريمة التنفيض ؟ .
- قرقر : وفيها إيه يعنى ؟ مش جمعيه قتل ؟ .
- نوح : أيوه قتل ، لكن مش تنفيض ، قتل بطرق شريفه نضيفه مش قتل بإثارة الغبار ، مش قتل بتحطيم الأعصاب ، دى من أول الحاجات

اللى بتنادى بيها الجمعية ، المطالبه بحرية الوساحة ، وحق الكركبه  
والفر كشه واللخبطه واللخفنه ، تقوم تيجى حضرتك وتقوللى قوم  
علشان انفض .. اتفو عليك .

فرقر : الله يسامحك ، طب بلاش التنفيض ، قوم عشان تفطر .

نوح : ماليش نفس ، انا حاخذ بقى م القزازه كفايه ( يشرب ) الله ..  
بالصحة والعافية .. بالهنا والشفا .

فرقر : قوم بقى يا سى نوح افندى الله لا يسيثك ، قوم الله يستر عرضك .

نوح : مش حا قوم خلاص انا عايز ادندن شويه عندى كيف للغنا ، ناولنى  
العود ، ناول .

فرقر : عود ؟ لا ، الظاهر انها حا تطبل على دماغنا ( يناوله العود ) مادام  
مسك العود يبقى مش حا يطلع من هنا أبدا .

نوح : تعرف تشتغل معايا على الرق ؟

فرقر : رق ؟ رق انت شويه ، وقوم .. قوم الله يجبر بخاطرك انا لاليه فى  
طيله ولا فى رق .. انت عايز ستى تيجى تلاقينى ماسك الرق  
تقطع عيشى ، انت يا سيدى بتقدر عليها ، لكن انا غلبان ، على قد  
حالى .

نوح : ( يبدأ فى ضرب العود والغناء ) يا سيدى زعلان ، يا روحى

زعلان ( قرقر يمد يده تحت الأريكة ويخرج منها لافتة يعلقها أمام  
نوح مكتوب عليها : « ممنوع الغناء بأمر أم عبده » فلا يكاد يراها  
حتى يصيه الدعر ويصمت ثم ينهض ويقلبها فيبدو عليها « ممنوع  
البصيصه بأمر أم عبده » فيتزعاها ويقذف بها تحت الأريكة ثم  
يعاود الغناء ) . يا سيدى زعلان .. يا روحى زعلان . ( يتحرك  
سيد ويتأوه محمود ) .

( قرقر يزداد ارتياكا ويقترّب من الشوالات ويربت عليها فى غفلة  
من نوح افندى ) .

- قرقر : ( للشوالات ) حاضر .. اصبر شويه .. دلوقت اجيب لك  
ساندوتش جينه ، بس لما أخرج الكاينه دى حالا ، ربنا يسهل .
- نوح : ( ملتفتا إلى قرقر ) انت بتعمل ايه عندك .. بتكلم مين ؟!
- قرقر : لا ما فيش حاجه .. دانا بس بدندن .
- نوح : بدندن ؟! انت جنسك إيه .. حيوان .. تدندن وانا با اغنى ..  
انت ما عندكش إحساس .. انت جماد .. لما انا اغنى يبقى لازم  
الدنيا كلها تسمع .. وياه اللشوله اللى عندك دى .. إيه دا كله ؟!
- قرقر : دا عفش الجماعة اللى كانوا ساكتين فوق السطوح .
- نوح : وياه اللى جابه هنا ؟.
- قرقر : ست أم عبده نزلته .
- نوح : علشان إيه ؟.
- قرقر : حاتبعه .
- نوح : تبعه ؟ .. واصحابه راحوا فين ؟.
- قرقر : طردتهم .
- نوح : كده على طول .. وليه تطردهم ؟.
- قرقر : علشان تسكن الشيخ عجائب .
- نوح : أما وليه دون .. تطرد الناس الطيبين الأمرا علشان تقعد الراجل  
النصاب المحتال .. طب وحا تبع عفشهم ليه ؟.
- قرقر : علشان تاخذ أجرة الأوده من تمنه .
- نوح : إخص على السفاله والإجرام .. تبع عفش الناس علشان تاخذ  
الأجره .. لا .. أنا ما اسكتش على كده أبدا .
- قرقر : ( فرحا ) إيه ! أطلعه تانى ؟.
- نوح : لا .. لا .. ما فيش فايده .. لو طلعتاه حا تنزله تانى .
- قرقر : أمال إيه ؟! نعمل ايه ؟.
- نوح : نعقد جلسه غير عاديه .. جلسه مستعجله .

- قرقر : جلسته !... لإيه ؟ .
- نوح : للجمعية .. ما فيش غير ..
- قرقر : ( مقاطعا بحنية أمل ) دا كل اللي تقدر تعمله ؟ .
- نوح : وده شويه .. لازم نجمع الجمعية .. لاتخاذ قرار ضدها .
- قرقر : ( بيأس ) طب ، اجمعها .
- نوح : لكن ، لكن حاتجتمع ازاي اذا كان ما فيش أعضاء ، عايزين أعضاء ، لازم تشترك .
- قرقر : حاضر .. حاشترك .
- نوح : وتجبب كان حد يشترك .
- قرقر : حاضر .. حا جيب لك حد يشترك . المعلم عضمه الجزار لسه متخانتق مع مراته وراقعاه علقه لما قطعت نفسه .. اجببولك يشترك ؟ .
- نوح : أيوه ، ده ينفعنا كويس ، مش يعرف يدببح ؟ .
- قرقر : قوى .. دى شغلته .. بس .. عن إيدك بقى دلوقت .. خمس دقائق .. حل عن الأوده شويه .
- نوح : علشان إيه ؟ .
- قرقر : أصلى .. أصلى .. عايز انكشها شويه .. وفيه شوية زباله بره .. عايز أدلقها على الكنبه .. علشان القعده تحلى .
- نوح : لا .. ما فيش لزوم .. ما تتعشب نفسك .. أنا اقدر استحملها كده .. ناولنى العود ناول .. واقعد جنبى هنا لما اشنف ودانك .
- قرقر : أنا عارف .. ما فيش فايده أيضا .. اتفضل يا سى نوح افندى ( يناوله العود ) وادى قاعده ( يجلس على الأرض بجواره ، وهو يلتفت إلى الشوالات ) أنا عملت اللي عليه وفوق اللي عليه .. لكن أعمل إيه .. لازم يشنف ودانى ، اتفضل شنف .
- نوح : ( يأخذ في العزف والغناء ) يا سيدى زعلان .. يا روحى

زعلان .. لان .. لان .. آه ياسيدى زعلان .. يا عينى زعلان ..  
يا روخى زع .. لان يا .. عينى زع .. لان يا .. يا .. يا ..  
سيدى زعلان .. وكان زعلان ..  
: ( يصيح فجأة منفجرا بالبكاء ) آه .. يانى .. آه .

قرقر

### المشهد الثالث

( تدخل أم عبده مهرولة .. ونوح افندى منهمك فى غنايه ) .  
: أم عبده إليه .. مالك يا واد .. انطق قول ؟ .  
: قرقر آه .. يانى .. آه .  
: أم عبده مالك .. بتعيط ليه ؟ .  
: قرقر يا اعيط على سى نوح افندى .. بقاله نص ساعه .. زى مانتى شايفه  
كده .. لا بيسكت .. ولا يقول زعلان ليه .  
: أم عبده طب بس انسد .. قوم شوف شغلك .. وانت التانى ما كفاكش  
غنا .. جايب الواد مقعده جنبك ومعطله عن شغله ؟ .  
: نوح يعنى وراه إليه .. المفاوضات ؟ .  
: أم عبده انتبهنا .. قوم بقى من فضلك كفايه غنا .  
: نوح ليه .. الغنا حرم !؟ .  
: أم عبده ما حرمش ولا حاجه .. بس مش وقته .. قوم بقى علشان تلبس  
وتروح تشوف شغلك .  
: ح وانت مالك .. عملوكى وصيه على .. أمادى مصايب .. ياستى  
انا مش قتللك ميت مره ما لكيش دعوه بى . هو انتى لكى عندى  
حاجه ؟ .  
: أم عبده بقى اسمع اما اقول لك .. أنا العفارىت بتتنطط فى وشى .. وإذا ..  
( تصدر فجأة صيحة من محمود وهو داخل الشوال ) .



- محمود : آه .  
أم عبده : ( تلتفت حولها في ذعر ) إيه ده ؟ اتم سامعين ؟ .  
قرقر : يا نهار اسود ، جالك الموت يا تارك الصلاة .  
أم عبده : إيه ده ؟ .  
قرقر : ده .. ده ( يلفت حواليه في حيرة ) دول دول لازم العفاريت  
أم عبده : أنهو عفاريت ؟ .  
قرقر : العفاريت .. اللي كانوا بيتتططوا في وش حضرتك .. الظاهر .. ان  
واحد منهم ، طب وقع في الشوال .  
محمود : آه .  
قرقر : يا نهار اسود .  
أم عبده : الحقوني ، أنا جتسى حا تلبش ، الحقوني بالشيخ عجايب .. أنا  
بقالى ليلتين حاسه ان فيه حاجه في الشقه .. انهولى الشيخ  
عجايب قوام .. ما فيش حد حا يطلعهم غيره .  
نوح : هم إيه دول اللي حا يطلعهم ؟  
أم عبده : العفاريت اللي مالين البيت .  
نوح : عفاريت إيه يا وليه ، انت مش حا تبطلى بقى شغل الهفه دى ، مش  
حا تعقلى أبدا ؟  
أم عبده : اسكت انت .. ما تتداخلش في اللي ما لكش فيه .. اطلع يا قرقر  
نادى لى الشيخ عجايب .. الحقنى بيه .  
قرقر : أيوه ، علشان تكمل ، ما هو مفيش غير هوا اللي ناقصنا ، علشان  
ينبسطوا ، أنا مالى ، أنا خاسس على حاجه ، أنا واقف على رجلى ،  
الدور على المقرفين جوا الشوالات .  
أم عبده : هم مين ؟ .  
قرقر : العفاريت .  
أم عبده : يا هوه ، يا مغيث ، ما تفسرش بقى لحسن جتسى بتلبش .. اجرى

الحقنى بيه .. مدشويه .  
( يخرج قرقر .. وترعى أم عبده وهى تلهث .. وفى اللحظة  
نفسها تدخل بيه ) :

## المشهد الرابع

- بيهة : ( فى دهشة ) إيه ؟ فى إيه ؟ ، مالك يا نينه ؟  
أم عبده : هس ، ماتز عقيش .  
بيهة : ليه ؟ جرا إيه ؟  
أم عبده : قولتلك ماتز عقيش كده ، لحسن بعدين يتقزعوا ، خليبهم مكنونين  
زى ما هم .  
بيهة : هم مين دول ؟  
نوح : اللي فى اللشولة .. أصل الدنيا ضاقت بيهم .. ملاقوش حتة يطبوا  
فيها غير اللشولة .  
بيهة : ( فى فزع ) إنتوا عرفتم ؟  
أم عبده : وانتى كان كنت عارفه ؟  
بيهة : أيوه يا نينه عرفت ، وصعبوا على قوى ، والنبي دول غلابه .  
نوح : هم إيه دول الغلابه ؟! عفاريت غلابه ؟! حلوه دى ، أول مره اسمع  
على عفاريت غلابه .  
بيهة : عفاريت ؟ . ( تنهد فى راحة ) أيوه برضه فيه عفاريت غلابه .  
محمود : ( من الداخلى ) آه .  
أم عبده : يا مصيبتى ، يا وقعتى .. متفسروش بقى .. كفايه ، أنا خلاص ما  
بقاش فيه نفس ، فىن هوا ده الشيخ هباب يلحقنى قبل ما اروح  
قطيس .  
بيهة : هو الشيخ عجائب حا يطلعهم ؟

- أم عبده : أيوه قرقر طلع بنده له .
- بهيبة : ( في فزع ) طلع بنده له ؟ .. وبعدين .. وبعدين لما يطلعهم حقيقي ، يروحوا فين ؟
- نوح : يطلعوا على جتنا .. يشاركونا في عيشتنا .. علشان تبسط امك ويهدا بالها .. أمال .. العفاريات بتتطط في وشها ، ويطبوا في الشوات ، وبعدين تطلعهم على جتنا ، هي وراها إيه غير تطلع على جتنا التراب والعفاريات .
- أم عبده : يا راجل اسكت بقى وانسد ، ما تقعدش تحيب سيرتهم وتبهجهم .
- نوح : أنا برضه اللي يبهجهم ؟ .. أنا اللي بعث أجيب لهم الشيخ عجائب علشان يطلعهم من اللشولة ؟ .. مالك وماهم إذا كانوا قاعدين في اللشولة مستريحين تطلعهم ليه ؟
- بهيبة : أيوه يا نينه حقيقي .. تطلعهم ليه ؟! ما تخليهم قاعدين مستريحين !
- أم عبده : انتوا اتجنتوا ، أخليهم كده قاعدين معانا ؟ باركين على نفسنا ؟
- نوح : مش باركين على نفسنا ولا حاجه ، الناس مكنونين جوا الشوات ، والشوات مش بتاعتنا يبقى حاجس علينا إيه ؟
- أم عبده : يعنى حاج يفضلوا كده قاعدين ؟
- بهيبة : أيوه يفضلوا .. لغاية ما يزهدوا ويمشوا من نفسهم ؟
- أم عبده : واذا ما زهدوش ؟
- بهيبة : نعتبرهم ضيوف ، يعنى حاج يكلفونا إيه غير لقمة بجهنم ، والاشوية خضار .
- أم عبده : وكان حيا كلوا .. ؟
- محمود : ( من داخل الشوال ) آه .
- أم عبده : يا مصيبي ، الحقوني ، يا ناس ، أنا مش قادره ، يا واد يا قرقر ؟ ( يدخل قرقر ومعه الشيخ عجائب حاملا كيس في يده أشبه بالخروج ) .
- ( أم وتية )

## المشهد الخامس

- قرقر : آدى الشيخ عجائب .. اتفضلى .. اتفضل يا سيدنا الشيخ  
اتفضل .
- عجائب : يا ساتر .
- أم عبده : اتفضل يا سيدنا الشيخ .. اتفضل .
- عجائب : بسم الله الرحمن الرحيم .
- أم عبده : الحقنا يا سيدنا الشيخ .. الحقنا .
- عجائب : يا أرحم الراحمين ارحمنا .. يا لطيف الطيف بنا .. يا لطيف الطيف  
بنا .. فيه إيه يا ست هاتم ؟ فيه إيه ؟
- نوح : عفاريت يا سيدنا الشيخ .. يعنى حا يكون فيه إيه غير كده .. انت  
لك اختصاص في إيه غير العفاريت ؟
- عجائب : هم فين ؟؟ هم فين ؟
- قرقر : جوه هنا في اللشولة .. مع العفش المحجوز عليه .. أصل الست ام  
عبده حجزت على العفش بالعفاريت اللي فيه .. لكن دلوقت  
استغنت عن العفاريت .. يعنى ممكن انك تطلعهم ؟
- نوح : بس تاخذهم معاك .. مش تطلعهم من اللشولة على جتنأ ..  
مفهوم ؟
- عجائب : مفهوم يا سيدنا الافندى مفهوم .
- نوح : إذا كنت عايزهم فوق معاك .. ما فيش مانع خداهم يونسوك .
- عجائب : لا .. لا .. دول صنف بطلال ما ينفعنيش ، أنا حا اطلعهم وأوديهم  
في داهيه .
- بهاء : ( منزعة ) في داهيه ازاي .. يا سيدنا الشيخ !! حرام عليك .
- عجائب : ما يمكنش .. انا لازم أفتك بيهم .. لازم أفنيهم ، أبيدهم .

- بیہ : تفنیہم ؟ حرام .. حرام علیک ( تکی ) .  
ام عبدہ : ہوا إیہ أصلہ دہ .. إیہ الی جرالک یابت ؟  
بیہ : مش سامعہ یا نینہ بیقول ایہ ؟ .. بیقول انه حا یفنیہم .. یعنی حا یوتہم .  
قرقر : یا ستی بیہ .. بس لما یطلعہم یقی یحلہا ربنا .. ہوا طلوع العفاریت بالساہل ، دول لما یتبتوا فی الشوال ما یطلعوش أبدا .. دول یطلعوا حبای عین الی حا یطلعہم . دول یطلعوا علی جتہ البلا قبل ما یطلعہم .. اسألینی انا یا ست بیہ ، دول لما یقرفصوا فی الشوال ، ما یطلعوش ولا بالطبل البلدی ، یقوا وحشین قوی وخطرین .. یعضوا ویشنکلوا ، ویعملوا حاجات وحشہ قوی .  
عجایب : اللہم احفظنا .  
قرقر : اسألونی انا عنہم ، انا اعرفہم کویس قوی ، عفاریت اللشولہ دولا .  
عجایب : معلہش ، ربنا یقدرنا علیہم ، اتفضلوا انتوا بقی من غیر مطرود .. فضوا لنا الأودہ .. خلونا تشوف شغلنا .. بس ابعتی لنا وأبور سیرتو وطاسہ وحلہ فاضیہ .  
نوح : انت حا تطلعہم ، والا حا تطبخ لہم .  
عجایب : دا شغلنا یا سیدنا لفتدی .  
قرقر : علی العموم ہم جعائین قوی .  
عجایب : إیش عرفک ؟  
قرقر : باین کدہ من صوتہم .. یعنی لو طلبت لہم کام سندوتش .. حا یقوا ممنونین خالص .  
عجایب : سندوتش ؟! الظاہر انک عمرک ما اشتغلت مع عفاریت .. سیبہم لی انت بس .. انا حا اطلعہم بالطریقہ بتاعتی .  
قرقر : انت حر .

- عجائب : يا الله اتفضلوا .  
( تخرج أم عبده ووراءها بيه ) .  
عجائب : وابتعوا لنا كان شوية دره عويجه .. أد حفته كده .  
قرقر : عويجه ؟  
عجائب : أبوه عويجه .  
قرقر : وليه العويجه ؟ يعنى لازم تصعبها .. ما تخليها دره عاده .. والا قمح .. يمكن يعملوه بليله ..  
عجائب : انت حا تعلمنى شغلتى ، دى صنعتى يا سى قرقر وانا اعرف الأصول كويس .  
قرقر : عدم المؤاخذه .. عويجه .. أنا مالى ، هو انا اللى حاكله .. انشا الله تطلب قرطم .  
عجائب : ( ملتفتا إلى نوح الذى أمسك بالعود وأخذ فى تصليحه ) وسيدنا لفندى مش حا يتفضل ؟ .  
نوح : أتفضل فىن ؟ .  
عجائب : شويه كده ، لغاية ما نطلع الكام عفريت .  
نوح : واتفضل ليه ؟ .  
عجائب : بس علشان الشغلانة دى متعبه شويه .. ويمكن أعصابك ما تستحملهاش .  
نوح : ما تخافش انا أعصابى تستحمل أبوها .  
عجائب : وكان عايزين هدوء تام .  
نوح : وآدى الهدوء التام ( يلقي بالعود جانبا ) مه ولا كلمه .. اتفضل شوف شغلك .  
قرقر : ولزومه إيه ياسى نوح افندى .. ما تسييه لوحدته فى الأوده .. يمكن يكونوا العفارىت ما يبياتوش على حد غريب .  
نوح : يعنى إيه .. عفارىت حريم ؟ .

- قرقر : جايز :  
نوح : يبقى مش حا اطلع ابدا .. أنا قتيل العفاريت أموت في العفاريت .  
عجائب : معلش .. تقدر تخليك زى ما انت ؟ .  
( تدخل عديله وهى تحمل السبرتو والطاسة والحله وكوز به  
الذرة العويجة ) .  
عديلة : اتفضل يا سيدنا الشيخ .  
عجائب : وحياة أبوكى ولعى لى السبرتو .  
عديلة : عنيه يا سيدنا الشيخ .  
عجائب : تسلم عنيكى .  
( عديلة تولع السبرتو ) .  
عجائب : حطى لى عليه الطاسه ، وحطى فيها حفنة دره وقلبيه لغاية ما  
يتحمص .  
( عديلة تنفذ المطلوب ) .  
( يفتح الخرج ويخرج منه بعض أوراق وكتاب أصفر وأحجية  
وبخور. يضع بعض البخور فوق الذرة ثم يضع الحجاين فى الحلة  
ويكتب فى ورقة يضع جمل ويضعها فيها ) .  
الشيخ عجائب : عايزين أتر من أى حد .  
عديلة : يعنى إيه ؟ .  
عجائب : يعنى أى حته من الهدوم بتاعت أى حد من البيت .  
نوح : ( يقذفه بفردة الشراب ) خد الشراب ابو نقرتين ، ما بقاش  
يلزمنى .  
عجائب : ( يضع فردة الشراب فى الحلة ) .  
نوح : كل ده حياكلوه العفاريت ؟ دا انت متوصى بيهم قوى .  
قرقر : متوصى بيهم ازاي ! دى فردة الشراب دى حا تكون القاضيه  
عليهم . حاتموتهم نحنقا بالغازات السامه .

- عديلة : هم مين دول ؟  
قرقر : العفارييت يا ست عديله .  
عديلة : عفارييت ، يا مغيث ، يا منجى . أشتاتا أشتوت ، وهو انا اقدر على  
طلوع العفارييت قدامى ، عن إذتك يا سيدنا الشيخ ، أنا جتى ما  
تستحملش .  
عجايب : ما تخافيش يا بنيه اطمنى خالص ، ما دام انا واقف جنبك ما تحمليش  
هم .  
عديلة : البركه فيك يا سيدنا الشيخ ، بس انا ركبى بتترعش .  
عجايب : اقري آية الكرسي خمس مرات .  
عديلة : حاضر ، بس انت فاكر الحاجه اللى طلبتها منك ؟  
عجايب : فاكر قوى ، وان شاء الله حا ديكى حجاب تلبسيه ، واقول لك  
على وصفه تنفعلك خالص .  
قرقر : هو إيه دا يا ست يا عديله !؟  
عديلة : اسكت انت دى حاجات ما تعرفهاش .  
قرقر : انتى كمان بتعملى حاجات عند سيدنا الشيخ . والله عال ربنا يجعلنا  
من بركاتك يا سيدنا الشيخ ، مش حا تبتدى الشغل بقى . والا  
عايزلك جدى أحول ؟  
عجايب : لا ما فيش لزوم ، الحكايه مش مستاهله . بس عايزك تقرب من  
الشوالات وتحط الحله على كفك وتمسك ودنك الشمال بإيدك  
اليمن .  
قرقر : حاضر ، من عينيه ، أما شوف آخرتها .  
( يضع الحلة التى على المنضدة فى كف قرقر ثم يقلب فيها الطاسه  
والذره والبخور ويضع عليها الغطاء ويشمر أكمامه ويخرج من  
الخرج كيسا صغيرا مدلى من خيط ويأخذ فى لفه بحركة دايره  
حول الحلة وهم يتمم بكلمات غير مفهومه ) .



- فرقر : ( في ملل ) وآخرتها . أنا دراعى خلاص نمل .
- عجائب : ( يقرأ ) أينك ياروبعه ، أينك يالوبعه .. أينك يا صاحب الروس الأربعة . ( يدفعه بكوعه ) اسكت . ما تخسرش الشغل .
- فرقر : أصل الحق مش عليك ، الحق على العفاريت اللي ساكتين لك لغاية دلوقت .
- عجائب : يعنى عايزهم يعملوا ايه ؟
- فرقر : يخلوا عندهم نظر ، يشكوك مقلب والا يلهفوك مقص ، والا يعنى حا يفضلوا ساينى كده لغاية ما دراعى يتقطم . أنا مالى ، أهى حا ترسى على دماغهم .
- ( يتحرك شوال محمود في قلقلة بطيئة حتى يقترب من أقدام عجائب ثم يدفعه في قدميه دفعة تلقى به على الأرض ) .
- عجائب : آه ، آه دماغى ، الحقونى . وسطى انقطم .
- عديلة : سلامتک يا سيدنا الشيخ ، إيه اللي جرى ؟
- ( لا يكاد ينهض متباعدة في خوف حتى يتلقاه سيد في دفعه في قدميه دفعة توقعه مرة أخرى . فينهض متحاملًا ثم يعدو مندفعًا خارج الحجرة بأقصى سرعة ) .
- ( عديلة تنطلق مولولة من الحجرة . نوح الهندى يتناول رشفة من الزجاجاة ثم يتناول العود ) .
- فرقر : إيه يا سيدنا الشيخ ، حد يجرى كده من العفاريت ؟
- عجائب : ( وهو يعدو في الخارج ) هم دول عفاريت ، دول بلطجية .
- نوح : أنا مع العفاريت ، فلتحى العفاريت ، لو منهم اتنين في جمعية قتل الزوجات . كنت سويت بيهم الهوايل . يارب اتنين بس . زى دول .. وانا امشى بيهم ام عبده على العجين ما تلخيطوش .
- ( أم عبده تدخل مندفعه على صوت الضجعة ) .
- أم عبده : إيه ؟ . حصل إيه ؟ . هم طلعا ؟

- قرقر : إيه هم دول ؟
- أم عبده : اللي ما يتسموش .
- قرقر : لا ، ده هو اللي طلّع .
- أم عبده : هو مين ؟
- قرقر : اللي يتسمى ، الشيخ عجائب . كبير محتالى القطر .
- أم عبده : طلّع ليه ؟
- قرقر : عاد إلى قواعده ، فى السطوح .
- أم عبده : يعنى إيه ؟ مش فاهمه ؟
- نوح : ( ضاحكا فى سخريه ) ودى عايزه فهم ، عاد إلى قواعده .. يعنى انسحب . عقب هزيمه منكره ، ارتد بعد خسائر جمه . برضه ما تيش فاهمه ، بالعرب زاع بعد ما تقحوه علقه جابت داغه .
- أم عبده : هم مين دول ؟
- قرقر : اللي ما يتسموش .
- أم عبده : ضربوه ؟ يوه ، يا مغيث ، يا ساتر يارب والعمل إيه ؟ اذا كان هو ما اقدرش عليهم مين حا يقدر عليهم ؟ وانت يا راجل ، قاعد ساكت كده ؟!
- نوح : أنا مبسوط كده ، أنا مع العصاريت ، نموت وتيا العصاريت ( يمسك العود ويعنى ) يا غائبنا عن عيوني ، وساكتنا فى شوالى .
- أم عبده : هوا انت فيك فايده .. وبعدين يا قرقر ؟! إيه العمل ؟!
- قرقر : إيه العمل ؟ ( مفكرا ) إيه العمل .. أقول لك يا ستى خليا على الله .
- أم عبده : أخليا على الله ؟! دا اللي قدرت عليه ؟
- قرقر : أيوه خليا على الله هوا فى حد بيدبرها غيره خليا على الله ، وعلى .
- أم عبده : عليك انت ؟
- قرقر : أيوه على انا .. انا حا أعرف ازاي اطلعهم لك .

- أم عبده : انت حا تظلمهم !؟ ما بقاش اللي انت ياسى قرقر .
- قرقر : ياستى يوضع سره فى أضعف خلقه .. جرى انتى حا يحس عليكى حاجه ؟
- أم عبده : طب بس انبط .. تعالى معايا نطلع نشوف الراجل جراه إيه .. يمكن نقدر ننزله تالى ..
- قرقر : ما فيش فايده ياست .. دى العلقه اللي تخدها ، مش حا تخليه يرجع هنا أبدا ، دى نوك أوت .
- أم عبده : يادى التصيبه ، وبعدين ؟
- قرقر : قتللك جريبنى .. مش عاجبك .. أعمل لك إيه ؟ جريبنى ياستى انت حا يحس عليكى حاجه ؟
- ( يزوم محمود من داخل الشوال ) .
- أم عبده : آه .. آه يانى .. أهم ابتدوا .
- قرقر : قتللك خلىنى اجرب .. ما نتش راضيه .
- أم عبده : طب جرب .. جرب .. زى ما انت عايز .
- قرقر : أيوه .. كده الكلام .. اتفضلى انت بقى من غير مطرود خلىنى اشوف شغلى .
- أم عبده : ( وهى تهم بالخروج ) ابعت لك شوية دره عويجه ؟
- قرقر : عويجه إيه ياست .. أنا حا طلع عقاريت مش كنا كيت .
- أم عبده : أمال ابعت لك إيه ؟
- قرقر : تبعنى إيه !؟ إيه ...؟
- ( محمود يزوم ) .
- قرقر : أيوه افكرت ، ابعتى حتة جبنه حلوم .. على طبق فول بالزبد .. على السبع بيضات اللي كنت حا تبعتيهم للشيوخ عجائب المهزوم ، وما فيش مانع تبعنى حتة القشطه وشوية عمل التحل اللي كان حا يتسممهم .

- أم عبده : ليه دا كله ؟  
قرقر : مش حاطلع عفاريت ، يمكن يطلعوا جمائين ابقى احليم  
ياكلوني ؟ والا اسيبهم في البيت يخربوه ويلهفوا اللي فيه ؟ مش  
برضه الاستحراس أحسن !؟  
أم عبده : برضك أحسن ، حالا خابعت لك اللي انت عايزه .. هي جت على  
كام بيضه .. أهو بجمله .  
( تخرج أم عبده ) .  
قرقر : وانت يا نوح افندى .. مش تفضل شويه . عسلشان نشوف  
شغلنا .  
نوح : شغلك !؟ انت كان تاوى تطلع عفاريت ؟ .  
قرقر : دانا حاطلع أبوهم ، دول ما يعصونيش أبدا ، إشاره واحده  
تطلعهم .  
نوح : طيب ماتيا لله تورينا الشطاره كده .  
قرقر : بس لازم أكون لوحدي .  
نوح : بقى كده .. انت اتعلمت شغل النصب ، انا مش حاسب  
الأوده .. لازم اشوفك وانت بتطلعهم .  
قرقر : ليه بس ياسى نوح افندى .. ليه تلخبط لنا الشغل .  
نوح : ما فيش فايده .. لازم اشوفهم يعنى لازم اشوفهم .  
قرقر : حد في الدنيا .. يشوف العفاريت ؟  
نوح : كيفى كده .. أحبهم ، أنا حاسس ان انا حلاق فيهم حاجه حلوه .  
قرقر : لا من الناحيه دى .. اطمئن جدا ، ما فيش فيهم حاجه حلوه أبدا ..  
دول دكرين ، زى الخنشات ، الله لا يورك .  
نوح : برضك حاشوفهم .  
قرقر : يادى الواقعه السوده .. يا سيدى قوم الله لا يسيتك ما تعطلش  
شغلنا ، قوم لحسن بعدين يعملوا فيك اللي عملوه في الشيخ

- عجائب .
- نوح : ولو .. برضه حاقعد .
- قرقر : ( بعد أن نفذ صبره ) لا ، الظاهر الحكاية ما فيهاش فايده أبدا ( لنفسه ) ما فيش طريقه غير انا اقول له الحقيقة ويا طابت يا اتنين عور ( لنوح ) بقى اسمع يا سبي نوح افندى .. انا مش حا حسي عليك .. أنا حاقول لك على كل حاجة ، باختصار القبول .. الحكاية وما فيها ، ان اللي في الشوالات دول مش عقاريت .
- نوخ : آمال يقوا ايه ؟
- قرقر : بنى آدمين ؟
- نوح : بنى آدمين ؟ اللي هبدوا الراجل العلقه دى كانوا بنى آدمين ؟ يا سلام عليهم .. أحبهم .. لا يبنى عليهم ، علشان ابوسهم مسن عنيم .. هم فين طلعمهم لى ( يقذف بالعود وينهض مقتريا من الشوالات ) .
- قرقر : طب بس اصبر ما ترعقش كده ، علشان افهمك بقية الشغلانة .
- نوح : مش عايز أفهم .. أنا عايز اسلم عليهم وأهنيم واحضنهم ( بهجم على شوال آخر غير الذى به محمود وسيد ويحضنه ) اهنيك .. اهنيك من كل قلبى ، يا سلام ، أدإيه انت فشيت غليلي ، أما مقص اللى نتشتهوله .. مش بتاع بنى آدمين ، مقص عقاريتى حقيقى .. إنت نخليتى اتمنى انك تكون بنى آدم علشان اضمك للجعميه .. لسه كنت بقول لقرقر ، لو منكم اتنين فى جمعية قتل الزوجات كنت سويت بيكو الهوايل ، إيدك لما اهنيك مبروك ( يفك الشوال ويمد يده فيجد به عدس بجيه فتبدو عليه الحليه ) إيه ده ؟ إيه ده يا واد يا قرقر ؟ ده بجيه ؟
- قرقر : جبه ؟ جابها متين الجبه دى ؟ ده ما كانش لابس جبه أبدا يمكن لبسها جوه .. على العموم معلش .

- نوح : معلش ازای ؟ بقول لك بجه ؟ یعنی لا يعرف يشنكل ولا يضرب مقصات .
- قرقر : ليه بس .. تفتكر یعنی ان الجبه حا نحوشه ، على العموم لو حاشته نبقى نقلعها له .
- نوح : هوا إيه اللي نقلعها له .. ونلبسها له .. ده عدس بجه .
- قرقر : عدس إيه ؟! وريني كده ( عجد يده ) يا سيدى خضتتى انت غلظت فى الشوال .. أنا رآخر بقوله ماله قاعد ساكت كده .. لا بيهرش ولا بيصرخ ، أصلهم اتنين .. واحد بيهرش علشان حاجه بتاكله والتانى بيصرخ من الجوع .
- ( محمود يصرخ ) .
- قرقر : حالا .. دقيقه واحده ، لغاية ما يجيوا الأكل ، أكله على كيفك عمرك مادقت زيها .. كانت من نصيب الشيخ عجائب .. أهى دى اللي يقولوا عليها تكوف فى بقلك وتقسم لغيرك .
- نوح : يا الله يا أخى طلعهم بسرعه علشان نعقد الاجتماع .
- قرقر : اجتماع إيه ؟ .
- نوح : الجمعيه .. هم مش حا ينضموا ؟ .
- قرقر : أيوه حا ينضموا .. بس مش كده خبط لزق . ما يصحش تاخذهم كده على مشهم .
- نوح : یعنی إيه مش خبط لزق ؟! الحكايه مستعجله ، ولازم نشوف شغلنا ، ونعقد اجتماع عاجل سريع .. علشان نبت فى أمر أم عبده وتتخذ ضلها إجراء حاسم ، والا یعنی عاجبك الشبايك اللي سنكراها دى ١٢ .
- قرقر : لا .. لا ، عاجبانى ازای .. بس انت عندك فكره عن شخصية العضوين دول .. یعنی تعرف هم يقوا مين ١٢ .
- نوح : مش عايز اعرف .. اللي أعرفه عنهم كفايه جدا ، كفايه انهم رقعوا

- عجائب الكلب الهلدين اللى خدوهم . كفايه مهارتهم في فن  
الشنكله ، والمقصات .. كفايه ..
- قرقر : مفهوم .. مفهوم .. بس انا عايز اقول لك .. ان ظهورهم هنا  
مستحيل .
- نوح : ليه ؟ .
- قرقر : لأن البيت ده محظور عليهم .. ده يعتبر منطقه محرمة عليهم .
- نوح : علشان إيه ؟ .
- قرقر : لأن دمهم مباح فيها .
- نوح : مين أباحه ؟ .
- قرقر : عدوك اللدود .. الست ام عبده .
- نوح : وليه ؟ مالها وماهم ؟ تطاردوهم ليه ؟ وتبيح دمهم ليه ؟ هسى  
متجوزاهم ؟ .
- قرقر : متجوزاهم ازاي يا سيدى .. بقول لك ام عبده مرات حضرتك ،  
تقول لى متجوزاهم ؟ .
- نوح : أصلك مخولتنى ، لأنى مش فاكر انها بتبيح دم حد غير جوزها ،  
مش فاكر ان الخصومه المستحكمه دى تنشأ بينها وبين حد إلا اذا  
كانت بينهم صلة جواز ، طيب إذا ما كانتش متجوزاهم تبقى مالها  
وماهم ، لها عندهم ايه ؟ .
- قرقر : أجرة الأوده .
- نوح : آه .. بقى قولتنى .. يعنى هم دول الجماعه اللى كانوا ساكتين  
فوق ، والى استولت على عفشهم ؟ .
- قرقر : أيوه ، أهم هم ، استولت عليهم ضمن العفش .
- نوح : وإيه اللى زنفهم الزنقه السوده دى ؟ .
- قرقر : طبت عليهم ما عرفوش يروحوا فين وكانوا متعودين ينزلوا على  
المواسير ، لكن حضرتك كنت واقف في البلكونه اللى تطل على

- المواسير فحافوا منك وملاقوش حته يستخبوا فيها غير الشوات .  
نوح : قلت لي ، طيب يا الله ، اطلق سراحهم حالا .  
قرقر : بس اصبر شويه ، لغاية ما البت عديله تجيب الأكل ، وبعدين نقفل  
الباب ونطلعهم يا كلوا لقمه ، والا ياخذوا الأكل معاهم  
ويزوغوا .  
نوح : والاجتماع ؟  
قرقر : تبقوا تتفقوا عليه بعدين .  
عديله : ( تدخل عديله وهي تحمل الصينية وعليها الفطار )  
قرقر : الأكل ايه .  
عديلة : حطيه على الترايزه .  
قرقر : أمال فين الشيخ عجائب ؟  
عديلة : تعيشى انتى .  
قرقر : يعنى إيه ؟ جراه حاجه ؟  
قرقر : العفاريت جابوا له الكافيه . طيروه على فوق .  
عديلة : أمال الأكل دالمين ؟  
قرقر : للعفاريت .  
عديلة : العفاريت بياكلوا غسل وقسطه ؟  
قرقر : ما ياكلوش ليه .. عفاريت ذواتى .. مش وانحدين على التقشف .  
عديلة : بقى كده ؟  
نوح : كده والامش كده ، انتى حاتفتحى له محضر سببى الأكل واطلعى  
بره خليه يشوف شغله ، هوا حا يطلعك والا حا يطلع العفاريت .  
عديلة : هو اللى حا يطلع العفاريت ؟ ياخى عفاريت لما ينططوه .  
نوح : ( تخرج عديله ويفلق قرقر الباب خلفها )  
نوح : يا الله ياعم .. يا الله قوام ، افرج عنهم حالا ، خليم يشموا نسيم  
الحرية ، وخلينى اشد على ايديهم وأهنتهم بعضوية الجمعية .



قرقر : حاضر .. حافكهم ااهه .. بس خد بالك من الباب كويس .  
نوح : ما تخافش ، انا حا اسنده بضهرى ، ما فيش حد حا يقدر يخش  
أبدا ، أنا باعتبار نفسى مسعول عن حياتهم .. دول أعضاء جمعيتى ،  
دول سندي ، يا الله بقى طلعمهم .

## المشهد السادس

( يسند نوح الباب الموصل إلى بقية الغرف بظهره ) .  
( يسرع قرقر فيفك الشوال الذى به محمود فيقفز إلى صينية  
الأكلى ويأخذ فى التهامه ) .  
محمود : لو صبرت على دقيقه واحده ، كنت مت من الجوع .. أما حنة  
صينية يا سلام سلم ، أنا مش عارف آكل إيه واسيب ايه ، أنا قتيل  
العسل النحل ده .  
( يتجه قرقر إلى شوال سيد ويفكه فيخرج سيد وهو يهرش ) .  
سيد : يا سلام يا هوه ، أنا أول حاجه حا انا دى بيها هى المطالبه بالحرية  
الخامسه ، ربنا ما يحرمش حد منها .  
نوح : إيه هى دى الحرية الخامسه ؟  
سيد : حرية الهرش يا أستاذ ، ربنا ما يحرمك منها أبدا .. إنت مجربتش لـ  
تكون حاجه بتقرصك ونفسك تهرش وما نتاش قادر ؟  
نوح : لا والله ما جربتاهش .  
سيد : يعنى ما فيش حاجه قرصتك أبدا ؟  
نوح : لا ، بس عمرى ما قدرتش اهرش ، أنا جايب عصايه مخصوص  
للهرش ، دى يمكن الحرية الوحيدده اللى با اتمتع بيها فى البيت حرية  
الهرش ، أما باقى الحريات فممنوعه لا حرية كلام ، ولا حرية غنا ،  
ولا حرية بصبصه ، ولا حرية وساخه ، ولا حرية لخبطه .. الله لا

- يورريك .. على العموم دا كله حا تحققة ان شاء الله بالجمعيه بتاعتنا . بس دلوقتى تعالى كل لك لقمه على ما قسم .  
( يتجه سيد إلى الصينية ويأخذ فى الأكل ) .
- نوح : ما تأخذوناش يا جماعة فى الأكل الطيارى اللي ع الواقف ده لكن نعمل إيه فى سبى قرقر ، ما دام عملكوا عفاريت .  
( يتعد من أمام الباب قليلا ) .
- قرقر : إوعى الباب ، إوعى ، لحسن القضا المستعجل يطب ويكشف الحكايه ، ونروح كلنا فى شربة ميه .
- محمود : القضا المستعجل ؟ يا باى ، أنا حازور .
- سيد : أحسن حاجه نعمل ساندويتشات وناخدها فى جيوبنا .
- نوح : ما تخافوش ، أنا سادد الباب كويس ما حدش حا يستجرى بحش ، كلوا على مهلكم ، علشان بعد كده نقدر نعقد الاجتماع على راحتنا .
- قرقر : اجتماع إيه ؟ مش وقته دلوقت ، يا الله يا جماعة اعملوا كل واحد ساندوتش ، وزوغوا دلوقت ، ما حدش عارف الظروف بعد كده إيه .
- نوح : والجمعيه ؟ .
- سيد : ( وهو يحشو رغيفه ) نتفق عليها بعدين .
- نوح : بعدين ازاي ؟! المسأله مستعجله خالص .
- محمود : طيب ممكن نتفق دلوقت على حته نتقابل فيها .. أصل هنا منطقة خطر .. خطر جدا .
- قرقر : أيوه خطر علينا كلنا ، دى لو طبت علينا مش حاتسينا الاقتلى .
- نوح : طيب نتقابل فين ؟ .
- قرقر : اتقابلوا النهارده بعد الضهر فى القهوه اللي على ناصية الشارع .
- نوح : بعد الضهر كثير ، احنا عايزين نشوف شغلنا .

- محمود : طيب نخلها الظهر والا الصبح زى ما انت عايز ، بس اظن دلوقت  
نخرج قبل ما حد يقفشنا ! .
- فرقر : أيوه .. يا الله زوغوا بسرعه ، وانا حاخبي الشواتل الفاضية ،  
وانعكش الأوده .. قال يعنى حصلت بيتنا خناقه جامده ، وانا  
انتصرت عليكم .
- ( لا يكادان يمان بالخروج حتى يفتح الباب المؤدى إلى السلم  
وتدفع منه زكيه ولعه ) .

## المشهد السابع

- نوح : ( صارخا في فرع ) زكيه ؟ إيه اللي جابك هنا دلوقت يا زكيه ؟ .
- محمود : الله !! زكيه !! .
- زكية : أيوه زكيه ، مالكم بتصول كده زى اما يكون التقيتوا عفريت ؟ .
- فرقر : والله العفريت أهون ، أنا لسه دلوقت مطلع عفريتين بشويسة  
عسل .. لكن انت اطلعك بإيه .. إيه اللي جابك يا ست زكيه ؟ .
- زكية : اسكت انت انسديابوز الإخص .
- فرقر : حاضر ، انسديت ، حاسكت خالص ، وانا بقى عندي حاجة ..  
كل اللي عندي خلاص قلته .. لغاية ما طلعت العفريتين دول ، لكن  
انت بقى ما اظنش فيه فايده منك ، ما كنتش عامل حساني عليكى  
أبدا ، أنا أحسن حاجة أقعد كده وانفرج عى اللي حا يجرى ،  
اتفضللى يا ست كبيرته .
- زكية : ولعه يا روح امك .
- فرقر : ولعه ، كبيرته ، أهو كله محصل بعضه ، أهى حاجة تلسع  
وخالص .
- زكية : قلت لك ولعه يعنى ولعه .. يعنى مشعوطه .. بت تلعب بالبيضة  
( أم رتية )

- والحجر .
- قرقر : أنا مالي يا سيدتي العبي باللي تلعبى بيه ، أهم كلهم قدامك ، بيض على حجاره ، العبي زى ما اتنى عايزه .. بس خدى بالك بقى يا ست ولعه .. ان فيه ورا الباب ده .. عاصفه .. اسمها ام عبده .. تاخذ فى وشها ميت ولعه .
- زكية : وانا مالي يا عمر ، بتخوفنى والا إيه ؟ انا ما كلش م الكلام ده .
- قرقر : أنا مالي تاكلى ولا ما تكليش ، أنا حبيت بس أعمل اللي عليه ، ودلوقت عن إذنتكم ، أكل لقمه ، على الأقل لما يجرى لى حاجه أبقي ميت شبعان ، حضرتهم يا ست ولعه .. الأستاذ نوح ، والأستاذ محمود والأستاذ سيد .
- زكية : عارفاهم يا روح ستك .
- قرقر : يعنى اطلع منها خالص .. حاضر .. حاضر .. اتفضلوا .
- محمود : الظاهر ان اليوم ده مش حا يفوت على خير أبدا .. أنا بافكر آخذ الرغبة بتاعى وادخل الشوال تانى ، هى حقيقى القعده مش مريحه ، لكن آهى مأمونه ، بعيد عن الخطر .. والشوال اللي تعرفه أحسن م اللي ما تعرفوش .
- ( بهم محمود بالدخول فى الشوال ) .
- زكية : رايح فين يا سى محمود افندى ، اطلع لى بره يا خويا ، أنا ليه عندك حساب .
- نوح : ما تزعقيش كده يا ست زكية الله لا يسيئك وطى صوتك شويه ، قولى لى بس إيه اللي جابك هنا ؟ .
- زكية : ( تكشف عن ساقها ) رجليه يا حبيبي ، وحشين ؟
- سيد : هم من جهة الخلاوه حلوين ، بس يعنى جابوكى هنا ليه ؟ .
- زكية : جابونى ليه ؟ علشان اصفى حسابى معاكم ، علشان اشوف لى طريقه ، علشان أرسى لى على بر .

- محمود : طيب انت مش جابه لنوح افندى ؟ عن اذنتك احنا .
- زكية : اقعده هنا ، انا جايه لكم انتوا لانتين ، لازم تشوفوا لى خلاص ،  
انتوا فاكرينها ايه ؟! سايبه ، فوضى ١٩.
- نوح : طيب يا زكيه ياختى ، الخلاص ده ممكن نشوفه فى اى حته تانيه ..  
الحكاية ما اظنهاش مستعجله اوى كده وانتى عارفه ان خالتك ام  
عبله لو دريت ..
- زكية : حا تعمل ايه يا ادلعدى ، انا عايزاها تدرى ، لازم اجيبها على  
بلاطه .. ما فيش فايده غير كده ، هو كل الطير اللى يتاكل لحمه ..  
كل ما اجيلكوا من هنا تجونى من هنا .. الحمد لله اللى قمشتكم هنا  
مع بعض ، علشان نرسى لنا على حل .
- سيد : حل فى ايه بس يا ست زكيه ، هو ادا وقته ؟.
- زكية : اسكت انت واتلم بلسانك ما تداخلش فى اللى مالكش فيه ( توجه  
الحديث لى نوح ) هه .. قلت ايه ؟.
- نوح : فى ايه بس يا زكيه ؟.
- زكية : ما نتاش عارف فى ايه ، فى اللى فى بطنى يا عומר .
- نوح : اللى فى بطنك ١٩! ماله ١٩.
- زكية : عايزه له اب يا حيبى .. عايزه له والد يا سيدنا لفندى .
- محمود : عايزه له ايه ١٩.
- زكية : اب ، اب ، مش فاهم يعنى ايه اب ، زى ابوك ، وابو ابوك .
- محمود : ايوه .. ايوه فاهم .. بس وطى صوتك .
- نوح : ومستعجله قوى ، على ايوه لسلامته ، ليه ١٩.
- زكية : مستعجله ليه ١٩.
- محمود : ايوه حقيقى ، يعنى مش كان يقى احسن لو تسيبه لغاية ما ينزل  
ويكبر ويميز ، ويختار الاب اللى يعجبه ١٩.
- فرقر : ( وهو يعضغ الطعام ) اى والله فكره ، انا شخصيا ، لو خيرونى ما

كتتش اخترت ابويه دا أبدا ، كان شحات ابن شحات ، وكان شكله وحش قوى ومورى أمى الويل . لكن اعمل ايه ، طلعت لقيته الله يرجمه أبويه ، وما قدرتش اقول لهم غيروه ، لكن والله لو كان بإيدى كنت مؤكدة نقيت واحد تانى .

نوح : مضبوط . لك حق ، أهى دى حريه جديده م الحريات اللى حان نطالب بيها الجمعية . حرية اختيار الآباء .

زكية : بتقولوا ايه ؟ حرية اختيار الآباء ؟ يا اختى بو لما يشتحك منك له . آل يختار الأب اللى هوا عايزه آل ، خش فى عى يا خويا خش . استكردى يا خويا استكرد ، ما اتم أصلكم فاكرينى هفيه ، لا ، أنا ما باكلش من الكلام ده . لازم اشوف له أب حالا .

محمود : ليه بس يا زكية يا اختى ؟ ليه العند ده ؟ دا مش وقته أبدا ، خيلنا بعدين ندبر المسألة سوا على رواقه .

زكية : ما كانتش يتعز يا حيبى ، غالى والطلب رخيص يا روحى ، آل على رواقه آل ، ياريت كان ممكن يا سى حوده .

نوح : هوا ايه أصله ده ؟!

زكية : ما انتش عارف أصله ايه ؟! حانعيده تانى . أصل انا عايزه أب للواد اللى جى بعد كام شهر ، عرفت بقى أصله ايه ؟ . أصل انا مش عايزاه ينزل يلاق نفسه يا ضنايا ، من غير أب ، يعنى ابن حرام ، فهمت يا روحى ، والا افهمك كان ؟! يعنى بالعربى واحد منكم لارم يتجوزنى حالا .

سيد : حالا ؟!

زكية : أيوه حالا ، حالا ، يعنى يطلع معايا من هنا على المأذون ، رجلى ، على رجله ، قلتم ايه بقى ؟!

نوح : يا ستسى زكياه ، الحكاياه ما تيجش كسده .

زكية : خلاص انتينا ، كلمه واحده ، أنا مش حادوخ نفسى وراكم بعد

- کده ، لازم اطلع من هنا بعريس . فاهمين والا لا ؟ .
- نوح : إيه هو ادا ؟ هي الحكايه ، عافيه ؟ .
- زكية : عافيه ؟ . بقى كده ؟ طيب انا حا اوربك العافيه تبقى ازاي ( توقع بالصوت ) يوه .
- قرقر : ( قافزا من مكانه في فرع ) يا نهار اسود ، انا في عرضك يا ست زكيه يا اختي ، أنا مفهم الست ام عبده ان العفرتين اللي حاطلعهنم لاتنين دكره ، ما كانش عندي فكره أبدا انك حا تشر في هنا كنت عملت مقدمه وقلت لها ان معاهم نتايه ، اعملني معروف وطي صوتك لحسن تطب علينا تجيب أجلنا ، يا الله يا جماعه ، خلصونا شوفوا لنا حل قوام .
- نوح : حل ازاي بقى ؟ .
- زكية : ما نتاش عارف حل ازاي . حنا نعيدته تناني ، واحد منكس بتجوزني .
- قرقر : أيوه ، واحد منكس بتجوزها ، ما فيش غير كده .
- نوح : أنا ما اقدرش ، ما اقدرش أبدا . دي ام عبده ، كانت تعلق لي المشنقه في وسط ميدان السيده ، دي كانت تاكلمني ، اتجوزها انت ياسي محمود ، انت فاضي ، وعلى كيفك .
- محمود : أنا ؟ أنا اتجوزها ؟ ده برضه معقول ؟ اتجوزها وانا مش لاقى آكل ، اتجوزها وأنا لسه تلميذ ، واروح لهم في البلد بدل ما يكون في إيدي شهاده يكون في إيدي زكيه ولعه ! وياريت زكيه ولعه وبس ، الا وعلى كتفها كان ولد !! ما شاء الله ، دول كانتوا يخنقوني ، لا يا عم ، أنا ماليش في الجوازه دي أبدا ، أنت راجل مقتدير مبسوط ، وكان قدامك في حساب الشرع ، تلاته ( إلى زكيه ) خلاص يا ست زكيه ، نوح افندي حا يتجوزك ، اتجوزها يا نوح افندي .

- نوح : ما يمكنش ، ما اقدرش ، حرام عليكم يا جماعة .
- زكية : ( في ملل ) يا الله بقى خلصوني ، أنا مش فاضيه لكم .
- قرقر : أحسن حاجه ، نعمل قرعه .
- زكية : اعملوا اللي انتوا عايزينه ، بس خلصوني قوام ، شوفوا لي جوز  
حالا ، حالا دلوقت ، فاهمين والا لا .  
( يسمع صوت أم عبده من الخارج ) .
- أم عبده : خلاص يا قرقر ؟!
- ( يحدث هرج ومرج وهم محمود وسيد بالفرار ، فتقف زكية في  
طريقهما ) .
- زكية : تخليك عندك منك له لحسن ازقع بالصوت .
- قرقر : ( مجيبا أم عبده ) اصبري على يا ست شويه ، لحسن دول  
معصلجين قوى ، ( إلى محمود ونوح وسيد ) يا الله يا جماعة  
شوفوا لنا حل بسرعه ، حد منكم يقول لها انه حا يتجوزها ،  
وخلونا ننتهي .
- زكية : يقول لي إيه يا عمر ؟! هو انا باكل من الكلام ده .. يخرج من هنا  
على المأذون إيدته في إيدي .. هي الحكايه ساويه والا إيه ؟!
- نوح : ( يرتقى على الأريكة في يأس ) لا .. الظاهر ان أجلى قرب .. يا  
خسارة الجمعيه .. يا خسارة المشروع .. يا خسارتك يا نوح  
افندي .
- محمود : ( يمسك الشوال محاولا إدخال نفسه فيه ) أنا يا عم حا ادخل جوه  
الشوال تاني ، ومش حا اطلع منه أبدا .
- قرقر : بقى ده اسمه كلام ؟! يعني عايزين ام عبده تيجي تموتني انا ؟! يعني  
هي المسأله ماهاش حل ؟! ما فيش حد عايز يضحي ؟!
- سيد : ( بعد تفكير ) أقول لكم . أنا حا اضحى . حا اضحى لكن مش  
علشان خاطر كم أو خاطر ام عبده ، انا حا اضحى علشان خاطر



مخلوقه واحده .. عارف انها حاتتا لم لو واحد منكم تجوز زكيه ..  
 حا اضحى علشان خاطر واحده حا تصدم لما تلاق ابوها تجوز على  
 أمها فى آخر العمر ، وحا تصدم أكثر لو تعرف ان النبى آدم اللى  
 فاكراه مثل أعلى تجوز الست زكيه ولعه ، وبقي أب لابن مجهول  
 الأب .. أنا حا تجوزك يا ست زكيه .. وأمرى لله لأن ما فيش حد  
 حاسس بيه ولا حايزعل عليه .

زكية : ( فى ذهول ) انت بتكلم جد ؟! والا عايز تلفنى .. خد بالك  
 كويس انا ما بتضحكش على أبدا .

سيد : أنا ما اعرفش الف .. كل اللى انتى عايزاه حا اعملهولك .. ياالله بينا  
 يا جماعه .

( ييمون بالخروج عندها يسمع صوت الشيخ عجائب من وراء  
 باب السلم ) .

عجائب : وله يا قرقر .. ما طلعتيش الفطار ليه ؟! انت عايزنى اموت من  
 الجوع .. مش كفايه اللى جوالى .

قرقر : يادى الوقعه السوده .. نعمل ليه دلوقت ؟! حا تخرجوا منين ( إلى  
 عجائب ) طيب يا سيدنا الشيخ اطلع دلوقت وانا اجيب لك  
 الصينيه .

عجائب : ( من الخارج ) مش طالع الا لما تديها إلى دلوقت .

قرقر : أعمل ليه فى اين الأروبه ده !! هاتوا يا جماعه الأكل اللى معاكم ..  
 ( يحاول جمع الأكل وإخراجه من الأريفة وإعادته إلى الصينيه  
 عندها يسمع صوت أم عبده من وراء الباب الآخر ) .

أم عبده : واد يا قرقر .. انت حا تضيع اليوم عندك والا ليه ؟.

نوح : خلاص ما فيش فايده رحنا فى داهيه .. الحصار تم من جميع  
 الجهات . وقعنا واللى كان كان . جالك الموت يا تارك الصلاة  
 أشهد أن لا إله إلا الله .

( يقفز قرقر من مكانه وينزع أغطيه الأرائك فيضعها فوق محمود  
وسيد وزكيه .. ويعطى لكل من محمود وسيد رق .. وزكيه  
طيلة ) .

قرقر : اسمعوا يا جماعة دي آخر محاولة .. دي آخر حاجة نقدر ننفذ بيها  
بصمرنا .. يا تخيل عليهم يا نروح في داهيه .. أنا حافتح لكم الباب  
وانتو .. تخرجوا على بره جرى وكل واحد منكم يدق باللي في إيده  
قوى ويفقر .. وانت يا نوح افندي امسك العود بتاعك ، وتتن  
لهم .. فاهمين ؟ .

( تفتح أم عبده الباب فتذهل مما تراه ) .

أم عبده : ( صارخة ) يا حفيظ .. يا مغيث .. دول إايه دول يا واد يا  
قرقر !؟ .

( يبدأ الدق ويندفع الطابور وهو يتروح إلى الخارج ) .

نوح : ( وهو يعزف على العود ) :

ترللي .. ترللي .. ترللي .. ترللي .

محمود : ( منشدا ) أنا الولي .. أنا الولي .

سيد : ( منشدا ) وأنا ابن عمه الشيخ على .

زكية : ( منشدة ) وأنا اللي بزف الصالحين .

( يفتح قرقر الباب أمام الموكب .. بينما هم يرددون الأنشودة  
مراراً ) . ( عجائب لا يكاد يرى الموكب حتى يصرخ فزعاً ويفر  
هارياً ) .

( يسدل الستار )

## الفصل الثالث

( المنظر : بعد سنة . والوقت قبيل العشاء في ليلة صيف . صالة في الشقة العليا ، لمنزل أم عبده التي استأجرها سيد ومحمود . في الواجهة باب يؤدي إلى شرفة بها بعض قصارى زرع . وفي اليمين بابان أحدهما يؤدي إلى دورة المياه والثاني إلى السلم ، وفي اليسار باب يفضى إلى غرفة النوم ، وشباك يطل على منور وقد وضعت عليه صينية قفل . في الركن اليمين البعيد أريكة استامبولي . وفي الركن اليسار البعيد بعض السلال والشوالات . في الوسط منضدة كبيرة حولها مقاعد خيرزان . في الركن اليمين القريب بوفيه وفي الركن اليسار القريب المنضدة القديمة وعليها كتب وأوراق والمرآة المشروخة .. وبجوارها غابة أشبه بسنارة الصيد في آخر الدوارة التي بها مشبك غسيل .. يبدو سيد جالسا أمام المنضدة وقد أتم كتابة رسالة وبدا في تلاوتها لنفسه ) .

## المشهد الأول

( يقرأ ) :

سيد

ه أكتب إليك يا ساحرة وأنت منى على قيد خطوات ، أكاد لو أنصت أسمع هبة أنفاسك وخفقة قلبك .. أكتب إليك لأنى أشعر عند الكتابة بما يشبه متعة اللقاء ، وأحس أنى أنقل إليك ذوب نفسي وخلاصة روحى ، وأكاد أتوهم وأنت تقرئين ما أكتب أنى طار في الصفحات قابع بين السطور ، وأنى أمتع العين بسحر عينيك وأدفع

الروح بحر أنفاسك .

إني أحسك يا ساحرة في كل ما أحس .. أحس بك في كل زهرة ندية  
وروضة بيبة ، وطر شاد ونجم هاد ، وعطر زكى ولحن شجي .  
أنت معي دائما .. في كل صحوة وغفوة .. أنت معي غائبة أو  
حاضرة ، واصلة أو هاجرة .. أنت باقية في روحى وفي ذهنى وفي  
قلبي .. بقاء الروح والذهن والقلب .

اخلاص محمود

( يطوى الرسالة ثم يشبكها بمشك غسيل المربوط في السنارة  
وتحين منه التفاتة إلى شكله في المرأة فتخرج منه تهيدة مريرة  
ساحرة ويحدث نفسه ) .

: ( لنفسه في المرأة ) وأخرتها ؟ وايش بعد دا كله ؟ إياه آخرة الهوى  
المتنكر ، والحب المقنع ده .. انت .. بخلقتك دى ، وبكيانك  
ده .. مفيش فايده منك مش حا تحبك مش حاسه بيك ، ولا حا  
تحس بيك أبدا .. خلقتك كده اا تعمل إيه ؟ طب ما انا عارف انها  
مش حا تحبني ، أنا يائس جدا من حبها ، أنا ما بعملش كده علشان  
تحبني .. أنا بعمل كده علشان ما اخذهاش ، أنا عايز امنحها الأمل  
اللى انا فقدته ، واعتقد ان انا نجحت في كده .. أنا عملت كل  
حاجه علشانتها .. أنا كرسست جهودى وحياتى كلها علشان  
اسعدھا واحقق لها أملها .. أنا قبلت اضحى بنفسى واتجوز زكيه ،  
علشان ما اصدمهاش في محمود ، ولولا ربنا ستر ، والحكاية طلعت  
لا حمل ولا حاجه .. كان زمانى جوز ست زكيه ولعه ، وأبو ابن  
ربنا يعلم مين أبوه .. قبلت دا كله علشان خايف عليها لتألم ،  
وفضلت ورا الحيوان محمود الله من البارات والكباريات وأذاكر له  
واسهر بيه اليالى لغاية ما خلتيه ينجح ويأخذ الليسانس ، وفضلت  
أجرى ليل مع نهار وانط من ديوان لديوان .. واجيب في واسطه ورا

سيد

واسطه لغاية ما ربنا سهلها له وبقي موظف محترم . وقعدت أديق  
واقصد واحرم نفسي لغاية ما بقالتا شقه محترمه نظيفه عليها القيمة  
بعدهما كنا مش قادرين ندفع أجرة الأوده اللي فوق السطوح  
وخرجتنا منها الوليه على ملا وشنا محبوسين فى الشوالات ، وطول  
المده دى كلها عمال اهدى فيه واحاول ان اخليه يجيبها واكتب لها فى  
جوابات باسمه ، وانا جيبها بلسانه .. أنا جيبها بلسانه هو ، وبقلبي  
أنا .. دا المنفذ الوحيد .. اللي بنفس بيه عن مشاعرى ، ويخرج فيه  
حسى ، ويتلقى منها الردود بتاعتها ، اللذيذه الحلو الهايمة ..  
حقيقى ، مكتوبه له .. لكن بحس منها بعزاء كبير ، بحس ان ولو اتانى  
مش مقصود بيها .. لكن بلاق فيها الرد على جواباتى ، وعلى  
هيامى ، وعلى حبى .. أنا حاسس ان الشعور بتاعى مردود ، مش  
ضايح فى الهواء .. هى حقيقى ما تحبش الشكل الظاهر ده ( يشير  
إلى نفسه فى المرآة ) ، ولها حق .. لكن منيألى انها بتحب الحاجه  
المستخبيه .. بتحب القلب والشعور ، والروح ، ودا كله أبقى  
وأدوم وأحق ، ( يطلق تهيدة مريرة ساخرة ) أهو كلام بنعزى بيه  
نفسنا ، آمال حنقول إيه لو ما كنش كده ، كان الواحد زمانه مات  
من اليأس .

( ينهض من مكانه ومعها الخطاب والسنارة والدوبارة ، ويتناول  
النأى من فوق البوفيه ثم يطفىء النور ويتجه إلى الشرفة . يقف  
بيها .. ويعزف برهة على النأى ، ثم يتقدم من حافتها على أطراف  
أصابعه ويقذف بالرسالة ممسكا بيده طرف السنارة ) .

( فى هذه اللحظة يفتح الباب المؤدى إلى السلم بفتاح من الخارج  
ويدخل محمود يحمل لفائف بها سندوتشات وماكولات  
وزجاجات بيره ويفتح النور ويضعها على الترابيزه ويرفع عقيرته  
بالغناء ) .

- محمود : ما كنش كده طبعك يا غزال ، والنبي انا مقدر على دى الحال .  
( سيد يفزع خشية أن تفضح بيه الأمر ويحاول إسكاته بإشارات من يده ، ولكن محمود لا يشعر به ويستمر فى الغناء ، فيترك السنارة مستدة على سور البلكون ويهول إلى الداخل ) .
- سيد : هس .. الله يفضحك .. زى ما حتفضحننا ، هو دا وقت غنا ؟
- محمود : ( يفاجأ ويفزع ) إيه ده !! انت طلعت منين نشفت دمي .
- سيد : هس ، وطى صوتك لحسن تسمعك .. تبقى فضيحه ، وتضيع كل تعبنا هدر . اطفى النور لغاية ما تاخذ الجواب ، والا يعنى لا منك ولا كفاية شرك .
- ( محمود يطفىء النور ثم يتسلل سيد إلى الشرفة ويمد يده فيسحب السنارة ) .
- محمود : ( هامسا من داخل الحجره ) ها .. غمزت ؟
- سيد : ( يشير برأسه بالإجابة ثم يعود متسللا إلى داخل الحجره ) كنت حا تودينا فى شربة ميه ، مالك جى عيارك فالت قوى ، وداخل فارد قلعك .. إيه حكايتهك ؟
- محمود : ( يضىء الحجره ) حكايته انا ؟ والا حكايتهك انت ؟ إيه اللي قعدك انت لغاية دلوقت .. انت مش قلت انك مسافر تجيب قرشين ومش راجع غير بكره بعد الظهر .
- سيد : دا اللي كان مفروض .
- محمود : وبعدين ؟
- سيد : ما جصلش قسنه .. الحكايه حصل فيها لخبطه واضطربت ألقى السفر .
- محمود : ( فى انزعاج ) تلغى السفر ؟ يعنى مش حا تسافر ؟
- سيد : مالك بتصرخ كده !! انت مش لسه قابض ، ولا طيرت الماهيه زى عوايدك ، على العموم بكره ربنا يفرجها ويرزقه من حيث لا

- يحتسب .
- محمد : قوی .. أنا معاك خالص ، من جهة ببرزق من حيث لا يحتسب  
فبرزق أوی .. بی بقی ببرزقه بایه ؟ عمرك ما تعرف بمصایب ..  
ببلاوی .
- سید : بلاوی إيه اللي رزقك بيها ؟
- محمد : فيه أكثر من كده بلاوی ؟
- سید : ما تقوللي بس إيه هي البلاوی دی ؟
- محمد : وجودك الليله دی .
- سید : وجودی أنا ؟
- محمد : أيوه .. كان لازم تسافر .. أنا كنت عامل حسابی علی إبتك تسافر  
الليله دی .
- سید : ولما ما سافرتش حصل إيه ؟ قعدت علی قلبك كتمت أنفاسك ؟
- محمد : حاجه زی كده .
- سید : یعنی إيه ؟
- محمد : یعنی بالعربی أنا عارف زكيه هنا الليله دی .. عملت حساب انك  
مسافر ، وقلت بدل ما اروح اسهر بره أهو أجيب شوية الشرب  
والأكل ونقعد نمزمر هنا ، جيت انت بسلامتك حلست في ،  
وقعدت في البيت وخسرت لي كل الشغلانہ ، تبقي دی بلاوی من  
حيث لا أحتسب ، والالاً ؟ إيه العمل ؟ مش تقوم تسافر احسن ؟
- سید : انت بتقول إيه ؟! انت اتجنتت ؟ زكيه جيا لك هنا في الشقه عشان  
تسهروا سوى ؟ دی آخر أنواع الفضائح اللي عايز تعملها ؟ عايز  
الجيران يقولوا علينا إيه ؟ انت مش حا تستريح الا لما تودينا في  
داهيه . وبسلامتها جابه إمتي ؟
- محمد : ( ينظر إلى الساعة ) أهو كان نص ساعه .
- سید : ( في فزع ) نص ساعه ؟ انت مجنون ؟ انت مش عارف بعد نص

- ساعه مين حا يجيلك هنا .
- محمود : مين ؟
- سيد : مش فاكر قتلتك إيه النهارده الصبح ؟
- محمود : لا .. مش فاكر .
- سيد : مش فاكر الجواب اللي قريتو لك ساعة ما صحيت من النوم ؟
- محمود : أبدا أبدا .. أنا لما باصحي من النوم باقعد بيعجى نص ساعه فى حالة غيبوبة تامه .. أنا مش فاكر الجواب ، أنا مش فاكر ان انا شفتك النهارده الصبح خالص .
- سيد : يا نهارك أسود .
- محمود : اسود ليه بس .. ما تقول مين اللي حا يجى وتريجنى .
- سيد : بهيه !! افكرت والاله ناسى .
- محمود : بهيه ؟ وإيه اللي حا يجيبها هنا ؟
- سيد : يا محمود يا اخويا .. أعمل فيك إيه ، أكثر من إنى اقرالك الجواب بتاعها .. وأكد عليك انك تستناها عشان حا تطلع تقابلك ، وأترجاك انك تبقى لطيف معاها ، وانك توربها انك بتحبها ، وتخليك رقيق وما تقلش أدبك ولا تمد يدك ، وتقول لها انك عايز تنجوزها ، وانك حا تخطبها من ابوها .
- محمود : إيه !! انت قلت لى الكلام ده ؟
- سيد : أيوه قلتو لك .. أنا قعدت نص ساعه ألقنك الدرس واحفضك حا تقول لها إيه .
- محمود : بس .. هى النص ساعه دى اللي اكون فى حالة غيبوبه فيها وقلتك إيه ؟
- سيد : قلت لى حاضر .. حاضر .
- محمود : حاضر إيه ؟
- سيد : حاضر حا تخطبها .



- محمود : لا .. دانا لازم كنت في ذهول تام .
- سيد : يعنى ايه ؟ مش حا تخطبها ؟
- محمود : أنا أخطب !. قال الله ولا فالك .. بقى انا سايك تكتب عنى جوابات حب زى ما انت عايز ومديك تو كيل تصفر وتغنى باسمى وقت ما تحب .. لكن لغاية الخطوبه .. وفرمل .. ستوب .
- سيد : ايه ده ! إنت مجنون ؟ أقعد أتعب التعب ده كله .. وبعدين تقول لى كده .. أقعد ارنى فيك ، وانجحك واوظفك علشان خاطرها ، والآخر تيجى تخلا بيه كده ، مش ممكن ، ما يمكنش أبدا .
- محمود : ايه هو ده اللى مش ممكن ؟! أنا ما اخطيش ولا اتجوزش أبدا . الشهاده بتاعتك خدها ، مش لازمانى ، والوظيفه كان ، أنا ما أبعش حرىتى أبدا ، ولا بالدكتوراه . لا يا خال ، دا حتى حرام عليك .
- سيد : يا محمود يا خويا ، يا حبيبى ، الله لا يسيئك ، خلينا نتكلم على رواقه ...
- ( يدق الجرس ... يفرع الاثنان ويرتبان ) .
- محمود : ودى تبقى مين فيهم اللى جايه بدرى ؟ اسمع يا خال :
- إذا كانت بيه ، أرجوك تقول لها ان انا مش هنا .
- سيد : مش ممكن ، لازم تقابلها بأى طريقه ، مش ضرورى تخطبها ، قل لها كلمتين لطاف وخلص . وبعدين يبقى يحلها رينا ، أرجوك علشان خاطرى .
- محمود : موافق .. بشرط .
- سيد : ايه هوه ؟
- محمود : إنها تنزل بسرعه .
- سيد : حاضر .
- محمود : طب واذا كانت زكيه ؟

- سيد : حا شيلهاالك على راسي .. اللي انت عايزه أعمله.أسافر لك لمدة شهر ، بس اوعى ترغل بيته .
- محمود : خلاص اتفقنا .
- ( يدق الجرس ثانية فيذهب سيد ليفتح الباب فيفاجأ بنوح افدى .. يدخل مندفعاً وهو يحمل حقيه ) .
- سيد : ( فى ذهول ) الله !! نوح افدى !؟

## المشهد الثاني

- نوح : ( وهو يضع الحقيبة على المنضدة ) أسعد الله التماسي كيف الحال ؟
- سيد : الحمد لله .
- محمود : الذى لا يحمد على مكروه سواه .
- نوح : ( وهو يخرج أوراق ومنشورات ) الليه دى عندنا شغل كثير .. خلاص ابتدينا الجد .. اقعديوا .
- ( سيد ومحمود يتبادلان نظرات الحيرة والتردد ويسترقان النظر إلى الباب فى خوف ) .
- نوح : ( وهو يلبس نظارته ويأخذ فى ترتيب الأوراق ) الطلبات نازله علينا زى النظره .. المنشور الأول عمل مقعوله .. الظاهر ان الحال من بعضه .. ما فيش حد أبدا راضى عن حاله .. ( يرفع بصره فيجد الاثنين مازالا يتبادلان نظرات الحيرة والارتباك ) الله .. انتم واقفين ليه !؟ ما تقعدوا احنا ما عندناش وقت .. لازم نفحص كل الطلبات دى . ولازم نراجع قانون الجمعيه .. ونبتدى فى تشكيل مجلس الإدارة .. وتكوين الشعب .. دى كلها عايزه جهد كبير .. جلسة النهارده حا تكون جلسه تاريخيه كبرى .. إن شاء الله حا تغير وجه التاريخ .. وحا تكون أول خطوه فى سبيل إعطاء الراجل كل

- حقوقه وحریاته من برائت المرأة و تحريره من قيودها .. اقعدها .
- سيد : لكن .. ( يتضح ) .
- نوح : لكن إيه ؟ فيه حاجه ؟ .
- سيد : لا .. ولا حاجه .. بس قصدى اقول ان .. أنا شايف ان الوقت  
وخرى شويه .. والدنيا ليلت .
- نوح : ليلت ؟ .. أمال عايزنا نعقد اجتماع في عز الظهر .. إيه ده يا أستاذ  
ده ؟ دي جمعيه سرية .. إنت عمرك ما اشتركت في جمعيات  
سرية ؟ الجمعيات دي ما تجتمعش الا في ستر الليل . تحت جناح  
الظلام .. ده عز وقت اجتماعها .. اقعدها بلاش تضيع وقت .. يا  
الله خلتنا نشوف شغلنا .
- سيد : ( ينظر إلى الباب في قلق ) بس .. ما يمكنش نقدر نأجل ..
- نوح : ( في غضب ) نأجل إيه ؟ هي لعب ، دي مصالح أزواج ، دي  
حياه أو موت ، المسألة خطيره جدا يا أستاذ ، إذا ما كناش نلحق  
نفسنا حا نروح في شربة مية ، الوليه ام عبده ، خلاص فجرت ،  
بعد ما خلت الشيخ عجائب يستوطن في الأوده اللي فوق ، وجوزته  
البت عديله ، واستولت عليه ، وطول النهار يشبش و يسحر  
ويعمل احجبه ، ويطلع في عمائل ، خلاص فضى لنا ، ما بقالوش  
شغله غيرنا ، هو وراه إيه ، آكل شارب نايم ، وأشيته رضا مع  
البت عديله ، يبقى وراه إيه غير خدمة ام عبده وأذيتنا لا ، لا ،  
الحكاية ما تستحملش التأجيل أبدا ، اقعدها .
- محمود : اقعده بقى يا خال ، ما فيش فايده ، الليله باينه من أولها .
- ( يجلس محمود وسيد ويضع نوح أمامهما بعض الأوراق ) .
- نوح : دلوقت نقدر نعقد جلسه .. أنا حاتولى الرئاسة .. انت يا سيد  
افندى تتولى السكرتاريه .. وانت يا سى محمود .. عضو مجلس  
الإدارة المنتدب .. ( مفكرا ) لكن بالطريقه دي مش حا يبقى فيه  
( أم رتيه )

- أعضاء .. لازم يكون فيه ولو عضو واحد .  
( يدق الجرس فيقفز سيد من مكانه فرعا ويجرى نحو الباب ويقف وراءه برهه مترددا ) .
- نوح : ( محاولا جمع أوراقه .. ناظرا إلى الباب في حذر ومتسائلا في صوت خفيض ) انتوا مستنيين حد ١٩
- محمود : لا .. أبدا .. ما فيش حد .. أبدا ! .
- ( يدق الجرس ثانية .. فيفتحه سيد ببطء ، ويمد عنقه من خلال الفتحة ليرى الطارق .. يسمع صوت الشيخ عجائب من خارج الباب ) .
- عجائب : السلام عليكم يا سي سيد افندى .. عدم المؤاخذه .. وحياة والدك اقدر الاق عندك قطنه بصبغة يود احطها على البطحه اللي في دماغى .
- ( سيد يفتح الباب ويدخله ) .
- سي : الله .. الله .. إيه اللي جراك كفى الله الشر ؟  
( يرتقى الشيخ عجائب على الأريكة وقد بدت إحدى عينيه سوداء من أثر كدمة ووضع يده بالمنديل على جرح في رأسه ) .

### المشهد الثالث

- نوح : الله .. إيه الحكايه يا شيخ عجائب ؟
- محمود : الظاهر ان عين صابته .. حسدناك والله يا شيخ عجائب .. لسه كنا بنقول عليك آكل شارب تايم .. وأشيتك رضا مع عديله .
- عجائب : الله يخرب بيتها بحق جاه النبي .. الحقنى يا سي سيد انا في عرضك لحسن خلاص .. دمي ساح .. إذا ما كانش بصبغة يود .. تبقى بتلقيمة بن ، بس اوقف الدم .

- سيد : حاضر .. حالا .. بس خليك كابسه بالمنديل .  
( سيد يخرج من البوفيه زجاجة صبغة يود وقطعة قطن ثم يضمدها  
جرح الشيخ عجائب ) .
- نوح : إيه اللي جراك يا راجل .. إيه اللي عمل فيك كده ؟  
عجائب : عديله ياسى نوح افندى .. خدتنى غدر .. دشدشتى خالص .  
نوح : ليه بس !؟ عملت لها إيه ؟  
عجائب : ولا حاجه والله .. النهارده الصبح الوليه زهره بتاعة الفول النابت  
فاتت علينا سابت لنا نص قدح فول .. وقالت لى ان بقالها خمس  
سنين من غير خلفه وان جوزها ناوى يتجوز عليها اذا ما كاتتش  
تخلف .. وطلبت منى وصفه للحمل .. الوليه صعبت عليه قولتلها  
فوقى عليه آخر النهار أكون عملتلك اللازم وقعدت احضر لها فى  
حجاب كويس محبش ما يخيش أبدا . وقرب المغرب خبط الباب  
ودخلت زهره .. رحت مديها الحجاب . الوليه خدتته وقلبتة فى  
إيديها وقول زى ما تكون استقلته .. قالت هوا دا يا سيدنا الشيخ  
الى حا يجيب الحبل .. قولتلها ياستى البسيه دلوقت واذا ما نفعش  
نعمل واحد تانى .. برضه لقيتها موسوسه ، حبيت اطمنها ..  
قولتلها يا ستى ما تخافيش اطمنى .. انا مش حاسيك أبدا الا لما  
تجبلى .. غلطت فى كده !؟
- نوح : أبدا .  
عجائب : انا يدوبك خلصت كلام .. والاقيلك الباب اتفتح وحاجه كده  
هجمت عليه .. زى اما يكون صاروخ .. أتانى كلامى كان فى  
دخلة عديله .. وسمعتة وهى ورا الباب الظاهر الفار لعب فى عبا  
خلها شعلت .. وهجمت عليه .. عاديك .. ما خلتش فيه  
نفس .. ولا قدرت افهمها ولا اشرح لها ولا آخذ منها حق ولا

باطل .  
 نوح : ما تخافش ، بكره حا تاخذ منها الحق والباطل ، اكتب يا سيد افتدى  
 بسرعه ، العضو الرابع ، الشيخ عجائب محمد عجائب ، قوم يا  
 شيخ عجائب قوم ، خد محلك على التراييزه ، قوم ، دانت ربنا  
 يبحك ، العلقه اللي انت اترقتها دي ، حا تكون نقطة تحول في  
 حياتك . حا تكون سبب في تخليد ذكرك في سجل الخلود ، دي  
 اللي حا تدخلك التاريخ من أوسع أبوابه . بدال ما كنت حتة هلفوت  
 نصاب دجال محال ماشي في ركاب شيخة بجرمات الشرق  
 الأوسط ، دلوقت حا تبقى عضو مؤسس في أكبر جمعيه سريره  
 عرفها التاريخ ، أكبر جمعيه حا تقضى على الطغيان والظلم  
 والاستبداد . قوم يا شيخ عجائب قوم .. انت امك داعيه لك ،  
 صدق من قال ، رب ضارة نافعه . أو كما قال ، تيجي مع العمى  
 طابات .

عجائب : ( في دهشة ) إيه أصله ده ، أقوم اروح فين ؟  
 محمود : قوم ، قوم ، انت وقعت والا الهوارماك ، آل من عديله لنوح يا  
 قلبي لا تحزن ، قوم يا حلو ، قوم خش التاريخ من أوسع أبوابه ، قوم  
 لحسن المسأله مستعجله قوى .

عجائب : بس مش تفهموني إيه الحكايه ؟  
 سيد : دلوقت تفهم ، بس قوم خد محلك .  
 نوح : يا الله يا جماعه بقى علشان نبتدى الجلسه ، الوقت كالسيف ، أو  
 كأم عبده ، ان لم تقطعه قطعك .

عجائب : قطيعه ، تقطع ام عبده ، وتقطع الزمن اللي رمانا في بيتها .  
 نوح : قضاك كدا يا شيخ عجائب . أمال انا اقول ايه ، اللي بقالى عشرين  
 سنه ، أم عبده مع الأشغال ، لكن معلش ، هانت .

فيا قلب صبرا إن جزعت فسر بما  
 هوى الزمن على رأس أم عبده بالصرم

مكسور البيت شويه يا أستاذ سيد ، معلهش ، مدام مكسور على  
دماغ ام عبده . يبقى الكسر حلال ، يا الله بينا يا جماعه ، فتحت  
الجلسه .

سيد : ( ينظر إلى الساعة في قلق ) احنا حانطول يا نوح افندى ؟  
نوح : احنا والتساهيل ، بتدى دلوقت نقرأ قانون الجمعيه ، انا بقالى شهر  
باوضع فيه ، واعتقد ان ما سبتش حاجه أبدا ما وفيتباش حقها ،  
خد يا سيد افندى باعتبارك سكرتير عام الجمعيه ، اقرا القانون .  
سيد : ( يتاول الأوراق ويأخذ في القراءة ) خطك وحش أوى يا نوح  
افندى .

نوح : الله يبشرك بالخير ، دايم العظماء ورؤساء الجمعيات السريه يبقى  
بخطهم وحش كده ، لكن على العموم شويه شويه حتأخذ عليه ،  
اقرا .

سيد : ( يقرأ ) قانون الجمعيه السريه لقتل الزوجات .  
مادة ٢ — الغرض من إنشائها :

(١) وقف استبداد الزوجات .

(٢) المطالبة بالحرية السبع للأزواج وهى :

( أ ) حرية البصبصه وشبرقة العينين ، شبرقه بريته مبدئيا .

محمود : انا معترض .

نوح : علشان ؟

محمود : علشان مسألة البراءه دى ، انا ما احبهاش أبدا .

نوح : يا أخى قولنا ، مبدئيا ، يعنى بتدى بريته ، وبعدين يسهلها ربنا ،  
والا المساله هبش كده ؟

محمود : إذا كان كده معلهش ، موافق .

نوح : استمر يا سيد افندى .

سيد : (ب) حرية الفوضى المنزلية ، وتحريم جميع أنواع النظافه من كنس

ومسح وتنفيض في حضور الأزواج ولا سيما أيام الجمع والعطلات الرسمية .

محمود : ( يصفق طربا ) ، حلوه الفقره دى ، قلها تانى يا خال وحياة والدك ، أصل انا احب القوضى قوى .

نوح : اقراها له تانى يا سيد افندى .

سيد : هو إيه أصله ده ؟ احنا ما ورناش وقت .

نوح : طيب كمل .

سيد : (جـ) حرية الغياب عن البيت لدواعي العمل ، مع عدم الاستفسار قطعيا عما هي دواعي العمل هذه ، حتى لا يرهق الزوج في التفكير .

( د ) حرية الكذب . مع عدم التدقيق في الاستجواب حتى لا يكشف الكذب .

(هـ) حرية الاحتفاظ بسرية آثار أحمر الشفاه في المناديل ، والروائح العطرية والشعرات المنتصقة بالجواكبات وعدم الإباحة بمصادرهما خشية الحرج .

( و ) حرية التصرف في نقوده الخاصة مع تحريم وضع يد الزوجه في جيب الزوج لعددها . أو لسلبها كلها أو بعضها . أو لحسابه عليها .

( ز ) حرية انتقاء الخدم ، مع منع طرد الخادومات الجميلات منعا باتنا ، ومنحهن حق الالتجاء إلى مجلس الدولة في حالة الطرد ، والعودة إلى المنزل بحكم مجلس الدولة .

مادة ٣ —

نوح : استنى شويه لما تاخذ رأى ، إيه رأيك في الحريات السبع دى ؟

الشيخ عجائب : ناقصين واحده .

محمود : إيه هي دى ؟

عجائب : حرية التحميل .



- نوح : حرية إيه ؟
- عجايب : حرية التحميل .
- نوح : كلام إيه ده يا شيخ عجايب .. ده كلام عيب ، ما نقدرش ننص عليه في صلب القانون .
- عجايب : عيب !؟ واللى فات دا كله مش عيب ؟
- سيد : أصل يا شيخ عجايب .. حرية التحميل .. حاجه مفروغ منها .. كل واحد له الحق فيها .. من غير ما ننص عليها .. فيه حد مالوش حق في تحميل زوجته ؟
- عجايب : زوجته ؟. زوجته إيه يا سى سيد ؟ انا قصدى زوجات الغير
- نوح : يا نهارك اسود ، عايز تنص على كده في القانون ؟
- عجايب : أيوه .
- نوح : أيوه ازاي بقى ؟
- عجايب : أيوه .. يعنى أيوه .. هى دى فيها حاجه ؟. حرية التحميل بواسطة الأحجية والشبثية والسحر والذى منه .. يا تنصوا عليها في القانون ، يا مستقيل .. السلام عليكم ( وينهض ) .
- نوح : طيب اقعد بس .
- عجايب : أقعد ازاي .. مش كفايه اللي جرائى .. اتتو عايزينى اقع فيه تانى .. هوا اللي جرائى دا مش من تحت راس ان الحرية دى مش مكفوله .. أمال إيه بقى فائدة الجمعية سلام عليكم ( وينهض ) !؟
- نوح : طيب اقعد .. حانص لك عليها .. اكتبها عندك دى يا سيد افندى واكتب بين قوسين ( خاصة بالشيخ عجايب ) .
- محمود : واشمعى بقى الشيخ عجايب .. هوا فيه خيار وفاقوس ؟
- نوح : يا أخى دى حاجه تدخل في نطاق عمله .. يعنى بياكل منها عيش .. وانت لازمك ليه .. حاتعمل احجيه انت كان ؟
- محمود : مين يعرف .. حد عارف الظروف ، خليها سايه كده من غير

- تحديد .
- نوح : حاضر .. خليها كده عامه ما فيش داعي للتخصيص ، اقرا المادة اللي بعدها .
- سيد : مادة ٣ : شروط العضوية ...
- ( يدق الجرس فيقفز سيد إلى الباب ، ويبدو الخوف على الجميع يفتح سيد بحدو ولكن الباب يدفع ويدخل منه قرقر لاهتا ) .

## المشهد الرابع

- قرقر : ( متدفعا في الحديث قبل أن يرى الموجودين ) الحق يا سيد افندى ... عرفت إيه اللي حصل .. مش دلوقت ( يلمح نوح افندى فتصيه دهشة وفرع ويقف الكلام على شففيه ) الله .. هو سيدى نوح افندى هنا ؟!
- نوح : إيه الحكايه يا واد يا قرقر .. مالك ؟
- قرقر : لا .. ما فيش حاجه .. دا انا بس .. أصلى ..
- سيد : أصلك إيه ؟ فيه إيه ؟ حصل حاجه ؟!
- قرقر : ( يغمز سيد بطرف عينيه ويقترب منه هامسا ) حصل كارته .. الست ام عبده قفشت الجواب اللي كان مدلل من البلكون لأن ست بيه ما كانتش موجوده وهي اللي كانت قاعده في البلكونه .. واستقرته .. وعرفت اللي فيه .. وعامله هيجان وحا توديكو في داهيه .. شوفولكوا طريقه بسرعه .
- سيد : ( مذهولا ) طريقه ؟ طريقه ؟ دي اتنيلت خالص .
- نوح : بتوشوشوا بتقولوا إيه ؟ قرب هنا يا واد يا قرقر .. قرب ؟ إيه الحكايه ؟!
- قرقر : ( يقترب مرتبكا ) ما فيش حاجه .. ده موضوع كان كلفنى بيه

- سيد افندى .
- نوح : طب اقعء .
- قرقر : أقعء ازاي ؟
- نوح : اقعء .
- قرقر : أنا ورايا شغل .
- نوح : قلت لك اقعء يعنى اقعء .
- قرقر : والسبب ام عبءه ؟
- نوح : ولا تهمك .. انت مصيرك بقى فى إيءى حسب قانون الجمعية ..
- المادة (٢) الفقرة ( ز ) .. للأزواج حرية اتقاء الخءم .. اقعء ..
- اكتب اسمه عنءك يا سيد افندى .. أهو دلوقت بقى مجلس إءاره
- مءترم .. إءنا ممكن كان نعمله سكرتير عام مساعء .. ده بتفعلك
- أوى يا سيد افندى .. يقدر يساعءك ، فى كءس الجمعية .. فى
- رءشا ، برءه الأمر ما يءلاش .
- سيد : ( يكتب ) عبء الجليل الجرجاوى وشهرته قرقر سكرتير عمام
- مساعء لشؤون الكءس والرءش .
- قرقر : ما بلاش حكاية الكءس والرءش .. خليا عايمه .. يمكن ءءاجولى فى
- ءاچه ءاىه .
- نوح : برءه أحسن ، اءطبها يا سبى ، كءل قرابه .
- سيد : المادة ٣ : شروط العءوية :
- (١) أن يكون إنسانا عاقلا مءترما .
- مءمود : ( صاءءحا ) إيه هوا ده ؟ عاقل إيه ومءترم إيه ؟ الظاهر أنكم مش
- عائزبن ءءء بنضم للجمعية أبءا .. ءى شروط معجزه .. ءى هب
- ءى الشروط اللى يجب انبا ما ءءوفرء فى العءو .
- نوح : ازاي بقى ؟
- مءمود : لأنه إذا كان عاقل .. مش ءا ىءوز .

- سيد : وإذا كان محترم ؟
- محمود : مش حا يخش الجمعيه .
- نوح : طيب شيل الشرط ده .. اقرا اللي بعده .
- سيد : (٢) اتنين .
- نوح : خليها (١) واحده على طول .
- سيد : طب (١) واحد .. أن يكون زوجا تعيسا .
- قرقر : الله !؟ وإذا ما كانش متجاوز زي حالاتي .
- نوح : الجمعيه تجوزه .
- قرقر : طيب وإذا ما بقاش تعيسا ؟
- نوح : الجمعيه تتولى إتعاسه .
- قرقر : ما اتتعسش ؟
- نوح : تطلقه وتجوزه واحده تانيه تتعسه .
- قرقر : برضه ما اتتعسش .
- نوح : يبقى طابور خامس .. يجب فصله .
- قرقر : وإذا ..
- سيد : إحنا مش حا نخلص والإيه !؟ بس بقى ياسى قرقر خطينا نكمل .
- قرقر : يعنى ما استفهمش ؟
- سيد : ابقى استفهم بعدين .. خطينا نخلص دلوقت ، ( ناظرا إلى الباب في قلق .. ثم إلى نوح في استعطاف ) أظن كفايه كده النهارده ؟
- نوح : كفايه ازاي .. انتوا إيه ؟ مش حاسين بخطورة الحالة .. إحنا لازم نشغل ليل نهار .. الحالة وحشه جدا . إحنا اذا ما كناش نتقد نفسنا .. حا نروح في داهيه .
- ( دقات متواصلة من الجرس .. طرقات متوالية على الباب .. ويسمع صوت أم عبده من الخارج ) .
- أم عبده : افتح يا ضلالي منك له ، والنبي لا وديكوا الثيابة يا خباصين

ياها لاسين .

نوح : ( قافزا من مكانه وهو يلتم الأوراق في الحقيبة ) يا نهار اسوددى ام عبده .. الحقونى .. لازم فيه وشايه بالجمعيه ، خلاص ، روحنا فى داهيه .

( يهرول بحقيته وأوراقه مندفعاً إلى باب الحجرة وخلفه الشيخ عجائب ) .

فرقر : جمعية إيه وبتاع إيه ؟ إيه العمل دلوقت .. حا تقولوا لها إيه على الجواب اللى بعته سى محمود م البلكونه ؟

محمود : أنا ياخويه ما بعش حاجه .. حد الله بينى وبينهم ، حد فى الدنيا يحب بنت ام عبده !! يحب بنت طوريد ؟ بنت بركان !! يا ساتر يارب .. أنا حا زوج يا خال واصطقل انت معاها .. أنا طول عمرى لا با احب حد ولا حد بيعبنى .. ( يتجه إلى باب المطبخ ) .

فرقر : وانا إيه اللى يخلينى اقبالها .. هو انا مستغنى عن نفسى .. خذنى معاك يا سى محمود .. أنا مش حملها . ( يختفى وراء محمود ) .

( يزداد الطرق والدق فيتجه سيد إلى الباب مرتجفا ويفتحه فى تردد فتدفعه أم عبده وتندفع ثائرة إلى الداخل وفى يدها الجواب ) .

## المشهد الخامس

- أم عبده : هو افين هواده ، الضلالى الخباص الى ما يخبثيش .. هو افاكرها  
إيه ، سايه ؟ وكاله من غير بواب ؟ مال من غير صاحب .. عايز  
يتلف البنت ويحبب أهلها ويخسر أخلاقها ، لا يا حبيبي .. لا يا  
عومر .. إحنا مش من أهل ذلك .. إحنا ناس أحرار ، مش بتوع  
مسخره .
- سيد : هدى نفسك بس يا ست ام عبده .. هو لا سمح الله حد قال عليكوا  
حاجه ؟
- أم عبده : بقدر .. دا انا كنت قصفت رقبته ، واطلع البلا على جتته .
- سيد : طيب امال مزعله نفسك ليه ؟
- أم عبده : مزعله نفسى ليه ؟ على الى حصل ، هو الى حصل شويه ..  
عايزنى ارقع بالزغاريط .. عايزنى أتخزم وارقص .. هى دى عامله  
تتعمل هو ما فيش خشنا ما فيش حيا دا احنا ناس أشراف .
- سيد : هو افيه حد قال انكم مش أشراف ؟ دا انتم أمياد الناس .. دا انتم  
سمعتكم زى الجنيه الذهب .
- أم عبده : ولما انتوا عارقين كده .. يبقى لزومه إيه ده ( تشير بالخطاب )  
لزومه إيه المسخره وقلة الأدب . . .
- سيد : يا ست ام عبده ، هو افيه مسخره وقلة أدب .
- أم عبده : لا .. فيه وعظ ، حوش يا خويه الآيات اللى بتتنقط منه حوش ،  
حوش الأدب اللى بيخر حوش ، آل فيه إيه ؟ .. فيه انت معى  
دائما ، فى كل نومه وقومه ، ياخى ان شا الله ينام ما يقوم ، معاه  
ازاى الضلالى اللى ما يخبثيش على عرضه .. بنت زى دى لسه عنيا  
ما اتفتحتش يقول عليها انها معاه فى كل نومه .. ازاى !! دا انا اوديه

النيابة ، دانا ايته في السجن .

سيد : ليه بس يا ست ام عبده .. الراجل قصده برىء ونبتة طيبه .  
أم عبده : طيبه؟! ياخي ما طاب له عيش ، آل طيبه آل ، بعدما يقول لها انت  
نايمه معايا دائما .. يبقى برضه طيبه ، أمال كان ناقص يقول لها  
إيه ؟ .

سيد : يا ست دا قصده توريه .. يعنى فى ذهنه دائما ، وهو نايم وهو  
صاحي .

أم عبده : لا يا حبيبي .. لا يا نضرى .. احنا مش من بتوع التوريه ، احنا  
ناس جد .. ناس أصله .

سيد : احنا عارفين يا ست ام عبده .. احنا عارفين قيمتكم كويس  
خالص ، ومحمود قصده شريف .. محمود يحب بيته ، وعزيز  
يتجوزها .

( تسمع نحنة محمود من وراء باب المطبخ ) .

أم عبده : ( تلين بعض الشيء ) واللى عزيز يتجوز الناس يا سي سيد يقوم  
يتجوزهم بالسناير والحبال ومشابك الغسيل من الشبايبك  
والبلكونات .. برضه دا يصح ، هي مالهش أب .. مالهش أم ،  
افرض حد من الجيران كان شافه ، يقولوايايه .. يقولوا البنت دايره  
على حل شعرها ، يقولوا مالهش حد يلماها .. إانت عارف الناس  
لسانتها وحشه ازاي يا سي سيد ، وما حدش بيقدروا يعرف .

سيد : معلش يا خالتي ام عبده .. حقتك عليه .. امسحيا فيه انا ، محمود  
برضه معذور أصله يحب بيته قوى ويموت فيها .. يتمنى التراب  
اللى بتدوس عليه ، والنسمه اللى بتمر بيها .. هي حياته ، هي  
روحه .

أم عبده : حيلك .. حيلك يا سي سيد ، احنا مش بتوع حاجات زى دى ..  
احنا ما نعرفش الحب .. احنا ناس جد .

- سيد : وهو اده هزار يا ستى ام عبده ، امال ييقى ايه الجد ؟ .
- أم عبده : الجد عندنا يعنى جواز .. إذا كان عايزها .. يجي يتقدم ومعاها الشبكه والذى منه .. ماذا والا ..
- سيد : وجب يا ست ام عبده .. دا برضه اللي حايعمله .
- ( تسمع نخبجة احتجاج من محمود وراء الباب ) .
- أم عبده : أهو كده الكلام .. الحكايه مش سايبه .
- سيد : لأ سايبه ازاي .. احتانا ناس نعرف ونقدر .
- أم عبده : أنا مستنياكوا .. متأخروش .
- سيد : نتأخر ازاي .. الليلة دى نقرا الفاتحة .. وبكره . نجيب الشبكه .
- أم عبده : امال هوا فين سى محمود ؟ .
- سيد : سى محمود .. أبوه .. بس وصل كده لغاية مشوار بسيط وزمانه جاي .. اتفضل انت .. وانا أول ما يجي حانزل لكم على طول .. مع السلامه .
- أم عبده : خلتيك بعافيه .. مستياكم .
- سيد : الله يعافيكى .
- ( لا تكاد تقترب من الباب حتى يدق الجرس بشدة ، فيرتبك سيد ارتباكاً شديداً ويسرع نحو الباب ولا يكاد يفتحه حتى يجد عديله قد اندفعت إلى الداخل وهي تلهث ) .
- عديلة : ستى .. الحقى يا ستى .. البوليس كابس على البيت ويقولوا عايزين يفتشوا شقتنا والشقه دى كان .
- أم عبده : ( تضرب على صدرها ) بوليس ؟! يا ندامه .. حد عمل حاجه .. هم فين هم .. أما شوف ايه الحكايه ؟ .
- عديلة : أهم طالعين فى رجلى يا ستى .
- ( لا تكاد تم حديثها حتى يدخل ضابط مباحث ومعه اثنين من المخبرين ) .



- سيد : ( مذهولا ) إيه ؟ فيه إيه ؟ .  
الضابط : خليكوا زي ما انتو كده .. ما فيش حد يتحرك .. فيه واحد هنا اسمه نوح افندى ؟ .  
أم عبده : ( فى ذعر ) ماله نوح افندى ؟ جراه إيه ؟ فيه إيه ؟ !  
الضابط : هو افين ؟ .  
سيد : هو افين ؟ .  
الضابط : أيوه هو افين ؟ .  
سيد : إيش عرفنى .  
الضابط : مش دى شفته ؟ .  
عديلة : لا يا حضرة اليه .. شفته تحت .. ودى الست بتاعته .  
الضابط : حضرتك ؟ .  
أم عبده : أيوه انا .. ماله نوح افندى ؟ مش تقوللى يا حضرة الضابط وتريجنى .  
الضابط : متهم بعمل جمعيه سرية لقلب نظام الحكم .  
أم عبده : قلب إيه ؟ !  
الضابط : نظام الحكم .  
أم عبده : ياخى ان شا الله تنقلب دماغه ويتوجع قلبه . هو ده يعرف بقلب نظام حكم .. ودا مين بقى بسلامته اللي قال لك عليه الحكايه دى ؟ .  
الضابط : يا ست احنا عندنا البيانات .. إحنا مش بنهزر .. تعالوا كده شويه خلونا تفتش .  
سيد : وتفتشوا هنا ليه ؟ ! إذا كان نوح افندى مش ساكن هنا ؟ .  
الضابط : لأن المعلومات اللي عندنا ان الاجتماعات بتاعته مع أعضاء الجمعيه بيعقدها هنا .  
أم عبده : بقى كده ؟ ! نوح افندى يعمل جمعيه واجتماعات !! طيب

اتفصلوا فتشوا. ان شاء الله حاييحي تقبكم على شونه.. هوا نوح افندى  
فاضى الا للبصيصه والغنا . خشوا فتشوا .. الشقة أهي قدامكم .

- سيد : ( مرتبكا ) لكن ..  
الضابط : ( للمخبرين ) يا الله ابتدوا ..  
الضابط : ( يأخذ الخبران في تفتيش الصالة ويتجه هو إلى باب الحجره ) .  
الضابط : ( مشيرا إلى الباب ) وهنا فيه إيه ؟  
سيد : ( مرتبكا ) هنا فيه .. فيه .. لا مافيش حاجه ، مافيش حاجه  
أبدا .  
الضابط : متأكد ؟  
سيد : جدا .  
أم عبده : ياخويا خش شوف وريح نفسك .. آل نوح افندى آل .. داتلقيه  
زمانه سطيحة في السكر .. هوا يفوق لنفسه لما حا يفوق  
للجمعيات .  
( الضابط يدفع الباب فيفاجأ بنوح افندى واقفا خلفه ممسكا  
بالحقيبة والأوراق فيراجع في دهشة ) .  
الضابط : الله؟! إيه ده ؟  
أم عبده : ( تضرب على صدرها ) نوح افندى .. يا نهار مهيب ومنيل ..  
انت بتعمل إيه هنا يا راجل ! .  
الضابط : هوا دا نوح افندى .. هه .. بقى كده !! ما فيش حاجه أبدا؟!  
زمانه سطيحة من السكر !! اطلع يا نوح افندى .. اطلع .  
( يدخل نوح افندى فيبدو وراءه الشيخ عجائب وهو معصوب  
الرأس ) .  
الضابط : ودا إيه كان ؟  
عديلة : ( تشهق من فرط الدهشة ) الشيخ عجائب ، بيلك انت كان  
بتعمل إيه هنا ؟ .

- الضابط : خش .. خش .. وانت تبقى ايه يا شيخ عجائب .. عضو مجلس إدارة متدب ؟ .
- عجائب : أبدا والله .. أنا عضو عادى .. عضو مستجد ، بقالى خمس دقائق بس ، ولولا العلقه اللي اترقعتها دلوقت ، ما كنتش دخلتها أبدا ..
- أم عبده : يا ناس ، يا هوه ، أنا فى حلم والا علم .. نوح افندى والشيخ عجائب يعملوا جميعه ، لقلب نظام الحكم ؟ حقه بطلوا ده واسمعوا ده .
- عديلة : ياما تحت السواهى دواهى .. الواحد يشوفهم يقول عليهم غلابه وعلى نياتهم .
- الضابط : ( لأحد التحيرين ) خد منه الشنطه حطها على الترايزه ، وطلع اللي فيها .
- الضابط : ادبها له .
- نوح : ما يمكنش .
- الضابط : ( فى دهشة ) ما يمكنش ليه ؟ .
- نوح : ما يمكنش يطلع اللي فيها قدام الحرم دول ( ويشير إلى أم عبده وعديله ) .
- الضابط : ليه بقى ؟ فيها قباحه ؟ .
- نوح : وهم الستات يكرهوا القباحه ؟ .
- الضابط : أمال فيها ايه ؟ .
- نوح : بعدين اقول لك ، بس أرجوك تأمر بإخراج صنف الحرم اللي هنا علشان نعرف تفاهم على رواقه .
- أم عبده : أنا اخرج ؟ يا اخى ان شا الله تخرج على ضهرك يا بعيد .. وايش عجب .. أنا اللي اخرج بس . أنا لوحدى من دونهم كلهم اللي ( أم رتية )

- تخاف مني ، أنا اللي مستحملك طول العمر ، ومستحمله همك  
وبلاويك .
- الضابط : طب يا ست اتفصلي بره شويه ، أما نشوف آخرتها معاه .
- أم عبده : أتفضل بره .. ليه عدوته ؟ ضبايه على عينه ؟ والنبي ما اخرج الا  
ما اشوف إيه الحكايه .. أنا عارفاه ، وعارفه وحايده ، المسأله لازم  
فيها سر .
- الضابط : يا ستى خلتنا نشوف شغلنا .
- أم عبده : دا بيتي . ما اخرجش ولا اتحركشى .
- الضابط : طب يا ستى نوح افندى ، اديله الشنطه .
- نوح : ( متشبتا بها بشدة ) أبدا .. هو انا مجنون اوربها اللي فيها ايه .. أنا  
قتيل الشنطه .
- الضابط : طيب خلتها معاك ( للمخبرين ) كملوا تفتيش ، نحش انت فتش في  
بقية الأود ( يشير إلى باب المطبخ ) ودإيه ؟ .
- سيد : المطبخ ودورة الميه .
- الضابط : وفيهم إيه ؟ .
- سيد : عضو مجلس الإدارة المنتدب .. والسكرتير العام المساعد .. لشئون  
الكنس والرش .
- ( يفتح الباب .. ويخرج فرقر منفعلا ) .
- فرقر : ما قولنا اشطبوها دي .. سكرتير عام مساعد بس .. ما فيش لزوم  
للفضايح دي .
- أم عبده : يابن الصرمه القديمه .. انت كان بتشتغل في الجمعيات السريه ؟  
دي لازم جمعيه وقيع خالص .. سيهم يا حضرة الضابط سيهم  
بلاش تضيع وقت .. دول جماعه مخابيل .. أنا عارفاهم كويس ..  
ما فيش فيهم عاقل غير سي محمود افندى .. لو كان هنا كنا قدرنا  
نعرف منه الحكايه وما فيها .

( محمود يخرج متحنجا ) .

- محمود : السلام عليكم .  
أم عبده : يا نهار اسود .. انت كان معاهم !! لا .. أنا خلاص .. برج من عقلى حا يطير .. لازم اعرف إيه الحكايه !؟ إيه السر !؟ .  
الضابط : وده إيه كان ؟ .  
نوح : عضو مجلس الإدارة المنتدب .  
أم عبده : متدب !؟ يا اخى إلهى يندبوا عليك .. يا راجل يا شايب يا عايب .. مش حا تورينى إيه اللى فى الشنطه دى ؟ .  
نوح : ما يمكنش ، أنا مجنون أودى نفسى فى داهيه ا .  
الضابط : انت لسه حا تودى نفسك فى داهيه .. دانت حا تروح اللومان .  
نوح : معلش لومان لومان .. برضه أهون من اللى حا يجيرالى لو شافت اللى فى الشنطه .  
أم عبده : آه يا نارى .. لو اتلم على اللى فيها .. لاوربك نجوم الضهر .  
نوح : شفت .. مش قلت لك .  
الضابط : على العموم اتفضلوا قدامى كلكم .. كده بحالكم بحالكم .. اتفضلوا على المحافظه .  
نوح : يا الله بينا .  
محمود : يا الله بينا ازاي !؟ هوه إيه أصله ده !؟ .. انت عايز تودينا فى توكر .. لازم نقول لهم على الحقيقه .  
نوح : حقيقه ؟ .. إنت مجنون ؟ .. دى هى دى اللى حا تودينا فى توكر .. اسكتوا انتم من فضلكم أنا الرئيس وأنا مسؤول عن كل حاجه .. يا الله بينا .. اتمسى بالخير يا أم عبده .  
أم عبده : الله لا يمسيك ولا يصبحك بالخير زى ما انت محيرنى ومفرج على الناس .  
( يتجهون نحو الباب ويم أحد التخيرين بفتح الباب عندما يدق )

- الجرس فجأة ) .
- سيد : ( منزعجا ) وده يبقى مين ده كان ؟ .
- محمود : واحده من الفردتين .. هم اللى فاضلين .. ما بقاش حد تانى بره أبدا .
- ( يفتح الباب فتبدو زكيه ولعه ) .
- محمود : مش قلت لك .. آدى فرده .. يبقى فاضل التانيه .
- زكية : ( فى ذهول ) يا نصيبتى .. إيه الحكايه ؟ .. إيه أصله ده ؟ ..
- جرى إيه كفى الله الشر .. إحنا جاين نتعشى ونسهر ونبسط والّا جاين نفتح محضر .
- أم عبده : بقى كده .. قولتولى .. يا خياصين يا هلاسين يا اولاد الصرم ..
- هى دى الجمعيه السريه بتاعتكم . بقى كلكم ملمومين علشان تقعدوا تسكروا وتهيصوا .. وتعملوها أردغانه .. خشى ياختى خشى .. خشى سمى عليهم .. قبل ما يروحوا التخشيه .. هوادى .
- قلب نظام الحكم .. ياختى إلهى تتوجع قلوبكم .. من أولكم لآخركم .. بقى كلكم ملمومين علشان خاطر البت المقصوده دى .. اللى زى عصا عيص القاريه .
- زكية : نقاريه مين يا حبيبتى .. ما شهبش والّا إيه ؟ دانا ولعه والأجر على الله .
- أم عبده : ولعه لما تقيد فى نافوخك ونافوخهم .. اتلمى يا بت لحسن والنبي ..
- زكية : والنبي إيه يا ادلعدى ؟ حاتعملى فيه إيه .. حاتقطعى الراتب اللى بتجريه عليه .. حاتحوشى عنى الخيرات اللى مفرقتى فيها بسلامته نوح افندى .. آل اللى يفرقه العويل بسيفه .
- أم عبده : سامع يا سى نوح .. سامع .
- الضابط : كويس قوى .. كويس خالص .. بلاش نشوف شغلنا ونقف

- نتفرج على ماتش الردح اللي بينكم . بس خلاص .. انتهينا .. فوتو قدامي كلكم .
- أم عبده : يفوتوا قدامك انت ؟ .. دول يفوتوا قدامي انا .. انت لسه برضك فاكر انهم عاملين جميعه سريره وحا يقلبوا نظام الحكم !؟ بقى بعد اللي انت شايفه ده عايز برضه تاخذهم معاك !؟ دا انت لازم على نيائك .. سيهم لي انت .. انا اشوف خلاصي معاهم .. اتفضل انت وأنا حاشوف شغلي .
- نوح : ياوعى يا حضرة الضابط .. ياوعى تسيينا .. لو سييتنا أنا حابلق عنك . حابقى إهمال في تأدية وظيفتك .. آدينى بقول لك ايه .
- عديلة : طيب فوت انت قدامى يا شيخ قطران .
- عجائب : أبدا .. انا مع نوح افندى .. الحقنى يا حضرة الضابط .
- الضابط : هويايه أصله ده .. انتم يايه حكايتمكم ؟ .
- ( يلقى الجرس ) .
- محمود : وادى الفرده التانيه .. أهى خلاص كملت . أظن بعد كده مش حابقى فيه خوف أبدا .. وادى قعده ( يجلس متربعا على الكنبه بعد أن يأخذ زجاجة بيوة ويفتحها ) تاخذ لك شفته يا خال ؟ .
- سيد : ( وهو يتجه ليفتح الباب ) يا اخى احنا في إيه والافى إيه . أما نشوف اللي حابجرالنا .
- محمود : يعنى حابجرالنا إيه اكتر من كده ؟ آل ضربوا الاعور على عينه آل خسراته خسراته .
- ( يفتح سيد الباب فتبدو به بييه ) .
- بييه : ( فى ذهول وهى تهم بالتراجع ) الله !؟ وإيه جابكم كلكم هنا ؟ .
- سيد : ( مرتبكا ) لا مؤاخذه يا ست بييه ، أصل فيه شوية سوء تفاهم ، أنا متأسف قوى ، اتفضللى استرجعى .
- ( تقف بييه فى الباب حائرة وجلة ) .

- بهية : ( وهي تنظر إلى الخبيرين ) ودول يعملوا ايه هنا ؟ ايه اللي شايله بابا ؟ .
- سيد : ما فيش حاجة . ما فيش حاجة أبدا ( يتقدم نحو نوح افندى ويأخذ منه الشنطة ) هات ياسى نوح افندى الشنطة بتاعتي واتفضلوا اتوا على تحت . يا حضرة الضابط ، أنا اللي مسؤول عن كل حاجة ، نوح افندى كان جاي بيطلبني بالأجره . فعرضت عليه انه يشترك معايا في جمعيه عاملها ، اسمها جمعية قتل الزوجات .
- الضابط : قتل إيه ؟ .
- سيد : الزوجات ، الزوجات ، انت مش متجوز ؟ .
- الضابط : متجوز .
- سيد : يبقى المشروع لازم يهملك قوى .
- الضابط : ( ضاحكا ) بس لسه متجوز جديد .
- سيد : يبقى كان شهر واحد حا تحتاج لنا ، واتفضل شوف الأوراق علشان تصدق ، أهه اقرأ .
- ( يقرأ الضابط ثم يقهقه ) .
- الضابط : دى الجمعيه بتاعتكم ؟ وعلشان كده خايف تورى الاوراق للست بتاعتك يا نوح افندى ؟ .
- نوح : انا ماليش دعوه يا جمعيه ، أنا رفضت خالص اشترك فيها . أنا راجل با احب مراتي موت ، موت .
- أم عبده : إيه ؟ بقى كده ؟ .
- الضابط : طيب عن إذنتكم يا جماعه ، أنا متأسف أوى لسوء التفاهم اللي حصل ، الظاهر ان المعلومات اللي جت لنا كانت مبنيه على مجرد شكوك كاذبه متأسف جدا ، سلاموا عليكم .
- ( يخرج الضابط والخبيرين ويحاول نوح الخروج في أذياهم ) .
- أم عبده : ( توقفه ) بس ، رايح فين ؟ .



- نوح : مش خلاص خالصنا ؟ الحكايه طلعت فشوش ؟ .
- أم عبده : فشوش عندهم هم ، لكن مش عندي أنا ، إنت فاكر أنا ينطلى على الكلام ده ، أنا لسه لي حساب معاك . الست ولعه هانم إيه اللي جابها هنا .. جايه لمن ؟ .
- نوح : أنا عارف ، هو انا صاحب الشقه .
- أم عبده : والشرب والمزه دي مين اللي جايهم ؟ .
- نوح : أنا مالي يا ست .
- أم عبده : مالك ؟ جاك مله على جنبك ، دا انا حاسود عيشتك . ما بقاش كان غير تحيب لي النسوان الهلافيت لغاية البيت ، أنا ابقى قاعده تحت مستيالك على نار ، وانت قاعد تسكر وتبيص وتفرفش مع الست ولعه ( تمسك بتلايبه وتهم بضره ) .
- نوح : يا ست والله العظيم انا ما اعرف انها جايه .
- أم عبده : آمال يعنى جايه لمن ؟ ( تشدد الخناق عليه ) .
- محمود : جايه لي أنا يا ست أم عبده ، سبني الراجل بقى ، ده مظلوم .
- أم عبده : ( تستدير إلى محمود ) جايه لك انت ؟ ! وكان بتقر بلسانك يا خباص يا ضلالى . انت اللي عامل بتحب وعمال تحدف جوابات الغرام من الشبايك والبلوكونات . انت اللي عمال تضحك على عقول البنات . انت يا نصاب يا فلاق ، والنبي لاوديك في داهيه . شايفه يا ست بهيه شايفه السافل اللون المجرم . اللي عمال يضحك على عقلك .. شايفه الرجاله .
- سيد : ( في غضب شديد ) إيه ده يا سي محمود الكلام الفارغ اللي بتقوله ده ، ما تصدقهاش يا ست أم عبده ، ما تسمعش كلامه يا ست بهيه ، دا بيحبك قوى .. دا يموت فيك . دا ما ينامش الليل من التفكير فيك ، دا حا يخطبك حالا دلوقت .
- زكية : ( صارخه ) !؟ الخاين ، اللي ما عنلوش ضمير!

محمود : بقى اسمع يا خال ، لحد هنا وبس ، كفايه اللخبطه اللي حصلت دى كلها ، أنا قلت لك أنا لا با احب ولا با اخطب .

سيد : ما تصدقيش يا ست بيه ، دا بيكذب .

بيهة : ( تطرق برأسها ) لا ما بيكذبش ، اللي بيكذب انت .. أنا عارفه مين اللي بيحبني ، وعارفه مين اللي يكتب لي الجوابات . أنا عارفه مين اللي يقعد طول الليل يصفر الألحان الحزينه الجميله . أنا عارفه مين اللي قلبه جميل ومشاعره رقيقه ونفسه طيبه ، عارفه كل حاجه . وحاسه بالجرح اللي سيتهولك أول مره شفتك ، وعرفت بعدها ان انا اخطأت الشخص اللي بحبه ، وابتدا شعورى يتجه اتجاهه الصحيح ، وحاولت كام مره أقول لك ان انا عارفه ، لكن كنت ما بتدنيش فرصه ، كنت بتهرب ، كنت خايف ، واطن دلوقت أحسن فرصه أقول لك فيها الحقيقه قدامهم كلهم . واقول لك ان انا مستعده اني اتجوزك .

سيد : ( ملدهولا ) مش معقول ، انا مش مصدق؟! أنا ، أنا ، انتي ، انتي ؟.

أم عبده : ما شاء الله ، ولك عين تقولى كده قدامنا ؟.

سيد : يا خالتي ام عبده ، أنا مش قادر أقول إيه .. أنا ما كنتش فاكر ان ربنا حا يكرمى للدرجه دى .. أنا ما كنتش متصور أبدا أن صبرى الطويل ده يتهى بتحقق الحلم اللي كنت يائس منه .. أنا طالب القرب منك فى بنتك .. أنا طالب القرب منك يا نوح افندى .

نوح : وجمعية قتل الزوجات ؟.

سيد : فلتسقط جمعية قتل الزوجات .. ولتحى الزوجات .

نوح : واذا عملت فيك زى امها ما بتعمل فيه ؟.

بيهة : ما افتكرش ، ما فيش أسهل من مرضاة الزوج ، الحكاياه ما تستوجبش جهد كبير أبدا .. كل الحكاياه أن الزوجه تكيف مزاجها

على مزاج جوزها .. اذا كان ما يحبس الخروج تبقى تحاول هي انها تحب البيت ، واذا كان يكره التنظيف ، يبقى مش لازم تنظف قدامه .. ده بيته اللي يستريح فيه .. وأظن أقل ما فيها انها تبيأ له فيه الحاجة اللي ترضيه حتى ولو كانت غلط ، ومش ضرورى تضيق عليه ، وتسنكر عليه الشبايك .. لازم تديله شوية حريه ، وشوية هوا ، يخلوه يحس بقيمتها .. ما فيش داعى تشتغل له بوليس سرى ، المهم انها هي تكون كويسه . ومسيره اذا كان بيص كده والا كده انه يقارن بينها وبين غيرها ، ويحس بفضلها ويعرف ان هسى الأحسن ، وانه ما لوش غيرها ، ما فيش داعى للشيشيه والسحر والكلام الفارغ .. كل ده نصب واحتيال .

عجائب : أيوه ، والله يا بتى لك حق ، أنا عمري ما قلحت فى حاجه عملتها أبدا .. الا حاجه واحده ، اللي هي كانت طالباها بنت الصرم .. عديله .

محمود : كانت طالبة ايه ؟

عجائب : كانت عايزه اعمل لها حجاب علشان تتجوز . عملت لها الحجاب ، وبعد جمعيتين اتجوزتتى ، ووقعت انا فى شر أعمالى .

عديلة : بقى كده ، طيب بس لما تطلع فوق .. وانا اسود لك العين التانيه . محمود : دلوقت خلاص وافقتم ؟

نوح : أنا ما عنديش مانع .

أم عبده : أما تتفق فى الأول على المهر والشبكه .

نوح : طيب ، بعدين يجلها ربنا .

أم عبده : أبدا .. دلوقت لازم نهى كل حاجه .

سيد : أيوه برضه أحسن .. أنا مستعد لكل حاجه .

أم عبده : أنا عايزه خمسين جنيه شبكه .

محمود : خمسين ايه ؟

- أم عبده : خمسين جنيه .  
محمود : طيب خيلنا بقى لما بيعتو لنا فلوس من البلد .  
أم عبده : بلد ؟ بلد إيه يا عمر .. أنا عايزه الفلوس دلوقت حالا .  
نوح : حالا ازاي بس يا ست ام عبده .. هي الحكاياه إيه ؟ قفش ! .  
أم عبده : أيوه قفش .. أنا لازم اربطهم .  
سيد : بس ، وبعدين .. يا جماعه .  
( يدق الجرس ) .  
محمود : ودا يبقى مين دا كان ؟  
( يفتح قرقر فيجد بالباب الشيخ زين ) .  
الشيخ زين : يا ساتر .. السلام عليكم .. هي دى شقة سيد افندى الفنط ..  
قرقر : ( فرحا ) شيخ زين !! أهلا وسهلا .. جيت فى وقتك يا شيخ  
زين .. اتفضل .. اتفضل ( يدخله ويجلسه على أحد المقاعد  
باحترام وترحيب شديد ) أهلا .. أهلا .. أهلا .. اتفضل .  
( يجلس الرجل ساعتا والجميع ينظرون إليه فى دهشة ويتسلل  
قرقر إلى المطبخ ثم يحضر مقشاة غليظة ويقف وراءه ثم يهوى بها على  
رأسه فيخر مغشيا عليه ) .  
سيد : ( صارخا ) إيه ده ؟! إيه اللي عملته ده ؟ انت اتجننت ؟ .  
قرقر : ( يفرك يديه ) بس فرجت ( يدخل يده فى جيب الرجل ثم يخرج  
الحافظة مليئة بالنقود ) عايزين كام ( يعد ) عشره .. عشرين ..  
تلاتين .. اربعين . خمسين .. يدوبك يكلمم ( يعطى النقود لأم  
عبده ) .  
أم عبده : إيه اللي عملته ده ؟ .  
قرقر : خدى بس دى فلوسهم .. جايبها لهم م البلد .  
نوح : طيب وما سبتوش ليه لما يديهاهم ؟ .  
قرقر : أسيه ؟ هوا انا اتجننت .. حا يقعد يقول .. بعد فحص وبحث

وتمحيص وإثبات شخصيه ، وموت يا حمار لما يجيلك العليق .	
: ( تهم بالخروج ) طيب اخرج انا بقى .	زكية
: تخرجى ازاي ! دول هم اللي يخرجوا .. يا الله يا جماعه اتفضلوا كلكم من غير مطرود .. يا الله يا الله .	محمود
: يا الله بينا ، فوت قدامى يا سخام البرك ؟	أم عبده
: اتفضل يا نوح اتندى .	سيد
: ( يتقدم هو ) ولا مؤاخذه سخام البرك .. دا يقى انا .. نوح اتندى يقى هباب الطين .	فرقر
: اتفضل يا سى هباب الطين .	أم عبده
: ما فيش فايده .. اللسان الزفر .. حا يفضل طول عمره زفر .	نوح
: فلتسقط الزوجات ولتحى زكيه ولعه .	محمود

( يسدل الستار )

ختام

## للمؤلف

( قصص قصيرة ١٩٤٧ )	أطياف
( رواية ١٩٤٧ . . . . . )	نائب عزرائيل
( قصص - قصيرة ١٩٤٨ )	اثنتا عشرة امرأة
( ١٩٤٨ )	خبايا الصدور
( ١٩٤٨ )	يا أمة ضحككت
( ١٩٤٩ )	اثنا عشر رجلا
( رواية ١٩٤٩ . . . . . )	أرض النفاق
( قصص قصيرة ١٩٤٩ )	في موكب الهوى
( ١٩٤٩ )	من العالم المجهول
( ١٩٥٠ )	هذه النفوس
( رواية ١٩٥٠ . . . . . )	إلى راحلة
( قصص قصيرة ١٩٥٠ )	مبكي العشاق
( ١٩٥١ )	بين أبو الريش وجنيئة ناميش
( ١٩٥١ )	أغنيات
( مسرحية ١٩٥١ . . . . . )	أم رتيبة
( قصص قصيرة ١٩٥١ )	هذا هو الحب
( ١٩٥١ )	صور طبق الأصل
( رواية ١٩٥٢ . . . . . )	بين الأطلال
( ١٩٥٢ )	السقامات
( قصص قصيرة ١٩٥٢ )	سماز الليلي
( ١٩٥٢ )	الشيخ زعرب
( ١٩٥٢ )	نقحة من الإيمان
( مسرحية ١٩٥٢ . . . . . )	وراء الستار
( قصص قصيرة ١٩٥٣ )	ست نساء وستة رجال
( ١٩٥٣ )	هذه الحياة

- |                         |                   |
|-------------------------|-------------------|
| ( رواية ٠٠٠٠٠ ١٩٥٣ )    | البحث عن جسد      |
| ( مسرحية ٠٠٠٠٠ ١٩٥٣ )   | جمعية قتل الزوجات |
| ( رواية ٠٠٠٠٠ ١٩٥٣ )    | فديتك ياليلي      |
| ( قصص قصيرة ١٩٥٣ )      | ليلة خمر          |
| ( ٠ ٠ ١٩٥٣ )            | همسة عابرة        |
| ( رواية في جزأين ١٩٥٤ ) | رد قلبي           |
| ( قصص قصيرة ١٩٥٥ )      | ليال ودموع        |
| ( رواية ٠٠٠٠٠ ١٩٥٦ )    | طريق العودة       |
| ( مقالات ٠٠٠٠٠ ١٩٥٧ )   | أيام تمر          |
| ( ٠ ٠ ١٩٥٨ )            | من حياتي          |
| ( ٠ ٠ ١٩٥٩ )            | لطمات ولثامات     |
| ( رواية في جزأين ١٩٦٠ ) | نادية             |
| ( ٠ ٠ ١٩٦١ )            | جفت الدموع        |
| ( مقالات ٠٠٠٠٠ ١٩٦١ )   | أيام مشرقة        |
| ( ٠ ٠ ١٩٦١ )            | أيام وذكريات      |
| ( ٠ ٠ ١٩٦٢ )            | أيام من عمري      |
| ( رواية في جزأين ١٩٦٤ ) | ليل له آخر        |
| ( مسرحية ٠٠٠٠٠ ١٩٦٦ )   | أقوى من الزمن     |
| ( رواية في جزأين ١٩٦٩ ) | نحن لا نزرع الشوك |
| ( رواية ٠٠٠٠٠ ١٩٧٠ )    | لست وحدك          |
| ( مقالات ٠٠٠٠٠ ١٩٧٠ )   | من وراء الغيم     |
| ( ٠ ٠ ١٩٧١ )            | أيام عبد الناصر   |
| ( رواية ٠٠٠٠٠ ١٩٧١ )    | ابتسامة على شفثيه |
| ( رحلات ٠٠٠٠٠ ١٩٧١ )    | طائر بين المحيطين |
| ( قصة ٠٠٠٠٠٠ ١٩٧٣ )     | العمر لحظة        |

## الإستاذ يوسف السباعى

- اثنا عشر رجلا
- اثنتا عشرة امرأة
- ست نساء وستة رجال
- المسقومات
- طريق العودة
- بين الأطلال
- لست وحدك
- جفت الدموع ( الجزء الأول )
- جفت الدموع ( الجزء الثانى )
- ليل له آخر ( الجزء الأول )
- ليل له آخر ( الجزء الثانى )
- هذه النفوس — هذه الحياة
- من العالم المجهول — خبايا الصدور
- ليلى ودموع — اطياف
- نفحة من الإيمان — صور طبق الاصل
- ليلة خمير — من حياتى
- بكى العشاق — فى موكب الهوى
- سمار الليالى
- هذا هو الحب




- طائر بين المحيطين
- من وراء الغيم
- ابتسامة على شفثيه
- اغنيات — الشيخ زعرب
- بين أبو الريش وجنينة ناهيش — يا امة ضحكت
- نائب عزرائيل — البحث عن جسد
- وراء الستار — اقوى من الزمن
- أم رتيبة — جمعية قتل الزوجات
- ناديسة ( الجزء الأول )
- ناديسة ( الجزء الثاني )
- رد قلبي ( الجزء الأول )
- رد قلبي ( الجزء الثاني )
- نحن لا نزرع الشوك ( الجزء الأول )
- نحن لا نزرع الشوك ( الجزء الثاني )
- إنى راحلة
- أرض النفاق
- فديتك يا ليلي

رقم الإيداع ٨٧/٨١٨٧

الترقيم الدولي ٥ - ٠٣٤١ - ١١ - ٩٧٧



مكتبة مصر  
٣ شارع كامل صدقي - الفيحاء



دار مصر للطباعة  
سعيد جوده السحار وشركاه

To: [www.al-mostafa.com](http://www.al-mostafa.com)